


რეი ბრედბერი  
ბაბუაწვერას ღვინო





მართხველთა ლიბრა

რეი ბრედბერი

ბაბუაწვერას ღვინო

ინგლისურიდან თარგმნა თამარ კოტრიკაძემ

\* \* \*

მშვიდად თენდებოდა. ქალაქს ჯერ კიდევ წყვდიადის საბანი ეხურა და ძილში ნებივრობდა. ჰაერი ზაფხულით გაჟღენთილიყო, ეს ნიავსაც ეტყობოდა. სამყარო ღრმად, აუღელვებლად სუნთქავდა. საკმარისი იყო, საწოლიდან წამომდგარიყავი და ფანჯრიდან გადაგხედა, რომ იგრძნობდი: თავისუფლება და სიცოცხლე სწორედ ახლა იწყებოდა, ვინაიდან ზაფხულის პირველი დღე დადგა.

თორმეტი წლის დაგლას სპოლდინგმა გაღვიძებისთანავე შეისუნთქა ზაფხულის დღის გარიჟრაჟი. მესამე სართულზე იწვა, თავის თაღიან საძინებელში, და ივნისის ნიავს, არაჩვეულებრივ სიმადლესა და ძალას გრძნობდა: ის ხომ ქალაქის ყველაზე მაღალ კოშკში იმყოფებოდა. დამდამობით, როცა ხეები ერთმანეთს ტალღებად ეხლებოდნენ, ბიჭის მზერა შექურას სხივივით სწვდებოდა მოშრიალე თელების, მუხებისა და ნეკერჩხლების ოკეანეს. ახლა კი...

- ბიჭოო... - ჩურჩულით წარმოთქვა დაგლასმა.

მთელი ზაფხული მის ხელში იყო, თითოეული დღე თავის ნებაზე შეეძლო გამოეყენებინა და შემდეგ კალენდარში გადაეხაზა. თავი ტურისტულ გზამკვლევაში გამოსახულ ფთაება შივად იგრძნო: მისი ხელები რას აღარ სწვდებოდა - ვაშლებს, ატმებსა და დამეულ ქლიავს წყვეტდა. უკვე გრძნობდა, როგორ შეიმოსებოდა ხეებით, ბუჩქებითა და მდინარეებით! რა სიამოვნებით გაიყინებოდა ნაყინის მაღაზიის დათრთვილულ მაცივარში! რა ნეტარებით შეიბრაწებოდა ბებოს სამზარეულოში ათი ათას ვარიასთან ერთად!

ახლა კი ჩვეული მოვალეობის შესრულება უწევდა. კვირაში ერთხელ ნება ჰქონდა დართული, მძინარე დედ-მამა და უმცროსი ძმა ტომი მათ ჰატარა სანლში მიეტოვებინა და ჰაპას მანსარდის ჩაბნელებული ხვეული კიბე აერბინა, რათა იქ, თავის მისნურ კოშკში, ჭექა-ქუხილებსა და ხილვებთან ერთად გაეტარებინა დამე, დილით კი რძის ბოთლების კრისტალისებრი წკარუნისათვის დაესწრო ადგომა და ჩვეული ჯადოქრობა აღესრულებინა.

რიჟრაჟის ბინდში ღია ფანჯარასთან გაჩერდა, ჰაერი ღრმად ჩაისუნთქა და ამოისუნთქა.

ქუჩის ლამპიონები მუქ ტორტში ჩარჭობილი სანთლებივით ერთბაშად ჩაქრა. ბიჭმა კვლავაც ამოუშვა მკერდიდან ჰაერი და თანდათან ყველა ვარსკვლავი გაქრა ციდან.

დაგლასს გაეღიმა. თითი გაიშვირა.

აი, აქ და, აი, აქ, ახლა კი იქ და, აიი, იქ...

ჩაბნელებულ მიწაზე ერთიმეორის მიყოლებით ყვითელი კვადრტები გამოიკვეთა, როცა სახლებმა განათებული თვალები დაჭყიტეს. ფანჯრების შუქები ნათელ წერტილებად მოეფინა დაბინდულ მიდამოს.

- აბა, ყველამ დაამთქნაროს. ყველა წამოდგეს.

დიდი სახლი თითქოს ოდნავ შეირხა.

- ჰაჰა, წყლიანი ჭიქიდან ამოიღე შენი კბილების პროთეზი! - ამის შემდეგ იმდენ ხანს შეიცადა, რამდენსაც ზრდილობა მოითხოვდა, - აბა, ბებოებო, ბლინები დააცხვეთ!

შებრაწული ცომის თბილი სურნელი მოეფინა დერეფნებსა და ოთახებს, ძილი გაუფრთხო სახლის მცხოვრებთ: ბიძებს, დეიდებს, სტუმრად ჩამოსულ ბიძაშვილ-მამიდაშვილებს.

- მოხუცების ქუჩავ, გაიღვიძე! მის ელენ ლუმის, პოლკოვნიკო ფრილაი, მისის ბენტლი! დაახველეთ, ადექით, თქვენ-თქვენი აბები მიიღეთ, ამოძრავდით! მისტერ ჯონას, შეკაზმეთ ცხენი, გამოაგორეთ ნაგვის ორთავალა და ქუჩებს ჩამოუარეთ!

ქალაქს რომ შუაზე კვეთდა, იმ ხევის გადაღმა მდგარმა პირქუშმა მდიდრულმა სახლებმაც გაახილეს ურჩხულის საზარელი თვალები. მალე დილის ქუჩებში ორი მოხუცი ქალი გამოჩნდა, თავიანთ ელექტრულ „მწვანე მანქანას“ მოასრიალებდნენ და ყველა შემხვედრ ძაღლს უქნევდნენ ხელს.

- მისტერ ტრიდენ, ფარენისკენ, ცოცხლად!

ცოტა ხნის შემდეგ ქალაქის ტრამვაი აგურით მოკირწყლულ ქუჩებში გამოსურდა, თან ზევიდან ცისფერ ნაპერწკლებს ყრიდა.

- ჯონ ჰაფ, ჩარლი ვუდმენ, მზად ხართ? - ჩურჩულით მიმართა დაგლასმა ბავშვების ქუჩას, - მზად ხართ, მოიმარჯვოთ გაზონების ნამით ღრუბელივით გაჟღენთილი ბეისბოლის ბურთები? მზად ხართ, იქანაოთ ხეებზე ჩამოკიდებულ ბაგირებზე?

- დედა, მამა, ტომ, გაიღვიძეთ!

მომორებით მადვიძარები აწკრიალდა. ბოხი ხმით ჩამორეკა მერიის შენობის საათმა. ჩიტები ჟრიაშულით გაიფანტნენ ხეებიდან და ბიჭის ნატყორცნ ბადესავით მოეფინნენ ზეცას. დაგლასმა დირიჟორის ჟესტით აღმოსავლეთისაკენ გაიშვირა ხელი.

მზე ამოდოდა.

ბიჭმა მკლავები მკერდზე გადააჯვარედინა და გრძნეული ღიმილით გაიღიმა. აი, ასე, ჩემს სიტყვებზე ყველა წამოხტა და აფუსფუსდაო, გაიფიქრა. მშვენიერი სეზონი იქნება.

თითების ერთი გატკაცუნებით უკანასკნელი ნიშანი მისცა ქალაქს.  
ხმაურით გაიღო კარი, ხალხი გარეთ გამოვიდა.  
1928 წლის ზაფხული დაიწყო.

\* \* \*

იმ დღით გაზონზე რომ გადაირბინა, დაგლას სპოლდინგმა სახითობობას ქსელი გაარღვია. ჰაერში გაჭიმული უხილავი ბაწარი საფეთქელზე ოდნავ შეეხო და უხმოდ გაწყდა.

ამ უფაქიზესმა, მოუხელთებელმა შემთხვევამ ბიჭს ანიშნა: ეს დღე განსაკუთრებული უნდა ყოფილიყო. ის კიდეც იმიტომაც იქნებოდა განსაკუთრებული, რომ, როგორც მამამ აუხსნა დაგლასს და მის ათი წლის ძმას, ტომს, მანქანით მგზავრობისას, არის დღეები, მხოლოდ სურნელისაგან რომ შედგება. ასეთ დღეებში სამყარო შემოდის შენში ერთი ნესტოდან, მეორედან კი გადის და ყნოსვის გარდა სხვა შეგრძნებები თითქოს არც კი არსებობს. არის კიდეც ისეთი დღეები, განაგრძობდა მამა, როცა შენს ყურსყოველი გაფაჩუნება და ყოველი ჩქამი სწვდება, რასაც კი მსოფლიო გამოსცემს. ზოგი დღე გემოს დასაქმნიკებლადაა ხელსაყრელი, ზოგი კიდეც ხელით შეხებისათვის. ზოგიც ყველა შეგრძნებას ერთბაშად გიმძაფრებს. აი, დღეს, მაგალითად, თავი გააქნია მამამ, ისეთი შთაბეჭდილება მაქვს, თითქოს მთებს იქით ერთ ღამეში ხეხილის ბალი ამოსულა და ახლა მთელი ხილული მიდამო მისი თბილი ქორფა სუნთქვით არის ავსებული. ჰაერში წვიმის სუნი ტრიალებს, თუმცა, ცაზე ერთი ღრუბელიც კი არ ჩანს. ყოველ წამს შესაძლებელია, ქალაში ვიდაც უცნობმა გადაიხარხაროს, მაგრამ ის ჯერჯერობით დუმს...

დაგლასი გაჰყურებდა ფანჯარაში მქროლ არემარეს. ის ვერც ბალის სურნელს გრძნობდა, ვერც წვიმის მოახლოებას, რადგან იცოდა: ვაშლის ხეებისა და ღრუბლების გარეშე არც ერთი იყო შესაძლებელი და არც მეორე. და რაც შეეხება ტყეში მოხარხარე უცნობს... რა ვიცი...

და მაინც უეჭველია - დაგლასს გააქრჟოლა კიდეც, - ეს დღე, რადაც დაუდგენელი მიზეზის გამო, ყოვლად გამორჩეული იქნება.

მანქანა მდუმარე ქალის შუაგულში გაჩერდა.

- ბიჭებო, აბა, წესიერად.

ძმები ერთმანეთს იდაყვებს ჰკრავდნენ.

- ჰო, მამა.

მანქანიდან გადმოვიდნენ, ცისფერი თუნუქის ვედროები მოიმარჯვეს და ტალახიანი შარაგზიდან ნაწვიმარი მიწის სუნით გაჟღენთილ ტყეში შეაბიჯეს.

- ფუტკრებს დააკვირდით, - უთხრა მამამ, - ფუტკრები ისევე არ სცილდებიან ველურ ყურძენს, როგორც ბიჭები სამზარეულოს. დაგლას!

დაგლასი შეკრთა და მამას ახედა.

- სადღაც მილიონი კილომეტრის იქით ხარ, - უთხრა მამამ, - გამოფხიზლდი, არ ჩამოგვრჩე.

- ჰო, მამა.

ჭალაში მიაბიჯებდნენ, მამა ძალიან მაღალი იყო, დაგლასი მის ჩრდილში აბიჯებდა, ტომს კი, ყველაზე პატარას, ძმის ჩრდილი ფარავდა. პატარა აღმართი აიარეს და ბორცვიდან გადმოიხედეს.

- აგერ, იქ, ხედავთ? - ანიშნა მამამ, - იქ, ქვევით ცხოვრობენ ზაფხულის თბილი, მძლავრი ქარები, მწვანე სიდრემეში ვეშაპების აჩრდილებივით უხილავად დასრიალებენ.

დაგლასმა სწრაფად გაიხედა, ვერაფერი დაინახა და იგრძნო, რომ მამა მეტისმეტად დიდ მოთხოვნებს უყენებდა. მასაც, პაპასავით, გამოცანებზე მეტად არაფერი უყვარდა. და მაინც... მაინც...

დაგლასი გაყუჩდა და მიაყურადა.

ჰო, რაღაც უნდა მოხდეს, გაიფიქრა, ნამდვილად ვიცი!

- აქ გვიმრაა, - მამამ ვედროს ქღარუნით ჩაუარა, - გრძნობთ ამას? - მიწას დაჰკრა ფეხი, - აქ მილიონი წლის მანძილზე ჩამოცვენილი ნემომპალაა. წარმოიდგინეთ, რამდენმა შემოდგომამ გაიარა, ვიდრე ეს პოხიერი ნიადაგი მომზადდებოდა.

- აუ, ინდიელივით დავდივარ, - თქვა ტომმა, - რბილად და უხმოდ.

დაგლასმაც მოსინჯა, მაგრამ ვერ იგრძნო მიწის სირბილე. გაფაციცებულ იყურს უგდებდა არემარეს. ალყაში ვართ! გაიფიქრა. აი, ახლა უნდა მოხდეს! რა? ბიჭი გაიტრუნა. გამოდი, სადაცა ხარ, ვინცა ხარ! დაიყვირა უხმოდ.

ტომი და მამა ნება-ნება განაგრძობდნენ გზას მდუმარე მიწაზე.

- ამაზე თხელი მაქმანი არ არსებობს, - მშვილად თქვა მამამ და ბავშვებს მაღლა, დაფოთლილ ტოტებზე მიანიშნა, რათა კარგად დაჰკვირვებოდნენ, თუ როგორ ჩაწნულიყვნენ ფოთლები ცის ქსოვილში, - იქნებ ცაა ფოთლებში ჩაწნული? - ეს თავადაც ვერ გაერკვია, - ასეა თუ ისე, - გაეღიმა მამას, - სულერთია.

მათ წინაშე საუცხოო ნაქარგობა იყო, ცისფერი და მწვანე, და თუ კარგად დააკვირდებოდნენ, შეამჩნევდნენ, რომ ტყე ახლაც განაგრძობდა მუშაობას

თავის მოზუზუნე დაზგაზე. მამა მოხერხებულად იდგა. სიტყვებს მსუბუქად ამოთქვამდა, სიამოვნებდა ასე ლაპარაკი. უფრო ხშირად თავადვე ეცინებოდა საკუთარ ნათქვამზე და ამით საქმეს აიოლებდა. მერე თქვა, მიყვარს სიჩუმისათვის ყურის გდებამ, და განაგრძო, იმიტომ, რომ ასეთ სიჩუმეში, როგორც ახლაა, ისმის, ყვავილების მტვერი როგორ დაფარფატებს ფუტკრებისაგან დასიცხულ ჰაერშიო. ჰო, ღმერთმანი, ჰაერი, მართლაც, ფუტკრებისგანაა დასიცხული! უსმინეთ! იმ ხეებს იქით ჩიტების ხმამაღალი ჟღერტული ისმისო!

აი, ახლა, გაიფიქრა დაგლასმა, საცაა მოვა! მოქრის! ვერ ვხედავ! მოქრის! ლამის შემეჯახოს!

- ყურძენი! - წამოიძახა მამამ, - ნახეთ, როგორ გაგვიმართლა!

არა! აღმოხდა დაგლასს.

ტომი და მამა დაიხარნენ და ხელები ბუჩქებში ააფათურეს. ტოტების ტკაცუნმა დაარღვია ჯადოსნური წამი. ის დიდებული, ფრთაშესხმული, მონეტიალე, გოროზი სულთამპყრობელი უკვალოდ გამქრალიყო.

დაგლასი მუხლებზე დაეცა, სახტად დარჩენილი და გულგამოცარიელებული. დაინახა, როგორ ჩაეფლო მისი თითები მწვანე წყვდიადში, ხოლო ისევ რომ ამოსწია, ისეთი ფერის ლაქებით ჰქონდა მოთხვრილი, თითქოს ტყის ღია ჭრილობაში ამოევლო ხელის მტევნები.

- ბიჭებო, ხემსის დროა!

ვედროები სანახევროდ გავესოთ ველური ყურძენითა და ტყის მარწყვით და ასე, ამ ფუტკრების გარემოცვაში, რომელთა ზუზუნი მამამ სამყაროს მოგუდულ ღიღინს შეადარა, მწვანედ დახავსებულ მორზე ჩამომსხდარნი, სენდვიჩებს შეექცეოდნენ და ცდილობდნენ, ტყისთვის ესმინათ. დაგლასი გრძნობდა, მამას მშვიდი, გაცეხული მზერა მისკენ მიეპყრო, რაღაცის თქმა უნდოდა, რამაც უეცრად გაუელვა თავში, მაგრამ ამის მაგიერ სენდვიჩი ჩაკბიჩა და ფიქრს მისცა თავი.

- როცა სენდვიჩს ღია ცის ქვეშ ჭამ, ეს უკვე ადარ არის უბრალო სენდვიჩი, სულ სხვა გემო აქვს. დაჰკვირებინართ? მეტი სიმძაფრე აქვს. პიტნისა და ფიჭვის ნაყენის გემო დაჰკრავს. სულ რომ არ გშიოდეს, მადა მაინც მოგივა.

დაგლასმა პურის ნაჭერი და შებოლილი ლორი ჩაკბიჩა. არა... არა... ჩვეულებრივი სენდვიჩი იყო.

ტომმა ღეჭვა-ღეჭვით დაუქნია თავი.

- ჰო, მესმის, რასაც გულისხმობ, მამა!

ცოტაც და, რაღაც მოხდება, გაიფიქრა დაგლასმა. არ ვიცი, რა, მაგრამ ის კი ვიცი, რომ ვეება იყო, ღმერთო ჩემო, უზარმაზარი! რაღაცამ დააფრთხო.



ნეტავ სად არის ახლა? ამ ბუჩქებს იქით! არა, ჩემს ზურგს უკან! არა, აქ... თითქმის, აი, აქ... სხვებისათვის შეუმჩნევლად მოისრისა მუცელი.

თუ დაველოდები, დაბრუნდება. საშიში არ არის; რატომღაც დარწმუნებული ვარ, რომ არაფერს დამიშავებს. მაშ, რა არის? რა? რა?

- იცი, რამდენჯერ ვითამაშეთ ბეისბოლი წელს, და შარშან, და იმის წინ? - უცებ ისე, სრულიად მოულოდნელად, ჰკითხა ტომმა.

დაგლასი თვალს ადევნებდა ტომის მოძრავ ტუჩებს.

- სულ ჩაწერილი მაქვს! ათას ხუთას სამოცდარვაჯერ! რამდენჯერ გამოვიხეხე კბილები ათი წლის მანძილზე? ექვსი ათასჯერ! დავიბანე ხელები თხუთმეტი ათასჯერ. მეძინა, სადღაც, ოთხი ათასჯერ, ცოტ-ცოტა ხნით თვალის მოტყუებას თუ არ ჩავთვლით. შევჭამე: ექვსასი ცალი ატამი, რვაასი ვაშლი. მსხალი ორასი ცალი. მსხალზე დიდად არ ვგიჟდები. რაც გინდა, დამისახელე. ყველაფრის სტატისტიკა მაქვს ჩამოწერილი! ზოგი რამე, რაც ათი წლის მანძილზე მაქვს გაკეთებული, მილიარდებამდე აღის.

აი, გაიფიქრა დაგლასმა, ისევ მიახლოვდება. რატომ? ტომი რომ ლაპარაკობს, იმიტომ? რატომ მაინცდამაინც ტომი? ტომი ლაქლაქებს, პირი საწებლით აქვს მოთხუპნილი, მამა, ჯიქივით გაფაციცებული, მორზე წამოწოლილა, ტომის პირიდან კი გაზიანი წყლის ბუშტებივით იფრქვევა სიტყვები.

- სულ ოთხასი წიგნი მაქვს წაკითხული. ახლა რა და რა ფილმები მაქვს ნანახი: ბაქ ჯონსის<sup>1</sup> მონაწილეობით - ორმოცი, ჯექ ჰოქსის<sup>2</sup> - ოცდაათი, ტომ მიქსის<sup>3</sup> - ორმოცდახუთი, ჰუთ გიბსონის<sup>4</sup> - ოცდაცხრამეტი, ვნანუ კატა ფელიქსის<sup>5</sup> მულტფილმის ას ოთხმოცდათორმეტი სერია, დაგლას ფერბენკსის<sup>6</sup> ათი კინო, რვაჯერ ვნანუ „ოპერის მოჩვენება“ ლონ ჩეინის<sup>7</sup> მონაწილეობით, ოთხი კინო - მილტონ სილსის<sup>8</sup> და ერთი რაღაც სიყვარულზე, ადოლფ მენჯუ თამაშობდა, ოღონდ მთელი ფილმის დროს კინოთეატრის

1 ბაქ ჯონსი (1891-1942) - ამერიკელი კინოვარსკვლავი, ცნობილი პოპულარულ ვე-სტერნებში მონაწილეობით.

2 ჯექ ჰოქსი (1885-1965) - ამერიკელი კინომსახიობი, როდოსა და ვესტერნების ვარ-სკვლავი.

3 ტომ მიქსი (ტომას ედვინ მიქსი; 1880-1940) - ამერიკელი მუხი კინოს ეპოქის ვე-სტერნების ვარსკვლავი.

4 ჰუთ გიბსონი (1892-1962) - ამერიკელი როდოს ჩემპიონი და პირველი კოვბოური ფი-ლმების მსახიობი, რეჟისორი და პროდიუსერი.

5 კატა ფელიქსი - მუხი კინოს ეპოქის მულტფილმების გმირი.

6 დაგლას ფერბენკსი (1883-1939) - მუხი კინოს ეპოქის ერთ-ერთი ბრწყინვალე ამერიკელი მსახიობი, სცენარისტი, რეჟისორი და პროდიუსერი.

7 ლონ ჩეინი (ლეონიდას ფრენკ ჩეინი; 1883-1930) - მუხი კინოს ეპოქის შესანიშნავი ამერიკელი მსახიობი, სცენარისტი, რეჟისორი და პროდიუსერი.

8 მილტონ სილსი (1882-1930) - XX საუკუნის დამდეგის თეატრისა და კინოს ამერიკელი მსახიობი.



ტუალეტში ველოდე, როდის მორჩებოდა ეგ დებილობა, იმიტომ, რომ მერე უნდა დაწყებულიყო „კატა და კანარის ჩიტი“ თუ, არა, „დამურა“, ის, რომლის დროსაც ყველა ერთმანეთს ებღაუჭება და მთელი ორ საათი შეუჩერებლად კვიან. სეანების განმავლობაში, ჩემი გამოთვლებით, ასე, ოთხმოცამდე საწუწნი კანფეტი, სამასი შოკოლადის ფილა და შვიდასი ნაყინი „ლოლო“ მაინც მექნება შეჭმული...

ასე მშვიდად და რიტმულად განაგრძობდა ჩამოთვლას კიდევ ხუთ წუთს, ვიდრე მამა არ შეეკითხა:

- რამდენი კენკრა გაქვს მოკრეფილი სიცოცხლეში, ტომ?

- ზუსტად ორას ორმოცდათექვსმეტი ცალი! - წამსვე უპასუხა ტომმა.

მამას გაეცინა და ხემსიც დასრულდა. სამივემ ისევ ბუჩქნარისაკენ გასწია, ისევ ყურძენსა და მარწყვს დაუწყეს ძებნა. ხან ერთი ჩაიხრებოდა, ხან მეორე, ხან მესამე. მათი ხელები გამალებით მოძრაობდა, ვედროები თანდათან უმძიმდებოდათ, დაგლასი კი, სუნთქვაშეკრული, ფიქრობდა: ჰო, ისევ მიახლოვდება! აი, უკვე ჩემს ზურგს უკანაა, საცაა კეფით მის სუნთქვას ვიგრძნობ! არ მიიხელო! იმუშავე, განაგრძე კრეფა, გაავსე ვედრო! თუ მიიხედავ, ისევ დააფრთხობ! ამჯერად მაინც უნდა მოიხელთო! მაგრამ როგორ შემოაბრუნებ ისე, რომ აქ, შენ წინაშე აღმოჩნდეს, რომ თვალი გაუსწორო? როგორ?! როგორ?!

- ჰო, იცი, ფიფქი მაქვს ასანთის კოლოფში, - წარმოთქვა უცებ ტომმა, თან ყურძნის წვენი ხელთათმნით შემოსილ თავის ხელს აკვირდებოდა ღიმილით.

დაგლასს უნდოდა, დაეყვირა: მოკეტე, რა! მაგრამ არა, მისი ხმა ექოს გამოიწვევდა და იმას დააფრთხობდა!

თანაც, მოიცადე... რაც უფრო მეტს ლაპარაკობდა ტომი, მით უფრო ახლოს მოდიოდა ის რაღაც ვეება, მას ტომისა აშკარად არ ეშინოდა, ტომი მას თავისი სუნთქვით იზიდავდა, ტომი თვითონაც მისი ნაწილი იყო!

- თებერვალში, - ამბობდა ტომი, - ქარბუქში ასანთის კოლოფი მაღლა ავწიე და ერთი ფიფქი შიგ ჩავარდა, მერე დავახურე, შინ შევვარდი და საყინულეში შევაგდე.

ახლოსაა, სულ ახლოს! დაგლასი ტომის მოუსვენარ ტუჩებს მიშტერებოდა. ბტუნვის დაუოკებელი ჟინი მოეძალა, იმიტომ, რომ ჭალის მიღმა უზარმაზარი ტალღის აზვირთება იგრძნო. ის სულ ერთ წამში დაბლა დაენარცხებოდა და მათაც თან ჩაიტანდა...

- მართლა, მართლა, - თავისთვის მსჯელობდა ტომი, თან ყურძნის კრეფას განაგრძობდა, - მთელ ილინოისში ერთადერთი ბიჭი ვარ, ვისაც

ზაფხულში თოვლის ფიფქი აქვს. ის ახლა ბრილიანტზე უფრო ძვირად ფასობს, ნადდად. ხვალ უნდა გავხსნა. დაგ, შენც შეგახედებ, თუ გინდა.

ნებისმიერ სხვა დროს დაგლასი ჩაიფრუტუნებდა, ხელს აუქნევდა, გაუცამტვერებდა მთელ ოცნებებს, მაგრამ ახლა, როცა ის ვეება მისკენ მოიქცაროდა და აგერ უკვე მის თავზე ეშვებოდა კრიალა ჰაერში, ისღა დარჩენოდა, თვალდახუჭულს უხმოდ დაექნია თავი.

ასეთი უჩვეულო თანხმობით გაცემულმა ტომმა კენკრის კრეფაც კი შეწყვიტა და ძმას მიაშტერდა. ბალახში ჩახრილი დაგლასი საუკეთესო სამიზნეს წარმოადგენდა. ტომი ახტა, შეჰყვირა, ძმას ზედ დაახტა. ბიჭები ერთმანეთს მიეხალნენ, გადაყირავდნენ და ბალახში გაგორდნენ.

არა! დაგლასი შინაგანად შეიკუმშა. არა! და უცბად... ჰო, ყველაფერი რიგზეა! ვარდნას, თავბრუდამხვევ კოტრიალსა და აურზაურს არ შეუჩერებია აზვირთებული ზღვა, ის ახლა ნიაღვრად ჩამოექცათ თავზე, ორივენი წალეკა და ბალახის სანაპიროზე, ტყის სიღრმეში გამორიყა. დაგლასს ტუჩებში მუშტი მოხვდა. პირში სისხლის თბილი, მომწკლარტო გემო იგრძნო, ტომს მაგრად ჩაეჭიდა, მკლავებში მოიქცია და ასე გამეშდნენ ძირს გართხმულები. მათ გულეებს ბაგაბუგი გაუდიოდა, ნესტოებიდან სისინით უშვებდნენ ჰაერს. როგორც იქნა, დაგლასმა ძალიან ნელა გაახილა ცალი თვალი: ეშინოდა, ვაითუ, აღარაფერი დამხვდესო.

მაგრამ ყველაფერი, სულ ყველაფერი თავ-თავის ადგილას იყო. და სამყაროც, ახალგახელილი გიგანტური თვალვიით, მას უყურებდა.

ახლა კი მიხვდა, რა იყო ეს, ასე მძლავრად რომ მიეხალა და სამუდამოდ რომ შეერწყა მის არსებას.

მე ცოცხალი ვარ, გაიფიქრა ბიჭმა.

ათრთოლებული, სისხლით მოსვრილი თითები რაღაც უცნაური დროშის ნაგლეჯებს მიაშგავსა, რომელიც ის-ის იყო, ეპოვა და ახლა ცდილობდა, გამოეცნო, თუ რა ქვეყანას ეკუთვნოდა ეს დროშა და რა იღუმალი ვალი ჰქონდა ამ ქვეყნის წინაშე. ტომი კვლავაც მკლავებში ჰყავდა მომწყვდუელი, ოღონდ მისი არსებობა სულ დაავიწყდა. თავისუფალი ხელი სისხლიან თითებზე მოისვა. შემდეგ ტომი მოიცილა. თავად ისევ გულადმა იწვა, მკლავი ცისკენ ჰქონდა აშვერილი. მისი მთელი არსება ახლა თავში იყო კონცენტრირებული, ის უცნაურ ციხე-გალავნად იქცა, რომლის ასაწევ გისოსს მიღმა თვალეები გუშაგებად იდგნენ და გრძელი ხიდის - მკლავის - გაყოლებაზე, შორს, მზეზე მოცახცახე მეწამულ ალამს გაჰყურებდნენ.

- რა მოგივიდა, დაგ? - ჰკითხა ტომმა.

ძმის ხმა საიდანტაც შორიდან, წყლის სიღრმიდან, მწვანე, დახავსებული ჭის ფსკერიდან მოესმა.

დაგლასის ბექებქვეშ ბალახი აჩურჩულდა. მკლავი დაუშვა და უცებ იგრძნო, როგორ შეიმოსა ის ღინდლის საფრით, ხოლო შორს, ქვევით, ფეხსაცმელებში, ფეხის თითები როგორ გაეხანუნა ერთიმეორეს. მის ნიჟარისებრ ჩახვეულ ყურებში ქარმა ამოიოხრა. სამყარომ თვალების მომრგვალებული მინის გასწვრივ ჩაუქროლა ჯადოსნურ სფეროში მოციმციმე გამოსახულებებით. ყვავილები თურმე მზეები ყოფილან, თუ ზეცის მოელვარე ნაგლეჯები, ვიდაცის ხელს რომ უხვად მიმოეფანტა ტყის მდელოზე. ცა ფართო, გადმოპირქვავებულ ტბად იქცა, მის ზედაპირზე ჩიტები მარჯვედ ნასროლი ქვებით მიხტოდნენ. ბიჭმა კბილებს შორის სუნთქვა გამოცრა: ის ყინულად შევიდა და ცეცხლად გამოვიდა. ჰაერი მწერების ელექტრული ვიბრაციით მონუსხულიყო. დაგლასის თავზე თმის ათი ათასი დამოუკიდებელი ღერი წამში დუიმის ერთი მემილიონედით იზრდებოდა. ყურებში ორი ტყუპი გულის ბაგაბუგი გაიგონა. მესამე ყელში უფართხალებდა, კიდეც ორი გული პულსირებდა მის მაჯებში, ხოლო ნამღვილი გული მკერდში რეკავდა დიდრონი ზარით. სხეულის ზედაპირზე მილიონი ფორა გაეხსნა სამყაროს შესახვედრად.

მე მართლა ცოცხალი ვარ! გაიფიქრა ბიჭმა. აქამდე ეს არ ვიცოდი, ან იქნებ არ მახსოვდა!

მან ეს სიტყვები ძალიან ხმამაღლა, მაგრამ უხმოდ დაიყვირა კიდეც და კიდეც! წარმოგიდგენია?! წარმოგიდგენია?! თორმეტი წლის ვარ და მხოლოდ ახლა მივხვდი ამას! მხოლოდ ახლა აღმოვაჩინე ეს უიშვიათესი ქრონომეტრი, ეს ოქროს საათი უდავო გარანტიით. აქ, ხის ქვეშ, დამრჩენია ოდესღაც და აი, ამწუთას, ტომთან ჭიდაობისას, კვლავ ვიპოვე.

- დაგ, კარგად ხარ?

დაგლასმა დაიღრიალა, ტომს ჩაებღაუჭა და მასთან ერთად გაგორდა მიწაზე.

- დაგ, გაგიჟდი?

- გავგიჟდი!

ბიჭები დაღმართზე ჩაკოტრიალდნენ. ღია პირებში და ფართოდ გახელილ თვალებში მზე ლიმონისფერ ნამსხვრევებად ეფანტებოდათ. ნაპირზე გამოყრილი კალმანებით აქომინებულებმა იმდენი იცინეს, ვიდრე ცრემლები არ წასკდათ.

- დაგ, მართლა ხომ არ გაგიჟდი?

- არა, არა, არა, არა, არა!

დაგლასის დახუჭული თვალების წინაშე, შავ ფონზე, რბილად ჩაიარეს ლაქებიანმა ლეოპარდებმა.

- ტომ! - ხმას ცოტა დაუწია, - ტომ... მსოფლიოში ყველამ იცის... რომ ცოცხალია?

- ჰო. ჰო, აბა, რა!

ლეოპარდებმა უხმოდ გასწიეს უფრო ბნელი მხარეებისკენ, სადაც მათ დაგლასის თვალის კაკლები ვეღარ გაჰყვებოდნენ.

- რა კარგია, - ჩაიჩურჩულა დაგლასმა, - ნეტავ მართლა ყველამ იცოდეს!

დაგლასმა თვალები გაახილა. მამა თავს წამოსდგომოდა, სადღაც ძალიან მაღლა იყო, მწვანეფოთლებიან ცაში, დოინჯემოყრილი იდგა და იცინოდა. ერთმანეთს თვალი გაუსწორეს. დაგლასი იმწამსვე გამოფხიზლდა. გაიფიქრა: მამამ ყველაფერი იცის, ყველაფერი წინასწარ ყოფილა ჩაფიქრებული. აქ განგებ მოგვიყვანა, რათა ეს მომსვლოდა! ის ამ თამაშშია ჩართული და ახლა ისიც იცის, რომ მე ყველაფერს ჩაწვდი.

ჰაერიდან ჩამოსული ხელი ბიჭს ჩაეჭიდა და ფეხზე წამოაყენა. ბარბაციტ იდგა მამისა და ტომის გვერდით. ჯერაც დაბეჭილი და გაჩეჩილი, გაოცებული და მონუსხული, სათუთად ისრესდა გახვევებულ იდაყვს და ნეტარებით ილოკავდა განლექილ ტუჩს. ბოლოს, მამასა და ტომს გადახედა.

- ყველა ვედროს მე წამოვიღებ, - თქვა დაგლასმა, - ამჯერად ყველაფერი მე მომანდეთ!

მათ ირონიული ღიმილით გაუწოდეს ვედროები.

დაგლასი ოდნავ ბარბაცებდა. ჩამოწეულ მკლავებზე ეკიდა მარცვალ-მარცვალ შეგროვებული ტყე, ტკბილი წვენიტ გაჟღენთილი და დამძიმებული. გაიფიქრა: მინდა, შეძლებისდაგვარად, ყველაფერი შევიგრძნო, დადლილობაც, ნამდვილი დადლილობა! არ უნდა დამავიწყდეს, რომ ცოცხალი ვარ! ახლა ხომ უკვე ვიცი! ჰოდა, ეს დღეს სატამოსაც უნდა მახსოვდეს, ხვალაც და ზეგაც!

უკან გაიყოლია ფუტკრები და ყურძნისა და ყვითელი ზაფხულის სურნელი. მძიმედ დატვირთული და გაბრუებული მიტორტმანებდა. თითები უცნაურად დაუბუჟდა, მკლავები დაუმძიმდა, ერთი-ორჯერ ფეხიც დაუცდა, ისე, რომ მამამ ხელი შეამველა.

- არა, - ჩაიბურტყუნა დაგლასმა, - არ მიჭირს, მოვდივარ.

ნახევარი საათი დასჭირდა საიმისოდ, რომ ბალახთან, ფესვებთან, ხავსიანი მორის ქერქთან შეხების ანაბეჭდები წაშლოდა ხელ-ფეხსა და ზურგზე. ვიდრე ამ განცდებს ემშვიდობებოდა, მათ თანდათანობით ქრობას, აორთქლებას აკვირდებოდა, უმცროსი ძმა და უშფოთველი მამა უკან

მიჰყვებოდნენ: და, თავად გაიკვლიოს გზა ტყიდან იმ არარსებული მარაგ-ზისაკენ, რომელმაც სამივენი ქალაქში უნდა დააბრუნოს.

\* \* \*

ქალაქი, იმავე დღის ნაშუადღევს.

და კიდევ ერთი ჭირნახულის აღება.

პაპა ფართო პარმალზე იდგა და კაპიტანივით გადაჰყურებდა გარდასული სეზონის მოსავალს, მის წინაშე ოკეანის მშვიდი ზედაპირით რომ გადაშლილიყო. მდუმარე შეკითხვით მიმართა ნიავს, მიუწვდომელ ზეცასა და გაზონს, რომელზედაც დაგლასი და ტომი იდგნენ და მხოლოდ მისთვის მიეპყროთ კითხვით სავსე მზერა.

- პაპა, მზად არის? უკვე დროა?

პაპამ ნიკაპი მოისრისა.

- ხუთასი, ათასი, სულაც ორი ათასი ცალი იქნება. ჰო, ნამდვილად მშვენიერი მარაგია. შეაგროვეთ ფრთხილად, სათითაოდ შეაგროვეთ. დასაწურად ჩაბარებულ თითო ტომარაში ათცენტისანს მიიღებთ!

- ჰეი!

გაბადრული ბიჭები ბალახში ჩაიხარნენ და ოქროსფერი ყვავილების კრეფა დაიწყეს. ყვავილებს მთელი ქვეყანა დაეტიბორა, გაზონებიდან ქვაფენილზე გადმოღვრილიყვნენ, სარდაფის ფანჯრის მინებზე რბილად აკაკუნებდნენ, აბობოქრებულ ტალღებად მოსდებოდნენ ყველაფერს, ისე, რომ სამყარო დამდნარი მზის ბრჭყვიალა ნათელით ღუოდა.

- ყოველ წელს, - წარმოთქვა პაპამ, - აი, ასე გიჟდებიან. მე ხელს არ ვუშლი. გეგონება, ეზოში ლომების პრაიდი დასეირნობსო. დიდხანს რომ უყურო, თვალის ბადურას ამოგწვავს. სულ უბრალო ყვავილია, კაცმა რომ თქვას, სარეველაა. სხვა მას ვერც კი შეამჩნევს, მაგრამ კეთილშობილი რამაა: ბაბუაწვერა.

სათითაოდ შეგროვებული ბაბუაწვერები ტომრებით ჩაიტანეს სარდაფში. მათმა ნათელმა ქვესკნელის სიბნელე გაანათა. ღვინის წნეხი კი, თავანდილი და ცივი, იდგა და მათ ელოდა. ყვავილების ნიაღვარმა გაათბო იგი. პაპამ დაატრიალა ხრახნი და წნეხი ფრთხილად შეუდგა ძვირფასი მოსავლის სრესას.

- ასე... აი, ასე...

ოქროს ნაკადმა, წელიწადის ყველაზე ხალასი თვის ღვრიტამ და სიცოცხლემ, ქვევიდან გამოყვანილ ღარში დაიწყო დენა, რათა, ბოლოს და

ბოლოს, გამოხდილ-გამჭირვალეული, კეტჩუპის სუფთა ბოთლებში მომწყვდეული, მბზინავ რიგებად ჩაწყობილიყო სარდაფის წყვდიადში.

ბაბუაწვერას ღვინო.

ეს სიტყვები ენაზე ზაფხულის გემოს ტოვებდა, თავად ღვინო კი შეყოვნებული და მოხუფული ზაფხული გახლდათ. მას შემდეგ, რაც დაგლასმა შეიტყო, რომ ცოცხალია, სურდა, სამყაროს ყველა საგანი ხელითა და თვალით მოეცვა და ახლა აღრინდელზე უფრო უპრინადაც მიაჩნდა ის, რომ ამ ახალი ცოდნის, ამ ყოვლად განსაკუთრებული არდადეგების თუნდაც მცირე ნაწილი, ცხრაკლიტულში საიმედოდ შემონახული, იანვრის სუსხიან დღეებამდე მიატანდა, იმ დრომდე, როცა ყოველივე თოვლით დაიფარება, მზე კვირაობით ან თვეობით არ გამოჩნდება და ვინ იცის, იქნებ მის გულშიც გახუნდეს და განელდეს სასწაულის განცდა. აი, როდის დასჭირდება მას კვლავ აღორძინება! ეს ხომ ყოვლად მოულოდნელი თავგადასავლების ზაფხული იქნება და რა კარგია, რომ ყოველ წუთს შეგეძლება, თითის წვერებზე ჩაუყვე ბნელ კიბეს და ხელით მოსინჯო ის სიბნელეში, ეტიკეტებს მიღმა საიმედოდ შემონახული!

მწკრივებად იდგება ბაბუაწვერას ღვინო: მტვრის თხელი ფენის ქვეშ განთიადზე გაშლილი ყვავილები იბრწყინებენ და ივნისის მზეც უწყვეტად იბრჭყვიალებს მასში. გაიხედავ ჭურჭელში ზამთრის დღეს და დამდნარი თოვლი წამში ბალახად გადაიქცევა, შიშველი ხეები ჩიტებით, ფოთლებით, ყვავილებით დაიხუნძლება - თითქოს ყველაფერს პეპლების ფარფატით აღძრულმა ზღაპრულმა სიომ შემოუქროლაო. გახედავ გამჭირვალე ჭიქას და ლითონისფერ ცას ლაჟვარდი გადაეკვრება.

ამასაც შეძლებ, ჭიქაში ჩამოსხმული ზაფხული ხელში დაიკავო - ეს, რა თქმა უნდა, ძალზე პატარა ჭიქა იქნება, ყველაზე ციცქნა, ერთყლუპიანი წკრიალა ჭურჭელი, რაც კი მთელ სახლში მოიძებნება, საგანგებოდ ბავშვებისათვის. შეძლებ, ზაფხული ბაგესთან მიიტანო, გადაყლურწო და სისხლძარღვებში აიჩუხჩუხო.

- მზადაა! ახლა წვიმის წყლის კასრთან გაიქცეთ!

რა თქმა უნდა, არანაირი სხვა წყალი არ გამოდგება. მხოლოდ ის კრისტალური წყლებია საჭირო, უშორესი ტბებიდან და უტკბესი დილის ნამიანი მინდვრებიდან რომაა გამოხმობილი, ცაში ცხრა ათასი მილის სიმაღლეზე აზიდული და გაქათქათებული ღრუბლის ზეწრებში ნარწევ-ნატარები, შემდეგ ყინულოვან ქარში გამოხაწრობი და მაღალი ძაბვით დამუხტული. აი, ამ წყლის ყოველ წვეთში ზეცის მთელი ენერჯიაა მოქცეული. ის სამხრეთის ქარსაც ეზიარა, აღმოსავლეთის, დასავლეთისა და ჩრდილოეთის ქარებსაც

და, საბოლოოდ, წვიმად ჩამოიქცა, წვიმა კი, თავის მხრივ, ახლა ღვინოდ გარდაიქმნება.

დაგლასი დაიხარა და კასრიდან სავსე ჩამჩა ამოიღო.

- მომაქვს!

წყალი აბრეშუმით ბზინავდა ჭურჭელში: ქათქათა, ოდნავ მოცისფრო აბრეშუმით. თუ შესვამდი, ბაგეზე, ყელსა და გულზე გელამუნებოდა. ეს წყალი სარდაფში ვედროებითა და ჩამჩებით უნდა ჩაეტანათ, რათა გრილ წყაროებად, მთის ნაკადულებად გადასხმოდა დასერილ ბაბუაწვერებს.

სხვებზე რომ არაფერი ვთქვათ, თვით ბებოც კი - თებერვლის რომელიმე სუსხიან დღეს, როცა ქარბუქი თავბრუს ახვევს არემარეს, აბრმავეს ფანჯრებს, სუნთქვას გართმევს - აი, ასეთ დღეს თვით ბებოც კი ჩაიპარებოდა ხოლმე სარდაფში.

მაღლა, უზარმაზარი სახლი სავსე იქნება ხველით, ცემინებით, ხრიალითა და კვნესით, ბავშვების სიციხებით, ყასბის დახლზე გამოფენილი ხორცივით გაწითლებული ყელებითა და დაღვინებული ალუბლის მსგავსი ცხვირებით, და ყველგან უხილავი მიკრობი იბატონებს.

აი, სწორედ ასეთ დროს ივნისის ქალღმერთივით ამოყვინთავს ბებო სარდაფიდან, რაღაცას მალულად ჩაიკრავს გულში, ნაქსოვი შალის ნაკეცებში მაინც რომ ამოიცინობა. ამ რაღაცას ავადმყოფობებით გატანჯულ ყოველ ოთახში შემოატარებს და ერთი ზომის ჭიქებში ჩამოასხამს, რათა ყველამ ზუსტი დოზით შესვას ეს სულ სხვა დროის წამალი, მზის ელექსირი, და მასთან ერთად - აგვისტოს უზრუნველი შუადღეები, აგურის ქვაფენილებზე სანაყინე ურიკის ბორბლების ხმა, ვერცხლისფერი ფიერვერკების მზუილი, ჭიანჭველების სამოსახლოებზე გადატარებული მოლის საკრეჭი მანქანის ზუზუნნი... და ეს ყველაფერი, ეს ყველაფერი - ერთ ჭიქაში.

ღიახ, თვით ბებოსაც ხანდახან გაუწევს გული სარდაფში დავანებული ივნისის განცდისაკენ. ისიც, ჰაპას, მამას, ძია ბერტის ანდა რომელიმე მდგმურის მსგავსად, მხოლოდ საკუთარ გულს განდობილი, ბოთლების თაროებთან გაირინდება და იღუმალ საუბარს გაუბამს დიდი ხნის წინ მოხეულ კალენდრის ფურცლებს: მთელ ამ პიკნიკებსა და მხაპუნა წვიმებს, პურის ყანებს, ცხელ-ცხელ ბატიბუტსა და მოსათიბად წაწოლილ ბალახს. თვით ბებოც კი კვლავაც და კვლავაც გაიმეორებს ამ საოცარ, ოქროვან სიტყვებს, ახლა, ამ წუთშიც რომ ისმის, როცა ყვავილები წნეხშია, და არც ზამთარში - არც ერთ ზამთარში - არ მიეცემა დავიწყებას. მის ბაგეზე ეს სიტყვები ღიმილად გაიშლება და კვლავაც და კვლავაც სხივივით უეცრად გააპობს წყვილიად.

ბაბუაწვერას ღვინო. ბაბუაწვერას ღვინო. ბაბუაწვერას ღვინო.



\* \* \*

მათ მოსვლასა და წასვლას ძნელად თუ შენიშნავდით. მთიდან ჩამოსული ღრუბლების ჩრდილებივით უხმოდ ჩაიქროლებდნენ და მათი ფეხით გათელილი ბალახი წამსვე ისევ წამოიმართებოდა... ზაფხულის ბიჭები, ფეხმარდად მრბოლელნი.

დაგლასი სხვებს ჩამორჩა. აქოშინებული შეჩერდა ხევის პირას, იმ იდუმალი უფსკრულის თავზე, საიდანაც ოდნავ შესამჩნევი გრილი ნიავი უბერავდა. შველივით ყურებდაცქვეტილმა ბიჭმა ქვევიდან მონაქროლი ისეთი საფრთხე იყნოსა, მილიარდი წლის წინათ უკვე ბებერი რომ იყო.

აქ, ამ ადგილას, ქალაქი შუაზე გაპობილიყო. აქ მთავრდებოდა და ქრებოდა ცივილიზაცია. აქ მხოლოდ მიწა იყო, რომელიც ცოცხლობდა და იზრდებოდა, და ყოველ საათში მილიონ სიკვდილსა და დაბადებას ზეიმობდა.

სწორედ აქ გადიოდა ურიცხვი ბილიკი, დატკეპნილი თუ ჯერაც გაუკვალავი, და ყოველი მათგანი ბიჭების მოგზაურობისაკენ სწრაფვაზე მეტყველებდა, მარადი ხეტიალის წყურვილზე, რომელსაც ისინი საბოლოოდ მამაკაცებად უნდა ექცია.

დაგლასმა მიმოიხედა. აი, ეს ბილიკი გველივით დაკლაკნილ მტვრიან ქუჩაზე, ზედ სანაყინესთან ამოდიოდა, სადაც ამ ყვითელ დღეებში ზამთარს შეეფარებინა თავი. ეს კი ტბის სანაპიროზე ბრძმედივით გავარვარებული ქვიშისკენ მიქროდა. კიდევ ერთი ბილიკი იმ ხეებისკენ ისწრაფოდა, რომელთა ფოთლებშიც საიმედოდ დამალული ბიჭები ტოტებზე ვამლებივით კონწიალობდნენ. ეს კი ატმის ბადში მიგიყვანდათ, ვაზის ტალავერში და იქ, სადაც საზამთროები გაზულუქებული ზოლიანი კატებივით მზეზე ნებეირად თვლემდნენ. ეს ბილიკი, დროებით მიტოვებული, საშინლად მიხვეულ-მოხვეული - სკოლისაკენ მიმავალი ბილიკია. ეს კი, ისარივით სწორი - კინოთეატრისკენ მისწრაფვის, სადაც შაბათობით კოვბოურ ფილმებს აჩვენებენ, ხოლო ეს, ნაკადულს რომ მიჰყვება, ქალაქის იქით უდაბური ადგილებისაკენ მიეშურება...

დაგლასმა თვალები დახუჭა.

ვინ იტყოდა დანამდვილებით, თუ სად მთავრდებოდა ქალაქი და სად იწყებოდა უდაბური მიდამო? რომელი უფრო ძლიერი იყო? მუდამ რჩებოდა რაღაც იდუმალი შუალედური ალაგი, სადაც ეს ორნი ერთურთს ერკინებოდნენ და ხან ერთი, ხანაც მეორე თითო წლით ეპატრონებოდა ამა თუ იმ ქუ-

ჩას, დაბლობს, დელეს, ხეს თუ ბუჩქს. ბალახისა და ყვავილების თვალუწვდენი ზღვის ლივლივა ზედაპირი წელიწადის დროთა ცვლასთან ერთად შორი მინდვრებიდან აგორებულ ტალღებად აწყდებოდა ქალაქს. დამდამობით ვერანი მიდამო და ხასხასა მდელიო ჩაიღვრებოდა ხოლმე ხევში, როგორც მდინარის კალაპოტში, მოუყვებოდა მას, თან მოჰქონდა ბალახისა და წყლის სუნი და საბოლოოდ ტბორავდა ქუჩებს. ქალაქს ყველანაირი სიცოცხლის ნიშანწყალს ართმევდა და მიწასთან ასწორებდა. და ყოველ დილით აღმოჩნდებოდა, რომ ხევი კიდევ ერთ სოლად შეჭრილიყო ქალაქის ხორცში, გარაჟებს ზვირთებზე მოტივტივე ნავებივით ჩაყლაპვით ემუქრებოდა, ნთქავდა წვიმისა და, მამასადამე, ჟანგისათვის მსხვერპლად შეწირულ ძველ, მიტოვებულ ავტომანქანებს.

- ჰეი-ჰეი! - ჯონ ჰაფმა და ჩარლი ვუდმენმა გაიქროლეს და გაუჩინარდნენ ხევის, ქალაქის, დროის ილუმალებაში, - ეჰე-ჰეი!

დაგლასი ნელა გაუყვა ბილიკს. ხევი მართლაც ის ადგილი იყო, სადაც ადამიანისა და ბუნების სამყაროები გვერდიგვერდ თანაარსებობენ. ბოლოს და ბოლოს, რა იყო ქალაქი, თუ არა სტიქიას თავდაღწეული ხომალდი, ბალახის ამოძირკვითა და ჟანგის ფხეკით დაკავებული მოფუსფუსე მგზავრებით სავსე. დროდადრო რომელიმე ქონმახი, სეზონების ქარიშხალში გზააბნეული, დედაგემს მოწყვეტილი უსუსური ნავივით იძირებოდა ტერმიტებისა და ჭიანჭველების მღუმარე ზვირთებში, ხევის ვეება განხმულ ხახაში, და მხოლოდ კალიების ზუზუნნი ათრთოლებდა მზით გაცხელებულ ბალახბულახს, გეგონებოდა, ერთმანეთს მუყაოს ორი ფურცელი ეხახუნებაო; საბოლოოდ, ის, აბლაბუდებით საიმედოდ შეფუთული, ფიცრისა და ქვითკირის ზვავად ქცეული, საკურთხეველზე დანთებული კოცონივით ჩაიქცეოდა, ხოლო ჭექა-ქუხილი ქაოსის ამ მორიგ გამარჯვებას ლურჯი ელვის ბლიც-ფოტოთი გააუკვდავებდა.

დაგლასს სწორედ ეს იზიდავდა: ადამიანისა და მიწის მარადი ჭიდილის საიდუმლო. იცოდა, რომ ქალაქები საბოლოოდ მუდამ მარცხდებოდნენ. ამიტომაც მშვიდად განაგრძობდნენ მთვლემარე არსებობას დაღუპვის ზღვარზე; აღჭურვილნი გაზონის საკრეჭი მანქანებით, მწერების შესაწამლი სითხითა და ბუჩქის მაკრატლით, ცივილიზაციის ზედაპირზე მანამ ტივტივებდნენ, ვიდრე აღსასრულის ჟამი არ მოუწევდათ; თითოეული სახლი მზადაა, ყოველ წუთს სამუდამოდ ჩაინთქას მწვანე მორევში, ჩაიძიროს და დასამარდეს, როგორც კი უკანასკნელი ადამიანი აღიგვება პირისაგან მიწისა, მისი ბარ-ნიჩაბი და მაკრატელი კი ჟანგის ნაფლეთებად იქცევა.

ქალაქი. უდაბნო. სახლები. ხევი.

დაგლასმა ჯერ ზურგს უკან მიიხედა, მერე წინ ისროლა მზერა. როგორ უნდა დაუკავშირო ერთურთს ეს ორი რამ, როგორ უნდა ჩასწვდე მათ მარად წონასწორობას, როცა...

ბიჭმა მიწისაკენ დახარა მზერა.

ზაფხულის პირველი რიტუალი, ბაბუაწვევების კრეფა და ღვინის წურვა დასრულდა. ახლა მას მეორე რიტუალი ელოდა: მოძრაობა, მაგრამ ბიჭი სრულიად უძრავად იდგა.

- დაგ... წამო... დაგ!.. - გაქცეული ბიჭების ხმები სადღაც შორს მიწყდა.

- მე ცოცხალი ვარ! - ხმამაღლა წარმოთქვა დაგლასმა, - მაგრამ ამას რა აზრი აქვს? ისინი ჩემზე უფრო ცოცხლები არიან. როგორ?! რანაირად?!

იღგა მარტო, საკუთარ უძრავ ფეხებს დაშტერებოდა, ვიდრე უეცრად არ მიაგნო ამ კითხვაზე პასუხს.

\* \* \*

იმ საღამოს, გვიან, დაგლასი და ტომი დედ-მამასთან ერთად კინოთეატრიდან ბრუნდებოდნენ. დაგლასმა განათებულ ვიტრინაში ტენისის ფეხსაცმელები შენიშნა. სწრაფად აარიდა თვალი, მაგრამ იგრძნო, ფეხები წუთით როგორ გაუშეშდა, თითქოს კოჭებში ვიღაც ჩაეჭიდაო. ისევ დაიძრა ადგილიდან, მაგრამ მიწა უხილავ მანევს უგებდა. მალაზიის თავზე გადაჭიმული ჩარდახი მისმა მოძრაობამ შეარხია. დედ-მამა და ძმა მშვიდად განაგრძობდნენ გზას დაგლასის მხარდამხარ. დაგლასი შეტრიალდა, უკან-უკან განაგრძო სვლა, თან უკან დარჩენილ შუაღამის ვიტრინასა და იქ გამოფენილ ფეხსაცმელებს თვალს არ აცილებდა.

- კარგი ფილმი იყო, - თქვა დედამ.

- ჰო, კარგი იყო... - ჩაილულულა დაგლასმა.

ივნისში უკვე დაგვიანებული იყო საგანგებო ფეხსაცმლის ყიდვა, - იმ ფეხსაცმლისა, ბილიკებს ზაფხულის შხაპუნა წვიმასავით რბილად და უხმაუროდ რომ ეხებოდა. ივნისი იღგა და მიწა ახალი ენერგიით ივსებოდა, ყველაფერი მოძრაობის ჟინს აეტანა. ბალახი კვლავაც ღვარად მოედინებოდა მინდვრებიდან, გზებსა და ტროტუარებს ეხლებოდა, სახლებს იტაცებდა და ნაპირზე რიყავდა. ქალაქი ყოველ წუთს შეიძლებოდა გემივით გადაბრუნებულიყო და ისე ჩაძირულიყო, რომ კვალიც არსად დაეტოვებინა. დაგლასი კი მონუსხული იღგა მკვდარი ცემენტითა და წითელი აგურით ნაგებ ქუჩაზე და წესიერად ნაბიჯსაც კი ვერ დგამდა.

- მამა! - დაგმა ვეღარ გაუძლოცდუნებას, - იქ, ვიტრინაში, „ზღვის ღრუბლისძირიანი სუპერმარდი სპორტული ფეხსაცმელი“...

მამა არც კი მიბრუნებულა.

- იქნებ მითხრა, რატომ დაგჭირდა ახალი წყვილი ბოტასი? შეგიძლია ამიხსნა?

- ჰმ-მ...

იმიტომ, რომ ამ ბოტასში თავს ისე გრძნობ, თითქოს წელს პირველად გაირბინე ფეხშიშველამ ბალახზე; თითქოს ზამთარში ფეხები თბილი ლოგინიდან გარეთ გაყავი და ფანჯარაში შემოქროლილ ცივ ნიავს შეუშვირე, კარგა ხანს გააჩერე ასე, შემდეგ ისევ შემოყავი საბნის ქვეშ და ახლა ტერფები დაპრესილი თოვლივით გაქვს გათოშილი. სპორტული ფეხსაცმლის ჩაცმისას მუდამ ერთი და იგივე გრძნობა გეუფლება, როგორც მაშინ, ამ ზაფხულს პირველად რომ გადახვედი ნაკადულის მდორე წყალზე და საკუთარი ტერფები ქვევით, წყლისა და სინათლის პრიზმულ გარდატეხაში დაინახე, ზედაპირზე მდებარე რეალური სხეულისაგან ნახევარი ღუმივით აცდენილი.

- მამა, - თქვა დაგლასმა, - ეს ძალიან ძნელი ასახსნელია.

იმათ, ვინც სპორტულ ფეხსაცმელს ამზადებენ, საიდანღაც ზუსტად იციან, თუ რა სჭირდებათ და რა სურთ ბიჭებს: ლანჩებში ზეფირსა<sup>9</sup> და წვრილად ჩახვეულ ზამბარებს აფენენ, დანარჩენ ნაწილს კი მინდვრის მზეზე გამოხუნებულ-გამხმარი ბალახებისგან ქსოვენ. სადღაც, ფეხსაცმლის რბილ სიღრმეში, ხარირმის თხელი, მკვრივი ძარღვები ჩაუმალავთ. ამ ფეხსაცმლის დამამზადებლებს უეჭველად ძალიან ბევრჯერ უნახავთ, თუ როგორ არხვეს ქარი ხეებს და როგორ ჩაედინება მდინარეები ტბების სილურჯეში. შეუძლებელია ამის ახსნა და განსაზღვრა, მაგრამ ერთი კი ცხადზე ცხადია: ამ ფეხსაცმელში თვით ზაფხულია.

დაგლასი ამ ყოველივეს სიტყვებით გადმოცემას შეეცადა.

- მესმის, - თქვა მამამ, - მაგრამ შარშანდელ ბოტასებს რაღა დაემართა? რატომ არ შეგიძლია უბრალოდ კარადიდან გამოიღო და ჩაიცვა?

ჰმ, ნამდვილად სიბრაღულის ღირსნი იყვნენ კალიფორნიაში მცხოვრები ბიჭები, მთელ წელიწადს ტენისის ფეხსაცმელი რომ ეცვათ! მათთვის ხომ უცხო იყო ეს განცდა: ფეხებიდან ზამთარს რომ ჩამოიხსნი, თოვლითა და წვიმით დამძიმებული რკინისძირებიანი ტყავის ფეხსაცმლისგან გათავისუფლები და მთელი დღე ფეხშიშველი ირბენ, მერე კი

9 ზეფირი - აქ: საკონდიტრო ნაწარმი, მზადდება შაქარში ათქვეფილი ხილ-კენკრის პიურეთი და კვერცხის ცილით.

ახალთახალ ბოტასებში ჩაყოფ ფეხს, რაც თვით ფეხშიშველა სირბილზე უკეთესიც კია! ამ მაგიას მხოლოდ ახალი ფეხსაცმელი ფლობდა. ზუსტად პირველი სექტემბრის წინაღამით ეს მაგია კვდებოდა, მაგრამ ახლა, ივნისის მიწურულს, მისი ჯერ კიდევ უხვი მარაგი რჩებოდა დაუნარჯავი და ასეთი ფეხსაცმელი ხეებზე, მდინარეებსა და სახლებზე გადაგახტუნებდა. თუ მოისურვებდი, ღობეებსაც გადაახტებოდი, ტროტუარებსაც და ძაღლებსაც.

- როგორ არ გესმის?! - შეჰყვირა დაგლასმა, - შარშანდელ ფეხსაცმელს ვერ ჩავიცვამ!

შარშანდელი ფეხსაცმელი შიგნიდან მკვდარია. ის არაჩვეულებრივი იყო შარშან, პირველი ჩაცმისას, მაგრამ ყოველი ზაფხულის ბოლოს საიდანღაც მოდიოდა გარდაუვალი ცოდნა იმისა, რომ ამ ფეხსაცმლით მდინარეებს, ხეებსა და სახლებს ვეღარ გადაახტებოდა, რომ ის გამოიფიტა და მოკვდა. ზაფხული ის იყო, იწყებოდა და ბიჭიც უტყუარად გრძნობდა, რომ ახალი ფეხსაცმლით ყველაფერს შეძლებდა, აბსოლუტურად ყველაფერს.

სახლის კიბეს აუყენენ.

- შენი ჯიბის ფული დაზოგე, - უთხრა დაგს მამამ, - და ხუთ-ექვს კვირაში...

- ...ზაფხულიც დამთავრდება!

როცა სინათლე ჩააქრეს და ტომს ჩაეძინა, დაგლასი იწვა და შორს, საწოლის ბოლოში, მთვარის შუქით განათებულ საკუთარ ტერფებს აკვირდებოდა. ისინი ახლა რკინისძირებიანი ზამთრის ფეხსაცმლისგან კარგა ხნით გათავისუფლდნენ, თითქოს უმძიმესი ლოდები ჩამოსწყდათო.

„გამართლება. უნდა მოვიფიქრო გამართლება ახალი ფეხსაცმლისათვის“.

მაშ, ასე: როგორც ცნობილია, ქალაქის მიმდებარე ბორცვები აკლებული ჰქონდათ მეგობრებს, რომლებიც აფრთხობდნენ ძროხებს, ბარომეტრის სიზუსტით რეაგირებდნენ ატმოსფერულ ცვლილებებზე და იხრუკებოდნენ მზეზე. მათი კალენდრის ფურცლებივით აქერცლილი კანი მზის სულ ახალ-ახალ სხივებს ისრუტავდა. ასეთ მეგობრებს ფეხი რომ აუწყო, მელიებსა და ციყვებზე სწრაფი უნდა იყო; ხოლო რაც შეეხება ქალაქს, ის ბრდღვინავდა სიცხისაგან ჩვეულებრივზე მეტად გაღიზიანებული მტრების რისხვით, ზამთრის ყველა წაკინკლავება და შეურაცხყოფა ახლა განსაკუთრებით მძაფრად რომ მოაგონდათ. დაეწიე მეგობრებს, უკან მოიტოვე მტრები! - აი, „კრემისფერი, სუპერმარდი ფეხსაცმლის“ სლოგანი, - სამყარო მეტისმეტად სწრაფად მიქრის? გსურს, დაეწიო? გსურს, მუდამ ფხიზელ მზადყოფნაში იყო? მაშ, იყავი სუპერსწრაფი!

ბიჭმა თავისი ყულაბა შეანჯღრია. იქიდან სუსტი ჩხრიალი მოისმა, ხელში ფულის მსუბუქი წონა იგრძნობოდა.

საკუთარ თავს უთხრა: თუკი რაღაც გსურს, შენით უნდა მიაღწიო. ამაღამვე უნდა შევიშუშაო გეზი ამ ჯუნგლების გასაკვალად...

ქალაქის ცენტრში ერთიმეორის მიყოლებით ჩაქრა მაღაზიის განათებები. ფანჯარაში ღამის სიომ შემოუბერა. ბიჭს თითქოს მდინარის ტალღა გადაევიწყო. მისი ტერფები სიამოვნებით გაჰყვებოდნენ ამ ღინებას.

სიზმარში ესმოდა, როგორ მირბოდა, მირბოდა, მირბოდა ბოცვერი რბილ ბალახში.

მოხუცი მისტერ სენდერსონი ისე მიმოდიოდა თავის ფეხსაცმლის მაღაზიაში, როგორც ზოომაღაზიის მეპატრონე უნდა მიმოდიოდეს მსოფლიოს ყველა კუთხიდან ჩამოყვანილი ცხოველების გალიებს შორის. გზადაგზა ხელის ოღნავი შეხებით ეფერებოდა თითოეულ წყვილს. ვიტრინაში გამოფენილ ფეხსაცმელებსაც გადაუსვა ხელი, სათუთად გაუსწორა თასმები, ამოუწია ენები, შემდეგ ზუსტად ხალიჩის შუაგულში გაჩერდა, მიმოიხედა და კმაყოფილების ნიშნად თავი დახარა.

შორიდან ქუხილი მოისმა.

წამის წინ სენდერსონის ფეხსაცმლის მაღაზიის კარში არავინ ჩანდა, ახლა კი მის ზღურბლზე დაგლას სპოლდინგი ატუზულიყო. ბიჭი უხერხულად იმშუშნებოდა თავის ტყავის ფეხსაცმელებს მიშტერებული, თითქოს უჭირსო ამ მძიმე ლოდების ადგილიდან დაძვრა. როცა ის ზღურბლზე შეჩერდა, ქუხილის ხმაც მინელდა. როგორც იქნა, მტკივნეულად ნელა შეაბიჯა შუადღის მზიანი ქუჩიდან. თვალს ვერ სწყვეტდა ხურდა ფულს, ხელისგულზე რომ ჰქონდა დახვავებული. დახლზე ისე ჩაამწკრივა ათ, ოცდახუთ და ორმოცდაათცენტიანი მონეტების სვეტები, გეგონებოდათ, ჭადრაკს თამაშობს და ნებისმიერმა გაუფრთხილებელმა სვლამ შეიძლება თამაშს ბოლო მოუღოსო.

- გიჯობს, ხმა არ ამოიღო! - უთხრა მისტერ სენდერსონმა.

დაგლასი შედგა და ადგილზე გაიყინა.

- ჯერ ერთი, მშვენივრად ვიცი, რისი ყიდვაც გინდა, - განაგრძო მისტერ სენდერსონმა, - მეორეც, ყოველ ნაშუადღევს ჩემი ვიტრინის წინ დგახარ; თუ გგონია, ვერ გამჩნევ, ძალიან ცდები. მესამეც, თუკი ყველაფერს გავამხელთ, შენ გსურს „საკუთესო კრემისფერი სუპერმსუბუქი და სუპერმარდი ტენისის ფეხსაცმელი“: აი, ის, „ფეხზე მენტოლის სიგრილის განცდას რომ მოგანიჭებთ!“ მეოთხეც, გინდა, ნისიად გაგატანო.

- არა, ნისიად არა, - დაგლასი ისე ქოშინებდა, გეგონებოდათ, მთელი დამე სიზმარში შეუსვენებლად ირბინაო, - ნისიაზე უკეთეს რამეს გთავაზობთ! - ჰაერი პირით შეისუნთქა, - გთხოვთ, მისტერ სენდერსონ, ერთი პატარა თხოვნა შემისრულებთ. შეგიძლიათ, გაიხსენოთ, სერ, თქვენ თვითონ უკანასკნელად როდის გეცვათ სუპერმარდი სპორტული ფეხსაცმელი?

მისტერ სენდერსონს სახე მოედუნა.

- ოო, ათი, ოცი თუ სულაც ოცდაათი წლის წინათ. ამას რატომ მეკითხები?

- მისტერ სენდერსონ, არ გეჩვენებათ, რომ თქვენი კლიენტების წინაშე ვალდებული ბრძანდებით, წუთით მაინც მოისინჯოთ ფეხსაცმელი, რომელსაც ყიდით, რათა იცოდეთ, მასში კაცი თავს როგორ გრძნობს? დიდი ხნის წინათ განცდილი შეგრძნება თანდათან ნელდება და ბოლოს გავიწყდება, რა და როგორ იყო. სიგარეტის გამყიდველი ხომ ეწევა? ტკბილეულის დახლის მეპატრონე უეჭველად წუწნის იმ კანფეტებს, რომელსაც ყიდის. ასე რომ...

- ეტყობა, ვერ შენიშნე, - ჩაურთო მოხუცმა, - მე ფეხსაცმელი მაცვია.

- მაგრამ არა სპორტული ფეხსაცმელი, სერ! სპორტულ ფეხსაცმელს ისე ვერ გაყიდი, თუ მასზე არ გიჟდები, და თუკი არ გცმია, როგორღა უნდა გაგიჟდე?

სიტყვების ამ კორიანტელის წინაშე მისტერ სენდერსონმა ოდნავ უკან დაიხია, მერე ხელი ნიკაპზე მოისვა.

- ჰოო...

- მოდი, ასე მოვიქცეთ, - არ ცხრებოდა დაგლასი, - თქვენი საქონელი მომყიდეთ და სანაცვლოდ მეც არანაკლებ ფასეულ საქონელს მოგყიდით.

- შვილო, ამ გარნიგებისათვის აუცილებელია, სპორტული ფეხსაცმელი ჩავიცვა? - იკითხა მოხუცმა.

- მთელი გულით ვისურვებდი ამას, სერ!

მოხუცმა ამოიოხრა. წუთის შემდეგ მძიმედ სუნთქავდა და ვიწრო ტერფებზე მორგებული ტენისის ფეხსაცმლის თასმებს იკრავდა. მოხუცის მკაცრი, ოფიციალური კოსტიუმის გაგრძელებად ქცეულმა ფეხსაცმელებმა იმწამსვე უცხო და გზააბნეული იერი მიიღეს. მისტერ სენდერსონი ფეხზე წამოდგა.

- აბა, რას გრძნობთ? - შეეკითხა ბიჭი.

- რას ვგრძნობ? გადასარეჯად ვგრძნობ თავს, - უპასუხა კაცმა და ისევ დასაჯდომად მოემზადა.

- მოიცადეთ, გთხოვთ! - მუდარის ნიშნად ხელი გაიშვირა დაგლასმა, - ერთი წუთით, მისტერ სენდერსონ! ახლა, თუ შეიძლება, ოდნავ წინ



გადმოიზნიქეთ, მერე - უკან, ცოტათი ახტით-დახტით, ერთი-ორჯერ ჩაბუქნეთ, მე კი ამასობაში დარჩენილ სათქმელს მოგახსენებთ. აი, რისი თქმა მინდოდა: მე მოგცემთ მთელ ჩემს ფულს, თქვენ მომცემთ ფეხსაცმელს, ერთი დოლარი თქვენი ვალი დამრჩება, მაგრამ, მისტერ სენდერსონ, მაგრამ... იცით, რა მოხდება, როგორც კი ფეხსაცმელს ჩავიცვამ?

- რა?

- რა და: ბრახ! ელვისუსწრაფესად მივარბენინებ თქვენს გზავნილებს დანიშნულების ადგილას, მოგიტანთ ყავას, დაწვავ თქვენს ნაგავს, გავიქცევი ფოსტაში, ტელეგრაფის სადგურზე, ბიბლიოთეკაში! წამში თორმეტჯერ მაინც მნახავთ გაქცეულსა და მობრუნებულს. შეიგრძნობთ თუ არა ამ ფეხსაცმელს, მისტერ სენდერსონ? ატყობთ, რა სისწრაფით შეუძლია გამაქროლოს? გრძნობთ, რა ხტუნვისა და რბოლის ენერგიითაა დამუხტული? როგორ გეუფლება ჩაცმისთანავე, აღარასოდეს გტოვებს მარტოს და როგორ არ მოსწონს, როცა უძრავად დგახარ! გჯერათ, რომ წამში მოგიგვარებთ ყველა იმ საქმეს, რითაც თავის გაცხელება არ გსურთ? თქვენ მშვიდად იჯდებით სიგრილეში, მე კი თქვენთვის მთელ ქალაქს შემოვირბენ! ოღონდ სინამდვილეში ამ ყველაფერს მე კი არა, ეს ფეხსაცმელები გააკეთებენ: შემოლილივით გადაკვეთენ ქუჩას, გზას მოკლეზე მოჭრიან, მეორე წუთში კი ისევ აქ გაჩნდებიან!

მისტერ სენდერსონი ამ ბგერათა ნიაღვარში გაოცებული იდგა. როცა სიტყვებმა სიჩქარეს უმატეს, ისიც გაჰყვა მათ დინებას; სულ უფრო ღრმად ჩაეფლო ფეხსაცმელში, ადგილზე როკვა დაიწყო, ქუსლები და თითის წვერები თავისთავად აუცეკვდა. უნმოდ და თითქმის შეუმჩნევლად ირწეოდა, მის სხეულს თითქოს ღია კარში შემოქროლილი ნიავი არხევდა. ფეხსაცმელები უჩუმრად ჩაეფლნენ ხალიჩაში, როგორც სარეველა ბალახსა და რბილ მიწაში. მოხუცი უეცრად საზეიმო გამომეტყველებით შეხტა და კვლავ ჩაემვა მთრთოლავ აფუებულ ცომში, ურბილეს თინაში. განცდებმა ისე გადაურბინეს სახეზე, თითქოს უამრავი ფერადი ნათურა მიანათეს და კვლავ ჩააქრესო. პირი ოდნავ ღია დარჩა, ძლივს მოახერხა ატოკებული სხეულის დაშოშმინება. ბიჭიც დადუმდა და ახლა ორივენი ურთიერთის პირისპირ იდგნენ და, ვება დუმილით მონუსხულნი, ერთმანეთს მიმტერებოდნენ.

გარეთ, მზით გავარჯარებულ ტროტუარზე, ვიდაცებმა ჩამოიარეს.

მოხუცი და ბიჭი ისევ ისე იდგნენ, ბიჭი შინაგანი მხურვალეებისაგან თრთოდა, მოხუცს კი სახე ზეციური გამოცხადების შუქით გაცისკროვნებოდა.

- შვილო, - როგორც იქნა, ხმა ამოიღო კაცმა, - რას იტყვი, ასე, ხუთი წლის შემდეგ მაღაზიაში შეგირდად რომ აგიყვანო?

- ოო, დიდი მადლობა, მისტერ სენდერსონ, მაგრამ ჯერ არ გადამიწყვეტია, რა უნდა გამოვიდე.

- რაც უნდა გადაწყვიტო, შვილო, - უთხრა მოხუცმა, - ყველაფერი გამოგივა. შენ ვერავინ შეგაჩერებს.

მოხუცმა მსუბუქი ნაბიჯით გადაკვეთა მაღაზია ათასობით ყუთით დაფარული კედლის მიმართულებით, მალევე დაბრუნდა ბიჭისთვის განკუთვნილი ფეხსაცმლით და, სანამ დაგლასი თასმებს იკრავდა, შემდეგ კი იდგა და ელოდა, ბარათზე სია ჩამოეწერა.

ბარათი ბიჭს გაუწოდა.

- ამ საქმეებს დღესვე მომიგვარებ. რომ დაასრულებ, ბარიბარში ვიქნებით და სამსახურიდანაც გაგათავისუფლებ.

- გმადლობთ, მისტერ სენდერსონ! - ბიჭი ხტუნვა-ხტუნვით გაემართა გასასვლელისაკენ.

- მოიცადე! - დაიყვირა მოხუცმა.

დაგლასი შეჩერდა და მიუბრუნდა.

მისტერ სენდერსონი მთელი სხეულით წინ გადაიხარა:

- რას გრძნობ?

ბიჭმა დაიხედა უკვე მდინარეთა სიდრმესა და მწვანე ტევრებში ჩაფლულ ტერფებზე, ქალაქიდან შორს რომ მიჰყვებოდნენ უხილავ ნიავს, მერე გაბრწყინებული თვალებით ახედა მოხუცს, ბაგე აამოძრავა, მაგრამ ერთი ბგერაც ვერ ამოთქვა.

- ანტილოპები? - იკითხა მოხუცმა, თან მზერა ბიჭის სახიდან ფეხსაცმელებზე გადაიტანა, - ქურციკები?

ბიჭი ჩაფიქრდა, წამით შეყოვნდა, შემდეგ გაცხარებით დაუკრა თავი. თითქმის იმწამსვე გაუჩინარდა, სისინით გაიქროლა და გაქრა. დია კარის ჭრილი ისევ დაცარიელდა. ტენისის ფეხსაცმელების ხმა ტროპიკული მზის გახუნებულ ჰაერში მინელდა.

მისტერ სენდერსონი ერთხანს კიდეც იდგა ზღურბლზე მზეს მიფიცხებულის და აყურადებდა. გაიხსენა, დიდი ხნის წინ, ბიჭობაში, როგორ ესიზმრებოდა ეს ხმა. უნატიფესი არსებები მსუბუქად მიხტოდნენ ლურჯი ცის ფონზე, სერავდნენ ჯაგნარს, ხეების ჩრდილებს, და სიშორეში მხოლოდ ძლივს გასაგონ ექოს ტოვებდნენ.

- ანტილოპები, - გაიმეორა მისტერ სენდერსონმა, - ქურციკები.

დაიხარა ბიჭის მიერ მიტოვებული ზამთრის ფეხსაცმლის ასადებად, მივიწყებულ თქემსა და კარგა ხნის დამდნარ თოვლს რომ დაემძიმებინა. შემდეგ რბილად და აუჩქარებლად შებრუნდა მათთან ერთად შიგნით, ცივილიზაციისაკენ...

\* \* \*

ყვითელი ნიკელისყდიანი ბლოკნოტი და „ტიკონდეროგას“ ფირმის ყვითელი ფანქარი გამოიღო. ბლოკნოტი გადაშალა. ფანქრის წვერს ენა აუსვა.

- ტომ, - გასძახა ძმას, - შენი სტატისტიკის შემხედვარეს ერთი აზრი გამიჩნდა. მეც შენნაირად მოვიქცევი, ყველაფერს დავაფიქსირებ. მაგალითად, თუ ატყობ, რომ ყოველ ზაფხულს ზუსტად იმავე თანამიმდევრობით ვაკეთებთ იმავეს, რასაც გასულ ზაფხულს ვაკეთებდით?

- რას, დაგ?

- თუნდაც იმას, რომ ბაბუაწვერას ღვინოს ვწურავთ, ტენისის ახალ ფეხსაცმელს ვყიდულობთ, პირველად ვუშვებთ ცაში ფეიერვერკს, ლიმონათს ვხარშავთ, ფენისგულში ხიჭვი გვერჭობა, ველურ ყურძენს ვაგროვებთ. წლიდან წლამდე ერთი და იგივე მოვლენები უცვლელად მეორდება, მაგრამ ეს ზაფხულის მხოლოდ ერთი ნახევარია, ტომ.

- მეორე ნახევარი რაღაა?

- ის, რასაც წელს კი არა, სიცოცხლეში პირველად აკეთებ.

- მაგალითად, ზეთისხილი რომ გავსინჯე?

- უფრო მნიშვნელოვან რამეებს ვგულისხმობ. მაგალითად, როცა აღმოაჩინე, რომ ჰაპამ და მამამ შეიძლება მსოფლიოში სულმთლად ყველაფერი არ იცოდნენ.

- როგორ არა! სულ ყველაფერი იციან, ამაში ეჭვი არ შეგეპაროს!

- ტომ, ნუ მეკამათები. ეს უკვე ჩანიშნული მაქვს „აღმოჩენებისა და გამოცხადებების“ განაყოფში. სულ ყველაფერი არ სცოდნიათ, მაგრამ ეს სრულიადაც არ ყოფილა დანაშაული. ესეც აღმოვაჩინე.

- კიდევ რა სიგიჟე გაქვს მანდ ჩანიშნული?

- ის, რომ ცოცხალი ვარ.

- ეგ ხომ უკვე ძველია!

- ის, რომ ამაზე ვფიქრობ, ამას ვაცნობიერებ, ახალია, რაღაც-რაღაცებს ისე ვაკეთებთ, რომ ვერც კი ვამჩნევთ. მერე კი უცებ შეხედავ და გაიაზრებ იმას, რაც ხდება, და ისეთი გრძნობა გაქვს, თითქოს ეს პირველად ხდებოდეს. ახლა ვაპირებ, ზაფხული ორ ნაწილად დავყო. ამ ბლოკნოტის

პირველი ნაწილის სათაურია „რიტუალები და ტრადიციები“: წლუულს პირველად როგორ მოვხარშეთ ლუდი; პირველად რომ გავირბინე ფეხშიშველამ ბალახზე; კინალამ რომ დავიხრჩვი ტბაში ჭყუმპალაობისას, ესეც - წელს პირველად; მერე - პირველი საზამთრო; პირველი კოდოს ნაკბენი; ბაბუაწვერას პირველი მოსავალი. სულ ისეთი რამეებია, გამუდმებით რომ მეორდება, თან ამაზე არც კი ვფიქრობთ, აი, აქ კი, ბოლოში, როგორც გითხარი, მეორე ნაწილია: „ადმოჩენები და გამოცხადებები“, ან იქნებ „მიგნებები“ უკეთესი სიტყვა იყოს, ან სულაც „გასხივოსნებები“, ჰა, რას იტყვი? მოკლედ, სიტყვაზე: დაკავებული ხარ რაიმე ძველი, კარგად ნაცნობი საქმით, თუნდაც ბაბუაწვერას ღვინის მოხუფვით, ამას, ცხადია, „რიტუალებსა და ტრადიციებში“ შეიტან, მერე კი ჩაუფიქრდები ამ საქმიანობას და, აი, რაც ამ დროს თავში მოგივა, რაგინდ გიჟური აზრი იყოს, უკვე „ადმოჩენებსა და გამოცხადებებში“ ჩაინიშნავ. აი, ღვინის შესახებ რა ჩავწერე: „ყოველი ახალი ბოთლის მოხუფვისას 1928 წლის კიდევ ერთ დიდ ულუფას ინახავ საიმედოდ, მომავლისათვის იმარაგებ“. როგორ მოგწონს, ტომ?

- ერთი კილომეტრით უკან ჩამოვრჩი იმას, რისი თქმაც გინდოდა.

- მოდი, სხვას წაგიკითხავ. წინ, „ტრადიციებში“, მიწერია: „1928 წლის ზაფხულში პირველად წავიჩხუბეთ და მამამ პირველად გამტყიპა. 24 ივნისის დილა“. „გამოცხადებებში“ კი ჩავწერე: „უფროსებისა და ბავშვების უთანხმოების მიზეზი მუდამ ის არის, რომ ისინი განსხვავებულ რასებს მიეკუთვნებიან. შეხედეთ მათ: ისინი ყველაფრით განსხვავდებიან ჩვენგან. მერე შემოგვხედეთ ჩვენ: მათ არაფერში ვგავართ. ორი სხვადასხვა მოდგმაა და ის ვერასოდეს გახდება ერთი“. კარგად შეიგნე, ტომ!

- დაგ, ათიანში გაარტყი! ზუსტია! ამიტომაც გვიჭირს დედასა და მამასთან საერთო ენის გამონახვა. დილიდან ღამემდე სულ პრობლემა! ბიჭო, შენ გენიოსი ხარ!

- თუ ამ სამ თვეში შენიშნავ, რომ რაღაც მოვლენა მეორდება, მითხარი, კარგი? მერე ჩაუფიქრდი ამ მოვლენას და ესეც მითხარი. შრომის<sup>10</sup> დღეს ზაფხულის შედეგები შევაჯამოთ და ვნახოთ, რა გამოგვივა!

- ახლავე შემოძლია ერთი სტატისტიკური მონაცემი გითხრა. ფანქარი მოიმარჯვე, დაგ. მსოფლიოში ხუთი მილიარდი ხეა. დათვლილი მაქვს. თითოეულ ხეს საკუთარი ჩრდილი აქვს, ხომ ასეა? ესე იგი, საიდან ჩნდება ღამე? ახლავე გეტყვი: ხუთი მილიარდი ხის ძირიდან გამოცოცდებიან ჩრდილები! წარმოიდგინე! ჩრდილები ჰაერში ირევიან და ჰაერს ამღვრევენ.

10 შრომის დღე - აშშ-ში დღესასწაულობენ სექტემბრის პირველ ორშაბათს.

რამენაირად რომ მოვახერხოთ და ეს წყეული ხუთი მილიარდი ჩრდილი თავ-თავიანთ ხეებქვეშ დავაკავოთ, მაშინ შეგვეძლება ნახევარი ღამე ფეხ-ზე გავატაროთ, დაგ, იმიტომ, რომ მაშინ საერთოდ არ დაღამდება! აი, ხომ ხედავ: ძველიცაა და თან ახალიც.

- ჰო, მართალი ხარ, თან ძველია, თან ახალი, - დაგლასმა ენა აუსვა „ტიკონდეროგას“ ყვითელი ფანქრის წვერს, გაგიჟებით უყვარდა ამ ფირმის დასახელება.

- აბა, თავიდან გამიმეორე!

- ხუთ მილიარდ ხეს თითო ჩრდილი აქვს...

\* \* \*

ღიას, ზაფხული ტრადიციებისაგან შედგებოდა. თითოეულს საკუთარი დრო და ადგილი ჰქონდა. აი, ჩაიარეს ლიმონათისა და ცივი ჩაის დამზადების, ღვინის, ფეხსაცმლის თუ ფეხშიშველ ა სირბილის ადათ-წესებმა და სახლის წინ, ვერანდაზე, საქანელას ჩამოკიდების ადათიც მშვიდი ღირსებით მიჰყვა სხვებს.

ზაფხულის მესამე დღის ნაშუადღევს პაპა გამოჩნდა სახლის კარში და პირქუშად ახედა ვერანდის ქერში გაყრილი ორი რგოლის უსინათლო თვალებს. შემდეგ ბალბების მწკრივით მორთული მოაჯირისაკენ გაემართა, აქაბივით<sup>11</sup> შეათვალიერა მშვიდი დღე და კრიალა ცა, შემდეგ ნერწყვით დასველებული თითის წვერით ქარის მიმართულება შეამოწმა, ქურთუკი გაიხადა და სახელოები დასავლეთის ქარს შეუმვირა. საღმით უპასუხა სხვა კაპიტნების შეგებებას, მასავით რომ გამოსულიყვნენ ყვავილებიან ჰარმალებზე და მიდამოს ტალღების მშვიდი რხევით მონუსხულები, ყურს აღარ უგდებდნენ ვერანდის ფარდის უკან ფინია ძაღლებივით მოწკავეწკავე ცოლებს.

- კარგი, დაგლას, მოდი, ჩამოვიკიდოთ.

გარაჟიდან გამოიტანეს დამტვერილ ბრეზენტში გახვეული საქანელა, ზაფხულის სადამოთა მშვიდი დღესასწაულების განუყრელი მონაწილე, რომელიც პაპამ ვერანდის ქერში გაყრილ რგოლებზე ჯაჭვებით ჩამოკიდა.

დაგლასი მსუბუქი იყო და პირველი მოკალათდა სავარძელში. წუთიც და, პაპა მთელი თავისი პატრიარქალური სიმძიმით ფრთხილად დაჯდა ბიჭის

<sup>11</sup> აქაბი - იგულისხმება კაპიტანი აქაბი, ამერიკელი კლასიკოსი მწერლის, ჰერმან მე-ღვილის (1819-1891) რომან „მოზი დიკის“ ჰერონაჟი.

გვერდით. ისხდნენ, ერთმანეთს უღიმოდნენ და თავს უკრავდნენ, თან მსუბუქად ირწეოდნენ, წინ და უკან, წინ და უკან.

ათი წუთის შემდეგ ვერანდაზე გამოჩნდა ბებო ვედროთი და ცოცხით ხელში და ცოტა ხანში ფიცრული იატაკი ერთნაირად ალაპლაპდა. ოთახებიდან გამოიტანეს სკამები, სარწეველები და შეზღონგები.

- მიყვარს გარეთ ჯდომა ზაფხულის პირველ დღეებში, - თქვა პაპამ, - ვიდრე კოდოები მომრავლდებიან.

საღამოს შვიდი საათისათვის სასადილო ოთახის ფანჯარას გარედან თუ მიადგებოდით, გაიგონებდით, ყველა სკამი ჭრიალით როგორ სცილდებოდა მაგიდას და ვიდაც როგორ აწყობდა მელოდიას ძველ ფორტეპიანოზე. ტაფები ჟღარუნით ეხლებოდა ჯერ სამზარეულოს ნიჟარის ფსკერს, შემდეგ კი - კედელს. საიდანაც ფირსაკრავის ჩუმი ხმა მოცურავდა, ხოლო მოგვიანებით საღამოს ბინდში ჩაფლულ ქუჩაზე, გოლიათი მუხებისა და თელეების ძირში ჩამწკრივებულ ვერანდებზე, თანდათან, საათიდან გამოსული მექანიკური ფიგურებივით ჩნდებოდნენ ადამიანები.

ესენი იყვნენ ძია ბერტი, ზოგჯერ პაპაც, შემდეგ - მამა და რომელიმე ბიძაშვილი; მამაკაცები მუდამ პირველები გამოეფინებოდნენ საღამოს ბლანტ სივრცეში, მათ ზურგს უკან, უკვე შეგრილებულ სამზარეულოებში, თავიანთი სამყაროს მოწესრიგებით დაკავებული ქალების ხმები ჟღერდა. საერთო ხმაურს მამაკაცების ხმებიც უერთდებოდა, ვერანდის ნაპირზე რამდენიმე წყვილი ტერფი გამოჩნდებოდა, რიკულებიანი ხის მოაჯირები ბიჭებით დაიხუნძლებოდა და დროდადრო, საღამოს განმავლობაში, რაიმე - ბიჭი ან ბალბიანი ქოთანი - აივნიდან მიწაზე მოადენდა ხოლმე ზღართანს.

ბოლოს, როგორც იქნა, კარის ჭრილში ლანდებივით უხმოდ გამოჩნდებოდნენ ბებო, დიდი ბებია, დედა, მამაკაცები წამოიშლებოდნენ, გაიწევ-გამოიწევდნენ და მათ სკამებს დაუთმობდნენ. ქალებს თან ნაირ-ნაირი დასაინავებელი საშუალება გამოჰქონდათ: ღურბინდად დახვეული გაზეთები, ჩალის დაწნული მარაოები, სუნამოდაპკურებული ცხვირსახოცები, რათა საუბრისას თავიანთი სახეების ირგვლივ სიო აემოდრავებინათ.

მეორე დღეს აღარავის ახსენდებოდა, თუ რაზე ბაასობდნენ მთელი საღამო. უფროსების საუბრის თემას საერთოდ არავისთვის ჰქონდა მნიშვნელობა; მთავარი თვით ბგერები იყო, ვერანდის სამი მხრიდან შემოვლებული მსუბუქი ჯებირებიდან გარეთ რომ იღვრებოდა; მთავარი წყვდიადი იყო, ზეციდან ჩამომდინარე შავი წყალივით რომ ტბორავდა ქალაქს; კიდევ - სიგარეტის კვამლი და ის, რომ საუბარი უსასრულოდ გრძელდებოდა.

ქალების ტარტალი ეზოში დრუბლებად ჩამოკიდებულ კოდოების გუნდებს აფრთხობდა, მამაკაცთა ხმები კი ბებერი სახლის ძვალ-რბილში ატანდა; თვალებს თუ მოხუჭავდი და თავს იატაკის ფიცრებს დაადებდი, ეს ხმები შორეული ბრძოლის ყრუ, გაბმულ გუგუნად ჩაგესმებოდა.

დაგლასი ნებიერად გაწვა აივნის მშრალ, გლუვ ფიცრებზე, ეს უსასრულო ხმები ამშვიდებდა, ტალღებივით ჩურჩულით ევლებოდა მის სხეულს, დახუჭულ თვალებს, გაბრუებულ ყურთასმენას, და ასე გაგრძელდებოდა უკუნითი უკუნისამდე. საქანელა-სკამები კალიებივით იჭრიალებდნენ, კალიები საქანელებივით იჭრიჭინებდნენ, წვიმის წყლის დახვავებული კასრი კოდოების ახალ-ახალ თაობებს მოავლენდა ამ ქვეყანაზე, რათა საუბრის თემა არასოდეს დაშრეტილიყო.

ზაფხულის დამით ვერანდაზე ჯდომა ისეთი შვებისა და სილადის მომგვრელი იყო, რომ ამ ტრადიციას აშკარად არასოდეს მიივიწყებდნენ. მუდამ ასევე იბოლებდა ჩიბუხები, მკრთალი ხელები ბინდში საქსოვ ჩხირებს ამოძრავებდნენ, ვერცხლის ქაღალდში გახვეული ნაყინი „ესკიმო“ ყელებს ჩაუგრილებდათ და არც ხალხის მიმოსვლა შეწყდებოდა ოდესმე, რადგან გვიან ღამემდე აქ ყველა ასწრებდა სტუმრობას; მოდიოდნენ ქუჩის მეორე ბოლოს მცხოვრებნი და კარის მეზობლები; მის ფერნი და მის რობერტაც შემოიქროლებდნენ თავიანთი ელექტრომანქანის ზუზუნით, ტომსა და დაგლასს კვარტალის გარშემო გაასეირნებდნენ, შემდეგ აივანზე ჩამოსხდებოდნენ და მარაობით გაიგრილებდნენ ალექსილ დაწვებს; ანდა მისტერ ჯონასი, მეძველმანე, ცხენსა და ორთვალას ხეივნის ბოლოში დატოვებდა და, მწიფე სიტყვებით დახუნძლული, ისე გაბადრული ამოივლიდა აივნის კიბეს, თითქოს ის, რის თქმასაც აპირებდა, ჯერ არასოდეს ეთქვას. და, მართლაც, მისი ერთი და იგივე სათქმელი როგორც მუდამ ახლებურად ჟღერდა. ბოლოს კი, უკანასკნელი დამალობანას თუ ბურთის თამაშის ლაბირინთიდან თავდადრეული ბავშვები გამოჩნდებოდნენ: აქომინებულნი და გახურებულნი, ბუმერანგებივით ჩუმი სისინით დაუბრუნდებოდნენ მთვლემარე ბაღებს, მოგროვდებოდნენ აივანზე და უსასრულო საუბრის ტბორში ჩაძირულნი, თანდათან ამშვიდდებოდნენ...

ო, რა ნეტარება იყო ასე წოლა გვიმრითა და ბალახით დაბურულ ღამეში, ვიდრე მოჩურჩულე ხმებით ნელა იქსოვებოდა წყვილიადის ფარდაგი. უფროსებს მისი აქ ყოფნა კიდევ ავიწყდებოდათ, იმდენად უხმოდ იწვა ხოლმე დაგლასი, და ისიც ყურს უგდებდა საკუთარი და სხვისი მომავლის მათ მიერ დაწყობილ გეგმებს. საუბარი სიგარეტის კვამლის მსუბუქ, მთვარით განათებულ ქულებზე მიირწეოდა, შორს კი, ქუჩაში, რძისფერი ფარვანები



გაცოცხლებული ვაშლის ყვავილებივით მსუბუქად ეხლებოდნენ ლამპიონების მიწებს. და საუბარი დროის ზანტ დინებას მიუყვებოდა მომავლისაკენ...

\* \* \*

იმ საღამოს სიგარების მაღაზიის წინ შეკრებილ მამაკაცებს ყურადღება აფეთქებული ღირიჯაბლების, ჩაძირული სამხედრო გემებისა და დინამიტისკენ მიეპყროთ, უპირველეს ყოვლისა კი აქ ფაიფურის მუნდშტუკში მომწყვდეული იმ ბაქტერიის შესასრუტად მოსულიყვნენ, ოდესმე სასიკვდილოდ რომ გაუყინავდათ ბაგეს. მომაკვდინებელი კვამლის ღრუბლები მჭიდროვდებოდა და კვლავ იფანტებოდა ერთი მამაკაცის ფიგურის გარშემო, იქვე რომ იდგა და სხვების საუბარში წერაქვ-ნიჩბების კაკუნი და ყრუ ჩურჩული რომ ჩაესმოდა: „მიწა ხარ და მიწად იქეც...“ ეს ქალაქის იუველირი, ლეო აუფმანი გახლდათ. ერთხანს დიდრონი, მუქი, წყლიანი თვალებით აშტერდებოდა მწეველ ჯგუფს, ბოლოს ბავშვური ხელები ცისკენ ადაპყრო და აღშფოთებით წამოიძახა:

- შეჩერდით! დვთის გულისათვის, მოშორდით მაგ სასაფლავს!

- ლეო, სავსებით მართალი ხარ, - გამოეხმაურა პაპა სპოლდინგი, სწორედ ამ დროს ძილისპირული სეირნობის შემდეგ რომ ჩამოიარა დაგლასსა და ტომთან ერთად, - ამ საბედისწერო მოლაყებებს მხოლოდ შენ თუ შეაჩერებ, ლეო. გამოიგონე ისეთი რამ, მომავალს კაშკაშა ფერები, დასრულებული სიმრგვალე და უსასრულო სიხალისე რომ შესძინოს. ხომ უკვე გამოიგონე ამდენი ველოსიპედი, შეაკეთე ამდენი ატრაქციონი, ქალაქის კინოთეატრიც ხომ პირველად შენ აამუშავე!

- მართლა, - აჰყვა დაგლასი, - გამოიგონეთ ბედნიერების მანქანა!

მამაკაცებს სიცილი აუტყდათ.

- სულ ტყუილად იცინით, - მიუბრუნდა მათ ლეო აუფმანი, - აქამდე ხომ მანქანებს მუდამ ადამიანების გასანადგურებლად ვიყენებდით! მართალია! რამდენჯერაც გავიფიქრებთ, რომ ადამიანი და მანქანა მშვენივრად უგებენ ერთმანეთს, იმდენჯერ - ბრახ! და ერთი ზედმეტი კბილანის გამო თვითმფრინავები ყუმბარებს გვესვრიან, ავტომანქანები კი კლდიდან უფსკრულში გვჩეხენ. განა ბიჭის თხოვნა სავსებით გამართლებული არ არის? დიანაც, რომ არის!

ლეო აუფმანი დადუმდა და ქუჩის პირას მიყუდებულ თავის ველოსიპედს როგორც დიდ შინაურ ცხოველს, ისე შეაჩხო ხელი.

- ბოლოს და ბოლოს, რას ვკარგავ? - თავისთვის ჩაიბურტყუნა, - ხელის-გულებზე გადატყავებულ კანს, ცოტაოდენ ლითონს, ორიოდ საათის ძილს. აი, ნახავთ, თუ არ გავაკეთებ!

- ლეო! - მიაძახა შეძრწუნებულმა პაპამ, - მართლა კი არ...

მაგრამ ლეო უკვე ატრიალებდა პედლებს ზაფხულის თბილ ბინდში, შორიდან კიდევ მოაწვდინა ხმა:

- გავაკეთებ...

- იცი, - ჩაილაპარაკა მონუსხულმა ტომმა, - მოდი, ნაძლევ: გააკეთებს.

\* \* \*

ლეო აუფმანი მსუბუქად ატრიალებდა პედლებს. ეტყობოდა, სიამოვნებით მიქროდა აგურით მოკირწყლულ ქუჩებზე, რომლებსაც უკვე ეფინებოდა სადამოს ჩრდილი. სიამოვნებდა, ღუმლის სუნთქვასავით გავარვარებული ქარი ნარშავს თავებს რომ აწრიალებდა და წვიმისაგან ალაპლაპებულ ბოძებზე გაჭიმულ ელექტროსადენებს ასისინებდა. ეს კაცი უძილო დამეებში მშვიდად, ხალისით აკვირდებოდა სამყაროს ვეება საათის მოძრაობას, რომელიც, ვინ იცის, ერთ მშვენიერ დღეს შეიძლებოდა მწყობრიდან გამოსულიყო. მრავალი დამის განმავლობაში მის წიკწიკს ხან იმედით, ხან უიმედოდ აყურადებდა.

პედლების ტრიალში გართული ფიქრობდა: მაინც რა განცდებს გვანიჭებს სიცოცხლე? დაბადება, ახალგაზრდობა, სიბერე, სიკვდილი. პირველს ბევრს კი ვერაფერს მოუხერხებ, მაგრამ დანარჩენ სამს?

ბედნიერების მანქანა ოქროს ბორბალივით უტრიალებდა თავში და მის ქერქვეშ ყველა მიმართულებით აფენდა ნათელს...

ისეთი მანქანა იქნება, ბიჭებს ატმის ღინღლი ასკილისეკლებიან სიმკვრივედ რომ გარდაუქმნას, გოგონებში კი შხამასოკოს სიფითრე ვაშლის სიგლუვედ აქციოს. და წლების შემდეგ, როდესაც შენი აჩრდილი ბრტყლად გაწვება მიწაზე და თავადაც საწოლზე გაირთხმება აჩქროლებული გულისცემით, ეს მანქანა ფოთოლცვენის მშვიდი შრიალით ისე მიგაძინებს, როგორც პატარა ბიჭს, მშრალი ნემოს გროვაში მყუდროდ ჩაფლული ნეტარად რომ ეზიარება კვდომის საერთო ნადიმს...

- მამიკო!

ექვსი შვილი, საული, მარშალი, ჯოზეფი, რებეკა, რუთი, ნომომი, ხუთიდან თხუთმეტ წლამდე ასაკისა, სირბილით გამოეგება ბადის ბილიკზე, ყველას ერთდროულად უნდოდა მისთვის ველოსიპედის ჩამორთმევა.

- გელოდებოდით! ნაყინი გვაქვს!

სახლისკენ მიმავალი ბინდში გრძნობდა პარმაღზე მდგარი ცოლის დი-  
მილს.

ხუთი წუთი ჭამის ნეტარმა დუმილმა დაიკავა. ამის შემდეგ ქმარმა მთვა-  
რისფერი ნაყინით სავსე კოვზი პირთან გაიჩერა და ისე შეხედა, თითქოს მი-  
სი გემო მთელი სამყაროს საიდუმლოს შეიცავდა, მერე კი ფრთხილად წარ-  
მოთქვა:

- ლინა, რას იტყვი, ბედნიერების მანქანა რომ გამოვიგონო?

- რა იყო, მოხდა რამე? - შეშფოთდა ცოლი.

\* \* \*

ჰაპა დაგლასსა და ტომთან ერთად შინ ბრუნდებოდა. შუა გზაზე ჩარლი  
ვუდმენმა, ჯონ ჰაფმა და სხვა ბიჭებმა მეტეოროების გუნდით ჩაუქროლეს  
ისეთი შემართებითა და სერიოზულობით, რომ დაგლასი ჰაპასა და ტომს  
მოსწყვიტეს და თან წაიყოლიეს, ხვისკენ.

- შორს არ წახვიდე, შვილო!

- ჰო, კარგი... კარგი.

ბიჭებმა წყვილიდში ჩაყვინთეს.

არც ტომს, არც ჰაპას მთელი დარჩენილი გზის მანძილზე ხმა არ  
ამოუღიათ, მხოლოდ სახლისკენ რომ გადაუხვიეს, ტომმა ძლივძლივობით  
ამოთქვა:

- აუ, რა მაგარი იქნება ბედნიერების მანქანა!

- ხვნემას მოეშვი, - უთხრა ჰაპამ.

სასამართლოს შენობიდან რვაჯერ ჩამორეკა საათმა.

სასამართლოს შენობის საათმა ცხრაჯერ ჩამორეკა. უკვე მართლაც დამ-  
დებოდა ამ პატარა ქუჩაზე, პატარა ქალაქში, დიდ შტატში, უზარმაზარ  
კონტინენტზე, პლანეტა დედამიწაზე, უსასრულო კოსმოსურ სივრცეში  
არარასკენ ან იქნებ რაღაც მიზნისკენ რომ მიექანებოდა, და ტომიც ამ  
უსასრულო ვარდნის ყოველ კილომეტრს შეიგრძნობდა. ის შემოსასვლელი  
კარის ბადეში გადაჰყურებდა ამ მქროლავ სიბნელეს, უცოდველი იერით  
თავს რომ იკატუნებდა, აქაოდა, უძრავად ვარო. თვალებს თუ მოხუჭავდი და  
წამოწვებოდი, მაშინდა გრძნობდი შენი საწოლის ქვეშ სამყაროს ტრიალს,  
მისი შავი ტალღები ყურებში ჩაგედვრებოდა და არარსებულ კლდეებს მი-  
ენლებოდა.

წვიმის სუნი იდგა. დედა აუთოებდა: ტომის ზურგს უკან იდგა, მშრალ, ხრამუნა ტანისამოსს კეტიჩუპის ხუფდასვრეტილი ბოთლით აპკურებდა წყალს.

კვარტალის ბოლოს ერთადერთი მაღაზია რჩებოდა ღია - მისის სინგერის.

ბოლოს, მაღაზიის დაკეტვამდე ზუსტად ერთი-ორი წუთით ადრე, დედამ საქმე გადადო და ტომს დააბარა, გაიქეცი და ერთი პინტა ნაყინი იყიდე, თან მისის სინგერს შეახსენე, კარგად შეფუთოსო.

ბიჭმა ჰკითხა, თუ შეიძლება თავზე ერთი კოვზი შოკოლადის ნაყინი დავადებინო, ვანილისა არ მიყვარსო. დედამ ნება დართო. ბიჭმა ფული მაგრად ჩაბღუჯა და ფეხშიშველა გაიქცა მაღაზიისაკენ, ვაშლისა და მუხის ხეების ძირას დაგებულ თბილ ქვაფენილზე. ქალაქი განაბულიყო, თითქოს ვიღაცას უსაფრდებამო, და მხოლოდ ქრიჭინები ხშიანებდნენ იმ ინდიგოსფერი ხეების ქვეშ, თავიანთ მხურვალე ფოთლებში ვარსკვლავებს რომ მალავდნენ.

შიშველი ტერფების ტყაპატყუპით გადაირბინა ქუჩა და მაღაზიაში მისის სინგერს შეეფეთა, ებრაული მელოდიების ღიღინით ზანტად რომ მიმოდიოდა.

- ერთი პინტა ნაყინი? - გაიმეორა ქალმა, - შოკოლადი ზევიდან? კი, ბატონო!

ბიჭი თვალს ადევნებდა იმას, თუ როგორ ახადა ქალმა ლითონის ხუფი დიდ სანაყინე კასრს და მრგვალი კოვზით მჭიდროდ გაავსო მუყაოს ყუთი ცარცისფერი მასით, შოკოლადის ბურთულა კი თავზე დაადო. ბიჭმა ფული გაუწოდა და ცივი მასა გამოართვა. ტყაპატყუპითვე გავარდა შინ, თან ყინულოვან ყუთს საფეთქელსა და ლოყაზე ისვამდა და ეცინებოდა. მის ზურგს უკან პატარა მაღაზიის ეული შუქი ჩაქრა და მხოლოდღა ქუჩის ფარანიღა ანათებდა შენობის კუთხეს. ქალაქი თითქმის ძიღმა მოიცვა.

ბადიანი კარი რომ გაადო, დედა ისევ საუთოო მაგიდასთან დახვდა. აფორიაქებული და შეწუხებული ჩანდა, მაგრამ მაინც გაუღიმა.

- მამა როდის დაბრუნდება სხლომიდან? - შეეკითხა ბიჭი.

- თერთმეტისთვის ან თორმეტის ნახევრისთვის, - უპასუხა დედამ. ნაყინი სამზარეულოში შეიტანა, გაანაწილა. შვილს შოკოლადის მოზრდილი ულუფა დაუდო. ცოტაოდენი თავისთვის გადაიღო, დანარჩენი გადაინახა „დაგლასისთვის და მამასთვის, როცა შინ დაბრუნდებიან“.

ზაფხულის ღამის უძირო სიმშვიდეში გახვეულები ისხდნენ და ნაყინს აგემოვნებდნენ. მხოლოდ დედა და ბიჭი იყვნენ, პატარა ქუჩაზე, პატარა

სახლში, რომელსაც ყოველი მხრიდან დამე შემოხვეოდა. ბიჭი კოვზს ყოველ ჯერზე გულდაგულ ლოკავდა, ვიდრე ტკბილ მასაში ხელახლა ამოუსვამდა. დედამ კი საუთოო მაგიდა ააღაგა და უთო გასაგრილებლად ჩადგამისთვის განკუთვნილ ღია სათავსში. ახლა ფირსაკრავის გვერდით სავარძელში იჯდა, თავის წილ დესერტს შეექცეოდა და აუჩქარებლად ამბობდა:

- ღმერთო, რა ცხელი დღე იყო. დედამიწა მთელ სიმხურვალეს ისრუტავს, დამით კი ისევ უშვებს. ამ ჩახუთულ ჰაერში რა დაგვაძინებს!

ორივენი ისხდნენ და კარ-ფანჯრების წინ ჩამოწოლილ დამეს უსმენდნენ სრულ სიჩუმეში და ეს იმიტომ, რომ რადიოს ელემენტი დაუჯდა, და კიდეც იმიტომ, რომ დღეს უკვე დაუკრეს ნიკერბოკერის კვარტეტის ყველა ფირფიტა; ელ ჯოლსონისა და „ორი შავი ყვავის“ ფირფიტებიც იქვე ეწყო, გაცვეთილ-დაქანცული. ასე რომ, ტომი ხის იატაკზე იჯდა, ბნელ სივრცეს გაჰყურებდა და კარის ბადეზე ცხვირი იმდენ ხანს აჰყლიტა, ვიდრე ცხვირის წვერი ციცქნა, კვადრატული ანაბეჭდით არ დაეფარა.

- ნეტავ დაგი სად არის? თითქმის ათის ნახევარია.

- მოვა, - დარწმუნებით უპასუხა ტომმა.

ჭურჭლის დასარეცხად გასულ დედას უკან გაჰყვა. ცხელი დამის სიჩუმე კოვზის თუ ფიალის ყოველ წკრიალს აასმაგებდა, უსიტყვოდ შებრუნდნენ სასტუმრო ოთახში, ტახტიდან ბალიშები ააღაგეს და ერთად გამალეს ორსაწოლიანი ლოგინი, რომელსაც ტახტი მთელი დღის მანძილზე საიდუმლოდ ინახავდა საკუთარ წიაღში. დედამ საწოლს თეთრეული გადააფარა და ბალიშები მოხდენილად მიაწყო სასთუმალთან. ბიჭი უკვე პერანგის დილების შეხსნას იწყებდა, როდესაც დედამ უეცრად შეაჩერა:

- ცოტა ხანს მოიცადე, ტომ.

- რატომ?

- იმიტომ, რომ ასეა საჭირო.

- რა უცნაური სახე გაქვს, დე!

დედა წამით ჩამოჯდა, მერე ადგა, კარში გაიხედა და დაიძახა. ბიჭი დიდხანს უგდებდა ყურს მის გაბმულ ძახილს.

- დაგლას, დაგლას, ოჰ, დაგ! დააააგლაააას! - ძახილი თბილ წყვდიაღში იფანტებოდა და უკან აღარ ბრუნდებოდა. ექო მას ყურადღებას არ აქცევდა.

დაგლას. დაგლას. დაგლას.

დაგლას!

და იატაკზე ჩამომჯდარ ტომს სხეულში ისეთმა სიცივემ დაუარა, არც ნაყინს და არც ზამთარს რომ არ უკავშირდებოდა და ზაფხულის სიცხის ნაწილი ხომ არა და არ იყო. შენიშნა, დედას რა უცნაურად უბზინავდა და

აქეთ-იქით მიმოურბოდა თვალები; რა გზააბნეული და შეშფოთებული ჩანდა.

ეს ყველაფერი ერთბაშად დაინახა.

დედამ კვლავ დაიძახა.

ღუმელი.

კიდევ ორჯერ დაიძახა.

ტომი გატრუნული იჯდა ოთახში. ყოველ წამს შეიძლებოდა, გრძელი, ვიწრო ქუჩის ბოლოდან დაგლასი გამონხმურებოდა ძახილს:

- ჰო, დედა! აქა ვარ, მოვდივარ, დე!

მაგრამ ის არ გამონხმურებია. ორი წუთის განმავლობაში ტომი აშტერდებოდა გაშლილ ლოგინს, მდუმარე რადიოსა და ფირსაკრავს, მქრქალ, მრგვალპლაფონებიან ჭადს, წითელი და ღვინისფერი ჩუქურთმებით გაწყობილ ხალიჩას. ფეხი განგებ ჰკრა საწოლის კიდეს, რათა დარწმუნებულიყო, რომ ტკივილს იგრძნობდა. მართლაც, ეტკინა.

ბადიანი კარი კვილით გაიღო და დედამ ტომს უთხრა, წამოდი, ტომ, გავიაროთო.

- საით?

- კვარტალის ბოლომდე. წამო.

ტომმა დედას ჩასჭიდა ხელი. ერთად გაუყვნენ სენტ-ჯეიმზის ქუჩას. მათ ფეხქვეშ ქვაფენილი ჯერაც თბილი იყო, ჭრიჭინების ხმა ჩამოწოლილ წყვდიადში კიდევ უფრო მძლავრად ჟღერდა. კუთხეს შემოუარეს და დასავლეთისკენ, ხევისკენ გაემართნენ.

სადაც შორს მანქანის შუქმა გაიელვა. სიცოცხლის, სინათლის თუ მოძრაობის სხვა არანაირი ნიშანწყალი არ იყო არსად. მათ ზურგს უკან, აქა-იქ, კიდევ რჩებოდა მკრთალი სინათლის კვადრატები - იქ, სადაც ადამიანები ჯერაც არ დაწოლილიყვნენ, მაგრამ სახლების უმრავლესობას წყვდიადში ჩაფლულს ეძინა. ზოგიერთი სახლის ბინადრები კი ვერანდაზე ჩამომსხდარიყვნენ და ღამეულ საუბარში გართულებს სინათლე არ სჭირდებოდათ. გვერდით თუ ჩაუვლიდი, მხოლოდ საქანელას ჭრიალი შემოგესმებოდა.

- მამაშენი მაინც ყოფილიყო შინ, - ჩაილაპარაკა დედამ. ფართო ხელისგული ბიჭის პატარა ხელს შემოხვია და მაგრად მოუჭირა, - აი, ნახავ, რას ვუზამ იმ ბიჭს! მარტოხელა ისევ თარეშობს. გამვლელებს ხოცავს. ღამით ვერავის გაუვლია მშვიდად. არავინ იცის, სად და როდის გამოჩნდება მარტოხელა. შინ რომ მოვბრუნდებით, ნახე, დაგლასს ტყავი თუ არ გავაძრო!

კიდევ ერთი კვარტალიც გაიარეს და გერმანული ბაპტისტური ეკლესიის ბნელი და გოროზი სილუეტის გვერდით აღმოჩნდნენ, ჩეპელ-სტრიტისა და

გლენ-როკის კუთხეში. ეკლესიის უკან, ასიოდე მეტრში, ხევი იწყებოდა. მისი სუნთქვა აქამდეც კი აღწევდა. ეს საკანალიზაციო მილისა და ნემომპალას მძიმე, ბნელი, სიმწვანის სუნი იყო. ეს ფართო ხევი, კლაკნილ ნაპრაღად რომ სერავდა ქალაქს, დღისით ნამდვილი ჯუნგლი იყო, ღამით კი, როგორც დედა ხშირად იტყოდა ხოლმე, მარტოკაცისთვის მეტად საშიში ადგილი განლდათ.

წესით, გერმანული ბაპტისტური ეკლესიის სიახლოვეს ბიჭი ცოტათი მაინც უნდა გაემხნეებინა, მაგრამ ეკლესია ჩაბნელებული და გაყინული იდგა, ის ახლა უფსკრულის ზღვარზე ლოდების მკვდარ, უმიზნო გროვად აღმართულიყო.

ათი წლის ბიჭმა სიკვდილის, შიშის, ძრწოლის შესახებ ცოტა რამ თუ იცოდა. სიკვდილი ექვსი წლისამ გაიცნო, როდესაც დიდი პაპა გარდაიცვალა. ის კუბოში ცვილის ქანდაკებას ჰგავდა. იწვა ასე, აბჯარასხმული დაცემული სვავივით, მდუმარე, ყველაფრისაგან განრიდებული, ახლა უკვე აღარასოდეს ეტყოდა, კარგად მოიქცეო, აღარც რომელიმე პოლიტიკური მოვლენის თაობაზე წამოისვრიდა მოკლე, ბასრ ფრაზას. სიკვდილი მისი პატარა დაიკო იყო, როდესაც შვიდი წლისამ ერთ დღილას მის აკვანში ჩაიხედა და მისი ცისფერი, გაშტერებული თვალების უძრავ, უსინათლო, გაყინულ მზერას შეეჩეხა, მერე უცხო ადამიანები მოვიდნენ, პატარა კალათში ჩააწვინეს და წაიყვანეს. ისიც სიკვდილი იყო, როდესაც ოთხი კვირის შემდეგ ბავშვის მაღალი სკამის წინ მდგარმა ერთბაშად გაიაზრა, რომ ის აღარასოდეს იჯდებოდა ამ სკამში, აღარ გაუცინებდა, აღარ ატირდებოდა, თავისი არსებობით ტომს ეჭვიანობის განცდას აღარ აღუძრავდა. აი, რა იყო სიკვდილი! სიკვდილი იყო მარტოხელა მკვლელი, ყველასათვის უჩინარი, მუდამ ხეებსა და ბუჩქებს ამოფარებული, სადღაც შორ მიდამოში ჩასაფრებული, წელიწადში ერთხელ ან ორჯერ მაინც რომ ესტუმრებოდა ამ ქალაქსა და მის ქუჩებს, ბნელ კუნჭულებს, რათა ამ უკანასკნელი სამი წლის მანძილზე სამი ქალი გამოეცალმებინა სიცოცხლეს.

ეს იყო სიკვდილი!

მაგრამ ახლა ბიჭი სიკვდილზე რაღაც ბევრად ძლიერს შეიგრძნობდა. თვალუწვდენი სიმაღლიდან ჩამომზირალი ვარსკვლავების ქვეშ გაწოლილიყო ზაფხულის ღამე, საკუთარ თავში ყოველივეს რომ იტევდა, რისი შეგრძნებაც, დანახვაცა და გაგონებაც მოუწევდა სიცოცხლეში და ეს ყოველივე ერთბაშად მის წალეკვას ღამობდა.

ტროტუარიდან სარეველებით დაფარულ, დაღარულ ქვაფენილზე გადავიდნენ, კალიებმა კი ამასობაში დოღების გუნდი აახმოვანეს. ბიჭი



მორჩილად მიჰყვებოდა უშიშრად მიმავალ, ტანმაღალ დედას - სამყაროს დამცველს. ერთად მიადგნენ ცივილიზაციის დასალიერს და ზედ მის ზღვარზე შეჩერდნენ.

ხევი.

ერთბაშად მიხვდა, რომ აქ და ამ წამს, წყვდიადის ამ ტევრებში, ყოველი-ვე ის გამოუცნობი სახლობდა, რასაც, იცოდა, ვერასოდეს ჩასწვდებოდა; ყველა უსახელო საგანი ხეების ამ შემჭიდროებულ ჩრდილსა და სიღამძლის სუნში შეფარულიყო.

ტომი და დედა სრულიად მარტონი იყვნენ.

უცბად იგრძნო, რომ დედას ხელი უკანკალებდა.

თრთოლა ბიჭსაც გადმოედო... კი მაგრამ, რატომ? განა დედა მასზე ბევრად უფროსი, ძლიერი და ჭკვიანი არ იყო? ნუთუ ისიც გრძნობდა ამ მოუხელთებელ საფრთხეს, იქ, ქვევით გართხმულ ამ ბოროტებას, წყვდიადიდან უნილავ საცეცებს რომ აცეცებდა? მაშ, როცა ვიზრდებით, არც მაშინ ვხდებით ყოვლისშემძლენი? ესე იგი, დიდობა არც ნუგეშია, არც თავშესაფარი? არც შუათამის გულისმღრღნელი შემოტევისაგან დამცავი მედგარი ციხე? ეჭვმა წამიერად გაუელვა გონებაში. ნაყინმა წელანდელზე მეტად ჩაუწვა ყელი, მუცელი, ხერხემალი და ყველა კიდური; სხეული უცბად მარმანდელი დეკემბრის ქარივით გაეთომა.

მიხვდა: თურმე ყველა ასეა, თითოეული ადამიანი მარტოა საკუთარ თავთან. ერთიანი საზოგადოების ნაწილია, მაგრამ მაინც ნიადაგ შიშშია. აი, როგორც ახლა. რომ დაეყვირა, მიშველეთო, განა ეს რამეს შეცვლიდა?

სიბნელე უსწრაფესად მოვა და გადაგსანსლავს; ერთ უსაშველო, გამყინავ წამში ყველაფერი დასრულდება. დამთავრდება გათენებამდე დიდი ხნით ადრე, მანამ, ვიდრე პოლიცია მოადწევს და პროჟექტორებით დასერავს წყვდიადს, ვიდრე ატელევიზიული ადამიანები დასახმარებლად მოიჩბენენ. ახლა მხოლოდ ხუთასი მეტრის იქით რომ იყვნენ და თუნდაც ნამდვილად იყოს საშველი, ბნელ მორევს სამი წამიც კი ეყოფა, რათა ამოიზვიროს და მისი ათივე წელი სამუდამოდ წალეკოს. და მაშინ კი...

მარტოსულობის განცდამ დამანგრეველი დარტყმით შეუძრა ისედაც აცახცახებული სხეული. დედაც მარტო იყო. და ამ წუთში მას ვერც ქორწინების სიწმინდე დაიფარავდა, ვერც ოჯახის სიყვარული, ვერც შეერთებული შტატების კონსტიტუციის იმედი ექნებოდა და ვერც ქალაქის პოლიციისა. ამ წუთში საკუთარი გულის ამარა დარჩენილიყო და უმართავი მღელვარებისა და შიშის მეტი არაფერი გააჩნდა. ეს განმხოლოებული პრობლემა იყო და

საკუთარ, კონკრეტულ გადაწყვეტას საჭიროებდა. მომავალში ხომ ბიჭსაც მოუწევდა მარტოობას შეჰგუებოდა და დამოუკიდებლად ემოქმედა.

ნერწყვი ძლივძლივობით გადაყლაპა და დედას მიეკრა.

ღმერთო, გთხოვ, დედას ნუ მოკლავ, გაიფიქრა. ნურაფერს დაგვიშავებ. ერთ საათში მამა სხდომიდან დაბრუნდება და სახლი რომ ცარიელი დახვდეს...

დედა პირველყოფილი ჯუნგლით გარშემორტყმულ ბილიკს ჩაუყვავა. ბიჭმა გაბედა და ამოილულულა:

- დედა, დაგს არაფერი დაემართება! კარგად იქნება! ყველაფერი კარგად იქნება! დაგს არაფერი სჭირს!

დედას ხმა წვრილი და დაძაბული ეჩვენა.

- ყოველთვის ამ ბილიკით გადმოდის. სულ ვუბნები, აქ ნუ გაივლი-მეთქი, მაგრამ ეს სადაგელი ბავშვები მაინც სულ აქ დარბიან. ერთ მშვენიერ საღამოსაც ჩავა და უკან ადარასოდეს ამოვა...

ადარასოდეს ამოვა.

ეს ყველაფერს შეიძლება ნიშნავდეს: მაწანწალებს, ბოროტმოქმედებს, სიბნელეს, უბედურ შემთხვევას. რაც მთავარია - სიკვდილს!

შენ მარტო ხარ სამყაროში!

მთელ მსოფლიოში მილიონობით ასეთივე პატარა ქალაქია. თითოეული ასევეა ჩაბნელებული, ასევეა მარტოსული, ასევე შორი, ასევე სავსე კრთომითა და ჭოჭმანით. პატარა ქალაქების მუსიკა მინორში აქლერებულ ვიოლინოთა მკვიანა ხმაა, არსად - სინათლე, ყველგან - ჩრდილები. ო, რა უსაზღვროა მათი სიმარტოვე. მათი ხეების სინოტივე - რა იდუმალი. დამით მათი არსებობა კომპარია, რადგან სიჯანსაღეს, ქორწინებას, ბავშვებს, ბედნიერებას ყოველი მხრიდან საზარელი ურჩხული ემუქრება: მას სიკვდილი ჰქვია!

დედამ ჩასძახა სიბნელეს:

- დაგ! დაგლას!

უცბად ორივემ გაიაზრა, რომ რაღაც ვერ იყო რიგზე.

კალიების ხმა ადარ ისმოდა.

დუმილი ყოვლისმომცველი გამხდარიყო.

ასეთი სრული სიჩუმე ცხოვრებაში არ განუცდია. მაინც რატომ დადუმდნენ კალიები? რატომ? რა უნდა ყოფილიყო ამის მიზეზი? ადრე არასოდეს დადუმებულან ასე. არასოდეს.

ესე იგი... ესე იგი.

რაღაც უნდა მომხდარიყო.

ხევი თითქოს თავის შავ, უხილავ თითებს დაბავდა, მუჭად კრავდა, მძინარე მიდამოებიდან შორ მანძილზე იწოვდა ენერგიას. ნამიანი ტყეებიდან, დარტაფებიდან და ბორცვების ტალღოვანი ზედაპირიდან, სადაც თავაწეული ძაღლები მთვარეს აჰყურებდნენ - ყველა კუნჭულიდან ერთი შუაგულისკენ დიდი სიჩუმე მოედინებოდა და ამ შუაგულს ტომი და დედამისი შეადგენდნენ. ათი წამიც და, რაღაც მოხდებოდა. კალიებს ისევ ისე შეეკრათ პირი, ვარსკვლავები გუნდ-გუნდად ეკიდა, ისე დაბლა, ბიჟს ეგონა, მათ ცხელ ქიმებს ხელს გაუსვამდა.

სიჩუმე მატულობდა. მატულობდა დაძაბულობაც. ო, რა ბნელში იდგნენ, რა შორს იყვნენ ყველაფრისაგან. დმერთო!

მერე კი, შორს, ძალიან შორს, ხევის გადაღმიდან მოისმა:

- ჰოო, დედა! მოვდივარ, დედა!

მეორე წუთში ისევ:

- მოვდივარ, დედა, მოვდივარ!

შემდეგ კი ტენისის ფენსაცმელებმა ტყაპატყუპით ამოირბინეს უფსკრულში გაჭრილი ბილიკი და სამი მოცინარი, აქოშინებული ბავშვი გამოჩნდა. ტომის ძმა დაგლასი, ჩაკ ვულმენი და ჯონ ჰაფი. ხარხარით მორბოდნენ.

ცამ ათი მილიონი ლოკოკინას საცეცი ანტენასავით შეისრუტა ვარსკვლავები.

კალიები ამდერდნენ!

წყვდიაღმა უკან დაიხია, დამფრთხალმა და გაწბილებულმა. ის-ის იყო, საჭმელად მოემზადა და ისე ტლანქად შეუშალეს ხელი, მაღაც კი გაუქრა. როგორც კი წყვდიადი ვეება ტალღასავით მიიქცა, ბიჭები მხიარულად ამოხტნენ მისი წიაღიდან.

- დედა, ტომ, გაუმარჯოს!

დაგლასი იყო, სხვა თუ არაფერი, ყნოსვით იცნობდი: ოფლის, ბალახის, ხეებისა და წყლის სუნი უდიოდა.

- იცოდე, გაილახები, ვაჟბატონო, - გამოუცხადა დედამ. წამიერად ჩამოიცილა შეშფოთება. ტომმა იცოდა, დედა ამას არასოდეს არავის უამბობდა, მაგრამ გულში ორივე სამუდამოდ ჩაიტოვებდა.

ზაფხულის გვიანი ღამით ბრუნდებოდნენ შინ დასაძინებლად. ტომს უხაროდა, დაგლასი რომ ცოცხალი იყო. ძალიან უხაროდა, თორემ სულ ერთი წამით ეგონა...

შორს, მთვარით გადათეთრებულ მინდვრებსა და ხეობებში, მჭახე სტვენით ჩაიარა ლითონის გზააბნეულმა, უსახურმა არსებამ, მატარებელმა.

აკანკალებული ტომი ძმის გვერდით ჩაწვა, საბანი მოიფარა და მატარებლის სტვენას მიაყურადა, ბიძაშვილი მოაგონდა, ხეობის ბოლოს რომ ცხოვრობდა, სწორედ იქ, საითაც მატარებელი მიიჩქაროდა; ბიძაშვილი, რომელიც წლების წინ, გვიანი ღამით, ფილტვების ანთებით გარდაიცვალა...

თავის გვერდით მწოლიარე დაგლასის ოფლის სუნი შეისუნთქა. საოცრება იყო. ტომს კანკალმა გადაუარა.

- ორად ორი რამ ვიცი უეჭველად, დაგ, - ჩასჩურჩულა.

- რა და რა?

- ღამე მაგარი ბნელია - ეს ერთი.

- მეორე?

- ღამით ხევი არ ეკუთვნის მისტერ აუფმანის ბედნიერების მანქანას, თუკი ოდესმე მოახერხა მისი აშენება.

დაგლასი ერთხანს ფიქრობდა:

- ეგ ნაღდია.

საუბარი შეწყვიტეს. ყურები ცქვიტეს და ქუჩის ბოლოდან მომავალი ნაბიჯების ხმა გაიგონეს, ხეივანში და შემდეგ სახლის წინ ტროტუარზე რომ გაისმა. დედამ მათ თავისი საწოლიდან მშვიდად გამოსძახა:

- მამათქვენია.

მართლაც მამა იყო.

\* \* \*

გვიან ღამით ლეო აუფმანი თავის ჰარმალზე ადგენდა სიას. საკუთარ ნაწერს სიბნელეში ვერ ხედავდა. ყოველი ახალ-ახალი კარგი მიგნებისას ხან „ოჰ!“-ს წამოიძახებდა ხოლმე, ხან კიღევ: „ესეც!“ უცბად შესასვლელი კარის მინაზე ფარვანასებრი რბილი კაკუნი მოესმა.

- ლინა, შენ ხარ? - ჩურჩულით ჰკითხა კაცმა.

ლინა ღამის პერანგის ამარა გამოვიდა და გვერდით ჩამოუჯდა საქანელაზე. არც იმ გოგონებივით იყო გამხდარი, ჩვიდმეტი წლის ასაკში რომ არავის უყვარს, არც იმ ქალებივით სრული, ორმოცდაათი წლის ასაკშიც რომ ვერ ეღირსნენ სიყვარულს. ლეოს აზრით, ის სრულყოფილი - ზომიერად მკვრივი და მრგვალი იყო, როგორცაა ნებისმიერი ასაკის ქალი მაშინ, როდესაც ყველაფერი აწყობილი აქვს.

საოცარი ვინმე იყო. მისი სხეული მის მაგიერ ფიქრობდა, აჩენდა ბავშვებს, ლეოს ნებისმიერ ოთახში შეასწრებდა, რათა იქ მისი იმწუთიერი გუნება-განწყობის ზუსტად შესაფერისი გარემო დაეხვედრებინა. ქალს

თითქოს ფიქრისათვის დრო არც კი სჭირდებოდა: ნებისმიერი გადაწყვეტილება მისი თავიდან წამში მის ხელს გადაეცემოდა და ბუნებრივი, მსუბუქი წრებრუნვის ძალით კვლავ უკან ბრუნდებოდა. ამ პროცესის განჭვრეტა და გააზრება ლეოს არც შეეძლო და არც სურდა.

- ეს მანქანა, - როგორც იქნა, წარმოთქვა ქალმა, - ჩვენ ის არ გჭირდება.

- არა, - უპასუხა კაცმა, - მაგრამ ზოგჯერ სხვებისთვის უნდა ვიმრომოთ. სწორედ ახლა ვფიქრობდი, რა ჩავლო შიგნით: ფილმები? რადიო? სტერეოსკოპი? ეს ყველაფერი ერთ წერტილში მოვაქციე, ისე, რომ საკმარისია, კაცმა ხელი გადაუსვას, მაშინვე იტყვის: „აი, ეს არის ბედნიერება!“

ღიას, ისეთი მარჯვე ხელსაწყო გამოგონება უნდოდა, ტალახიანი ფეხების, კბილის ტკივილის, არეულ-დარეული საწოლებისა და იმ წუთების მიუხედავად, როცა დილის სამ საათზე მაჯლაჯუნები არ გასვენებენ, მაინც ბედნიერებას რომ წარმოქმნის იმ ჯადოსნური საფეკვაკვიით, ოკეანეში გადაგდებული ისევ შეუჩერებლად რომ ფქვავდა მარილს მანამდე, ვიდრე ოკეანე წათხის გოლიათ ქვაბად არ გადააქცია<sup>12</sup>. ასეთი მანქანის შესაქმნელად ვინ არ დაღვრის ოფლს? ამ კითხვით მიმართა სამყაროს, ქალაქსა და საკუთარ ცოლს!

მის გვერდით საქანელაზე ლინას უხერხული დუმილი აზრის გამოთქმის ტოლფასი იყო.

ლეოც დადუმდა, თავი უკან გადასწია და ქარში მოსისინე თელის ფოთლებს მიაყურადა.

არ დაგავიწყდეს, უთხრა საკუთარ თავს, მანქანა ხმოვანიც უნდა იყოს.

წუთის შემდეგ საქანელაც და პარმადიც დაცარიელდა.

\* \* \*

პაპას ძილში გაეღიმა.

ღიმილი თავადვე იგრძნო და გაკვირვებამ გამოადვიდა. სმენადქცეული უძრავად იწვა და ღიმილის მიზეზსაც მალე მიაგნო.

ის, რაც ესმოდა, ჩიტების ჭიჭიკსა და ნორჩი ფოთლების შრიალზე უფრო მნიშვნელოვანიც კი იყო. ყოველ წელიწადში ერთხელ, აი, ასე ეღვიძებოდა და საწოლში გარინდებული იმ ხმას ელოდა, ზაფხულის ოფიციალურ შემობრძანებას რომ მოასწავებდა. ყოველთვის, ასეთივე დილით, რომელიმე

<sup>12</sup> მინიშნება ზღვის მლაშე წყლის წარმოშობის შესახებ თქმულებაზე, რომელმაც ფი-ნურ ეპოსში „კალუვალამი“ ჰჰოვა ასახვა.

მდგმური, ნათესავი, შვილი თუ შვილიშვილი ეზოში ჩავიდოდა და ზაფხულის ქორფა ბალახზე ჩრდილოეთიდან აღმოსავლეთისაკენ, სამხრეთიდან დასავლეთისაკენ იმოძრაებდა მბრუნავი ბასრი ფოლადის ზუზუნით, თავისი ტრაექტორიით მოლზე სულ უფრო მცირე კვადრატებს რომ ხაზავდა. გამრჯე მანქანიდან სამყურას ყვავილების, თითო-ოროლა დაუკრეფავი ბაბუაწვერას ნაპერწკლების, ჭიანჭველების, ტოტების, კენჭების, შარშან ოთხ ივლისს გასროლილი შუშუნებისა და ძენძის ნარჩენების, ძირითადად კი ხასხასა სიმწვანის შადრევანი ამოიფრქვეოდა, გრილი და ფაფუკი შადრევანი; პაპამ წარმოიდგინა, ფეხებსა და გახურებულ სახეზე როგორ ელამუნება, ნესტოებს ახალი სეზონის სურნელით უვსებს, გულს კი - უტყუარი რწმენით: ღიახ, ყველანი კიდევ თორმეტ თვეს ვიცოცხლებთ!

დაილოცოს მოლის საკრეჭი მანქანა, გაიფიქრა პაპამ. რომელმა უგუნურმა დააწესა ახალი წლის დადგომა პირველ იანვარს? ამის მაგივრად ილინოსის, ოჰაიოსა და აიოვის მილიონობით მოლზე მეთვალყურეობა უნდა დაეწესებინათ და როგორც კი ბალახი საკმარის სიმაღლეს მიაღწევდა, ფეიერვერკების, საყვირებისა და შეძახილების მაგიერ კონტინენტის ტრამალებზე მოლის საკრეჭი მანქანების სიმფონია უნდა აჟღერებულყო. კანფეტისა და ქაღალდის ბურბუმელას მაგიერ ადამიანებს ერთმანეთისთვის მოჭრილი ბალახი უნდა შეეფრქვიათ და ასე აღენიშნათ ჭეშმარიტი დასაბამის დღე!

საკუთარ მსჯელობაზე თავადაც ჩაეცინა, ფანჯარასთან მივიდა და მზის ლბილი სხივებით დამთბარ ჰაერში გადაიხარა. აი, ისიც: ერთ-ერთი მდგმური, ახალგაზრდა ჟურნალისტი ფორესტერი, ეს-ეს არის რომ ჩაამთავრა პირველი მწკრივი.

- დილა მშვიდობისა, მისტერ სპოლდინგ!

- მიდი, ბილ, მიდი! - გულიანად ჩასძახა პაპამ. მეორე წუთში უკვე ქვედა სართულზე იყო და ბებოს მომზადებულ საუზმეს შეექცეოდა. კედლის შვერილში გაჭრილი ფანჯარა ღია იყო და საკრეჭის ზუზუნი პირდაპირ მის თეფშს დასტრიალებდა.

- რა გამამხნევებლად ჟღერს, - აღმოხდა პაპას, - ერთი უსმინე ამ საკრეჭს!

- მალე მოლის საკრეჭი მანქანა აღარავის დასჭირდება, - მიუბრუნდა ბებო და წინ მაჭკატებით სავსე თეფში დაუდგა, - რაღაც ახალი ჯიშის ბალახი გამოუყვანიათ, ახლა რომ ბილ ფორესტერი თესავს, აი, ის. თურმე გაკრეჭა არ სჭირდება. არ ვიცი, რა ჰქვია, მაგრამ, აი, ამაზე მაღალი არ იზრდება.

პაპა გაოგნებული მიმტერებოდა.

- გთხოვ, ასე უშნოდ ნუ მეხუმრები.

- წადი, შენ თვითონ ნახე, - უპასუხა ბებომ, - ბილ ფორესტერის იდეა იყო, - ახალი ბალახი პატარა ფენილებად აწყვია სახლის გვერდით. თურმე, საკმარისია აქა-იქ პატარა ორმოები ამოთხარო და ეს ნაჭრები შიგ ჩააფინო, წლის ბოლოს ახალი ბალახი მთლიანად დაჩაგრავს ძველს და - მორჩა, შეგიძლია გაზონის საკრეჭი გაყიდო.

პაპა სკამიდან წამოხტა, დერეფანი გამოირბინა და ათ წამში უკვე ეზოში იყო.

ბილ ფორესტერმა მანქანა მიატოვა, ახლოს მივიდა, მზის კამკამა შუქისაგან თვალბმობოჭტული და მოდიმარი.

- დიახ, ასეა, ამ დილით ვიყიდე. ვიფიქრე, შვებულებით ვისარგებლებ და დაგირგავთ-მეთქი.

- რატომ არ გამაფრთხილეთ ამის შესახებ? ეს ხომ ჩემი გაზონია! - შესძახა პაპამ.

- მეგონა, ამ იდეას მომიწონებდით, მისტერ სპოლდინგ!

- ჰმ, არა, არა მგონია, მოგიწონოთ. ერთი მიჩვენეთ ეგ თქვენი წყეული ბალახი!

ახალი ბალახის პატარა ოთხკუთხედი ბალიშების გროვას მიუახლოვდნენ. პაპამ იჭვნულად წაჰკრა ფეხის წვერი.

- ჩვეულებრივ ბალახს ჰგავს. დარწმუნებული ხართ, რომ ვიდაც ვაჭრუკანას დილაადრიან ნამძინარევი არ გამოუჭერიხართ და არ მოუტყუებინართ?

- ეს ბალახი კალიფორნიაში მინახავს. აი, ამსიმაღლე იზრდება, მეტი - არა, ჩვენს ჰავას თუ შეეგუა, გაისად კვირაში ერთხელ ადარ მოგვიწევს ამ ჯანდაბის აღრიალება.

- აი, თქვენი თაობის პრობლემაც სწორედ ეს არის, - მიუგო პაპამ, - გრცხვენოდეს, ბილ, შენ ხომ ჟურნალისტი ხარ. თქვენ გინდათ, ერთი ხელის მოსმით ყველაფერი მოსპოთ, რაც სიცოცხლეს ეშხსა და გემოს ანიჭებს. დრო დავზოგოთ, შრომა დავზოგოთო, გაიძახით, - მოხუცმა ბალახის ფირფიტებს ფენი ჰკრა ზიზღით, - ბილ, ჩემს ასაკს რომ მიაღწევ, მაშინ მიხვდები, რომ ასეთი წვრილმანების დაგემოვნება დიდ სიახლეებზე გაცილებით მნიშვნელოვანია. გაზაფხულის დილით ფენით გასეირნება ბევრად სჯობს ჩქაროსნული მანქანით გრიალს და იცი, რატომ? იმიტომ, რომ ასეთი დილა ათასნაირი სურნელითაა სავსე. გარშემო ყველაფერი იზრდება და სუნთქავს და ფენით სიარულისას დაკვირვებისა და აღმოჩენის საშუალება გეძლევს. მესმის, თქვენ სწრაფი შედეგი გჭირდებათ და, ალბათ, ასეც უნდა იყოს, მაგრამ შენსავით გაზეთში მომუშავე ახალგაზრდა მხოლოდ საზამთროებს არ უნდა გამოეკიდოს, ყურძენიც უნდა ეძებოს. თქვენ ჩონჩხები



გაინტერესებთ, მე კი - თითის ანაბეჭდები; კეთილი და პატიოსანი, ბევრი რამ მოსაწყენად გეჩვენებათ, იქნებ იმის გამო, რომ არ იცით, რომელი მხრიდან მიუდგეთ საქმეს. კაცმა ნება რომ დაგრთოთ, ყველა მცირე საქმისა და საზოგადოდ ყველა წვრილმანის გასაუქმებლად გამოსცემთ კანონს, ახალ-ახალი რამეების გამოგონებით იჭყლეტთ ტვინს, ვიდრე საბოლოოდ არ შეიშლებით. ამის ნაცვლად, რატომ არ აცლით ბუნებას, თავისი გამოგონებები გიჩვენოთ? ბალახის კრეჭა და სარეველების ამოძირკვა შეიძლება ცხოვრების სტილად აქციო, შვილო.

ბილ ფორესტერი მშვიდი ღიმილით შეჰყურებდა.

- ვიცი, - შეცბა ჰაჰა, - ძალიან ბევრს ვლაპარაკობ.

- ასეთი სიამოვნებით სხვას არავის მოვუსმენდი.

- მაშინ ლექციას განვაგრძობ. უბრალო იასამნის ბუჩქი ორქიდეაზე უფრო ძვირფასია. ბაბუაწვერა და ეშმაკის ბალახიც ძვირფასია! რატომ? იმიტომ, რომ ძირს დაგაჩოქებს, სულ ცოტა ხნით ჩამოგამორებს ქალაქსა და ხალხს, ოფლს გამოგადენს და შენი ცხვირის არსებობას შეგახსენებს. და როცა ასე მარტო რჩები საკუთარ თავთან, ცოტა ხნით კვლავაც საკუთარ თავად იქცევი; ეჩვევი ფიქრსა და განმარტობას. მებაღეობა ხომ ყველაზე მარჯვედ ამართლებს ფილოსოფოსობას, ვერავინ გამჩნევს, ვერავინ გასაყვედურობს, არადა, იორდასალამების კვალში მუხლმოყრილი პლატონი ხარ, კონიოს კვლებზე მზრუნველი სოკრატე. კაცი, რომელიც თავისი ბაღის ბილიკზე ნაკელით სავსე ტომარას მიარწევს, მხრებზე სამყაროს ტვირთაკიდებულ ატლასს ემსგავსება. როგორც ოდესღაც ბრძანა სემუელ სპოლდინგმა, „რაც მეტად ვთხრით მიწას, მითუფრო ღრმად ვაღწევთ საკუთარი სულის წიაღში“. მაგ საკრეჭის კბილანები ატრიალე, ბილ, და სიყმაწვილის უშრეტი შადრევნის წყლები იპოვე. ლექციის დასასრული. თანაც, დროდადრო ბაბუაწვერას ღეროების სალათი ძალზე სასარგებლოა.

- უკანასკნელად რამდენი წლის წინათ მიირთვით ბაბუაწვერას სალათი, სერ?

- მოდი, ახლა ამას ნუ ჩავუღრმავდებით!

ბილმა მსუბუქად ჩაჰკრა ფეხი ბალახის ერთ ფირფიტას და თავი დაუკრა.

- ამ ბალახს რაც შეეხება, მოყოლა არ დამიმთავრებია, ისე მჭიდროდ იზრდება, რომ სავსებით ანადგურებს სამყარას და ბაბუაწვერას...

- ღმერთო დიდებულო! ეს იმას ნიშნავს, რომ გაისად ბაბუაწვერას ღვინოს ვეღარ დავლევთ! ადარც ფუტკრები გვეწვევიან! ჭკუიდან ხომ არ შეიშალე, შვილო! მომისმინე, რამდენი დაგიჯდა ეს ყველაფერი?

- დოლარი, - თითო ფირფიტა, სიურპრიზად ათი ცალი შევიძინე.

პაპამ ჯიბეზე იტაცა ხელი, ძველებური დრმა საფულე ამოიღო, ვერცხლის შესაკრავი შეხსნა და სამი ხუთდოლარიანი კუპიურა ამოაძვრინა.

- ბილ, ამ საქმიდან ხუთი დოლარი მოგება დაგრჩება. მინდა, ეს პროზაული ბალახის გროვა ხევში გადაყარო, ან ნაგავსაყრელზე. სულერთია, ოღონდაც უმორჩილესად გთხოვ: ჩემს ბაღში ნუ დარგავ. შენ ყოვლად საპატიო მიზეზები გაქვს, მაგრამ, პირველ ყოვლისა, ჩემი მიზეზებია გასათვალისწინებელი, რაკილა მე უკვე უაღრესად ფაქიზ ასაკს მივუკაკუნე.

- კარგი, სერ, - ბილმა უხერხულად ჩაიღო ფული ჯიბეში.

- ბილ, არა უშავს, სხვა დროს დარგავ მაგ ახალ ბალახს. როცა მოკვდები, მეორე დღესვე შეგიძლია მთელი გაზონი ამოძირკვო. როგორ ფიქრობ, მოითმენ კიდე ხუთიოდ წელიწადს, ვიდრე ბებერი ორატორი სულს არ გააფრთხობს?

- როგორ ვერ მოვითმენ, სერ, - უპასუხა ბილმა.

- წესიერად ვერც კი აგისხნი, მაგრამ მოლის საკრეჭის ხმა ქვეყნად ულამაზეს ხმად მიმაჩნია: ეს თვით ზაფხულის ხმაა და მის გარეშე საშინლად მოვიწყენ. ვერც ბალახის სუნს დავთმობ ასე ადვილად.

ბილი ერთ-ერთი ფირფიტის ასაღებად დაიხარა.

- წავალ, ხევში გადავყრი.

- შენ კარგი, თავაზიანი ახალგაზრდა ხარ და შენგან ბრწყინვალე, გამჭრიახი რეპორტიორი დადგება, - უთხრა პაპამ და თვითონაც ფირფიტების გადაზიდვას შეუდგა, - კარგად დაიხსომე ჩემი წინასწარმეტყველება!

დილა მიიწურა, შუადღის სამხრის შემდეგ პაპა თავის ოთახში ავიდა მოსასვენებლად, უიტიერს<sup>13</sup> კითხულობდა, მერე კი რამდენიმე საათს ტკბილად იძინა. როდესაც გაეღვიძა, სამი საათი იყო, მზის სხივები ფანჯრებში იდვრებოდა. გაოცებულს ისევ ძველი, ნაცნობი, დაუვიწყარი ხმა ჩაესმა.

- რა ხდება? - წამოიძახა, - ვიდაც გაზონს კრეჭს! მაგრამ ჩვენი გაზონი ხომ დღეს გაკრიჭს!

ისევ დაუგდო ყური. ეჭვი არ იყო: ისევ ის ხმადაბალი ზუზუნი გაისმოდა.

თავი ფანჯარაში გაყო და გაკვირვებისაგან პირი დაადო.

- ბილი ყოფილა. ბილ ფორესტერ, აქ რა გინდა? მზემ ხომ არ დაგკრა? მოლს ისევ კრეჭ?

ბილმა ახედა, გაიბადრა და ხელი დაუქნია.

<sup>13</sup> ჯონ გრინლიფ უიტიერი (1807-1892) - ამერიკელი პოეტი, პროზაიკოსი, ჟურნალი-სტი, აბოლიციონისტი.

- დიახ! მგონი, დილით რამდენიმე ადგილი გამომრჩა!

და სანამ გაოცებული პაპა კიდევ ხუთ წუთს ნებივრობდა საწოლში, ბილ ფორესტერმა საკრეჭი მანქანა ჯერ ჩრდილოეთის მიმართულებით გაატარა, შემდეგ - დასავლეთის, შემდეგ - სამხრეთის და საბოლოოდ, მწვანე მადრენის შხეფებში გახვეული, აღმოსავლეთისკენ შებრუნდა.

\* \* \*

კვირა დილით ლეო აუფმანი ძალიან ნელა ფუსფუსებდა თავის გარაჟში და მოელოდა, რომ რომელიმე ფიცარი, მავთულის ხვეული, ჩაქუჩი თუ ჭანჭიკი მოუხმობდა, აქეთ მოდი, აქედან დაიწყებოდა. მაგრამ არაფერი უხმობდა, არაფერი მიუთითებდა, საიდან დაეწყოს საქმე.

დაფიქრდა, უნდა იყოს თუ არა ბედნიერების მანქანა ისეთი ზომის, რომ მისი ჯიბით ტარება შეგეძლოს.

ან, განაგრძო ფიქრი, იქნებ იმხელა უნდა იყოს, რომ თვითონ გატაროს ჯიბით?

- ერთი რამ უეჭველად ვიცი, - წამოიძახა ხმამაღლა, - ის უნდა კამკამებდეს.

დაზგის კუთხეში საგანგებოდ დადგა ნარინჯისფერი საღებავის ქილა, მერე ლექსიკონი მოიმარჯვა და შინ შევიდა.

- ლინა! - ლექსიკონში ჩაიხედა, - მითხარი, ხარ თუ არა „კმაყოფილი, მხიარული, ნასიამოვნები“? თუ გრძნობ თავს „იღბლიანად, ბედნიერად?“ არის თუ არა შენს გარს არსებული ნივთები „კარგად მორგებული და მოსახერხებელი“, „მყუდრო და სასურველი“?

ლინამ ბოსტნეულის კეპვა შეწყვიტა და თვალები მოწკურა.

- აბა, კიდევ ერთხელ წამიკითხე.

ლეომ წიგნი დახურა.

- ნუთუ ასე რთულია, რომ პასუხის გასაცემად გაჩერდე და ერთი საათი იფიქრო? უბრალოდ მითხარი: ჰო ან არა! არა ხარ კმაყოფილი, მხიარული და ნასიამოვნები?

- მე კი არა, ძროხები არიან კმაყოფილები, ჩვილი ბავშვები და მეორე ბავშვობაში გადავარდნილი მოხუცები ყოველთვის ნასიამოვნები ჩანან, ღმერთმა უშველოთ! „მხიარული“ კიდევ... ნახე, ლეო, რა მხიარულად ვხეხავ ნიჟარას!

კაცი სახეში ჩაამტერდა და შემდეგ შვებით ამოისუნთქა:

- მართალი ხარ, ლინა. მამაკაცები თქვენს შრომას ვერ ვაფასებთ. იქნებ შემდეგ თვეს სადმე გავემგზავროთ.

- მე არ ვწუწუნებ! - მიუგო ქალმა, - მე კი არ შემოვსულვარ აქ ლექსიკონით და არ მიტყვამს, აბა, ენა გამოყავიო. ლეო, განა ვკითხულობთ, რა გვიძგერებს გულს მთელი დამე? არა! კიდეც რის კითხვას აპირებ: რა არის ქორწინება? ვინ იცის, ლეო? სჯობს, არ იკითხო. ის, ვინც ზედმეტად უკვირდება იმას, თუ როგორ ხდება ესა თუ ის მოვლენა, ან ცირკში ტრაპეციიდან ვარდება, ანდა საყლაპავის კუნთების მუშაობაზე დაკვირვებისას იგუდება. ჭამე, იძინე, ისუნთქე, ლეო, და ნუ მომშტერებიხარ, თითქოს ამ სახლში პირველად მხედავდე!

ლინა აუფმანი უცებ გაშეშდა. ჰაერი დაყნოსა.

- ღმერთო, სულ შენი ბრალია!

ღუმელის კარი გამოათო. სამზარეულო კვამლით აივსო.

- ეგეც შენი ბედნიერება! - მოთქვამდა ქალი, - მაგ ბედნიერების გულისთვის ექვსი თვის მანძილზე პირველად ვიჩხუბეთ! და ოცი წლის მანძილზე პირველად ვახშმად პურის მაგივრად ნახშირი გვექნება!

ბოლის დრუბელი რომ გაიფანტა, ლეო აუფმანი ადარსად ჩანდა.

ყურისწამლები ხმაური, კაცის ჭიდილი შთაგონებასთან, ფოლადის ჟღარუნი, ფიცრების ბრაგაბრუგი, ჩაქუჩის კაკუნი, სახრანისის, ლურსმნებისა და რაისშინას<sup>14</sup> დრჭიალი მრავალი დღე გაგრძელდა.

ღროდაღრო დამარცხებული ლეო აუფმანი დაძაბული და შეშფოთებული გალასლასდებოდა ქუჩებში, შორიდან გაგონილი სიცილის ყოველ ხმაზე კრთებოდა, ბავშვების ლაზღანდარობას უგდებდა ყურს, მათ ღიმილს აკვირდებოდა. სადამოობით გვიანობამდე იჯდა მეზობლების ხალხმრავალ ვერანდებზე, უსმენდა ცხოვრების აწონ-დაწონაში ჩაფლულ მოხუცებს და მზიარულების ყოველი ამოფრქვევისას თავადაც გამოცოცხლდებოდა ხოლმე იმ გენერალივით, მტრის უკან დახევასა და საკუთარი სტრატეგიის წარმატებას რომ ამჩნევს. შინ აღტაცებული ბრუნდებოდა, მაგრამ გარაჟში, უძრავი ხელსაწყოებისა და მკვდარი ფიცრების დანახვისთანავე გაბადრული სახე ისევ მოედუშებოდა და საკუთარი მარცხის დასაფარად გამალეებული ბრაგუნით შეუდგებოდა ხოლმე მანქანის აწყობას, იფიქრებდი, ერთურთზე დახვავებულ ამ ჯართის ნაწილებს, მართლაც, რაიმე აზრი აქვსო. ბოლოს, როგორც იქნა, უწესრიგო გროვამ რაღაც ფორმა შეიძინა და ათი დღე-ღამის

<sup>14</sup> რაისშინა - დიდი სახაზავი, როომელსაც ცალ ბოლოზე ჰერპენდიკულარული მოკლე ლარტყა აქვს.

შემდეგ ქანცგამოცლილი, აცანცახებული, ნაშიმშილები ლეო აუფმანი, როგორც იქნა, ბარბაცით შევიდა შინ. მეხდაცემულს ჰგავდა.

მის დანახვაზე ბავშვები, მანამდე საშინელი წივილ-კივილი რომ ჰქონდათ ატეხილი, დადუმდნენ და ადგილზე გაიყინნენ, თითქოს მამა კი არა, მეწამული სიკვდილი შემოსულიყოს საათის ბოლო ჩამოკვრასთან ერთად.<sup>15</sup>

- ბედნიერების მანქანა... - ჩაიბუტბუტა ლეო აუფმანმა, - მზადაა...

- ლეო აუფმანმა თხუთმეტი გირვანქა დაიკლო, - ალაპარაკდა მისი ცოლი, - უკვე ორი კვირაა, ბავშვებისთვის ხმა არ გაუცია, ისინი ღელავენ, შეხედე, რა ამბავი აუტეხიათ! მისმა ცოლმა ნერვიულობით ათი გირვანქა მოიმატა, ახალი ტანისამოსი დასჭირდება, აი, ნახე! მანქანა მზადაა, კარგი, ბატონო! მაგრამ სადაა ბედნიერება? ვინ მეტყვის? ლეო, მოეშვი მაგ საათის კეთებას! იმხელა გუგულს მაინც ვერ იშოვი, შიგ რომ იცხოვროს! ასეთი რამეები ადამიანის საქმე არ არის. არა, ღმერთს სცოდავო, არ გუუბნები, მაგრამ ლეო აუფმანს რომ სცოდავ, ეს ამკარაა, კიდევ ერთი ასეთი კვირა და აქედან შენი მანქანითვე გაგასვენებენ!

ლეო აუფმანი ყურს არ უგდებდა, უფრო მნიშვნელოვანი რამით იყო დაკავებული: გაცემებით აკვირდებოდა, ოთახის კედლები მალლა როგორ მიქროდა.

რა საინტერესოა, გაიფიქრა ძირს გამოტილმა.

წყვდიადი ფართოდ რომ ჩამოეფარა ქუთუთოებზე, კიდევ ჩაესმა, ვიღაცამ რაღაც როგორ დაიყვირა და ბედნიერების მანქანა სამჯერ ახსენა.

მეორე დილით, პირველი, რაც გააცნობიერა, ფრთების ფარფატის ხმა იყო, ჰაერს კრიალა ნაკადულში ჩაყრილი კენჭებივით რომ ადელვებდა: ათობით ფრინველი რბილად დაემუა გარაჟის თუნუქგადაკრულ სახურავზე.

სხვადასხვა ჯიშის ძაღლების მთელი ხროვა უხმოდ შემოპარულიყო ეზოში და გარაჟის კარში იცქირებოდა; ოთხი ბიჭი, სამი გოგო და რამდენიმე მამაკაცი ქუჩაში, ალუბლის ხეების ძირში, ბოლთას სცემდა. ლეო აუფმანმა მშვენივრად იცოდა, თუ რამ მოიზიდა ყველანი მის ეზოში.

ეს ბედნიერების მანქანის ხმა იყო.

მსგავს ხმას, ალბათ, ზაფხულის ნაშუადღევს გაიგონებთ გოლიათის სამზარეულოდან. ეს ყველანაირი ზუზუნი გახლდათ - ჩუმი და ხმამაღალი, მონოტონური და ცვალებადი. თითქოს ჩაის ფინჯნებისხელა ფუტკრები ბზუილით ამზადებდნენ ყოვლად წარმოუდგენელ კერძებს და სადაც იყო,

<sup>15</sup> მინიშნება ამერიკელი მწერლის, ედგარ ალან პოს მოთხრობაზე „მეწამული სი-კვდილის ნიღაბი“

გოლიათი დიასახლისიც გამოჩნდებოდა კარში, თვით ზაფხულივით გაფაშფაშებული, კმაყოფილებით მოღიღინე, ატმისფერ მთვარესავით პირმრგვალი, და მშვიდად გადახედავდა მოღიმარ ძაღლებს, ხორბლის-ფერქოჩრიან ბიჭებსა და თმადაფერფლილ მოხუცებს.

- მოიცა, - იყვირა ლეო აუფმანმა, - ამ დილით რომ მანქანა ჯერ არ ჩამირთავს? საულ!

საულმა უზოდან ახედა მამას.

- საულ, შენ ჩართე?

- ნახევარი საათის წინ შენ თვითონ მითხარი, შეახურეო.

- ჰო, კარგი, საულ, უბრალოდ, დამავიწყდა. კარგად ვერ გამოვფხიზლდი, - ისევ საწოლში ჩაიკეცა.

ცოლმა საუზმე ამოუტანა, ფანჯარასთან შეყვინდა და ერთხანს გარაჟს გაჰყურებდა.

- მითხარი, - მშვიდად მიუბრუნდა ქმარს, - თუ ეს მანქანა მართლაც ისეთია, როგორც ამბობ, იქნებ ბავშვების გაჩენის შესახებაც ჰქონდეს პასუხი? შეუძლია სამოცდაათი წლის ადამიანები ოცი წლისებად აქციოს? და კიდევ, თუ მის შიგნით ჩაიმალები, იქიდან სიკვდილი როგორი გამოჩნდება?

- ჩაჯექი და ნახავ!

- გადაღლილობამ თუ შემინჩირა, რა უნდა ვქნა - აი, მაგ ყუთში ჩავძვრე და თავი ბედნიერად ვიგრძნო? ერთი მითხარი, ლეო, რას წარმოადგენს ჩვენი ცხოვრება? ხომ იცი ჩვენი ოჯახის ამბავი: დილის შვიდ საათზე საუზმე, ბავშვები; ცხრის ნახევრისთვის ყველანი გაიკრიფებით და მხოლოდ მე ვრჩები სარეცხთან, სადილსა და დასაკემს წინდებთან ერთად, ბოსტანიც ჩემი გასამარგლია, საყიდლებიც და ვერცხლის დანა-ჩანგლის ხეზვაც ჩემზეა. განა ვწუწუნებ? უბრალოდ, გახსენებ, ლეო, თუ რაზე დგას ჩვენი სახლი, რა ასულდგმულებს! ახლა მითხარი, როგორ იტევს ამ ყველაფერს შენი მანქანა?

- ის სულ სხვანაირადაა მოწყობილი!

- მაშინ, მაპატიე, მაგრამ დრო არა მაქვს, რომ შევხედო.

ლოყაზე აკოცა და ოთახიდან გავიდა. კაცი იწვა და ისრუტავდა ქვევიდან, გარაჟში დამალული მანქანიდან მონაქროლ ნიავს, სავსეს იმ შემწვარი წაბლის სურნელით, რომელსაც შემოდგომობით ყიდიან პარიზის ქუჩებში. იმ ქუჩებში მას არასდროს გაევლო.

კატამ უხმოდ და შეუმჩნევლად გამოიარა მონუსხულ ძაღლებსა და ბიჭებს შორის და გარაჟის კარს გაეხახუნა, საიდანაც შორ სანაპიროსთან მიქცეული ტალღების რიტმული სუნთქვა იღვრებოდა...

ხვალ, გაიფიქრა ლეო აუფმანმა, ყველანი ერთად გამოვცდით ბედნიერების მანქანას.

გვიან ღამით გაეღვიძა და იმწამსვე მიხვდა, რომ თავისთავად არ გაუღვიძია. მოშორებით, სხვა ოთახში ვიღაც ტიროდა.

- საულ? - ჩურჩულით წამოხტა საწოლიდან.

საული თავის ოთახში იწვა ბალიშში თავჩარგული და გულამოსკვნით სლუკუნებდა.

- არა... არა... მორჩა... მორჩა...

ბიჭი ტირილს განაგრძობდა.

- საულ, ცუდი სიზმარი ნახე, მითხარი, რა ნახე, შვილო?

ბიჭის საწოლზე ჩამომჯდარმა ლეო აუფმანს უეცრად რაღაცამ უბიძგა, ფანჯარაში გაიხედა. გარაჟის კარი ღია იყო.

იგრძნო, როგორ დაბურძგლა.

როცა საულს, როგორც იქნა, ჩაეძინა, თუმცა, მაინც მოუსვენრად სუნთქავდა და ღროღადრო კრუსუნებდა, მამა კიბეს ჩაუყვავდა და ხელგაწვდილი მიუახლოვდა გარაჟის ღია კარს.

ღამის გრილ ჰაერში ბედნიერების მანქანის ლითონი ისე გავარვარებულ იყო, რომ ხელს ვერ შეახებდი.

გაიფიქრა, ესე იგი, საული ამაღამ აქ იყო.

რატომ? უბედური იყო და მანქანა სჭირდებოდა?

არა, ბედნიერი იყო, მაგრამ სურდა, ბედნიერება სამუდამოდ მოეხელთებინა. ბიჭი უკვე იმდენად შეგნებულ იყო, რომ საკუთარი მდგომარეობა გაცნობიერებული ჰქონდა. მამ, როგორღა გაამტყუნებდი, თუკი ამ ყოფის შენარჩუნება სურდა? და მაინც...

უეცრად მადლა, საულის ფანჯრიდან რაღაც თეთრი გამოფარფატდა. ლეო აუფმანს გული შეუქანდა. მერე მიხვდა, უბრალოდ ღამის ნიაჰმა ააფრიალა ფარდა, მაგრამ სიბნელებში ისე იღუმლად ქათქათებდა, ეგონა, ბიჭის სული გამოფრინდაო ოთახიდან. და ლეო აუფმანმაც უნებლიეთ გაშალა მკლავები, თითქოს სურდა, აეტაცა და მძინარე სახლში დაებრუნებინა.

გაყინული და აკანკალებული შებრუნდა შინ, საულის ფანჯარაში ქარისგან აფრიალებულ ფარდას ხელი წაავლო და საკეტი მაგრად ჩარაზა, რათა ფერმკრთალი ლანდი ისევ არ გაქცეულიყო. მერე კარგა ხანს იჯდა საწოლის კიდეზე და ხელი საულის ზურგზე ედო.

- „ორი ქალაქის ამბავი“? ჩემია. „სიძველეთა ღუქანი“? ჰმ, ლეო აუფმანის არის, მეტი ვისი იქნება! „დიდი იმედები“? ჩემი იყო ოდესღაც, მაგრამ ახლა მისთვის მიჩუქნია!



- რა ხდება აქ? - იკითხა ოთახში შესულმა ლეო აუფმანმა.

- რა და, - მიუგო ცოლმა, - ქონებას ვანაწილებ! როცა მამა შვილს ღამით ამინებს, ღროა, ყველაფერი ორად გაიყოს! გამეცალე, მისტერ „ცივო სახლო“, „სიძველეთა ღუქანი“.<sup>16</sup> ლეო აუფმანისთანა შეშლილ მეცნიერს მთელ ამ წიგნებში ვერ ნახავს კაცი!

- მიდიხარ! მანქანა არც კი გამოგიცდია! - შეეწინააღმდეგა ქმარი, - გამოცადე და ნახავ, ყველაფერს ამოალაგებ და დარჩები!

- „ტომ სუიფტი და მისი ანიჰილატორი“<sup>17</sup> - ნეტავ ვისი უნდა იყოს? რა რთული გამოსაცნობია? - ჩაიფრუტუნა ცოლმა და „ტომ სუიფტი“ ლეო აუფმანს მიაწოდა.

- ზოგი აქ, ზოგი იქ; ოთხი აქ, ოთხი იქ; ათი აქ, ათი იქ, - ლინა აუფმანს ამდენი თვლით გული შეუწუნდა და ცოტა ხნით ჩამოჯდა.

- ჰო, კარგი, - ამოიხვნეშა, - ვიდრე წავიდოდე, ლეო, დამიმტკიცე, რომ შენი უცოდველი შვილების კომმარებში ხელი არ გირევია!

ლეო აუფმანი ულაპარაკოდ გაუძღვა ცოლს საღამოს ბინდში და რვა ფუტი სიმადლის ნარინჯისფრად შეღებილ ყუთთან მიიყვანა.

- ესაა ბედნიერება? - ჩუმი ხმით იკითხა ქალმა, - რომელ ღილაკს უნდა დავაჭირო, რომ სიხარული, მადლიერება, კმაყოფილება და აღტაცება დამეუფლოს?

ბავშვები გარს შემოეხვივნენ.

- დედა, - უთხრა საულმა, - არ გინდა!

- ხომ უნდა ვიცოდე, საულ, რის გამო ავტებე ეს დავიდარაბა, - მანქანის სავარძელში ჩაჯდა და ქმრისკენ გაიქნია თავი.

- მე არა, ეს შენ გჭირდება, ადამიანის სახე რომ დაგიკარგავს.

- მოდი, გთხოვ, - შეევედრა კაცი, - თვითონ ნახავ!..

ლეომ კარი დახურა.

- ღილაკს დააჭირე! - ჩასძახა გაუჩინარებულ ცოლს.

წკაპუნის გაისმა. მანქანა მშვიდად ათრთოლდა ვეება მძინარე ძაღლივით.

- მამა! - ადელდა საული.

- ყური დაუგდე! - უთხრა ლეო აუფმანმა.

<sup>16</sup> „ორი ქალაქის ამბავი“, „სიძველეთა ღუქანი“, „დიდი იმედები“, „ცივი სახლი“ - ჩარლზ დიკენსის (1812-1870) რომანები.

<sup>17</sup> „ტომ სუიფტი და მისი ანიჰილატორი“ – XX საუკუნის დასაწყისში აშშ-ში მოზარდე-ბისთვის განკუთვნილი წიგნების სერიის ერთ-ერთი წიგნი. მთავარი გმირი, ნორჩი გენიოსი ტომ სუიფტი, თავისი გამოგონებებით ღროს უსწრებს - გამოიგონა ტურბო-ძრავიანი მოტოციკლეტი, მოტორიანი ნავი, საჰაერო ხომალდი, ელექტრონული ია-რადი, ფოტოტელეფონი და ა.შ.

თავიდან მანქანის უჩინარი ბორბლებისა და კბილანების ზუზუნის გარდა არაფერი ისმოდა.

- დედას რამე ხომ არ დაემართა? - იკითხა ნოომიმ.

- დაემართა კი არა, კარგად არის, მშვენივრად! აი... გესმის?

- ოჰ!.. - უეცრად აღმოხდა მანქანის წიაღში დამალულ ლინა აუფმანს, წუთის შემდეგ კი შეცბუნებულმა წამოიყვირა, - აჰ!.. ამას შეხედე! ჰარიზი! - ცოტა ხნის შემდეგ კი, - ლონდონი! აი, რომი! პირამიდები! სფინქსი!

- სფინქსიო, გესმით, ბავშვებო? - ჩუმი სიცილით ჩასჩურჩულა შვილებს ლეო აუფმანმა.

- სუნამო! - გაცვებით შეჰყვირა ლინა აუფმანმა.

საიდანღაც ბუნდოვნად ისმოდა პატეფონზე დაკრული მელოდია „ცისფერი ღუნაი“.

- მუსიკა! ვცეკვავ!

- ეჩვენება, თითქოს ცეკვავს, - განმარტა მამამ.

- საოცარია! - წარმოთქვა უჩინარმა ქალმა.

ლეო აუფმანს ლოყები შეეფაკლა.

- რა გამგები ცოლი მყავს.

მერე კი, უცბად, ბედნიერების მანქანაში მომწყვდეულმა ლინა აუფმანმა ტირილი დაიწყო.

გამომგონებელს სახეზე ღიმილი შეეყინა.

- ტირის, - თქვა ნოომიმ.

- შეუძლებელია!

- ტირის, - გაიმეორა საულმა.

- ყოვლად შეუძლებელია! - თვალები აახამხამა ლეო აუფმანმა და მანქანას ყური მიადო, - კი, მაგრამ... ჰო... ბავშვივით ქვითინებს...

უმწეოდ შეაღო კარი.

- მაცალე, - ცოლი ადგომას არ აპირებდა, ცრემლები ღვარად ჩამოსდიოდა დაწვებზე, - დამამთავრებინე, - ერთხანს კიდეც იტირა.

თავზარდაცემულმა ლეო აუფმანმა მანქანა გამორთო.

- ოჰ, ეს ქვეყნად ყველაზე უფრო გულსაკლავი რამაა, - ამოიკვნესა ბოლოს ლინამ, - თავს საშინლად ვგრძნობ, საშინლად, - მანქანიდან გადმობობდდა, - თავიდან ჰარიზი ვნახე...

- მერედა, რა არის ამამი ცუდი?

- ცხოვრებაში არასოდეს მომსვლია თავში ჰარიზში წასვლა, მაგრამ ახლა ჰარიზი განმაცდევინე და მისი ნახვა მომანდომე!

- მანქანა თითქმის მთლიანად გიცვლის რეალობას.

- ვერა. შიგ რომ ვიჯექი, ვიცოდი, რომ ეს სინამდვილე არ იყო!

- დედა, ნუ ტირი.

ქალმა დიდრონი, ჩამუქებული, სველი თვალებით ახედა ქმარს.

- მაცეკვე კიდეც. უკვე ოცი წელიწადია არ გვიცეკვია.

- ხვალვე წაგიყვან საცეკვაოდ!

- არა, არა! რა აუცილებელია! არც უნდა იყოს აუცილებელი, ეს შენი მანქანა ამბობს, აუცილებელიაო! და მისი გჯერა! ცოტას კიდეც ვიტირებ, ლეო, და უკეთ ვიქნები.

- კიდეც რა?

- კიდევ? მანქანა ამბობს, ახალგაზრდა ხარო, მე კი ადარ ვარ. ის ტყუის! ბედნიერების კი არა, უბედურების მანქანაა!

- რატომ უბედურების?

ცოლი ცოტათი დამშვიდებულიყო.

- ლეო, გეტყვი, რა შეცდომაც დაუშვი. დაგავიწყდა, რომ ოდესღაც დადგება ის წუთი, ის საათი, როცა აქედან უნდა გამოვძვრეთ და ისევ გასარეცხ ჭურჭელსა და ასალაგებელ ლოგინებს დავუბრუნდეთ. სანამ შიგ ზიხარ, ყველაფერი კარგადაა: მზის ჩასვლა უსასრულოდ გრძელდება, ჰაერში საამო სუნი ტრიალებს და ტემპერატურაც იდეალურია. რაც გსიამოვნებს, შენი სურვილისამებრ გრძელდება. გარეთ კი ბავშვები სადილს ელოდებიან, პერანგებზე დილებია მისაკერებელი, თანაც, გულზე ხელი დაიდე, ლეო, რამდენ ხანს შეიძლება უყურო მზის ჩასვლას? ვის სჭირდება უსასრულოდ გაჭიანურებული მზის ჩასვლა? ვის სჭირდება მარადიული კეთილსურნელება და იდეალური ტემპერატურა? დროთა განმავლობაში ამ ყოველივეს ვედარც კი შევამჩნევთ. მზის ჩასვლა ორიოდ წუთით არის მშვენიერი, შემდეგ ის რაღაც სხვამ უნდა შეცვალოს. ასეთები ვართ ადამიანები. ეს როგორ დაგავიწყდა, ლეო?

- მართლა დამავიწყდა!

- მზის ჩასვლა იმიტომაც გვხიბლავს, რომ ხანმოკლეა.

- მაგრამ რომ მთავრდება, ყოველთვის გვწყდება გული.

- სამუდამოდ თუ გაგრძელდა და ყელში ამოგივიდა, მაშინ ნახე გულის დაწყვეტა. შენ ორი რამ გააკეთე არასწორად: ხანმოკლე მოვლენები შეაყოვნე, შორეული კი ჩვენს ეზოში შემოიყვანე, მაგრამ აქ მათი ადგილი არ არის, აქ მხოლოდ ეს შეუძლიათ მითხრან: „ლინა აუფმან, ჰარიზს ვერასოდეს ნახავ! ვერც რომის ნახვას ეღირსები!“ მე კი ეს ისედაც მუდამ ვიცოდი, რაღა საჭიროა შეხსენება? სჯობს, დავივიწყოთ ეს ყველაფერი და დინებასმიყვით, ლეო, უბრალოდ ვიცხოვროთ, რას იტყვი?

ლეო აუფმანი შეტორტიმანდა და მანქანას მიეყრდნო, მერე იმწამსვე წამოიშრია და დამწვარი ხელი გაიქნია.

- მაშ, ახლა რა ვქნათ, ლინა?

- მე ვერაფერს გირჩევ. ის კი ვიცი დანამდვილებით, რომ ვიდრე ეს მანქანა აქ დგას, მუდამ მოგვინდება გამოსვლა ან მე, ან საულს, როგორც წუხელ იყო, ჩვენდა უნებურად ჩავსხდებით შიგ და შორეულ და მიუწვდომელ ადგილებს მოვინახულებთ, მერე კი ყოველ გადმოსვლაზე მწარედ ავტირდებით და ოჯახის სრულყოფილ წევრებად ველარ ვივარგებთ.

- არ მესმის, - თქვა ლეომ, - ასე როგორ შევცდი. რომ დავრწმუნდე, თვითონ უნდა გამოვცადო, - მანქანაში ჩაჯდა, - ხომ არსად წახვალთ?

- დაგელოდებით, ლეო, - თავი დაუკრა ცოლმა.

ლეომ კარი დახურა. ერთ წუთს შეჩერდა თბილ სიბნელეში, მერე ღილაკს დააჭირა და ის-ის იყო, ფერებისა და მუსიკის ტალღებში განცხრომას მიეცა, რომ ვიდაცის კვილი შემოესმა.

- ცეცხლი, მამა! მანქანა იწვის!

ვიდაც გამალეებით ურტყამდა კარს. ლეო წამოხტა, თავით ჭერს მიეხალა და მოულოდნელად ღია კარში გადავარდა. ბავშვებმა გარეთ გამოათრიეს და წამოაყენეს. მის ზურგს უკან რაღაცამ მოგუდულად იფეთქა. მეორე წუთში მთელი ოჯახი სხვადასხვა მიმართულებით გარბოდა. ლეომ უკან მიიხედა და შეიცხადა:

- საულ, სახანძროში დარეკე!

ლინა აუფმანმა საული შეაჩერა.

- მოიცა, საულ.

გარაჟიდან ცეცხლის ალმა იხუვლა და მოგუდულად კვლავ რაღაცამ იფეთქა. როდესაც დარწმუნდა, რომ მანქანა კარგად იწვოდა, ლინამ თავის დაკვირვით გაამხნევა შვილი:

- კარგი, საულ, ახლა გაიქეცი, სახანძრო გამოიძახე.

თუკი ვინმე იყო რაიმეს შემძლე, ხანძრის ჩასაქრობად მოქანდა. პაპა სპოლდინგიც აქ იყო დაგლასსა და ტომთან ერთად, მათი მდგმურების უმრავლესობა, ხევის გაღმიდან მოსული მოხუცები და ექვსი კვარტალის რადიუსზე მცხოვრები ბავშვებიც აქ იმყოფებოდნენ. ლეო აუფმანის შვილები კი, წინა რიგში ამაყად გამოჰიმუნნი, გარაჟის თავზე ლამაზად მოცეკვავე ალებს აყოლებდნენ თვალს.

პაპა სპოლდინგმა ცისკენ ამავე კვამლის ღრუბელს ახედა და მშვიდად იკითხა:

- რა იყო ეს, ლეო? შენი ბედნიერების მანქანა?

- ერთ-ორ წელიწადში შეიძლება კარგად გავიაზრო და მერე გეტყვიტ, - უპასუხა ლეომ.

ლინა აუფმანი სიბნელეში იდგა და ეზოში მოფუსფუსე მენანძრეს უმზერდა; გარაჟი გუგუნით ჩამოიშალა.

- ლეო, - თქვა ქალმა, - ამის მოფიქრებას წლები არ უნდა. შეხედე, დაფიქრდი. ცოტა ხნით გაყუჩდი, მერე შემოდი და მეც მითხარი. სახლში ვიქნები: წიგნებს თაროებზე დავაბრუნებ, ტანსაცმელს - კარალებში, ვახშამს მოვამზადებ, თორემ დაგვიანდა, ხედავ, უკვე ბნელა. წამოდით, ბავშვებო, დედას დაეხმარეთ.

როდესაც მენანძრეები და მეზობლები გაიკრიფნენ, ლეო აუფმანი, პაპა სპოლდინგი, დაგლასი და ტომი მხრჩოლავი ნაცეცხლარის წინაშე დარჩნენ ჩაფიქრებულნი.

ლეომ ფეხი წაჰკრა სველი ნაცრის გროვას და მძიმედ ამოთქვა აუცილებელი სათქმელი:

- ცხოვრების დასაწყისში ყველაფერზე ადრე ერთ რამეს ხვდები: რომ სულელი ხარ... და სულ ბოლოსაც ამას ხვდები: ისევ ისეთ სულელად დარჩი. ამ ერთ საათში ძალიან ბევრი რამ გავიაზრე. ვიღაცამ თითქოს ჩამჩურჩულა: „ლეო აუფმან, ბრმა ხარ!..“ გინდათ, ნამდვილი ბედნიერების მანქანა გაჩვენოთ? ასე, ორი ათასი წლის წინ გამოიგონეს და დღემდე მუშაობს, არა, მუდამ უხარვეზოდ არა, მაგრამ მაინც მუშაობს. ამდენ ხანს აგერ, ჩემ გვერდით იყო.

- კი მაგრამ, ხანძარი?.. - იკითხა დაგლასმა.

- ხანძარი, გარაჟი, ჰო, მართალია! მაგრამ, როგორც ლინამ თქვა, ამის მიხედრას წლები არ სჭირდება. ის, რაც გარაჟში დაიწვა, ნამდვილი არ ყოფილა!

ყველანი პარმადის კიბეზე აჰყვნენ ლეოს.

- აგერ, - ჩასჩურჩულა ლეო აუფმანმა, - მოუახლოვდით ფანჯარას, ჩუმად იყავით და დაგანახვებთ.

პაპამ, დაგლასმა და ტომმა ყოყმანით შეიხედეს შუშაბანდის ფართო ჭრილობი.

იქ, თბილი შუქის პატარა ტბორებში გახვეულიყო ის, რასაც ლეო აუფმანი უჩვენებდათ: საული და მარშალი პატარა მაგიდასთან ჭადრაკს თამაშობდნენ. სასტუმრო ოთახში რებეკა სუფრაზე დანა-ჩანგალს აწყობდა. ნოომი ქალღმერთისაგან თოჯინას კაბებს ჭრიდა. რუთი აკვარელით ხატავდა. ჯოზეფს თავისი ელექტრომატარებელი ჩაერთო. სამზარეულოს ღია კარში ლინა აუფმანი ოხშივრიანი ღუმლის წინ დახრილიყო, ფრთხილად

გამოჰქონდა ტაფა, რომელზედაც შებრაწული ქათამი შიშხინებდა. ყოველი ხელი, თავი თუ ბაგე დიდ-პატარა მოძრაობას ასრულებდა. მინის მიღმა მათი ხმები მოისმოდა. ვიღაც მღეროდა მაღალი, კრიალა ხმით. ახალგაზომ-ცხვარი ჰურის სურნელი იფრქვეოდა. ისეთი, ეჭვს რომ არ ტოვებდა: ეს ნამდვილი ჰური იყო, რომელსაც ერთ წუთში ნამდვილი კარაქი წაესმებოდა. ყველაფერი თავ-თავის ადგილზე გახლდათ და აწყობილად მუშაობდა.

პაპა, დაგლასი და ტომი ლეო აუფმანს მიუბრუნდნენ, მას ფანჯრისათვის თვალი არ მოეცილებინა, გამტკნარებულ სახეზე ვარდისფერი სინათლე ეღვრებოდა.

- რა თქმა უნდა, - თავისთვის ჩაილაპარაკა, - აგერ არის, - მშვიდი სევდით, გაათმაგებული სიხარულითა და დარწმუნებით აღევნებდა თვალს სახლის წიაღში აღძრულ ფუსფუსს, ჭერქვეშ საგნების გადანაცვლებას, შეყოვნებასა და კვლავ საერთო წესრიგში ამოძრავებას, - ბედნიერების მანქანა, - წარმოთქვა ბოლოს, - ბედნიერების მანქანა.

წამიც და, ის გაუჩინარდა.

მერე კი პაპა, დაგლასი და ტომი უყურებდნენ, როგორ მიმოდიოდა ლეო აუფმანი თავისი დანადგარის წიაღში, მის თბილ, საოცარ, უსასრულოდ ფაქიზ და იღუმალ ნაწილებს შორის, ხან ერთს წაახმარდა ხელს, ხან მეორეს გაასწორებდა, ხანაც მესამეს დაატრიალებდა.

ბოლოს სამივენი პარმაღიდან ზაფხულის გრილ ღამეში ჩაეშვნენ.

\* \* \*

წელიწადში ორჯერ ეზოში დიდ, ფართო ხალიჩებს ფრიალით აფენდნენ მოლზე, სადაც ისინი უადგილოდ და უკაცურად გამოიყურებოდნენ. მერე კი ბებოსა და დედას რაღაცები გამოჰქონდათ, რაც იმ ულამაზესი, გრეხილი მავთულის სკამების ზურგს მოგაგონებდათ, ქალაქის ცენტრში, გამაგრებულ ბელი სასმელების კაფეში რომ იდგა. ამ დიდ მავთულის ჩოგნებს წრეში ჩამოარიგებდნენ და წამით ყველანი - დაგლასი, ტომი, ბებო, დიდი ბებია და დედა - კუდიანებივით თუ ფუძის ანგელოზებივით გატრუნულნი, ძველ სომხურ ჩუქურთმებში ჩამჯდარ მტვერს ჩაუსაფრდებოდნენ. შემდეგ დიდი ბებია თვალით ან ბაგის ამოძრავებით აძლევდა ყველას ნიშანს, ყველანი საბერტყებს მოიქნევდნენ, მავთულის წნულები სისინით გააჰობდა ჰაერს და ხალიჩებს ეცემოდა, - აი, შენ! ესეც შენ! - გაჰყვიროდა დიდი ბებო, - აბა, ბიჭებო, ბუზებს დაერიეთ! გასრისეთ ეგ ბატლინჯოები!

- კარგი რა! - შეაგონებდა ხოლმე ბებო თავის დედას.

ყველას ეცინებოდა. თავზე მტვრის ქარბუქი დასტრიალებდათ. სიცილი ხველაში გადადიოდა.

ჰაერის ყოველ აფეთქებაზე იფრქვეოდა ბუსუსების კორიანტელი, ქვიშის მარცვლების ნიაღვარი, ჩიბუხიდან გადმოცვენილი თუთუნის ოქროს ფანტელები. სულის მოსათქმელად შეჩერებული ბიჭების თვალწინ ფარდაგის ფაფუკ ზედაპირზე მათი საკუთარი და უფროსების ფენის ურიცხვი ნაკვალევი იკითხებოდა. აღმოსავლეთ სანაპიროზე აღბეჭდილი ეს მილიარდი კვალი ახლა მრავალჯერ მიმოქცეული დარტყმების ზვირთებს უნდა ამოეშალა.

- აი, შენი ქმრის დაღვრილი ყავა! - ბებომ გულისწყრომით მიარტყა საბერტყი ხალიჩას.

- აქ ნაღები დაგეცა! - დიდმა ბებიამ მტვრის ბუდი დააყენა.

- ხედავთ, როგორ ემჩნევა, ზედ რომ სრიალებდით? ოჰ, ბიჭებო, ბიჭებო!

- სუპერბებია, აგერ, შენი კალმიდან გადმოდვრილი მელანი!

- ფუჰ! ჩემი მეწამულია, ეს კი უბრალო ლურჯი მელანია!

ტყავ!

- ერთი შეხედვ შემოსასვლელი კარიდან სამზარეულოსაკენ გაკვალულ ბილიკს. საკვები. აი, რა იზიდავს ლომებს სარწყულებლად. მოდი, ამოვშალოთ, უკუდმა შემოვატრიალოთ.

- მაგას სჯობს, მამაკაცები სახლში აღარ შემოვუშვათ.

- ფენსაცმელი შემოსასვლელთან გაიხადონ.

ტყავ! ტყავ!

საქმის დასაგვირგვინებლად ხალიჩები სარეცხის თოკებზე გადაფინეს. ტომი დაამტერდა უცხო ხვეულებსა და თვლებს, ყვავილებსა და ყოვლად გამოუცნობი ფიგურების განმეორებად ჩუქურთმებს.

- ტომ, რას გაჩერებულხარ. დაარტყი, შვილო!

- მაგარია, იმდენ რამეს ვხედავ, - გაეპასუნა ტომი.

დაგლასმა ეჭვით შეხედა.

- მაინც რას ხედავ?

- ბიჭო, მთელ ქალაქს, ხალხს, სახლებს, აი, ჩვენი სახლიც! - ტყავ! - ჩვენი ქუჩა! - ტყავ! - ეს შავი ადგილი ხევია! - ტყავ! - აგერ სკოლა! - ტყავ! - ეს სასაცილო სიფათი შენ ხარ, დაგ! - ტყავ! - აი, დიდი ბებია, ბებო და დედა. - ტყავ! - რამდენი წელია, რაც ეს ხალიჩა ძირს გვიფენია?

- თხუთმეტი.

- თხუთმეტი წელია ხალხი ზედ დააბიჯებს; ყოველ ნაკვალევს მკაფიოდ ვხედავ, - გაიკვირვა ტომმა.



- გონს მოდი, ბიჭო, რას მიეღ-მოედები? - უთხრა დიდმა ბებია.

- აქ ყველაფერი ჩანს, რაც კი ამ წლების მანძილზე მოხდა ჩვენს სახლში!

- ტყაპ! - მთელი წარსული, მაგრამ მე მომავალსაც ვხედავ. თვალებს თუ დავაჭყეტ და ამ ჩუქურთმებს კარგად ჩავაკვირდები, იმასაც დავინახავ, სად წავალთ და სად ვირბენთ ხვალ.

დაგლასი შედგა, ცალ ხელში ისევ საბერტყს იმარჯვებდა.

- კიდევ რას ხედავ მაგ ხალიჩაზე?

- ალბათ, ძირითადად, ძაფებს, - ჩაერთო დიდი ბებო, - ისეთი გაცრეცილია, რომ ჩონჩხიდა დარჩა. სულ გამჭვირვალე ჩანს ქსოვილი.

- მართალია! - იღუმალი კილოთი დაეთანხმა ტომი, - ჯვარედინად გაჭიმული ძაფები. ყველაფერს ვხედავ. მზაკვარი არამზადები. ჩასაფრებული მტარვალნი. აი, ასე გადის ავდრის ხაზი, ეს კი კარგი ამინდის ხაზია. პიკნიკები, ჰურმარილი, მარწყვის წვეულებები, - საბედისწერო ჟესტით მიუთითებდა თავისი საბერტყით ხალიჩის ხან ერთ მონაკვეთზე, ხან მეორეზე.

- მაშ, მე აქ ჰანსიონი მქონია გახსნილი, - გაწბილდა ბებია.

- ყველაფერი ამ ფაფუკ ხავსშია ჩახატული. თავი გვერდზე გადასწიე, დაგ, და ცალი თვალი მოჭუტე. რა თქმა უნდა, სადამოთი უფრო მოსახერხებელია, როცა ხალიჩა ოთახში აფენია, სინათლე ანთია, მაშინ ზედ ყველანაირი ჩრდილი ეცემა, მკრთალი და ბნელი, ძაფები უსასრულობაში იჭიმება, გეძინება, ხელს უსვამ ხაოიან მინდორს. დაგენაძლევეები, ზუსტად ასეთი სუნი აქვს უდაბნოს, ცხელი და ხრაშუნა, ალბათ, სარკოფაგშიც ასეთი სუნია. ამ წითელ ლაქას შეხედე: ბედნიერების მანქანა იწვის!

- ვიდაცის სენდვიჩიდან გადმოღვრილი კეტჩუპი იქნება, - თქვა დედამ.

- არა, ბედნიერების მანქანაა, - დაგლასს გული დასწყდა ამის გამო, რომ ის აქაც იწვოდა. ლეო აუფმანის იმედი ჰქონდა, ეგონა, ის ყველაფერს მოაგვარებდა, ყველა სახეზე უცვლელ დიმილს გააჩენდა, ეგონა, მისი წყალობით ციციქნა ავტოპილოტი, რომელსაც დაგლასი საკუთარ არსებაში შეიგრძნობდა, მუდამ მზისკენ იფრენდა, მაშინაც კი, როცა დედამიწა კოსმოსური წყვდიადისაკენ შებრუნდებოდა. ამის მაგიერ თვალწინ ლეო აუფმანის უნიათობა და ნაცარტუტის გროვა ედგა. ტყაპ! ტყაპ! დაგლასმა მთელი ძალით შეუტია ამ სანახაობას.

- შეხედე, მწვანე ელექტრომანქანა! შიგ მის ფერნი და მის რობერტა სხედან! - შესძახა ტომმა, - პიპიპი! ტყაპ!

ყველანი იცინოდნენ.

- დაგლას, შენი სიცოცხლის ძაფები კვანძებად იხლართება. ძალიან ბევრი მკვანზე ვაშლი არ ჭამო, არც მწინილი ძილის წინ!

- აბა, რომელია? - ჩააკვირდა დაგლასი.
  - ეს დღეიდან ერთი წლის შემდეგ იქნება, ეს კვანძი ორი წლის მერეა, ეს კი ერთი, სამი, ოთხი, ხუთი წლის მერე!
  - ტყაპ! მავთულის საბერტყი ჰაერში გველივით ასისინდა.
  - ეს მომავალში კიდე გაიზრდება! - დაასრულა ტომმა.
- ისე მაგრად დაარტყა ხალიჩას, მთელი ხუთი საუკუნის მტვერი აადინა შეშინებულ ქსოვილს და ერთი შემზარავი წუთის მანძილზე ეს შავი ღრუბელი მთრთოლარე ქსოვილის ხლართებში ჩამტერებული დაგლასის თავზე ჰაერში გაქვავდა, მერე კი ძველი სომხეთის ქარიშხალმა მათ თვალწინ, უხმოდ, შავი სუდარით შემოსა ბიჭი...

\* \* \*

ხნიერ მისის ბენტლის ადარც კი ახსოვდა, რით დაიწყო ბავშვებთან მისი ურთიერთობა. ხშირად მოხვედრიან თვალში ხილ-ბოსტნეულის მაღაზიაში, ფარვანებივით თუ მაიმუნებივით რომ დაძრწოდნენ კომბოსტოებსა და ბანანის კუნწულებს შორის, მუდამ უდიმოდა მათ და ისინიც ღიმილით ჰასუხობდნენ. ხედავდა, ახალ ნათოვზე ნაკვალევს როგორ ტოვებდნენ, როგორ ისრუტავდნენ შემოდგომის ბოლს, გაზაფხულობით კი ვაშლის ყვავილის კორიანტელს აყენებდნენ, მაგრამ მათი არასდროს შეშინებია. თავად მას რაც შეეხება, მის სახლში მუდამ უკიდურესი წესრიგი სუფევდა: იატაკები სუფთად ჰქონდა გამოგვილი, სურსათი - სათავსებსა და ყუთებში დაბინავებული, ქუდის სამაგრი ქინძისთავები - საგანგებო ბალიშზე ასხმული, საძინებლის კამოდის უჯრებში კი მთელი ცხოვრების მანძილზე ნაგროვები ტკიცინა თეთრეული ინახებოდა.

მისის ბენტლი თავშენახული ქალი გახლდათ. სათუთად ინახავდა ბილეთებს, თეატრის ძველ პროგრამებს, მაქმანის ჩამონაჭრებს, თავსაფრებს, მატარებლის განრიგებს; ყველაფერს, რაც კი არსებობის მოსაგონარ სუვენირებად ეგულებოდა.

- ფირფიტების მთელი დასტა მაქვს, - ჰყვებოდა ხშირად, - აი, ეს კარუზოა. 1916 წელს ვიყიდე ნიუ-იორკში; მაშინ სამოცისა ვიყავი და ჯონი კიდეც ცოცხალი იყო. ეს კი, „ივნისის მთვარეა“, 1924 წელს შექმნილი, მგონი, უკვე ჯონის გარდაცვალების შემდეგ.

გარკვეულწილად, მისი ცხოვრების უდიდეს სინანულს სწორედ ეს წარმოადგენდა: უსაყვარლესი არსება, რომლის მოსმენა და შეხება ყველაზე მეტად სიამოვნებდა, ვერ შეინარჩუნა. ჯონი ახლა შორს იყო, ის კუბოში

სათუთად მოეთავსებინათ, ტრიალ მინდორზე ბალახის ქვეშ ჩაემალათ და ზედ თარიღიც მიეწერათ. მისგან აღარაფერი შემორჩა გარდა აბრეშუმის ქუდისა, ხელჯოხისა და საგარეო კოსტიუმისა, რომელსაც ქალი კარადაში ინახავდა. აი, სულ ეს გახლდათ მისი ნაშთი და ისიც ჩრჩილს დაეძენდა.

და მაინც, რაც შეძლო, ყველაფერი შემოინახა: ვარდისფერი ყვავილებით მოჩითული მისი კაბები უზარმაზარ შავ ჩემოდნებში ნაფტალინის ბურთულებს შორის ეწყო; ბავშვობისდროინდელი თლილი მინის ჭურჭელი მინისავე კარადებში იდგა, - ეს ყველაფერი ხუთი წლის წინ წამოიღო, როდესაც ამ ქალაქში ჩამოვიდა. მისი მეუღლე სხვადასხვა ქალაქში ბინებს აქირავებდა. მისის ბენტლი კი მონაცვლეობით ცხოვრობდა ამ ბინებში, სიძველისგან გაყვითლებული ჭადრაკის სპილოს ძვლის ფიგურასავით ქალაქიდან ქალაქში გადადიოდა და გზადაგზა ბინებს ყიდდა, სანამ ამ უცხო ქალაქში არ ამოყო თავი ჩემოდნებითა და ჩამუქებული ავეჯით გარშემორტყმულმა.

ბავშვებთან დაკავშირებული ამბავი შუა ზაფხულში მოხდა. სუროს მოსარწყავად ვერანდაზე გამოსულმა მისის ბენტლიმ ორი გოგონა და პატარა ბიჭი შენიშნა, მის გაზონზე უდრტვინველად რომ წამოწოლილიყვნენ და ბალახის სიღბოთი ტკბებოდნენ.

მისის ბენტლის ნიღაბივით ყვითელ სახეზე ღიმილი გამოისახა. წუთიც და, მოსახვევიდან ჯადოქრის კიდობანივით უეცრად გამოჩნდა მენაყინის ვაგონი. მოგორავდა და თან სიგრილის მომასწავებელი ჟღარუნა მელოდით უხმობდა ყველას. ბავშვები ბალახზე წამოიმართნენ და მზისკენ მიქცეული მზესუმზირებივით მისკენ მიაბრუნეს თავები.

- გინდათ ნაყინი? - გასცახა მისის ბენტლიმ, - ახლავე! - ვაგონი გაჩერდა და მოხუცმა ქალმა გამყიდველს ხურდა ჩაუჩხრიალა, დიდი გამყინვარების უმშვენიერესი ნაკუწები გამოართვა და ბავშვებს დაურიგა. ბავშვებმა მადლობა გადაუხადეს, პირი უკვე თოვლით ჰქონდათ ამოვსებული, იდგნენ და თავიდან ფეხებამდე ათვალეიერებდნენ მოხუც ქალს.

- თქვენც ხომ არ მოკბეჩით ცოტას? - შესთავაზა ბიჭმა.

- არა, პატარავ. ისეთი მოხუცი ვარ, რომ პაპანაქება სიცხემიც კი მცია, - ჩაიცინა მისის ბენტლიმ.

ციცქნა აისბერგებით ხელში კიბე აიარეს და ვერანდის ჩრდილში ჩამწკრივდნენ გრძელ ღივან-საქანელაზე.

- მე ელისი ვარ, ეს ჯეინია, ეს კი ტომ სპოლდინგი.

- ძალიან სასიამოვნოა. მე კი მისის ბენტლი ვარ. იყო დრო, როცა ელენს მეძახდნენ.

ბავშვები გაოგნებით მიაშტერდნენ.

- არ გჯერათ, რომ ელენი მქვია? - ჩაეკითხა მოხუცი ქალი.
- არ ვიცოდი, ხნიერ ქალბატონებსაც თუ ჰქონდათ სახელები, - ტომმა თვალელები დაბნეულად აახამხამა.
- მისის ბენტლიმ ცივად ჩაიცინა.
- იმის თქმა უნდოდა, რომ მოხუცებს სახელით არავინ მიმართავს, - შეარბილა ჯეინმა.
- ჩემო კარგო, ჩემი ხნის რომ გახდები, არც შენ დაგიძახებენ ჯეინს. ასაკი სიღინჯეს გვმატებს და ქალბატონობით მომართვას ითხოვს. ახალგაზრდები ვერ ბედავენ, „ელენით“ მომმართონ. ეს მეტისმეტად ფამილარულად ჟღერს.
- რამდენი წლის ბრძანდებით? - იკითხა ელისმა.
- ასე, პტეროდაქტილის ხნის, - ღიმილით უპასუხა ქალმა.
- მაინც, რამდენის?
- სამოცდათორმეტის.
- ბავშვები ჩვეულებრივზე უფრო ძლიერად დაეწაფნენ ტკბილ ლოლოებს, რათა ეს ინფორმაცია საფუძვლიანად გაეაზრებინათ.
- რა ბებერი ხართ, - აღმოხდა ტომს.
- ისეთი შეგრძნება მაქვს, თითქოს მას მერე, რაც თქვენი ტოლი ვიყავი, არაფერი შეცვლილა, - მიუგო ქალმა.
- ჩვენი ტოლი?
- ჰო, ოდესღაც შენნაირი მშვენიერი გოგონა ვიყავი, ჯეინ, და შენნაირიც, ელის.
- ბავშვებს ხმა აღარ ამოუღიათ.
- რაშია საქმე?
- არაფერში, - ჯეინი წამოდგა.
- ოჰ, ასე უცბად ნუ წახვალთ. ჭამა არ დაგიმთავრებიათ... მოხდა რამე?
- დედამ მითხრა, ტყუილის თქმა არ შეიძლებაო, - თქვა ჯეინმა.
- რა თქმა უნდა, არ შეიძლება. ეს ძალიან ცუდია, - დაეთანხმა მისის ბენტლი.
- და არც ტყუილის მოსმენა შეიძლება.
- ვისგან მოისმინე ტყუილი, ჯეინ?
- ჯეინმა მოხუც ქალს შეხედა და შეწუხებული სახით აარიდა მზერა:
- თქვენგან.
- ჩემგან? - მისის ბენტლიმ გადაიხარხარა, დამჭუნარი პატარა თათი გამბდარ მკერდზე მიიღო, - მაინც რა მოგატყუე?
- თქვენი ასაკის შესახებ რაც გვითხარით, პატარა გოგონა ვიყავიო.

მისის ბენტლი გაშრა.

- კი მაგრამ, დიდი ხნის წინათ მართლა ვიყავი პატარა გოგონა!

- ელის, ტომ, წამოდი.

- მოიცადეთ ერთ წუთს, - უთხრა მისის ბენტლიმ, - ესე იგი, არ გჯერათ?

- არ ვიცი, - თქვა ჯეინმა, - არა.

- სასაცილოა პირდაპირ! ეს ხომ თავისთავად ცხადია: ოდესღაც ყველა იყო პატარა!

- თქვენ არა, - თვალებდახრილმა თითქმის უხმოდ ჩაილულულა ჯეინმა და ნაყინის ჯოხი ძირს წარმოქმნილ ვანილის გუბეში ჩაუვარდა.

- როგორ არა, თქვენსავით მეც ვიყავი რვა, ცხრა, ათი წლის.

გოგონებს სიცილი წასკდათ, მაგრამ იმწამსვე თავი შეიკავეს და დადუმდნენ.

მისის ბენტლიმ თვალები დააბრიალა.

- კარგი, გეყოფათ! სად მაქვს ათი წლის ბავშვებთან კამათის დრო! საკვირველი არაფერია: ათი წლისა მეც თქვენსავით სულელი ვიყავი.

გოგონებს ისევ გაეცინათ. ტომმა თავი უხერხულად იგრძნო.

- გვეხუმრებით, ხომ ასეა? სინამდვილეში ხომ არასოდეს ყოფილხართ ათი წლის, მისის ბენტლი?

- აბა, შინ მოუსვით! - უცერად დაუყვირა ქალმა, რადგან მათი მზერის ატანა აღარ შეეძლო, - რას მომჩერებხართ და დამცინით?!

- სინამდვილეში ხომ არ გქვიათ ელენი?

- აბა, რა მქვია?

- კარგად ბრძანდებოდეთ, - გასძახეს გოგონებმა და ხითხითით გაუყვნენ ჩრდილში გახვეულ გაზონს, ტომი მათ უკან მიჩანჩალებდა, - გამადლობთ ნაყინისათვის!

- ოდესღაც კლასობანასაც ვთამაშობდი! - უკან დააღევნა მისის ბენტლიმ, მაგრამ ბავშვები უკვე აღარსად ჩანდნენ.

\* \* \*

მისის ბენტლი საღამომდე არ გაჩერებულა: ხმაურიანად ახეთქებდა თუნუქის ჩაიდნებს, მომეტებული ენერგიით მოიძადა დიეტური სამხარი, წამდაუწუმ გარეთ აცეცებდა თვალს, ღია კარში, რათა იმ აბეზარა ლაწირაკებისათვის სიცილის დროს წაესწრო. თუმცა, რომც გამოჩენილიყვნენ, რაღა უნდა ჰქონოდა მათთან სალაპარაკო, ან მათზე ფიქრით რატომ უნდა გაეცხელებინა თავი?

- ერთი ამათ დამიხედე! - გაცხარებით მიმართა მოხუცმა ქალმა თავის კონტა, ვარდებიან ფინჯანს, - არავინ არასოდეს დაეჭვებულა იმაში, რომ ოდესღაც პატარა გოგონა ვიყავი. რა სულელური, რა საშინელი აზრია! სიბერე სულაც არ მაწუხებს! სრულებით არა! მაგრამ ვერ დავუშვებ, რომ ჩემი ბავშვობა წამართვან!

ერთი-ორჯერ დალანდა ბავშვები ფუღუროებიანი ხეების ქვეშ, უღმობელი პატარა თითებით მის ჰაერით უჩინარ სიყმაწვილეს რომ დააქროლებდნენ.

ვანშმის შემდეგ თვითონაც გაოცდა, როდესაც მისმა ხელებმა, სპირიტისტულ სეანსზე ამოძრავებული ხელთათმანეებით, დამოუკიდებლად მოაგროვეს რამდენიმე საგანი და სუნამონაპკურებ ცხვირსახოცში გაახვიეს. ამის შემდეგ ქალი ვერანდაზე გავიდა და იქ ნახევარ საათს იდგა უძრავად.

უცბად ღამის ფრინველებით ჩაიქროლეს ბავშვებმა, მაგრამ მისის ბენტლის ძახილმა ააფართხალა და შეაჩერა ისინი.

- ღიახ, მისის ბენტლი?

- ვერანდაზე ამოდით! - უბრძანა ქალმა და გოგონები კიბეზე აბობდნენ, ტომიც კვალდაკვალ მიჰყვა.

- გისმენთ, მისის ბენტლი! - ისევ განსაკუთრებულად, ფორტეპიანოს პედალივით მძიმედ გამოკვეთეს სიტყვა „მისის“, თითქოს ეს ქალის სახელი ყოფილიყოს.

- ჩემთვის ძვირფასი რამეები უნდა გაჩვენოთ, - ცხვირსახოცი გაშალა და შიგ ისე ჩაიჭყიტა, თითქოს თვითონაც ცნობისმოყვარეობას აეტანა. ხელოვნური ბრილიანტებით გაწყობილი ციცქნა, ნატიფი თმის სამაგრი ამოიღო.

- ცხრა წლის რომ ვიყავი, ეს მეკეთა, - უთხრა ბავშვებს.

ჯეინმა ნივთი ხელში აათამაშა.

- რა საყვარელია!

- მაჩვენე! - შესძახა ელისმა.

- ეს პაწაწინა ბეჭედი კი რვა წლის ასაკში მეკეთა, - განაგრძო მისის ბენტლიმ, - ხედავთ, ახლა შიგ თითი აღარ ჩამდის. შიგ თუ გახედავთ, პიზის კომპს დაინახავთ, თან იმასაც შეატყობთ, რომ სადაცაა უნდა წაიქცეს.

- აბა, როგორ იხრება? - გოგონებმა ერთიმეორეს გადასცეს ბეჭედი, ბოლოს ჯეინმა ის თითზე მოირგო.

- კარგად მაქვს! - აღფრთოვანებით წამოიძახა.

- თმის სამაგრი კი მე მაქვს კარგად! - გაოცდა ელისი.

მისის ბენტლიმ კი ამასობაში რამდენიმე მრგვალი კენჭი ამოაწყო, მერე კი ძირს დააბნია.

- აი, ამეებით კენჭობანას ვთამაშობდით.

კენჭები უცნაურ ფიგურად განლაგდნენ იატაკზე.

- ახლა ამასაც შეხედეთ! - მისის ბენტლიმ გამარჯვებულის იერით ააფრიალა თავისი კოზირი: ღია ბარათისხელა სურათი, რომელიც შვიდი წლის ასაკში გადაიდო - სურათზე პეპელასავით ყვითელი კაბა ეცვა, ოქროსფერი კულულები, ფართოდ გახელილი ცისფერი თვალები და საყვარლად გაბუსხული ტუჩები ჰქონდა.

- ეს პატარა გოგონა ვინ არის? - შეეკითხა ჯეინი.

- ეს მე ვარ!

გოგონებმა ხელი სტაცეს სურათს.

- თქვენ რომ არ გგავთ? - გულუბრყვილოდ გაიკვირვა ჯეინმა, - ასეთ სურათს ხომ ყველა იშოვის, თუ მონიდომა.

ბავშვებმა ეჭვით შეხედეს მოხუც ქალს.

- სხვა სურათები არა გაქვთ, მისის ბენტლი? - არ ცხრებოდა ელისი, - უფრო გვიანდელი? თუ გაქვთ სურათები, რომელიც თხუთმეტი, ოცი, ორმოცი, ორმოცდაათი წლისამ გადაიდეთ?

გოგონებმა ჩაიფხუკუნეს.

- რა მოვალე ვარ, ყველაფერი გაჩვენოთ?! - გაცხარდა მისის ბენტლი.

- მაშინ არც ჩვენ ვართ მოვალე, დაგიჯეროთ, - უპასუხა ჯეინმა.

- კი მაგრამ, ეს სურათი ხომ ამტკიცებს, რომ მეც ვიყავი პატარა?!

- ეს ვიდაც სხვაა, ჩვენნაირი პატარა გოგონაა. თქვენ ეს სურათი ვიდაცას წაართვით.

- მე გათხოვილიც ვიყავი!

- თუ ასეა, მისტერ ბენტლი სად არის?

- დიდი ხანია, რაც აღარ არის. ახლა აქ რომ იყოს, გეტყოდათ, ოცდაორი წლისა რა ახალგაზრდა და მომხიბლავი ვიყავი.

- მაგრამ ის ხომ აქ არ არის და ვერაფერს გვეტყვის, ასე რომ, ეს ვერაფერს ამტკიცებს!

- ქორწინების მოწმობა მაქვს.

- იქნებ ისიც ვიდაცას გამოართვით? მხოლოდ მაშინ დავიჯერებთ, რომ ოდესმე ახალგაზრდა იყავით, - ჯეინმა თვალები დახუჭა იმის ნიშნად, თუ რამდენად სწამდა საკუთარი სიტყვების, - თუკი ვინმე დამიდასტურებს, რომ ათი წლის ასაკში გნახათ.

- ათასობით ადამიანს ვუნახავვარ, პატარა შტერო, მაგრამ ახლა ყველა მკვდარია, ან მოხუცდნენ, დაუძღურდნენ ან სხვა ქალაქებში არიან,



ამიტომაც ვერ დამემოწმებიან. სულ რამდენიმე წელია, რაც აქ გადმოვედი, ასე რომ, არავის უნახავვარ პატარა.

- აი, ხომ ხედავთ! - ჯეინმა გამარჯვებული მზერა შეავლო მეგობრებს, - არავის უნახავს!

- მომისმინე! - მისის ბენტლი გოგონას მაჯაში სწვდა, - ასეთ რამეში სიტყვას უნდა ენდო. მოვა დრო და შენც დაბერდები და შენზეც იმავეს იტყვიან: „არა, ეს სვავი არასოდეს ყოფილა კოლიბრი! ეს ჭოტი მოლაღური როგორ იქნებოდა?! ამ თუთიყუშს რა საერთო აქვს ლურჯ ფრინველთან?!“ ერთ მშვენიერ დღეს მე დამემსგავსებით!

- არაფერიც, - თავი გააქნიეს გოგონებმა და ერთმანეთს გადახედეს, - ეს ხომ შეუძლებელია?

- მოიცადეთ და ნახავთ! - უთხრა მისის ბენტლიმ.

თავისთვის კი გაიფიქრა: ღმერთო ჩემო, ბავშვები ბავშვები არიან, მოხუცები კი - მოხუცები, ერთმანეთთან არაფერი აკავშირებთ, რასაც ვერ ხედავენ, იმის წარმოდგენა არ შეუძლიათ.

- აი, ვთქვათ, დედაშენი, - მიმართა ჯეინს, - არ შეგინიშნავს, წლებთან ერთად როგორ იცვლება?

- არა, - უპასუხა ჯეინმა, - ის ყოველთვის ერთნაირია.

მართლაც ასე იყო. როდესაც ყოველდღიურად ხარ ადამიანის გვერდით, ვერაფერს ამჩნევ, რადგან ცვლილებები უცბად არ ხდება. მხოლოდ დიდი ხნით, წლობით წასულები უკან რომ ბრუნდებიან, მაშინდა გეცემა თვალში თავზარდამცემი ცვლილება.

ქალმა თავი ისე იგრძნო, თითქოს სამოცდათორმეტი წელი მოგუგუნე შავი მატარებლით სადღაც მიქროდა, ახლა კი უცბად ბაქანზე აღმოჩნდა, ყველა მას შემოეხვია და ეკითხება: „ეს შენ ხარ, ელენ ბენტლი?“

- მგონი, სჯობს, სახლში წავიდეთ, - თქვა ჯეინმა, - გმადლობთ ბეჭდისთვის, ზუსტად მომერგო.

- გმადლობთ თმის სამაგრისთვის. ძალიან ლამაზია.

- გმადლობთ პატარა გოგოს სურათისათვის.

- დაბრუნდით, ამ ნივთებს ვერ გაგატანთ! - შეჰყვირა მისის ბენტლიმ, მაგრამ გოგონები უკვე კიბეზე ჩარბოდნენ, - ეს ყველაფერი ჩემია!

- რას შვრებით? - გაეკიდა გოგონებს ტომი, - დაუბრუნეთ!

- არა, მან ეს ნივთები ვიღაც პატარა გოგოს მოჰპარა! ისინი სხვისია. დიდი მადლობა! - გასძახა ელენმა.

ყვირილს აზრი აღარ ჰქონდა, გოგონები ღამის ფარვანებივით გაუჩინარებულიყვნენ.

- ბოდიში, - ტომმა გაზონიდან ახედა პარმადზე გაქვავებულ მისის ბენტლის და ისიც სწრაფად გაუჩინარდა.

წაიდეს. ჩემი ბეჭედი, ჩემი თმის სამაგრი და ჩემი სურათი წამართვეს, ფიქრობდა აცახცახებული მოხუცი ქალი. ო, გამძარცვეს! ეს ჩემი ცხოვრების ნაწილი იყო!

დიდხანს წრიალებდა უძილოდ სიბნელეში დახვავებულ თავის ჩემოდნებსა და სკივრებს შორის. თვალი გადაავლო კონტა დასტებად დაწყობილ ქსოვილებს, სათამაშოებსა და ბუმბულებს და ხმამაღლა წარმოთქვა:

- მართლაც მე მეკუთვნის ეს ყველაფერი?

ან იქნებ ეს მხოლოდ მარჯვე დედაბრული ხრიკი იყო საკუთარი თავის დასარწმუნებლად, აქაოდა, მეც მაქვსო წარსული? ბოლოს და ბოლოს, რაც ჩავლილია, ჩავლილია, მორჩა და გათავდა. ჩვენ მხოლოდ აწმყოში ვცხოვრობთ. შეიძლება, ოდესღაც იყო კიდეც პატარა, მაგრამ ახლა ხომ აღარ არის! ბავშვობა დასრულდა და მას ვეღარაფერი დააბრუნებდა!

ოთახში ღამის ნიაჰმა შემოუბერა, თეთრი ფარდა ააფრიალა და შავი ხელჯოხი წააქცია, სხვა ძველისძველ მოსაგონართა გვერდით წლების მანძილზე რომ ეყუდა კედელთან. ხელჯოხი რბილად გაგორდა ძირს, მისი ოქროს ბუნიკი მთვარის შუქის სხივზე გაბრწყინდა. ეს მეუღლის ოპერაში სასიარულო ხელჯოხი იყო. ქალს მოეჩვენა, თითქოს ის ახლაც ამ ჯოხით რაღაცას მიუთითებდა, როგორც უწინ, იმ იშვიათ შემთხვევებში, როდესაც უთანხმოება მოსდიოდათ, და მეუღლე თავისი ლბილი, ნაღვლიანი, გაწონასწორებული ხმით ესაუბრებოდა.

- ეს ბავშვები მართლები არიან, - ასე ეტყოდა, ალბათ, - მათ შენთვის არაფერი წაურთმევიათ, ძვირფასო. აქ, ამ წუთში, ეს ნივთები შენი აღარ არის. მას ეკუთვნის, შენს ყოფილ ორეულს, დიდი ხნის წინათ რომ ცხოვრობდა.

ოჰ, შეიცხადა მისის ბენტლიმ. მერე კი, თითქოს ძველისძველი ფირფიტა აშრიალდა პატეფონის ნემსის ქვეშ, ერთბაშად მოაგონდა ის საუბარი, ერთხელ რომ ჰქონდა მისტერ ბენტლისთან - ზრდილ, კოპწიად გამოწყობილ მისტერ ბენტლისთან, საღილეში ვარდისფერი მიხაკი რომ ჰქონდა გაყრილი.

- ძვირფასო, შენ ღროის დინებას ვერ ეგუები - მუდამ ცდილობ, ის იყო, რაც ოდესღაც იყავი, იმის ნაცვლად, რომ დღევანდელი დღე, აი, ეს საღამო გაითავისო. რისთვის ინახავ მაგ ბილეთების დასტებსა და თეატრის პროგრამებს? ისინი მხოლოდ გულს დაგწყვეტენ მომავალში. ჩემო კარგო, გადაყარე ეგ ყველაფერი.

მაგრამ მისის ბენტლი ჯიუტად განაგრძობდა ნივთების სახსოვრად შეგროვებას.

- აზრი არა აქვს, - განაგრძობდა საუბარს მისტერ ბენტლი ჩაის ფინჯნით ხელში, - რამდენსაც უნდა ეცადო, მაინც ვერ დარჩები იმად, რაც იყავი, მუდამ ის იქნები, რაც ამ წუთში ხარ. დრო მომწესხველად მოქმედებს. როცა ცხრა წლის ხარ, ასე გგონია, სულ ცხრა წლის იყავი და სამუდამოდ ცხრა წლის დარჩები. როცა ოცდაათის ხარ, გგონია, სულ მუდამ შეინარჩუნებ წონასწორობას ცხოვრების ამ წყალგამყოფ ქიშხე. მერე კი, სამოცდაათი რომ შეგისრულდება, ესეც სამუდამოდ გეჩვენება. ჩვენ აწმყოში ვართ მომწყვდეულნი, სულერთია - ახალგაზრდობაში თუ სიბერეში, მაგრამ ჩვენი გადასახედიდან სხვა აწმყო არ ჩანს.

ეს მათი მშვიდი ქორწინების მცირერიცხოვან საკამათო თემებს შორის ერთ-ერთი იყო. მეუღლეს არასოდეს მოსწონდა მისი ეს კოლექციონერობა.

- რაც ხარ, ის იყავი, რაც აღარ ხარ, დამარხე და დაივიწყე, - ეტყოდახოლმე, - ბილეთების შენახვა იაფფასიანი ხრიკია, სარკეებიანი ფოკუსი - მეტი არაფერი.

დღეს რომ ცოცხალი ყოფილიყო, ნეტავ რას ეტყოდა?

- სულ ტყუილად ინახავ ამ ჭიის პარკებს, - აი, რას ეტყოდა, - წარსული იმ კორსეტს ჰგავს, რომელშიც ვედარასოდეს ჩაეტევი. მაშ, რადაც გინდა? ახალგაზრდა რომ იყავი, ამას ვედარაფრით დაამტკიცებ. სურათებით? სურათებიც ხომ ტყუიან. შენ ახლა სხვა ხარ.

- საბუთები?

- არა, ჩემო კარგო, შენ არც თარიღი ხარ, არც მელანი, არც ქაღალდი. არც ხარაზურითა და მტვრით სავსე ეს ჩემოდნები. მხოლოდ და მხოლოდ ის ხარ, რადაც ამ წუთში გხედავენ.

მისის ბენტლიმ თავი დაუქნია მოგონებას და შვებით ამოისუნთქა.

- ჰო, მესმის, ყველაფერს მივხვდი.

ოქროსბუნკიანი ხელჯოხი ახლა უძრავად ესვენა მთვარით განათებულ ხალიჩაზე.

- ხვალ დილით, - მიმართა ქალმა, - ამ ყველაფერს ბოლოს მოვუდებ და გასულ წლებს ერთხელ და სამუდამოდ გამოვეთხოვები. დიან, ასე მოვიქცევი...

და ჩაეძინა...

\* \* \*

კამკაშა, მწვანე დილა გათენდა. ბადიანი კარის წინ ორი გოგონა იდგა და ხმადაბლა აკაკუნებდა.

- კიდევ რამე ხომ არ გაქვთ ჩვენთვის, მისის ბენტლი? იმ პატარა გოგონას ნივთებიდან?

ქალი დერეფნის გავლით ბიბლიოთეკაში შეუძღვა.

- აი, ეს აიღე, - ჯეინს ის კაბა მისცა, რომლითაც თხუთმეტი წლისა მანდარინის ქალიშვილს განასახიერებდა, - აი, ესეც, ესეც, - კალეიდოსკოპი, არაჩვეულებრივი დურბინი. რაც მოგეწონებათ, ყველაფერი წაიღეთ, - უთხრა ბავშვებს, - წიგნები, თოჯინები, გორგოლაჭები, ყველაფერი თქვენია.

- ჩვენია?

- დიახ, თქვენი. ახლა კი უნდა გთხოვოთ, ერთ საქმეში დამეხმაროთ. სახლის უკან, ეზოში, დიდი კოცონი უნდა დავანთო. ჩემოდნები უნდა დავცალო და ბევრი რამ მეძველმანეს გავატანო. ყოველივე ეს მე არ მეკუთვნის. საერთოდ, არც ერთი ნივთი არ არის ვინმეს საბოლოო საკუთრება.

- დაგეხმარებით, - უთხრეს გოგონებმა.

მისის ბენტლი ასანთის კოლოფით ხელში წინ გაუძღვა ეზოსკენ მიმავალ ხელებდახუნძლულ პროცესიას.

ზაფხულის მომდევნო დღეებში ხშირად ნახავდით ვერანდაზე მისის ბენტლის, ორ პატარა გოგონასა და ტომს, მავთულზე შემომსხდარნი ნარჩიტებივით რომ გატრუნულიყვნენ და ელოდნენ. როგორც კი შორიდან მოისმებოდა მენაყინის ვაგონის უღარუნი, შემოსასვლელი კარი გაიღებოდა და მისის ბენტლი გამორბოდა თავის ვერცხლისსაკეტიან საფულეში ხელჩაყოფილი. მერე კი პატარებიც და მოხუცი ქალიც ნახევარ საათს პარმაღზე ატარებდნენ, მშვიდად შეეცქეოდნენ შოკოლადის ლოლოებს, შინაგან სიტბოს სიცივით იზავებდნენ და ხალისობდნენ. საბოლოოდ, ძალიან დამეგობრდნენ.

- რამდენი წლის ხართ, მისის ბენტლი?

- სამოცდათორმეტის.

- ორმოცდაათი წლის წინ რამდენის იყავით?

- სამოცდათორმეტის.

- ხომ არასოდეს ყოფილხართ პატარა, არასოდეს გიტარებიან ბაფთები და, აი, ასეთი კაბები?

- არა.

- სახელი გაქვთ?

- არა, მისის ბენტლი მქვია.
- და სულ მუდამ ამ სახლში ცხოვრობდით?
- სულ მუდამ.
- და ლამაზიც არასოდეს ყოფილხართ?
- არასოდეს.
- ხომ სულ ასეთი მოხუცი ხართ, უკვე მილიონ-ტრილიონი წელია? - ზაფხულის ნაშუადღევს უძრავ სიციხეში გოგონები მოხუცი ქალის სახეს გაფაციცებით აკვირდებოდნენ.
- ჰო, - ეტყოდა ხოლმე მისის ბენტლი, - უკვე მილიონ-ტრილიონი წელია.

\* \* \*

- ყვითელი ბლოკნოტი მომარჯვებული გაქვს, დაგ?
- აბა, რა, - დაგმა ფანქრის წვერი კარგად დაასველა.
- ბოლოს რა ჩაინიშნე?
- მთელი რიტუალები.
- ოთხი ივლისი, ბაბუაწვერას ღვინის წურვა, ჰარმაღზე საქანელას გამოტანა და მსგავსი ხარახურა?
- აი, აქ მიწერია, რომ წელს პირველად ვჭამე ნაყინის ტორტი - 1928 წლის პირველ ივნისს.
- ეგ ზაფხულში კი არა, ჯერ კიდევ გაზაფხულზე მოხდა.
- მაინც „პირველი“ იყო, ამიტომაც სიაში შევიტანე. 25 ივნისს ახალი სპორტული ფეხსაცმელი ვიყიდე. 26 ივნისს ბალახზე ფეხშიშველამ გავიბინე. ძალიან, ძალიან ბევრი რამ მქონდა პირველად გასაკეთებელი! ამჯერად რა უნდა შემატყობინო? კიდევ რამე გაიმართა წელს პირველად, არდადეგებთან დაკავშირებული რაიმე ახალი ტრადიციული თამაში? ნაკადულში კიბორჩხალა დაიჭირე თუ წყლის მოხეტიალე ობობასთვის ხელის შევლება მოახერხე?
- არავის არასოდეს შეუვლია ხელი წყლის მოხეტიალე ობობასთვის. მენ იცნობ ასეთ ვინმეს?
- მოიცა, დავფიქრდე...
- ჰა?
- მართალი ხარ. ასეთს არავის ვიცნობ. მგონი, ამას ვერც ვერავინ შეძლებს. წყლის მოხეტიალე ობობა მეტისმეტად სწრაფია.
- სწრაფი კი არა, ის უბრალოდ არ არსებობს, - მოუჭრა ტომმა. წუთით დაფიქრდა და შემდეგ დაადასტურა, - ჰო, არც ოდესმე უარსებია.

წინ გადმოიხარა და ძმას ყურში რაღაც ჩასჩურჩულა.

დაგლასმა მისი ნათქვამი ჩაიწერა.

ორივემ შეხედა ნაწერს.

- ამის დედა ვატირე! - თქვა დაგლასმა, - ამაზე არასოდეს მიფიქრია. მაგარია! მართლაც ასეა. მოხუცები არასოდეს ყოფილან ბავშვები!

- და ეს რაღაცნაირად გულსატკენია, - დემილის შემდეგ წარმოთქვა ტომმა, - მათ ვერაფერს ვუშველით.

\* \* \*

- ასე მგონია, ქალაქი მანქანებითაა სავსე, - შუა სირბილში გადასძახა დაგლასმა მეგობარს, - მისტერ აუფმანი და მისი ბედნიერების მანქანა, მის ფერნი, მის რობერტა და მათი მწვანე მანქანა. შენ კი რას მთავაზობ ახლა, ჩარლი?

- დროის მანქანას! - წამოეწია ქოშინით ჩარლი ვუდმენი, - დედას გეფიცები, მზვერავის, ინდიელის პატიოსან სიტყვას გაძღვევ, ასეა!

- მოგზაურობები წარსულსა და მომავალში? - იკითხა ჯონ ჰაფმა და ორივე მორბენალ ბიჭს გაასწრო.

- არა, მხოლოდ წარსულში. რას იზამ, ერთბაშად ყველაფერი სად არის! აი, მოვედით.

ჩარლი ვუდმენი მესერთან შეჩერდა. დაგლასმა მწვანე მესერს იქით მდგარ ძველ სახლს შეხედა.

- ეს ხომ პოლკოვნიკ ფრილაის სახლია. აქ დროის მანქანა როგორ იქნება: პოლკოვნიკი გამომგონებელი არ არის და რომც იყოს, დროის მანქანა ისეთი მნიშვნელოვანი რამაა, მის ამბავს წლების წინ გავიგებდით.

ჩარლიმ და ჯონმა პარმადის კიბე ფეხაკრეფით აიარეს. დაგლასმა ჩაიფრუტუნა, თავი გააქნია და კიბის ძირას გაჩერდა.

- ჰო, კარგი, დაგლას, - მიუბრუნდა ჩარლი, - რას ჯეუტობ? რა თქმა უნდა, პოლკოვნიკ ფრილაის ეს მანქანა არ გამოუგონია, მაგრამ მისი მეწილეა. ეს მანქანა, რაც თავი გვახსოვს, სულ აქ იყო, უბრალოდ, ჩვენ ვიყავით დებილები და ვერ ვამჩნევდით! დაგლას სპოლდინგ, აბა, კარგაად!

ჩარლიმ ჯონს ისე გაუყარა ხელი, თითქოს ქალს მიაცილებდა. ბადიანი კარი შეადო და სახლში შევიდა. კარის ბრახუნი არავის გაუგონია, რადგან დაგლასი წამოეწიათ, კარს ხელი წაავლო და უხმოდ გაჰყვა მათ შემინულ ვერანდაზე.

ჩარლიმ სწრაფად გადაკვეთა შუშაბანდი, შესასვლელ კარზე დააკაკუნა და შეადო. გრძელი ჩაბნელებული დერეფნის ბოლოში ოკეანის გამოქვაბულივით მწვანე, მიმქრალი, მოციმციმე შუქით განათებული ოთახი მოჩანდა.

- პოლკოვნიკო ფრილაი!

დუმილი.

- ცუდად ესმის, - ჩურჩულით აუხსნა მეგობრებს ჩარლიმ, - მაგრამ მითხრა, პირდაპირ შემოდი და დაიყვირეო. პოლკოვნიკო!

პასუხად ზედა სართულზე ამავალი ხრახნული კიბიდან მტვერი ჩამოიფრქვა. შემდეგ რაღაც სულ ოდნავ შეინძრა დერეფნის ბოლოს, იმ წყალქვეშა ოთახში.

ფრთხილად გაიარეს დერეფანი და მიადგნენ ოთახს, სადაც მხოლოდ ორი საგანი დახვდათ - მოხუცი კაცი და სკამი. ეს ორი საგანი ერთიმეორეს საოცრად ჰგავდა: ორივე ისეთი თხელი იყო, ცხადად ეტყობოდათ, სახსარი - მყესთან, რიკული ძელთან როგორ ჰქონდათ აწყობილ-მიმაგრებული. მათ გარდა ოთახი შიშველ კედლებს, ჭერსა და უხემ ფიცარნაგ იატაკს შორის მხოლოდ დუმილით გაქვინთილ ჰაერს იტევდა.

- მიცვალეხულებს ჰგავს, - ჩურჩულით წარმოთქვა დაგლასმა.

- არა, უბრალოდ ახალ-ახალ ადგილებს იგონებს სამოგზაუროდ, - ძალიან მშვიდად და ამაყად განუმარტა ჩარლიმ, - პოლკოვნიკო!

მუქი ხის ორი საგნიდან ერთ-ერთი შეინძრა, ეს პოლკოვნიკი იყო. მიმოიხედა, თვალები მოჭუტა და სახე უკბილო ღიმილით გაებადრა.

- ჩარლი!

- პოლკოვნიკო, დაგი და ჯონი მოვიყვანე იმიტომ, რომ...

- შემოდით, ბიჭებო, დასხედით, დასხედით!

ბიჭები უხერხულად მოთავსდნენ იატაკზე.

- კი მაგრამ, სად... - დაიწყო დაგლასმა. ჩარლიმ სასწრაფოდ გაჰკრა იდაყვი ნეკნებში.

- რას გულისხმობ? - ვერ გაერკვა პოლკოვნიკი ფრილაი.

- სად შეგვიძლია ჩვენ რამის მოყოლაო, ეს უნდა ეთქვა, - ჩარლიმ დაგლასს დაუბღვირა, მერე ისევ ბერიკაცს გაუღიმა, - თქვენ უნდა გვიამბოთ რაიმე, პოლკოვნიკო.

- ფრთხილად იყავი, ჩარლი, მოხუცებს ერთი სული გვაქვს, ვინმემ გვთხოვოს, ისაუბრეო და მაშინ ველარაფერი შეგვაჩერებს: ბნელი მალაროდან ამომავალი ჟანგიანი ლიფტივით მოყვებით ჯაყჯაყს.



- გვითხარით, ჩინ ლინ-სუს<sup>18</sup> შესახებ რა გახსოვთ, - თითქოს გაკვირით ჩაურთო ჩარლიმ.

- რაო? - შეეკითხა პოლკოვნიკი.

- ბოსტონი? - უკარნახა ჩარლიმ, - 1910 წელი.

- ბოსტონი, 1910... - წარბები შეკრა პოლკოვნიკმა, - ჩინ ლინ-სუ, ოჰ, რა თქმა უნდა!

- დიახ, სერ.

- მოიცადეთ, მოიცადეთ... - პოლკოვნიკის ბუტბუტი თითქოს შორეული ტბის მუქ წყლებზე მოტივიტივებდა, - მოიცადეთ...

ბიჭები გაინაბნენ.

პოლკოვნიკმა თვალები დახუჭა.

- 1910 წლის პირველი ოქტომბერი, შემოდგომის მშვიდი, გრილი სადამო. ბოსტონის ვარიეტეს თეატრი, ჰო, აი, სად მოხდა ეს. სავსე დარბაზი, ყველანი იცდიან. ორკესტრი, ფანფარები, ფარდა! სცენაზეა დიდებული აღმოსავლელი ჯადოქარი ჩინ ლინ-სუ! მე კი პირველი რიგის შუაში ვზივარ. „ტყვიის დაჭერა! - აცხადებს ჯადოქარი, - აბა, მონალისებო!“ სცენაზე ჩემ გვერდით მჯდომი კაცი ადის. „შეამოწმეთ თოფი! - ამბობს ჩინი, - მონიშნეთ ტყვია! ახლა კი მონიშნული ტყვიით დატენეთ თოფი და სახეში მესროლეთ, კარგად დამიმიზნეთ, მე კი სცენის ბოლოში ვიდგები და ტყვიას კბილებით დავიჭერ!“

პოლკოვნიკმა ჰაერი ღრმად ჩაისუნთქა და დადუმდა.

დაგლასი გაოგნებითა და თან აღტაცებით შეჰყურებდა პოლკოვნიკს, ჩარლი და ჯონი ერთიანად მონუსხულნი ისხდნენ. მოხუცმა თხრობა განაგრძო, თავი და სხეული სრულიად გაქვავებოდა და მხოლოდ ტუჩები უმოძრავებდა.

- „მზადაა, დაუმიზნეთ, ცეცხლი!“ - ყვირის ჩინ ლინ-სუ. თოფი გავარდა! ჩინ ლინ-სუ კრთება, ტორტმანებს, ვარდება, სახე წითლად ეღებება. დარბაზში პანიკაა, ყველა ფეხზეა. თოფი გაუმართავი აღმოჩნდა. მკვდარიო, ვიღაც ამბობს, და ასეც არის. მკვდარია. საშინელებაა... არასოდეს დამავიწყდება... სახე სისხლიან ნიღაბს მიუგავს, ფარდა სწრაფად ეშვება, დარბაზში ქალების ტირილი ისმის... 1910 წელი... ბოსტონი... ვარიეტეს თეატრი... საბრალო კაცი... საბრალო კაცი...

პოლკოვნიკმა ნელა გაახილა თვალი.

<sup>18</sup> ჩინ ლინ-სუ (იგივე ელსკორთ რობინსონი - 1861-1918) - ამერიკელი ილუზიო-ნისტი, რომელიც ტირიუს „ტყვიის დაჭერა“ შესრულებისას დაიღუპა.

- რა მაგარი იყო, პოლკოვნიკო! - თქვა ჩარლიმ, - ახლა პოუნი ბილზე<sup>19</sup> გვიამბეთ!

- პოუნი ბილზე?..

- მაშინ სამოცდათხუთმეტ წელში, პრერიაში რომ იყავით...

- პოუნი ბილი... - პოლკოვნიკმა კვლავ შეცურა წყვილიდან, - ათას რვაას სამოცდათხუთმეტი წელი... ჰო, მე და პოუნი ბილი შუა პრერიაში პატარა შემადლებაზე ჩავსაფრდით. „ჩუ! - მეუბნება პოუნი ბილი, - ყური დაუგდე“. პრერია უკიდვანო სცენასავით გაფაციცებულა ავდრის მოლოდინში. მენი გავარდა. ყრუდ, ლბილად. ისევ გავარდა, ახლა უფრო მჭექარედ. და აი, მთელი ჰორიზონტის გასწვრივ, სადაც კი თვალი შესწვდება, ვება, შემზარავი, მღვრიე ყვითელი ღრუბელი გადაჭიმულა, შავი ელვარებით დასერილი, ძირს გართხმული, სიგრძე-სიგანეში ორმოცდაათ მილს სწვდება. ერთი მილის სიმაღლისა და მხოლოდ ერთი დუიმიტ თუ იქნება მიწას აცდენილი. „ღმერთო! - შევყვირე ჩემი ბორცვიდან, - ღმერთო დიდებულო!“ მიწას დაზაფრული გულივით გაუდიოდა ბაგაბუგი. მეგონა, ძვლები დამემსხვრეოდა. მიწა იძვრის: დაგ-დაგ-დაგ, დაგ-დაგ-დაგ! გრგვინვა გაუდის. საოცარი სიტყვაა „გრგვინვა“! ო, როგორ დაიგრიალა ამ ქარიშხალმა ტრამალებსა და ბორცვებზე! მხოლოდ ჯანდი მოჩანდა, მის მიღმა კი - არაფერი! „ისინი არიან!“ - დაიყვირა ბილმა. ღრუბელი მტვრისა ყოფილა! არც ორთქლი იყო, არც წყალი, არამედ ხმელი ბალახით დაფარული ტრამალებიდან ატაცებული, ფქვილივით წმინდა მტვერი აბრწყვიალდა, მზის სხივებში ყვავილის მტვერივით ამოფრქვეული, რადგან ღრუბლებიდან მზე გამობრწყინდა. გაცებულმა ისევ შევყვირე! რატომ? იმიტომ, რომ ჯოჯოხეთის ცეცხლი და ბუდი გაიფანტა და მე ისინი დავინახე, გეფიცებით, დავინახე! უძველესი დროის გოლიათი ლაშქარი: ბიზონები - პრერიის დევები!

პოლკოვნიკმა ზღუდედ აღმართა დუმილი და შემდეგ კვლავ ჩამოშალა.

- თავები ვება ზანგების მუშტებს მიუგავდათ, ტანები - ლოკომოტივებს! ოცი, ორმოცდაათი, ორასი რეაქტიული ყუმბარა უგზო-უკვლოდ მიექანებოდა დასავლეთიდან მიწის დასალიერისკენ: მუგუზლებივით თვალებს აბრიალებდნენ და თან მტვრის კორიანტელი მოჰქონდათ!

დავინახე, ღრუბელმა წამით მადლა რომ აიწია და ჩემ წინ კუზებისა და ყალყზე დამდგარი ბალნის შავი, აქოჩრილი ზვირთები აატორტმანა...

<sup>19</sup> პოუნი ბილი (იგივე გორდონ უილიამ ლილი - 1860-1942) - ამერიკელი შოუ-მენი და „ველური დასავლეთის“ შოუების მონაწილე, ერთხანს ბავალო ბილის საქმიანი პარტნიორი.

„ესროლე! - მომძახის პოუნი ბილი, - ესროლე!“ - მიმეორებს. მე კი ვდგავარ გაქვავებული, ისე, თითქოს უფლის მარჯვენა ვიყო. გავყურებ ჩემ წინ დღისით-მზისით ჩავლილ შუადამის ძალუმ ზმანებას, შავ, მგლოვიარე ჭირისუფალთა უსასრულო წყებად რომ მიჰყვება ვიდაცის კუბოს, და როგორ უნდა მესროლა ჭირისუფლებისთვის, მითხარით, ბიჭებო? მხოლოდ ის მსურდა, მტვრის ღრუბელი კვლავ ჩამოწოლილიყო და დაეფარა ბედისწრის ეს შავი ბელტები, მძიმე დარტყმებით, დამანგრეველი ბიძგებით რომ მიიწევდნენ წინ. და მტვერი მართლაც ჩამოეშვა, ბიჭებო! ღრუბელმა დაუფარათ ფეხები, გამუდმებით რომ სჭექდნენ და მტვრის ბუღს აყენებდნენ. მომესმა პოუნი ბილის წყევლა და მხარზე მისი დარტყმა ვიგრძენი, მიხაროდა, რომ დენთის ერთი მარცვლითაც კი არ შევზებვიარ არც იმ ღრუბელს და არც მასში დავანებულ ძალას. მინდოდა, სულ ასე მეცქირა ჩემ წინაშე მგორავი დროის ვეებერთელა ბორბლისთვის, ბიზონების ჩლიქებით გამოხმობილი ავდარი რომ ფარავდა და მარადისობისაკენ მიაგელვებდა.

ერთი, სამი, ექვსი საათი დასჭირდა ამ გრიგალს, ვიდრე ჰორიზონტს გადაივლიდა ჩემზე უფრო უმოწყალო კაცებისაკენ. პოუნი ბილი წასულიყო, მე კი მუნჯივით, ელდანაცემივით ვიდექი. გაქვავებულმა გამოვიარე სამხრეთით, ასი მილის მოშორებით მდებარე ქალაქი, ქუჩებში ხალხის ხმა არ ისმოდა და ეს შვებას მგვრიდა. მინდოდა, ცოტა ხანს მაინც ის გრგვინვა მსსომებოდა. ახლაც ჩამესმის. აი, ასეთ ზაფხულის დღეებში, როცა წვიმა ეცემა ტბის ზედაპირს; საოცარი, შემზარავი ხმაა... ნეტავ თქვენც გაგეგონათ...

მერქალმა სინათლემ გააშუქა პოლკოვნიკ ფრილაის გრძელი ცხვირი, ძალიან მკრთალი, ნელთბილი ფორთოხლის ჩაით სავსე თეთრი ფაიფურის ჭურჭელს რომ ჰგავდა.

- ჩაეძინა? - რამდენიმე ხნის შემდეგ იკითხა დაგლასმა.

- არა, - აუხსნა ჩარლიმ, - უბრალოდ, ელემენტები აქვს დაცლილი.

პოლკოვნიკი ფრილაი სწრაფად დამსუბუქად სუნთქავდა, თითქოს დიდხანს ერბინოს, ბოლოს, როგორც იქნა, გაახილა თვალები.

- სერ! - აღფრთოვანებით მიმართა ჩარლიმ.

- სალამი, ჩარლი, - პოლკოვნიკმა დაბნეულად გაუღიმა ბიჭს.

- ეს დაგი და ჯონი არიან, - გამოარკვია ჩარლიმ.

- გამარჯობა, ბიჭებო.

ბიჭებმა სალმით უპასუხეს.

- კი მაგრამ, - წამოიძახა დაგლასმა, - სად არის...

- ჩუ! შენ, მე მგონი, დებილი ხარ! - ჩარლიმ მუჯლუგუნი ჰკრა დაგლასს, შემდეგ პოლკოვნიკს მიუბრუნდა, - თქვენ რატაცას გვიამბობდით, სერ!

- მართლა? - ამოილულულა მოხუცმა.

- სამოქალაქო ომი, - ჩუმად შესთავაზა მეგობარს ჯონმა, - ნეტავ თუ ახსოვს?

- მახსოვსო? - წამსვე გამოეხმაურა პოლკოვნიკი, - მახსოვს, როგორ არ მახსოვს! - თვალები რომ მოხუჭა, ხმა ისევ აუკანკალდა, - სულ ყველაფერი! მხოლოდ... იმას ვერ ვიხსენებ... ვის მხარეზე ვიბრძოდი...

- თქვენი სამხედრო ფორმის ფერი ხომ გახსოვთ? - მიმართა ჩარლიმ.

- თვალს რომ მიაჩვევ, ფერები თითქოს გაგირბის, - ჩურჩულით დაიწყო ლაპარაკი, - ბურუსში ვხედავ ჩემ გვერდით მსხდომ ჯარისკაცებს, მაგრამ, რა ხანია, მათი ქურთუკებისა და ქულების ფერს ვეღარ ვამჩნევ. დავიბადე ილინოისში, გავიზარდე ვირჯინიაში, დავოჯახდი ნიუ-იორკში, სახლი ტენესიში ავიშენე და, ღმერთო ჩემო, საბოლოოდ, აქ, გრინთაუნში ვარ. ახლა ხომ ხვდებით, ფერები რატომ გამიმკრთალდა?

- ის მაინც ხომ გახსოვთ, მთების რომელ მხარეს იბრძოდით? - ჩუმი ხმით ჩაეკითხა ჩარლი, - მზე რომელი მხრიდან ამოდიოდა: მარჯვნიდან თუ მარცხნიდან? კანადისაკენ მიიწევდით თუ მექსიკისაკენ?

- მგონი, ზოგ დღეს მზე მარჯვენა მხრიდან ამოდიოდა, ზოგჯერ - მარცხნიდან. ჯარის სვლას რაც შეეხება, ყველა მიმართულებით გვიწევდა სვლა. მას შემდეგ სამოცდაათი წელი გავიდა. ამდენი ხნის მერე მზის ჩასვლა-ამოსვლას რა გაგახსენებს.

- გამარჯვებები ხომ გაგონდებათ? რომელიმე მოგებული ბრძოლა, სად მოხდა?

- არა, - ღრმა, მოგუდული ხმით წარმოთქვა მოხუცმა, - არ მახსოვს, ოდესმე ვინმეს მოეგოს ბრძოლა. ომში არავინ არის მოგებული, ჩარლი. სულ დამარცხებული ხარ და საბოლოოდ ვინც მარცხდება, იმას უყენებენ პირობებს. მხოლოდ დამარცხებები მაგონდება, ტკივილი, სევდა და არაფერი კეთილი, გარდა ომის დამთავრებისა. ომის დასასრული, ჩარლი, თავისთავად გამარჯვებაა, მაგრამ არა მგონია, ბიჭებო, ამგვარ გამარჯვებებზე მეკითხებოდეთ.

- ენტიეტამზე<sup>20</sup> ჰკითხე, - აჩურჩულდა ჯონ ჰაფი, - ენტიეტამზე.

- მეც იქ ვიყავი.

<sup>20</sup> ენტიეტამი - ჯონ ჰაფი გულისხმობს 1862 წლის ბრძოლას ენტიეტამთან, აშშ-ის სამოქალაქო ომის დროს.

ბიჭებს თვალები გაუნათლათ.

- ახლა ბულ-რანზე<sup>21</sup> ჰკითხე...

- იქაც ვიყავი, - გაისმა მშვიდი პასუხი.

- შაილოს<sup>22</sup> შესახებ რას გვეტყვი?

- მას შემდეგ ერთი წელიწადიც არ გასულა ისე, რომ არ მეფიქროს, რა ლამაზი სახელწოდებაა და რა დასანანია, რომ მხოლოდ ბრძოლასთან დაკავშირებით აგონდებათ-მეთქი.

- ეს შაილო, მაგრამ ფორტ-სამტერი?<sup>23</sup>

- ღავინახე, ტყვია-წამლის კვამლმა ბოლქვებად რომ იწყო ცაში ასვლა, - პოლკოვნიკი ნელა, თითქოს ძილ-ბურანში ლაპარაკობდა, - იმდენი რამე მიბრუნდება, ოჰ, რამდენი რამე... მახსენდება სიმღერები. „პოტომაკის ნაპირებზე სიმშვიდეა, მებრძოლებსაც დაუფლათ ძილი. მათ კარვებსა და გუშაგთა კოცონს ეფინება მთვარის თეთრი სხივი“... ჰო, მახსოვს, მახსოვს... „პოტომაკის ნაპირზე სიმშვიდეა; ხმა არ ისმის, მხოლოდ ჩქამი დინების; მკვდრებს სახეზე ნამის ცრემლი ეფინებათ - განისვენეთ სამუდამოდ, გმირებო!“... კაპიტულაციის შემდეგ მისტერ ლინკოლნმა თეთრი სახლის აივანიდან ორკესტრს უბრძანა, „დიქსი ლენდი“ დაეკრა... ერთმა ბოსტონელმა ქალბატონმა კი ერთ სადამოში ისეთი სიმღერა დაწერა, ათასი წლის შემდეგაც რომ ემახსოვრებათ: „ჩემმა თვალებმა იხილეს უფლის გამოცხადების მწველი დიდება; მან გადათელა ის ვენახები, რისხვის მტევნები სადაც მწიფდება“. გვიან ღამით ჩემი ტუჩები თავისით იმეორებდნენ იმდროინდელ სიმღერებს: „დიქსის ლაშქარო, შენ მედგრად იცავ სამხრეთის ნაპირს...“ „ბიჭები შინ რომ დაბრუნდებიან, გამარჯვებულებს შევამკობთ დაფნით...“ ძალიან, ძალიან ბევრ სიმღერას მღეროდნენ ფრონტის ორივე მხარეს, ღამის ნიავი მათ ხან სამხრეთიდან მოაქროლებდა, ხანაც ჩრდილოეთიდან. „მოვდივართ, მამა აბრაჰამ, ბევრნი ვართ: სამასი ათასნი...“ „იძლება კარვები, იძლება კარვები, ამაღამ იქ დავბანაკდებით...“ „ვაჟა, ვაჟა, დროშა მოგვაქვს, გამარჯვების საწინდარი!“

მოხუცის ხმა თანდათან მინელდა და ჩაწყდა.

<sup>21</sup> ბულ-რანი - ბიჭი გულისხმობს სახმელეთო ბრძოლას მდინარე ბულ-რანთან, აშშ-ში სამოქალაქო ომის პერიოდში, ბულ-რანთან ორჯერ გაიმართა ბრძოლა. პირველად 1861 წლის 21 ივლისს, მეორედ - 1862 წლის 28-30 აგვისტოს.

<sup>22</sup> შაილო - შაილოს ბრძოლა; აშშ-ის სამოქალაქო ომის ისტორიაში ყველაზე დიდი ბრძოლა ტენესის შტატის სამხრეთ-დასავლეთით, 1862 წლის 7 აპრილს.

<sup>23</sup> ფორტ-სატერი - ბრძოლა ფორტ-სამტერისთვის (1861 წლის 12-13 აპრილი), ქალაქ ჩარლსტონის (სამხრეთ კაროლინის შტატი) მახლობლად ფორტ-სამტერის ბლოკადა, დაბობმვა და აღება შეიქმნა ფორმაღური მიზეზი აშშ-ში სამოქალაქო ომის დაწყებისა.

ბიჭები დიდხანს ისხდნენ უძრავად, მერე კი ჩარლი დაგლასს მიუბრუნდა:

- ჰა, რას იტყვი? არის თუ არ არის?

დაგლასმა ორჯერ ჩაისუნთქ-ამოისუნთქა და უპასუხა:

- უეჭველად არის.

პოლკოვნიკმა თვალეები დააჭყიტა.

- რა ვარ უეჭველად?

- დროის მანქანა, - ამოილულულა დაგლასმა, - დროის მანქანა.

პოლკოვნიკი ხუთი წამი თვალს არ აშორებდა ბიჭებს და რომ ალაპარაკდა, მის ხმაში მათივე გაცემა და მოწინება ჟღერდა.

- მაშ, ეს სახელი შემარქვით, ბიჭებო?

- დიახ, პოლკოვნიკო.

- დიახ, სერ.

პოლკოვნიკმა ნელა მიაყრდნო თავი სკამის საზურგეს, გადახედა ბიჭებს, შემდეგ - საკუთარ ხელებსა და შემდეგ მათ ზურგს უკან ცარიელ კედელს მიამტერდა.

ჩარლი წამოდგა.

- მგონი, დროა, წავიდეთ, ნახვამდის და გმადლობთ, პოლკოვნიკო!

- რაო? აჰ, ნახვამდის, ბიჭებო.

დაგლასი, ჯონი და ჩარლი ფეხაკრეფით გავიდნენ გარეთ. პოლკოვნიკს თვალწინ ჩაუარეს, მაგრამ მათი წასვლა აღარავის შეუნიშნავს.

უკვე ქუჩაში იყვნენ, პირველი სართულის ფანჯრიდან უეცარმა ძახილმა რომ შეაკრთოთ.

- ეჰეი!

ბიჭებმა ფანჯარას ახედეს.

- დიახ, გისმენთ, პოლკოვნიკო!

პოლკოვნიკი ფანჯრის რაფას ჩამოყრდნობოდა და ხელს უქნევდა.

- დავფიქრდი იმაზე, რაც მითხარით, ბიჭებო!

- დიახ, სერ?

- და... მართალი ხართ! აქამდე როგორ არ მომაფიქრდა! დროის მანქანა ვარ, ღმერთმანი, დროის მანქანა!

- დიახ, სერ!

- კარგად, ბიჭებო! როცა კი გენდომებათ, მესტუმრეთ!

ქუჩის ბოლოში რომ გავიდნენ, კვლავ მოიხედეს უკან. პოლკოვნიკი კი ისევ ისე უქნევდა ბიჭებს ხელს. თვითონაც დაუქნიეს ხელი, სამივეს გულში სითბომ და ხალისმა დაისადგურა. მერე გზა განაგრძეს.

- ჩუქუ-ჩუქუ! - ახმაურდა ჯონი, - შემიძლია, ოცი წლის წინანდელ წარსულში გავემგზავრო. უააუ-ჩუქ-ჩუქ!

- ჰო, - ჩარლი პოლკოვნიკის მდუმარე სახლს გაჰყურებდა, - მაგრამ, აი, ასი წლით უკან კი ვერ დაბრუნდები.

- არა, - დაფიქრდა ჯონი, - ასი წლით - ვერა. ეს მართლაც დროში მოგზაურობა იქნებოდა. ამას ნამდვილად მანქანა დასჭირდება.

ერთ წუთს მდუმარედ მიაბიჯებდნენ და საკუთარ ტერფებს ათვალთვლებდნენ. ვიღაცის ღობეს მიადგნენ.

- ამ ღობეს ვინც ბოლო გადაახტება, ის გოგოა, - გამოაცხადა დაგლასმა.

მთელ უკანა გზაზე, ვიდრე შინ მივიდოდნენ, ორივე მეგობარი დაგს „დორას“ ეძახდა.

\* \* \*

გვიან ნაშუადღევს ტომს გაეღვიძა. დაგლასი ჯიბის ფარნის შუქზე რაღაცას გამმაგებით იწერდა ყვითელ ბლოკნოტში.

- დაგ, რა ხდება?

- რა ხდებაო? რა და - ყველაფერი! ვითვლი, რამდენი ძვირფასი რამ მაქვს მომადლებული, ტომ! ბედნიერების მანქანამ ხომ არ გაამართლა, მაგრამ ეგ ვიღას ადარდებს! მთელი წლის განრიგი მაინც წინასწარ მაქვს შემუშავებული. თუკი მთავარი ქუჩების შემოვლა დამჭირდა, გრინთაუნის ტრამვაის შემოვანტები და სამყაროს მისი ფანჯრებიდან ვუთვალთვალებ. თუ მთავარი ქუჩების გარდა ქალაქის რომელიმე კუნჭულში დამჭირდა მისვლა, მის ფერნისა და მის რობერტას კარზე დავაკაკუნებ და ისიც თავიანთ ელექტრომრბოლელს ელემენტებს გამოუცვლიან და ტროტუარების გასწვრივ გამაქროლებენ. და თუ ხეივანში დამჭირდა გარბენ-გამორბენა და ღობეებზე გადახტომა, გრინთაუნის იმ ნაწილის შესასწავლად, რომელსაც მხოლოდ იმ შემთხვევაში მოინახულებ, მოულოდნელად თუ შემოტრიალდები ანდა უხმოდ მიეპარები, ასეთი შემთხვევებისათვის ჩემი ახალთახალი ბოტასები მაქვს. ბოტასები, ელექტრომანქანა, ტრამვაი! სრული ადჭურვილობა მაქვს! მაგრამ კიდევ უკეთესი, ტომ, კიდევ უკეთესი რამ მაქვს. ყური დამიგდე! თუკი მოვისურვებ, გავემგზავრო იქ, სადაც სხვა არავინ მიდის, იმიტომ, რომ ამის გასაფიქრებლადაც კი საკმარისი ჭკუა არ გააჩნიათ, თუკი მსურს დავბრუნდე 1890 წელს, მერე კი 1875-ში გადავინაცვლო, და მერე 1860-შიც ამოვყო თავი, ამისთვის საკმარისია, მოხუც პოლკოვნიკ ფრილიაის ექსპრესში ავსკუპდე! აი, როგორ ვწერ აქ ამის შესახებ: „შესაძლოა, მოხუცები



არასოდეს ყოფილან ბავშვები, როგორც მისის ბენტლის შემთხვევაში ვვარაუდობთ, მაგრამ უეჭველია: ზოგიერთი მათგანი 1865 წლის ზაფხულში აპომატოქსის მახლობლად იყო დაბანაკებული. მათ ინდიელის თვალი აქვთ და ბევრად შორეულ წარსულს ხედავენ, ვიდრე ჩვენ ოდესმე დავინახავთ“.

- კარგად ჟღერს, დაგ. ამიხსენი, რას ნიშნავს ყოველივე ეს?

დაგლასმა წერა განაგრძო.

- იმას ნიშნავს, რომ მე და შენ ვერასოდეს გავხდებით მათნაირი მოგზაურები. თუ გავვიმართლა, ორმოც, ორმოცდახუთ, ორმოცდაათ წელს მივაღწევთ, მაგრამ ნამდვილად შორი მოგზაურობისათვის ოთხმოცდაათამდე, ოთხმოცდათხუთმეტამდე, სულაც ასამდე უნდა გაქაჩო.

ჯიბის ფარანი ჩაქრა.

ბიჭები მთვარით განათებულ ოთახში იწვნენ.

- ტომ, - ჩასჩურჩულა ძმას დაგლასმა, - მთელი ამ გზების შემოვლა მიწადა. რაც შეიძლება მეტი უნდა ვნახო. მაგრამ, უპირველეს ყოვლისა, პოლკოვნიკ ფრილაის უნდა ვეწვიო კვირაში ერთხელ, ორჯერ, სამჯერ, ის ყველა სხვა მანქანას სჯობს. ის საუბრობს, შენ კი უსმენ. რაც მეტს საუბრობს, მით უფრო დაკვირვებული ხდები და შენ გარშემო ბევრ რამეს ამჩნევ. თუკი მას დავუჯერებთ, ჩვენ ყოვლად განსაკუთრებულ მატარებელში ვსხედვართ, და ასეც არის. თვითონ მთელი გზა გამოიარა, ბოლო სადგურამდე და ამიტომაც იცის. და, აი, ახლა უკვე მე და შენ მივუყვებით ამავე მარშრუტს. ოღონდაც ბევრად უფრო უკან ვართ და იმდენი რამ გვხვდება სანახავი, დასაყნოსი თუ მოსასინჯი, რომ მართლაც გვჭირდება პოლკოვნიკის შეგონება, იფხიზლეთ, რათა თითოეული წამი დაიმანსოვროთო! ყველაფერი, რისი დამანსოვრებაცდირს! და მერე, თვითონაც რომ მოხუცდები და ბავშვები შემოგეხვევიან, მათთვის იმავს გააკეთებ, რასაც პოლკოვნიკი აკეთებდა შენთვის. ასეა, ტომ, მასთან სტუმრობას ბევრი დრო უნდა შევწირო, რომ რაც შეიძლება ხშირად გავყვე უშორეს მოგზაურობაში.

ტომი დადუმდა, შემდეგ სიბნელეში მწოლიარე ძმას გადახედა.

- უშორესი მოგზაურობა. აზრზე ხარ, რას ნიშნავს?

- თან აზრზე ვარ, თან არა.

- უშორესი მოგზაურობა, - ჩურჩულით გაიმეორა ტომმა.

- ერთადერთი, რაშიც დარწმუნებული ვარ, ეს არის, - დაგლასმა თვალები მოხუჭა, - ეს დიიდ სიმარტოვეს უნდა ნიშნავდეს.

\* \* \*

ბრახ!

კარი ხმაურით მიიკეტა. სხვენში დაწყობილ საწერ მაგილებსა და წიგნის თაროებს მტვერი აუვიდა. ორი მოხუცი ქალი გამწარებით ეცა სხვენის კარს, ერთმანეთს მის დაკეტვას არ აცდიდნენ. მათ თავზე სახურავის სარკმელში ათასობით მტრედმა აიშხუილა. უცბად ორივე გაქვავდა, ბაგეები გაოცებამ მოურკალათ. მხოლოდ პანიკის მანიშნებელი ხმა ესმოდათ - საკუთარი გულის ბაგაბუგი საკუთარ მკერდში... შეეცადნენ, ეს ხმაური საკუთარი ხმებით გადაეფარათ.

- ეს რა ჩავიდინეთ! საბრალო მისტერ კუოტერმინი!

- ალბათ, მოვკალით. და, მგონი, ვიდაცამ დაგვინახა და დაგვეღვენა. ნახე...

მის ფერნმა და მის რობერტამ სხვენის აბლაბუდებჩამოფარებული ფანჯრიდან გადაიხედეს. ქვევით, ვითომ არც არაფერი მომხდარიყო, მუხები და თელები ისევ ისე იწევდნენ მზის მაცოცხლებელი სხივებისაკენ. ტროტუარზე ზღაზვნით გაიარა ვიდაც ბიჭმა, შემოტრიალდა, უკან დაბრუნდა და მათი ფანჯრისაკენ ამოიხედა.

სხვენში განაბული მოხუცი ქალები ისე მიშტერებოდნენ ერთურთს, თითქოს სწრაფად გამდინარე წყალში ცდილობდნენ ერთმანეთის სახეების გარჩევას.

- ჰოლიცია!

პირველი სართულის კარზე არავის დაუბრაუნებია, არც არავის დაუდასნია, კანონის სახელით გააღეთო.

- ვინ არის ის ბიჭი, ქვევით რომ დგას?

- დაგლასია, დაგლას სპოლდინგი! დმერთო დიდებულო, ალბათ, იმიტომ მოვიდა, რომ მანქანით გასეირნება გვთხოვოს. არაფერი იცის. ჩვენმა სიამაყემ დაგვლუპა. სიამაყემ და იმ წყეულმა ელექტრონულმა გამოგონებამ!

- ის ვიგინდარა გამპორტფოლზელი ვაჭრუკანა: სულ მისი ბრალია, მისი ლაყბობის!

მისი სიტყვები სმენას ისევე ფაქიზად სწვდებოდა, როგორც ზაფხულის მზაპუნა წვიმა ეცემა სახურავს.

უცრად თვალწინ სულ სხვა შუადღე წარმოუდგათ. თავიანთ რიკულებიან ვერანდაზე ისხდნენ თეთრი მარაობითა და ლაიმის ცივ ჟელეს შეექცეოდნენ.

და აი, მზის თვალისმომჭრელ ყვითელ ნათებაში გამოჩნდა ზღაპრული უფლისწულის ეტილივით მბზინავი...

მწვანე მანქანა!

ქუჩაზე რბილად შემოსრიალდა. ოკეანის ნიავევით ჩუმად შრიალებდა. ნეკერჩხლის ფოთლების ნაზი ჩურჩული, წყაროს რაკრაკი და კატის მეფური კრუტუნი შერეოდა ერთურთს ამ ჯადოსნურ ხმაში, მანქანაში კი ბრიოლინით გადასვლეპილ თავზე ჰანამაჩამოფარებული გამპორტფოლზელი კომივოიაჟორი იჯდა! რეზინისებრი რბილი და მოქნილი მოძრაობით მანქანა ქუჩის გასწვრივ გაასრიალა, ტროტუარის შეეთერებულ ბორდიურს მილიმეტრებში ჩაუარა, ზედ ჰარმადის პირველ საფეხურს მიაღდა და გააჩერა. კომივოიაჟორი ქვაფენილზე გადმოხტა და თავისი ჰანამით მზეს აეფარა. ჩრდილის ამ პატარა მონაკვეთში მისმა ღიმილმა გაიბღვრი-  
ალა.

- უილიამ ტერა გახლავართ! ეს კი... - ხელით მოუჭირა რეზინის ბურთულას და სიგნალის ხმა გაისმა, - ...ეს საყვირია! - შავი სატინის საზურგე ბალიშები გადასწია, - აქ სათადარიგო ელემენტებია! - გახურებულ ჰაერს ჭექა-ქუხილის სუნი შეერია, - მართვის ბერკეტი! ფეხების დასაყრდნობი! მზისგან დამჩრდილავი ტენტი! აი, ეს გახლავთ, in tutto<sup>24</sup> მწვანე მანქანა!

სხვენის წყვდიადში ჩაცუცქულ თვალებდახუჭულ ქალბატონებს ამ მოგონებაზე გააჟრჟოლათ.

- ოჰ, ნეტავ იქვე განგვეგმირა საქსოვი ჩხირებით!

- ჩუ, უსმინე!

ვიდაც შემოსასვლელის კარზე აკაკუნებდა. შემდეგ კაკუნი მიწყდა და ფანჯრიდან ქალი დაინახეს, მათი ეზო გადაკვეთა და მეზობელ სახლში შევიდა.

- უბრალოდ, ლავინია ნებსია, ხელში ცარიელი ფინჯანი უჭირავს, ნამდვილად ცოტა შაქრის სასესხებლად იქნებოდა მოსული...

- მომეხვიე, მეშინია.

თვალები დახუჭეს. მეხსიერების თამაში განახლდა. გამპორტფოლზელი მამაკაცის დანახვისას ის ძველისძველი შალის ქუდიც კი გამოცოცხლდა, რკინით მოჭედო სკივრზე რომ იდო.

- გმადლობთ, ცივ ჩაის მართლაც გეახლებით, - სრულ სიჩუმეში გაიგონებდით, გაგრილებული სასმელი მუცელში როგორ ჩასდიოდა. შემდეგ მზერა ისე მიმოავლო მოხუც ქალბატონებს, როგორც ექიმის ქუდზე

<sup>24</sup> In tutto – (ლათ) მთლიანობაში.

დამაგრებული პატარა ფარანი აღწევს პაციენტის თვალებში, ნესტოებსა და პირის ღრუში.

- ქალბატონებო, ვხედავ, რომ ორივე ძალზე მხნედ და ყოჩაღად ბრძანდებით. გეტყობათ, რომ ასეა. ოთხმოცი წელი, - მან თითები გაატკაცუნა, - არაფერს ნიშნავს თქვენთვის! მაგრამ ხომ არის ისეთი წუთები, როდესაც გეჩქარებათ, როდესაც ნამდვილი მეგობრის თანადგომა გჭირდებათ, ჰოდა, სწორედ ასეთ მეგობრად მოგვევლინებათ ორადგილიანი მწვანე მანქანა.

მელას ფიტულის თვალებივით ბრჭყვიალა მისი მწვანე შუშის თვალები ამ არაჩვეულებრივ გამოგონებას მიაშტერდნენ. მანქანა იღგა ჩასაჯდომად გამზადებული, სიახლის სუნი ასდიოდა, მზეზე ლაპლაპებდა და ბორბლებზე მყუდროდ შედგმულ სალონის სავარძელს ჰგავდა.

- გედის ბუმბულივით უხმოა, - ქალებს სახეზე მისი მსუბუქი სუნთქვა შეეხრო, - ყური დაუგდეთ, - ისინი სმენად იქცნენ, - ელემენტები ბოლომდე დატენილი და მზადაა! ყური დაუგდეთ! ოდნავი ხმაც კი არ ისმის, რადგან ელექტროლია, ქალბატონებო. დამდამობით გარაჟში შეგეძლებათ მისი დატენა.

- ხომ არ... მოკლედ... - უმცროსმა დამ ცივი ჩაი გადაყლურწა, - შემთხვევით დენს ხომ არ დაგვარტყამს?

- დაივიწყეთ! გამორიცხულია!

კვლავ მანქანაში ჩახტა. კბილები ისე უქათქათებდა, დანტისტის კაბინეტში გამოფენილი გეგონებოდა, გვიან ღამით გვერდით რომ ჩაუვლი და განათებული ვიტრინიდან რომ შემოგვცინებენ.

- წვეულებები! - მანქანას ვალსის რიტმში წრე შემოარტყმევინა, - ბრიჯის კლუბის შეხვედრები. საღამოები, კონცერტები. დაბადების დღეები! ამერიკის რევოლუციის ქალიშვილთა ასოციაციის საუზმეები, - ჩუმი კრუტუნით დაძრა მექანიზმი და თითქოს სამუდამოდ გაშორდა, მაგრამ იმწამსვე დაბრუნდა რეზინის შხუილით, - ოქროს ვარსკვლავის დედათა საზოგადოების ბანკეტები, - წელში გამართული იჯდა, ტანზე კორსეტად ადგა მის მიერვე მლიქვნელურად შექმნილი ქალის იდეალური პორტრეტი, - ადვილი სამართავია. უხმოდ, მოხდენილად მიგაბრძან-მოგაბრძანებთ. ლიცენზია არ სჭირდება. ცხელ დღეებში გაგაგრილებთ კიდევ. ოჰ!.. - ჰარმადის წინ რომ ჩაისრიალა, თავი უკან გადახარა, ნეტარებისაგან თვალები მილულა, კონტად გადავარცხნილი თმა ნიავმა აუფრიალა.

ჰარმადის კიბე ქუდით ხელში დინჯად ამოიარა, საცდელი მოდელისაკენ ისეთი მოწინებით შეტრიალდა, როგორც სასულიერო პირი საკურთხევლისაკენ.

- ქალბატონებო, - კვლავ ტკბილად მიმართა მოხუცებს, - ოცდახუთ დოლარს დაგიკლებთ. თვეში ათი დოლარი, ორი წლის განმავლობაში.

ფერნი პირველად ჩავიდა კიბეზე და მანქანის სავარძელში მოთავსდა. სკამი ფრთხილად მოსინჯა. ხელი მოუთმენლად უკრთოდა. როგორც იქნა, გაბედა საყვირისათვის ხელის მოჭერა.

გაისმა სელაჰის ყეფის ხმა.

რობერტამ მხიარულად შეჰკვივლა და პარმადის მოაჯირიდან გადმოიზინქა.

მათ სიხალისეს კომივოიაჟორიც შეუერთდა. მხიარული შექანვლებით ჩამოაცილა უფროსი და კიბეზე, თან საიდანღაც კალამი მოიმარჯვა და ქუდის სარჩულიდან რაღაც ქაღალდი ამოაძვრინა.

- აი, ასე ვიყიდეთ! - იხსენებდა სხვენში ჩაცუცქული, საკუთარი გამბედაობით თავზარდაცემული მის რობერტა, - ვინმეს უნდა გავეფრთხილებინეთ!.. მეგონა, ბაზრობის კარუსელის ვაგონივით მსუბუქი იქნებოდა!

- რას იზამ, - შეეცადა თავის მართლებას ფერნი, - უკვე რამდენი წელია, რაც თეძო მაწუხებს, შენც ხომ გღლის ფეხით სიარული. ისე კეთილშობილურად გამოიყურებოდა, ისე მეფურად. ძველ დროს მოგაგონებდა, როდესაც ქალები ფართო კაბებს ატარებდნენ და ქუჩაში ნავებივით დასრიალებდნენ! ჩვენი მწვანე მანქანაც ისე ნარნარად დასრიალებდა.

სასეირნო ნავივით აღვილად იმართებოდა, ერთადერთი ბერკეტის გადაწევ-გადმოწევით, აი, ასე.

ო, რა იყო ის დიდებული და დაუვიწყარი პირველი კვირა! ოქროს სხივებში მობანავე ჯადოსნური ღღეები, როდესაც ქუჩების ჩრდილში მთვლემარე მარადიულ მდინარეს მიუყვებოდნენ სავარძლებში წელგამართულნი, უდიდოდნენ შემხვედრ ნაცნობებს, მოხვევისას ხელის დინჯი მოძრაობით ანიშნებდნენ მიმართულებას, შეფერხებისას შავი რეზინის საყვირს მჭახედ აწივლებდნენ, ხანდახან დაგლასსა და ტომს ან გზის პირას მოსეირნე სხვა ბიჭებსაც გაატარ-გამოატარებდნენ. მაქსიმალური სიჩქარე თხუთმეტი მდორე და სასიამოვნო მილი იყო საათში. ასე ბორბლებზე შემდგარი ძველისძველი ლანდებივით მიმოდიოდნენ, სახეზე ფოთლების შუქრდილები გადაჰფენოდათ.

- მერე კი, - ჩურჩულით წარმოთქვა ფერნმა, - დღევანდელი დღე! ო, დღევანდელი დღე!

- ეს უბედური შემთხვევა იყო.

- მაგრამ ჩვენ მივიმალეთ, ეს კი დანაშაულია!

შუადღე. მანქანაში ტყავის სავარძლების სუნი იდგა. განცხრომით მთვლემარე პატარა ქალაქის ქუჩებში დაქროდნენ.

ყველაფერი უცბად მოხდა. მანქანა რბილად მისრიალებდა გრილ ტროტუარზე, რადგანაც ქუჩა მზისგან ვარვარებდა და ჩრდილი მხოლოდ ეზოების გასწვრივ ხეივანსლა შერჩენოდა. მოსახვევს რომ მიუახლოვდნენ, ყოველი შემთხვევისთვის, საყვირი აახმიანეს. უეცრად ყუთიდან ამომხტარ ჭინკასავით მათ წინ მისტერ კუოტერმეინი გამოჩანჩალდა!

- ფრთხილად! - დაიწვილა მის ფერნმა.
- ფრთხილად! - დაიწვილა მის რობერტამ.
- ფრთხილად! - შეჰყვირა მისტერ კუოტერმეინმაც.

მოხუცი ქალები ბერკეტის მაგივრად ერთმანეთს ჩააფრინდნენ.

ძლიერი ყრუ დარტყმა იგრძნეს. მეორე წამში მწვანე მანქანამ სვლა განაგრძო წაბლებისა და დახუნძლული ვაშლის ხეების ჩრდილში. მოხუცმა ქალებმა მხოლოდ ერთხელ მიიხედეს უკან და თვალებზე შიშისგან ლიბრი გადაეკრათ.

მოხუცი კაცი ტროტუარზე უძრავად გამოტილიყო.

- ახლა კი აქა ვართ! - ამოიკვნესა მის ფერნმა სხვენის ჩამოწოლილ სიბნელეში, - ო, რატომ არ გავჩერდით! რატომ გამოვიქეციით!
- ჩუ! - ორივენი სმენად იქცნენ.

პირველი სართულის კარზე კვლავ კაკუნი გაისმა.

სიჩუმე რომ ჩამოვარდა, სადამოს ბინდში კვლავ დაინახეს, თუ როგორ გადაკვეთა ბიჭმა მათი გაზონი.

- ისევ დაგლას სპოლდინგი იყო გასასეირნებლად მოსული, - ამოისუნთქა ორივემ.

დღე მიიღია. ჩამობნელდა.

- მთელი ნაშუადღევი აქ გავატარეთ, - დადლილი ხმით წარმოთქვა რობერტამ, - სამი კვირა ხომ ვერ დავიმალებით სხვენში, ვიდრე ეს ამბავი ყველას არ მიავიწყდება.

- შიმშილით დავიხოცებით.

- მაშ, რა ვქნათ? როგორ ფიქრობ, ვინმემ დაგვინახა და უკან გამოგვეკიდა? - ერთმანეთს გადახედეს.

- არა. არავის დავუნახავვართ.

ქალაქი ღუმდა, კოხტა სახლებში სინათლეები აციმციმდა. ქვევიდან სველი ბალახისა და ნაირ-ნაირი კერძის სუნი ამოიფრქვა.

- დროა, ხორცი ღუმელში შევდგათ, - თქვა მის ფერნმა, - ფრენკი ათ წუთში შინ იქნება.

- ქვევით ჩასვლისა არ გეშინია?

- სახლი თუ ცარიელი დახვდა, ფრენკი პოლიციას დაურეკავს. ეს კიდევ უარესია.

მზე სწრაფად ჩავიდა. მოხუცი ქალები ახლა შმორიან სიბნელეში მოძრავ ორ უფორმო საგნად გადაიქცნენ.

- როგორ ფიქრობ, - იკითხა მის ფერნმა, - მკვდარია?

- მისტერ კუოტერმეინი?

- ჰო, - დუმილის შემდეგ გაისმა პასუხი.

რობერტა დაფიქრდა.

- სალამოს გაზეთი გადავამოწმოთ.

სხვების კარი გააღეს და ფრთხილად ჩახედეს ქვევით ჩამავალ კიბეს.

- ოჰ, ფრენკმა რომ ეს გაიგოს, მწვანე მანქანას წაგვართმევს, არადა, ისეთი სიამოვნებაა, ქალაქის ქუჩებში რომ მისეირნობ და გრილი ნიავი გელამუნება.

- მოდი, არ ვუთხრათ.

- არ ვუთხრათ?

ერთმანეთს ხელი ჩაჰკიდეს და სვენებ-სვენებით ჩაუყვნენ ჭრიალა კიბეს, თან ყოველ წუთს აყურადებდნენ... ჯერ სამზარეულოში, მერე საკუჭნაოში შეიჭყიტეს, შემდეგ გულისფანცქალით გაიხედეს ფანჯრებში, ბოლოს კი ქურას მიუბრუნდნენ და ჰამბურგერის შებრაწვას შეუდგნენ. ხუთ წუთს უხმოდ მუშაობდნენ და, როგორც იქნა, ფერნმა ნაღვლიანად გახედა რობერტას.

- იცი, რა ვიფიქრე? უკვე მოვხუცდით, ძალა გამოგველია, თუმცა, ამის აღიარება არ გვინდა. მაგრამ ჩვენ სახიფათონი ვართ. საზოგადოების წინაშე პასუხი უნდა ვაგოთ იმისათვის, რაც ჩავიდინეთ.

- და... რა? - ქურაზე მოშიშხინე კერძს დუმილი გადაეფარა, როდესაც დები, ხელებჩამოყრილნი და გაქვავებულნი, ერთმანეთს სახეში ჩააშტერდნენ.

- მე მგონია, - ფერნი კარგა ხანს აკვირდებოდა კედელს, - აღარასოდეს არ უნდა ვიაროთ მწვანე მანქანით.

რობერტამ თეფში აიღო და გამხდარი ხელით წინ გამოიწვდინა.

- აღარასოდეს?.. - იკითხა მერე.

- ჰო.

- მაგრამ, - ძლივს გაბედა რობერტამ, - მისი... მისი გაცემა ხომ არ მოგვიწევს? ხომ შეიძლება დავიტოვოთ?

ფერნი ამ ნათქვამს ჩაუფიქრდა.

- ჰო, მგონი, შეიძლება დავიტოვოთ.



- ეს უკვე კარგია. წავალ, ელემენტებს ამოვაცლი.

რობერტას კარში მათი უმცროსი ძმა, ორმოცდაათექვსმეტი წლის ფრენკი შეეფეთა.

- სალამი, დებო! - შესძახა ღიმილით.

რობერტა უსიტყვოდ გაუსხლტა გვერდზე და ზაფხულის მწუხრს შეერია. ფრენკს გაზეთი ეკავა, რომელიც ფერნმა საჩქაროდ გამოაცალა ხელიდან. აკანკალებულმა თავიდან ბოლომდე დაფურცლა, შემდეგ კი შვებით ამოი-  
ოხრა და ისევ დაუბრუნა.

- ამ წუთს გარეთ დაგ სპოლდინგი შემხვდა. მთხოვა, თქვენთვის რაღაც გადმომეცა. ასე მითხრა, ნუ ინერვიულებენ, ყველაფერს შევესწარი და ყვე-  
ლაფერი კარგად არისო. ნეტავ რას გულისხმობდა?

- ნამდვილად არ ვიცი, - ფერნმა ზურგი შეაქცია და ცხვირსაზოცის ძებნას შეუდგა.

- ოჰ, ეს ბავშვები, - ფრენკი თავის დის ბეჭებს კარგა ხანს შესცქეროდა, მერე მხრები აიჩეჩა, - ვახშამი თითქმის მზადაა, არა? - იკითხა ალერსი-  
ანად.

- ჰო, - მის ფერნმა სამზარეულოს მაგიდა გააწყო.

გარედან საყვირის ჭყვივლილი მოისმა. ერთხელ, ორჯერ, სამჯერ.

- ეს რა არის? - ფრენკმა სამზარეულოს ფანჯრიდან საღამოს ბინდს გახე-  
და, - რას შვრება რობერტა? მეხედე, მწვანე მანქანაში ზის და რეზინის საყ-  
ვირს აწვება!

კიდევ ერთხელ ორჯერ გაისმა მწუხრის ჰაერში რაღაც მგლოვიარე ცხო-  
ველის ძახილივით მსუბუქი ჰანგი.

- რა მოუვიდა? - გაოცდა ფრენკი.

- თავი დაანებე! - შეჰკვივლა მის ფერნმა.

ფრენკი კიდევ უფრო გაოგნდა.

წამიც და, მის რობერტა მშვიდად შემოვიდა, თვალებში არავის უყურებ-  
და. სამივენი ასე მიუსხდნენ ვახშმის სუფრას.

\* \* \*

რიჟრაჟის პირველმა სხივმა სახურავი გაანათა; ჯერ კიდევ ძალიან ად-  
რეა. თითოეულ ხეს იმ უმცირესი სიოს მობერვაზეც კი შეღვიძების ნაზი  
მღელვარებით უთრთის ფოთლები, რასაც განთიადი უგზავნის. და უეცრად,  
შორიდან, ვერცხლისფერი ლიანდაგის მოსახვევში გამოჩნდება ოთხ პატა-  
რა, მოვერცხლისფრო-მოცისფრო ბორბალზე შემდგარი მანდარინისფერი

ტრამვაი. ბრინჯაოს მბზინვარე სარტყლები ეპოლეტებად ამშვენებს, ოქროსფერი მილები - სირმებად; როდესაც მოხუცი მემანქანე დანაოჭებული ფეხსაცმლის წვერით აწვება პედალს, ზარის ხმა ისმის. ტრამვაის წინ და გვერდებზე ლიმონისფერი ნომრები აქვს მიმაგრებული. შიგნით სავარძლებს გრილი, მწვანე, ბუსუსებიანი ხავსი ფარავს. ტრამვაის სახურავიდან ხოჭოს საცეცებისმაგვარი გამონაზარდები ამოუწვდია და მალა, გზისპირა ხეებში გაჭიმულ ობობას ქსელს ეხება, მისგან ისრუტავს საკვებს. ყველა ფანჯრიდან მაცოცხლებელი გუნდრუკის სურნელი აღწევს- ზაფხულის ავდრებისა და ელქექთა ყოვლისგამჭოლი, მოლურჯო, იღუმალი სუნი.

ასე მოგორავს ტრამვაი თელების ჩრდილში, მემანქანის უასაკო, რუხ-ხელთათმნიანი ხელი ფაქიზად ეხება ბერკეტებსა და ღილაკებს.

შუადღე იყო, მემანქანემ უბნის შუაგულში რომ გააჩერა ვაგონი და ფანჯარაში თავი გამოყო.

- ეჰეი!

დაგლასმა, ჩარლიმ, ტომმა და უბნის მთელმა გოგო-ბიჭებმა შენიშნეს მისი რუხი ხელთათმანი, ის ხელს უქნევდა ბავშვებს და ბავშვებიც ჩამოხტნენ ხეებიდან, მიატოვეს ბალახზე თეთრი გველებივით გადახლართული სანტუნაო რეზინები და მწვანე პლუმის სავარძლებში უფასოდ მოკალათდნენ. კონდუქტორს, მისტერ ტრიდენს, ხელთათმნიანი ხელი ბილეთების ავტომატისათვის პირზე აეფარებინა და ასე განაგრძობდა ჩრდილში ჩაფლული უბნის მოსახლეთა მოხმობას.

- საით მივდივართ? - იკითხა ჩარლიმ.

- ეს უკანასკნელი რეისია, - უპასუხა ელექტრომავთულისაკენ მზერააპყრობილმა მისტერ ტრიდენმა, - მორჩა, ტრამვაი მეტს აღარ ივლის. ხვალიდან ავტობუსი გამოვა სამუშაოდ. მეც პენსიაზე მიშვებენ, მაშ! ასე რომ, დღეს ყველას უფასოდ გაგატარებთ!

მან ფოლადის სახელური შემოატრიალა, ტრამვაიმ ამოიხვნემა და უსასრულო მწვანე მოსახვევში შევიდა. სამყაროს მთელი დრო ერთბაშად შეყოვნდა, თითქოს ყველა და ყველაფერი გამეშებულიყო და მხოლოდ ბავშვები და მისტერ ტრიდენი მიუყვებოდნენ მარადისობის ულევ მდინარეს.

- რაო, დღეს ბოლო დღეა? - იკითხა თავზარდაცემულმა დაგლასმა, - არა, შეუძლებელია! ის არ კმარა, რომ მწვანე მანქანა აღარ დადის, ყოველგვარი გამართლების გარეშე გარაჟმია გამომწყვდელი? ისიც მეყოფა, ახალი ტენისის ფეხსაცმელი რომ მიძველდება და სისწრაფეს კარგავს! როგორღა უნდა ვიმოდროაო? კი მაგრამ... კი მაგრამ... ტრამვაის ვერ წაგვართმევენ! რაც უნდა იყოს, ავტობუსი ვერ შეცვლის ტრამვაის. სულ სხვა ხმა აქვს. არც

ლიანდაგები აქვს, არც სადენები, არც ნაპერწკლებს ისვრის, არც ქვიმას აბნევს გზადაგზა, ასეთი ჭრელიც არ არის, არა აქვს ზარი და არც კიბეს უშვებს ტრამვაივით!

- ჰო, მართლა, - დაეთანხმა ჩარლი, - ყოველთვის მისწორდება, ტრამვაი როცა ჩერდება და აკორდონივით ჩამოშლის საფეხურებს.

- აბა, რა, - თქვა დაგლასმა.

მარშრუტის დასასრულს მიადგნენ, რომლის იქითაც თვრამეტი წლის მანძილზე მიტოვებული ლიანდაგის ზოლი მწვანე ბორცვებს შორის მიიკლაკნებოდა. 1910 წელს ხალხი ნუგბარით დატვირთული კალათებით მიემგზავრებოდა ტრამვაით ჩესმენის პარკში და იქ პიკნიკებს აწყობდა. ძველი ლიანდაგი აღარავის აუყრია, ის თანდათან ჟანგდებოდა ბუნების წიაღში.

- აქ უკან დაბრუნება გვიწევს, - თქვა ჩარლიმ.

- აი, აქ კი ცდები! - მიუგო მისტერ ტრიდენმა და სათადარიგო გენერატორის ჩამრთველი გადაატრიალა, - წავიდა!

ტრამვაი ყრუ ბრაზუნითა და ლალი სინარნარით გასცდა ქალაქის საზღვარს, უკან მოიტოვა ქუჩები და სწრაფად დაეშვა დაღმართზე სურნელოვანი მზისა და მზამასოკოს სუნით გაჟღენთილი ჩრდილის შუალედებში. ლიანდაგს აქა-იქ ნაკადულები კვეთდა, მზის სინათლე კი ხის ფოთლებში ისე გამოსჭვიოდა, როგორც მწვანე მინაში. მხუილით ჩაუქროლეს ველური მზე-სუმზირების ტალღებით დაფარულ მდელოებს, მიტოვებულ ბაქნებს, მხოლოდ გადამფრენი ქარებით დასვრეტილი ქაღალდის ნაფლეთებით მოფენილს, და ტყის რუს ჩაუყვინნ ზაფხულის ჭალაში.

დაგლასი ისევ ალაპარაკდა:

- ტრამვაის განსაკუთრებული სურნელი აქვს. ჩიკაგოს ავტობუსში ვმჯდარვარ, რაღაც მაზალო სუნი ასდის.

- ტრამვაი მეტისმეტად ნელია, - თქვა მისტერ ტრიდენმა, - ახლა ყველგან ავტობუსებს შემოიღებენ. მოსახლეობისთვისაც და სკოლებისთვისაც.

ტრამვაი ჭრიალით გაჩერდა. მისტერ ტრიდენმა ზედა თაროებიდან პიკნიკის ვეებერთელა კალათები გადმოიღო. ბავშვებმა სინარულისაგან შეჰყვირეს და კალათების გადმოტანაში დაეხმარნენ. ყველაფერი ნაკადულის პირას მიიტანეს, მშვიდ, პატარა ტბორში რომ ჩაედინებოდა, რომლის ნაპირზეც ძველისძველი საორკესტრო ესტრადა იდგა, ჭიანჭველების ლუკმად ქცეული და უკვე სანახევროდ ჩამოშლილი.

ყველანი ხორციან სენდვიჩებს, ქორფა მარწყვსა და ცვილისფერ ფორთოხლებს შეექცეოდნენ, მისტერ ტრიდენი კი ჰყვებოდა, თუ როგორ უკრავდა ამ სცენაზე ორკესტრი სადამო ხანს, ოცი წლის წინ, როგორ უბერავდნენ

მუსიკოსები სპილენძის საყვირებს, ტანსრული ღირიჟორი როგორ იწმენდდა ოფლს, ბავშვები და ციციანთელები მაღალ ბალახში დანავარდობდნენ, გრძელ კაბებში გამოწყობილნი, მაღალი ვარცხნილობით მორთული ქალბატონები კისერში ჰალსტუხნაჭერილი მამაკაცების გვერდით დასეირნობდნენ ქსილოფონისებურ ფიცრულ ბილიკზე.

ბილიკი ახლაც შემორჩენილიყო, წლებს იგი ხის ბოჭკოების დონდლო მასად ექცია. ტბა მშვიდი, ლურჯი და კრიალა იყო, თევზები უშფოთველად არხვდნენ ლელის რტოებს. ტრამვაის ძრავა შეუჩერებლად ზუზუნებდა და ბავშვებს ეგონათ, თვითონაც სულ სხვა დროში გადასულიყვნენ, მისტერ ტრიდენიც სხვაგვარად, საოცრად ახალგაზრდულად გამოიყურებოდა, თვალები მომცრო ნათურებივით ლურჯი ელექტრომუქით უბრწყინავდა. მსუბუქი, მოფარფატე დღე იყო, არავინ ჩქარობდა, ტყის კორომი თავზე მჭიდროდ გადაჰკვროდათ და მზეც ერთ ადგილას იდგა. მისტერ ტრიდენის ხმა ტალღასავით ირწეოდა და ჰაერში მოძრავი მკერავის ნემსი ცაზე ოქროსფერ, უხილავ არშიებს ქარგავდა. ყვავილზე მოზუზუნე ფუტკარი მოკალათებულიყო. ტრამვაი ჯადოსნურ საკრავს ჰგავდა და მზეზე გავარვარებული გვერდები უდუღდა. ტრამვაის სპილენძის სურნელს შეიგრძნობდნენ თავიანთ ხელებზე, როდესაც მწიფე ალუბლებს შეექცეოდნენ. ზაფხულის ნიაჰი სტაცებდა მათ ტანისამოსს ტრამვაის სურნელს.

თავზე კივილით გადაუფრინათ ბატასინმა.

ვიდაცას გააქროლოა.

მისტერ ტრიდენმა ხელთათმანები წამოიცივა.

- აბა, წასვლის დროა. მშობლები იფიქრებენ, რომ სამუდამოდ მოგიტაცეთ.

ტრამვაიში, როგორც სანაყინეში, სიჩუმე და გრილი სიბნელე იდგა. ბავშვებმა უსიტყვოდ, ჩუმი შრიალით შეატრიალეს მწვანე სავარძლები, რათა ზურგი შეექციათ მდუმარე ტბისთვის, მიტოვებული ესტრადისა და ფიცრული ბილიკისათვის, რომელიც მასზე შემდგარ ადამიანს უცხო ქვეყნებისკენ თავისებური მუსიკით აცილებდა.

ბინგ! მელოდიურად ჩამორეკა ზარი მისტერ ტრიდენმა და ტრამვაიც, მზისაგან მიტოვებული, უცბად ჩამომჰკნარი მდელოებისა და ჭალების გავლით უკან, ქალაქისაკენ გააქროლოა, სადაც მას აქეთ-იქიდან აგურის, ბეტონისა და ხის დამთრგუნველი კედლები შემოაწვა. მისტერ ტრიდენმა ძრავა გამორთო და ბავშვები კვლავ ხეივანში ჩამოსხა.

დაგლასი და ტომი სხვებზე დიდხანს შემორჩნენ ტრამვაის ელექტრული სუნთქვით მთრთოლავ დაფჩენილ ხახასთან, რომლიდანაც ენა და

დასაკეცი კიბე ჩამოშლილიყო. ისინი მართვის პულტზე შეჩერებულ მისტერ ტრიდენის ხელთათმანებს მისჩერებოდნენ.

დაგლასმა ხელი გადაუსვა სავარძლების მწვანე ხავსს, გადახედა ვერცხლისა და სპილენძის ბზინვარებასა და ღვინისფერ ჭქრს.

- კიდევ ერთხელ გემშვიდობებით, მისტერ ტრიდენ.
- ნახვამდის, ბიჭებო.
- გინახულებთ ხოლმე, მისტერ ტრიდენ.
- მინახულებთ.

ჰაერში მსუბუქი ამოხვრა გაისმა; გოფირიებული ენა აიკეცა და კარი რბილად დაიკეტა. ტრამვაი ნელა დაიძრა, ის მზეზე უფრო კაშკაშად ბრწყინავდა საღამოს ქალაქში, მანდარინისფრად, ოქროსფრად, ლიმონისფრად გაიელვა მოსახვევში და სამუდამოდ მიეფარა თვალს.

- სკოლის ავტობუსიო! - ჩარლი ტროტუარისკენ გაემართა, - ადარასოდეს მოგვიწევს სკოლაში დაგვიანება, პირდაპირ კართან მოგვადგება წასაყვანად, სიცოცხლეში ვეღარასოდეს დავაგვიანებთ. წარმოიდგინე, რა კომპარია, დაგ, წარმოიდგინე!

მაგრამ დაგლასი იმაზე ფიქრობდა, როგორ მოვიდოდნენ ხვალ ადამიანები და ვერცხლის ლიანდაგებს გავარვარებულ გუდრონს გადაასხამდნენ, მალე ვეღარავინ გაიგებდა, რომ აქ ოდესღაც ტრამვაი დადიოდა. იცოდა, რომ თვითონ წარმოუდგენლად ბევრი წელიწადი დასჭირდებოდა, ვიდრე ამ ლიანდაგებს დაივიწყებდა. იცოდა, შემოდგომის, ზაფხულის ანდა ზამთრის დილით გაიღვიძებდა და თუ ფანჯარასთან არ მივიდოდა, თუ საწოლში დარჩებოდა რბილად ჩაღუნტულებული, მაშინ შორიდან მათ ხმას აუცილებლად გაიგონებდა.

და ქუჩის მოსახვევიდან, სიკომორების, თელებისა და ნეკერჩხლების ხეივნიდან, ჩვეული ცხოვრებისაგან გამიჯნულ დილის სიჩუმეში, ბიჭს ნაცნობი ხმები შემოესმებოდა - საათის ტიკტიკის, მგორავი ლითონის კასრების, ერთადერთი გიგანტური ნემსიყლაპიას ზუზუნის მსგავსი ხმა. ის კარუსელივით, ლურჯი ელვებით შემოსილი სულ ერთი ბეწო ელექტრული ქარიშხალივით მოვარდება, გაიჟღერებს და გაქროლდება. ტრამვაის მელოდია! მინერალური წყლების ონკანივით დაიშხვვლებს, კიბეს ჩამოშლის და კვლავ დაიძვრება ფერად ზმანებად, გასრიალდება თავის დამარხულ, მიმალულ ლიანდაგზე, რაღაც დამარხული, გადამალული მიზნისაკენ.

- ნავახშმევს კონსერვის ქილით ვიმატაოთ? - იკითხა ჩარლიმ.
- ვიმატაოთ, აბა, რა, - უპასუხა დაგლასმა.

\* \* \*

თორმეტი წლის ჯონ ჰაფის პიროვნებასთან დაკავშირებული ფაქტები მარტივია და მათი ჩამოთვლა დიდ დროს არ ითხოვს. ჩოკტოს თუ ჩეროკის ტომის ნებისმიერ მწვერავზე უკეთ პოულობდა კვალს, სიმაღლიდან ხტომაში შიმპანზეს სჯობნიდა, წყალქვეშ ორი წუთით გაძლება შეეძლო და სადაც ჩაყვინთავდა, იმ წერტილიდან ორმოცდაათ იარდს მიცურავდა დინების გასწვრივ. პასს რომ გადააწვდიდი, ბეისბოლის ბურთით ვაშლის ხიდან ერთ ტონა მოსავალს ჩამოყრიდა. ბადის ექვსფუტიან ღობეზე ხტებოდა, მეგობრებში ყველაზე მარჯვედ შეეძლო ტოტების ჩამოწევა და ყველაზე სწრაფად ბრუნდებოდა მოპარული ქლიავით დამძიმებული. სიცილით დარბოდა. ლადად იჯდა. არავის ჩაგრავდა. კეთილი იყო. თმა მუქი და ხვეული ჰქონდა, კბილები კი - ათქვეფილი ნადებევით თეთრი. ყველა კოვბოური სიმღერის ტექსტი ახსოვდა და თუ სთხოვდი, შენც გასწავლიდა. იცოდა ყველა მინდვრის ყვავილის სახელი, მთვარის ჩასვლა-ამოსვლისა და ზღვის მიმოქცევის ზუსტი დრო. სიმართლე თუ გინდათ, ის იყო მთელი მეოცე საუკუნის მანძილზე ილინიოსის შტატის ქალაქ გრინთაუნში მცხოვრები ერთადერთი ღვთაება, რომელსაც დაგლას სპოლდინგი იცნობდა.

და სწორედ ახლა, ერთ მშვენიერ, თბილ, მარმარილოს სფეროსავით დასრულებულ, სინათლის ალივით სრულყოფილ დღეს, ის და დაგლასი ქალაქის გაღმა დასეირნობდნენ, ლაჟვარდისფერი ბალახი აზვირთულიყო, მოსარკული ნაკადულები რძისფერი კენჭების გროვებს მარაოებად გადაჭყენოდნენ.

დაგლასი უდარდელად დასეირნობდა და დარწმუნებული იყო, ასე გაგრძელდებოდა საუკუნოდ. დღის ეს დასრულებული სიმრგვალე და ბალახის სურნელი სინათლის სიჩქარით მიიწვავდა მომავლისაკენ. როდესაც საუკეთესო მეგობარი მოლაღურის ხმით უსტვენს შენ გვერდით და ჩოგბურთის ბურთს ურტყამს ხელს, შენ კი ამ დროს გასაღების ჟღარუნით მოქრიხარ მტვრის ბილიკზე, ეს ყველაფერი სრულყოფილი და ძალზე ხელშესახებია - თითოეული საგანი აქვეა, შენს ხელთ, და ყოველთვის ახლოს დარჩება.

აი, ასეთ კაშკაშა დღესუეცრად ღრუბელი გადაეფარა და ადარ გადასულა.

ჯონ ჰაფი რამდენიმე წუთს მშვიდად ლაპარაკობდა. დაგლასი ბილიკზე შეჩერდა და მისკენ მიიხედა.

- ჯონ, გაიმეორე, რაც თქვი.
- პირველადაც ხომ გაიგონე, დაგ.
- როგორ თქვი, სხვა ქალაქში გადადიხარ?

- მატარებლის ბილეთი, აგერ, ჯიბეში მაქვს. კუ-კუუ! ჩუქუ-ჩუქუ-ჩუქუ-ჩუუ-უუუ...

ხმა ჩაუწყდა.

ჯონმა საზეიმო იერით ამოაძვრინა ჯიბიდან მატარებლის ყვითელი ბილეთი და ორივე ბიჭი წამით მას შეაჩერდა.

- დღეს საღამოს? - ვერ იჯერებდა დაგლასი, - ღმერთო ჩემო! დღეს ხომ „წითელი, მწვანე, გაშეშლი“ უნდა გვეთამამა! როგორ მოხდა, ასე უცებ რომ გადაწყვიტეთ? რაც თავი მახსოვს, გრინთაუნში ცხოვრობდი. როგორ შეიძლება, ასე უცბად აბარგდე და წახვიდე?

- მამაჩემის გამო, - თქვა ჯონმა, - სამსახური მისცეს მილუოკიში. დღემდე არ ვიცოდით დანამდვილებით...

- ფუ შენი! შემდეგ კვირას ბაპტისტურ ჰიკნიკს ვეგემავდით, მერე შრომის დღეს - დიდ კარნავალს, მერე - ჰელოუინს... მამაშენს არ შეუძლია მანამდე მოიცადოს?

ჯონმა თავი გაიქნია.

- რა უბედურებაა! - შეჰყვირა დაგლასმა, - მოიცა, დავჯდე!

ბორცვის ძირას, ბებერი მუხის ჩრდილში ჩამოსხდნენ. ქალაქს გაჰყურებდნენ, მზე კი მათ გარშემო ჩრდილის ფართო, მოცანცახე წრეებს კრავდა. ხის ძირას ისე გრილოდა, როგორც გამოქვაბულში. გარეთ, მზისგულზე, ფანჯრებდაღებულ ქალაქს ოხშივარი ასდიოდა. დაგლასს იქით მოუნდა გაქცევა, სადაც ქალაქი სახლების სიმძიმით შემოაწვებოდათ და ჯონს გამგზავრების საშუალებას არ მისცემდა.

- კი მაგრამ, ჩვენ ხომ მეგობრები ვართ, - უმწეოდ წარმოთქვა დაგლასმა.

- ყოველთვის მეგობრებად დავრჩებით, - უპასუხა ჯონმა.

- კვირაში ერთხელ მაინც ჩამოხვალ ხოლმე ჩვენს სანახავად?

- მამა ამბობს, მხოლოდ წელიწადში ორჯერ-სამჯერო. მანძილი ოთხმოცი მილია.

- ოთხმოცი მილი შორი არ არის! - დაიდრიალა დაგლასმა.

- არა, შორი სულაც არ არის, - დაეთანხმა ჯონი.

- ბებიაჩემს ტელეფონი აქვს, დაგირეკავ ხოლმე, ან იქნებ ჩვენც გესტუმროთ. მაგარი იქნება!

ჯონი კარგა ხანს ხმას არ იღებდა.

- ჰო, კარგი, - თქვა ბოლოს დაგლასმა, - მოდი, რამეზე ვილაპარაკოთ.

- რაზე?

- როგორ თუ რაზე! თუკი მიდიხარ, მილიონი რამე გვაქვს სალაპარაკო! ყველაფერი, რაზეც ერთი თვის, ორი თვის შემდეგ ვილაპარაკებდით!



ჩოქელებზე, საჭაერო ბურთებზე, აკრობატებზე, ხანჯლების მცლაპავებზე! მიდი, განაგრძე, მაშინ რომ მიყვებოდით, კალიები როგორ იფურთხებიან!

- გაგეცინება, მაგრამ რატომღაც არ მინდა კალიებზე ლაპარაკი.

- ყოველთვის გინდოდა ხოლმე!

- ჰო, - ჯონი დიდხანს გაჰყურებდა ქალაქს, - მაგრამ ახლა, მგონი, ამის დრო არ არის.

- ჯონ, რა დაგემართა? უცნაური სახე გაქვს...

ჯონმა თვალეები მაგრად მოხუჭა და სახე მოექმუნა.

- დაგ, ტერლების სახლი ხომ განსოვს?

- ჰო.

- მაღალ სართულზე პატარა, მრგვალ ფანჯრებს ყოველთვის ჰქონდა ფერადი რაფები?

- ჰო, აბა, რა.

- დარწმუნებული ხარ?

- ეგ ფანჯრები სანამ ჩვენ დავიბადებოდით, მანამდე იყო. რატომ მეკითხები?

- დღეს პირველად შევამჩნიე, - თქვა ჯონმა, - ქალაქში რომ დავსეირნობდით, უცებ ავიხედე და დავინახე. დაგ, რას ვაკეთებდი მთელი ეს წლები, რატომ ვერ ვამჩნევდი?

- სხვა რამეებით იყავი დაკავებული.

- ჰოო? - ჯონი მიუბრუნდა და შემფოთებული ჩააკვირდა სახეში, - დმერთო, დაგ, ამ წყუღმა ფანჯრებმა რატომღაც შემაშინა! რატომ? რა არის ამაში საშინელი? უბრალოდ... - ენა დაება, - უბრალოდ, თუკი დღემდე ეს ფანჯრები ვერ შევნიშნე, იქნებ სხვა კიდე უფრო მნიშვნელოვანი რამეებიც გამომრჩა? და რასაც ვხედავდი ამ ქალაქში ყოველდღიურად, იმის დამახსოვრებას თუ შევძლებ წასვლის მერე?

- რისი დამახსოვრებაც გინდა, ყველაფერი დაგამახსოვრდება. შარშანწინ, ზაფხულში, ბანაკში რომ გამიშვეს, იქ ყველაფერი მახსოვდა.

- არა, არ გახსოვდა! თვითონ მითხარი, დამდამობით მეღვიძებოდა და დედაჩემის სახეს ვერ ვიხსენებდიო.

- არა!

- ზოგჯერ ღამით აქაც მომდის ასეთი რამ. გული მისკდება ხოლმე. მშობლების ოთახში შევდივარ და მათ სახეებს ვაკვირდები! მერე ჩემს ოთახში ვბრუნდები, ისევ მავიწყდება. ო, დაგ! - მკლავები მუხლებს შემოაჭდო, - მხოლოდ ერთ რამეს დამპირდი, დაგ. დამპირდი, რომ დამიმახსოვრებ, რომ ჩემი სახე და ყველაფერი გენსომება. მპირდები?



- მაგას რა უნდა. თავში კინოკამერა მაქვს. დამდამობით საწოლში რომ დავწვები, თავში ნათურას ავინთებ და კედელზე პროექტორივით გაუშვებ გამოსახულებას და შენც ჩემ წინ იქნები, შემომძახებ და ხელს დამიქნევ.

- აბა, თვალები დახუჭე, დაგ. ახლა მითხარი, რა ფერის თვალები მაქვს? ნუ იჭყიტები. რა ფერის თვალები მაქვს?

დაგლასს ოფლმა დაასხა. ქუთუთოები ნერვიულად აუცახცახდა.

- ჯონ, ასე არ შეიძლება.

- მითხარი!

- თაფლისფერი!

ჯონმა გვერდზე გაიხედა.

- არაფერიც.

- როგორ თუ არაფერიც?!

- ახლოსაც კი არა ხარ! - ჯონმა თვალები დახუჭა.

- აქეთ მოტრიალდი, - უთხრა დაგლასმა, - გაახილე, მაჩვენე.

- რა აზრი აქვს? - უთხრა ჯონმა, - უკვე დაგავიწყდა, ასეც ვიცოდი.

- მოტრიალდი! - დაგლასი თმაში სწვდა და ნელა შემოატრიალა.

- ჰო, კარგი, დაგ.

ჯონმა გაახილა თვალები.

- მწვანე, - დაგლასს უდონოდ ჩამოუცვივდა ხელები, - მწვანე თვალები გქონია... ჰმ, ახლოსაა თაფლისფერთან, თითქმის წაბლისფერია.

- დაგ, რას მატყუებ.

- ჰო, კარგი, - ჩუმად თქვა დაგმა, - აღარ მოგატყუებ.

ისხდნენ და აღმართში მათკენ ყვირილითა და ქოშინით ამომავალ სხვა ბიჭებს გაჰყურებდნენ.

\* \* \*

ლიანდაგების გასწვრივ დაქროდნენ, მერე ხემსი ამოიღეს და ღრმად შეიყნოსეს კალკის ქაღალდში გახვეული სენდვიჩის შეკაზმული ლორისა და ფერად-ფერადი მწნილის სურნელი. მერე ისევ შეუჩერებლად დაქროდნენ. დაგლასი მიწაზე გაწვა, ყური ლიანდაგის ცხელ ფოლადს დაადო და უშორესი მატარებლების ხმები მოესმა, იმდენად შორი, რომ სხვა ქვეყნებიდან მასთან, ამ მომაკვდინებელი მზის ქვეშ მწოლიარე ბიჭთან მოღწეულ მორზეს გზავნილებს ჰგავდა. დაგლასი გაბრუებული წამოდგა ფეხზე.

- ჯონ!

ჯონი დარბოდა. ეს ყოვლად დაუშვებელი იყო, რადგან, როცა დარბიხარ, დროც გარბის. ყვირი, ღრიალებ, მალაყს გადადიხარ, კოტრიალობ და უცებ ამჩნევ, რომ მზე ჩასულა, გესმის საყვირის ხმა და სხვა გზა ადარ გაქვს: შინ უნდა წალასლასდე, რომ ვახშამს მიუსწრო. როდესაც თვალს არ ადევნებ, მზე შენს ზურგს უკან უსწრაფესად მიიპარება! მოვლენათა შენელების ერთადერთი საშუალებაა, ყველაფერს თვალი ადევნო და თავად არაფერი აკეთო. ასე, თვალის დევნებით შეიძლება დღე სამი დღის სიგრძეზე გაწელო!

- ჯონ!

შეუძლებელი იყო, რაიმე ხრიკის გარეშე ახლა მისი გადმოხირება.

- ჯონ, გავეცეთ, სხვებს გავეცეთ!

ჯონი და დაგლასი ყიჟინით დაეშვნენ დაღმართზე. მიზიდულობის ძალა თავიანთ სასარგებლოდ გამოიყენეს, მდელოებს გადაუფრინეს, ბედლებს შორის გაძვრნენ-გამოძვრნენ, ვიდრე მდევრების ხმები უკან არ მოიტოვეს.

ჯონი და დაგლასი თივის ზვინში შეძვრნენ, მათი სხეულების ქვეშ ვეება კოცონივით რომ ტკაცუნობდა.

- მოდი, არაფერი ვაკეთოთ, - თქვა ჯონმა.

- ზუსტად ამის თქმას ვაპირებდი ახლა, - გაუხარდა დაგლასს.

უძრავად ისხდნენ და თანდათან მოითქვეს სული.

თივაში მწერის წრიპინივით ოდნავ შესამჩნევი ხმა ისმოდა.

ეს ხმა ორივეს ესმოდა, მაგრამ ყურადღება არ მიუქცევიათ. დაგლასმა ხელი გაანძრია და ხმამ ზვინის სხვა ნაწილში გადაინაცვლა. ხელი კალთაში ჩაიდო და მწერი მის მუხლთან აწიკწიკდა. წამის მეასედით დახარა მზერა. მისი მაჯის საათი სამ საათს აჩვენებდა.

დაგლასმა მოწიკწიკე მწერისკენ ქურდულად გააპარა მარჯვენა ხელი და საათის მოსამართი ღილაკი გამოსწია. ისრები უკან დააბრუნა.

ახლა უსასრულოდ ბევრი დრო ექნებოდათ, რათა გულდასმით ეთვალეირებინათ სამყარო და მზის ცეცხლოვანი ქარის სუნთქვა შეეგრძნოთ.

მაგრამ, ბოლოს და ბოლოს, ჯონმა, როგორც ჩანს, სხეულით იგრძნო, უსხეულო ჩრდილები მიწაზე როგორ გადაიხარნენ. სიჩუმე დაარღვია.

- დაგ, რომელი საათია?

- სამის ნახევარია.

ჯონმა ცას ახედა.

ო, არა! გაიფიქრა დაგლასმა.

- სამის ნახევარი იქნება, ოთხიც, - თქვა ჯონმა, - ასეთი რამეები ბოისკაუტების ბანაკში ვისწავლე.

დაგლასმა ამოიხვნიე და ჩუმად გაასწორა საათი.

როცა ამას აკეთებდა, ჯონი უხმოდ ადევნებდა თვალს. დაგლასმა ახედა, ჯონმა მხარზე მუშტი მიარტყა, მსუბუქად, სულ არ სტკენია.

მატარებელი მძლავრ ტალღასავით უცბად მოვარდა და სწრაფად ჩაი-  
არა. ბიჭები გზიდან გაეცალნენ, ყვრილითა და მუშტების ქნევით გააცი-  
ლეს. დაგლასი და ჯონიც მათ შორის იყვნენ. მატარებელი ღრიალით გაუყ-  
ვა ლიანდაგს და თან ორასი მგზავრი წაიყოლა. მტვრის ღრუბელი ერთხანს  
სამხრეთისკენ მიჰყვა, შემდეგ მშვიდად მოეფინა ოქროსფერ მიდამოს.

ბიჭები შინისაკენ მიაბიჯებდნენ.

- ჩვიდმეტი წლის რომ გავხდები, ცინცინატიში წავალ და რკინიგზაზე ვი-  
მუშავებ ცეცხლფარეზად, - გამოაცხადა ჩარლი ვუდმენმა.

- მე ბიძა მყავს ნიუ-იორკში, - თქვა ჯიმმა, - მეც წავალ და ასოთამწყობი  
გავხდები.

დაგს სხვებისთვის აღარაფერი უკითხავს. უკვე ჩაესმოდა მატარებლების  
მრავალხმიანობა და ხედავდა მათ სახეებს ბოლო ვაგონის პლატფორმებ-  
ზე თუ კუპეს ფანჯრებს მიღმა. ყველანი გაეფანტნენ. მერე დაინახა ცარიე-  
ლი გზა, ზაფხულის ცა და საკუთარი თავი კიდეც ერთი მიმართულებით მიმ-  
სწრაფ მატარებელში. დაგლასს მოეჩვენა, რომ ფეხქვეშ ნიადაგი ეცლება,  
ბიჭების ჩრდილები ბალახიდან წამოიწევს და ჰაერს ბინდით აავსებს.

ყელში მობჯენილი გორგალი გადაყლაპა, ყურისწამლები ყიჟინა დასცა  
და მძლავრი მოქნევით მთელი ძალით აისროლა ბურთი ცაში.

- ბოლო ვინც მიირბენს, ის მარტორქის უკანალია!

სიცილით მოედვნენ ბილიკებს, ხელ-ფეხის ქნევით აიკლეს გარემო. ჯონ  
ჰაფი ისე მიქროდა, მიწას ფეხით არც კი ეხებოდა. დაგლასი უკან მისდევდა  
და წუთითაც კი არ ასცილებია მიწის ზედაპირს.

\* \* \*

შვიდი საათისათვის ყველამ ივახშმა. ბიჭები თანდათან ისევ შეგროვ-  
დნენ ქუჩაში, ხან ერთი სახლიდან, ხან მეორიდან ისმოდა კარის ბრაზუნი  
და მშობლების ხმა, უკან რომ მისძახოდნენ, კარს ნუ აბრაზუნებო. დაგლასი,  
ტომი, ჩარლი და ჯონი ექვსიოდე სხვა ბიჭთან ერთად იდგნენ გარეთ. და-  
ხუჭობანას და გამეშობანას დრო იყო.

- ერთი თამაშიც და მორჩა, - თქვა ჯონმა, - მერე წასასვლელი ვარ. მატა-  
რებელი ცხრა საათზე გადის. ვინ აცხადებს?

- მე, - დაიყვირა დაგლასმა.

- პირველად ვხედავ, ვიდაც თავისი ნებით აცხადებდეს, - გაიკვირვა ტომმა.

დაგლასმა ჯიქურ შეხედა ჯონს და მიაყვირა:

- გაიქეციო!

ბიჭები ყვირილით მიმოიფანტნენ. ჯონმა ნელა დაიხია უკან, მერე შეტრიალდა და გაიქცა. დაგლასმა აუჩქარებლად დაიწყო თვლა. დააცადა, სანამ ყველანი შორს წავიდოდნენ, გაიშლებოდნენ და თითოეული თავ-თავის მიკროსამყაროში მოექცეოდა. როცა სწრაფად გაირბინეს გზა და უკვე სადაც იყო, თვალს მიეფარებოდნენ, ღრმად ჩაისუნთქა.

- გამეშლიო!

ყველა გაქვავდა.

დაგლასი ძალიან ნელა გაემართა გაზონის მეორე ბოლოსკენ, სადაც ჯონ ჰაფი სპილენძისგან ჩამოსხმული ირემივით გამეშებულიყო.

შორს სხვა ბიჭებს აღემართათ ცისკენ მკლავები და დამანჭული სახეები და ციყვების ფიტულებს ჰგავდნენ.

ჯონი კი მარტოდმარტო და უძრავად იდგა, ირგვლივ არავინ დაძრწოდა და ვერანაირი ხმაური ვერ გაუფუჭებდა გუნებას.

დაგლასმა აქეთ-იქით შემოუარა გამეშებულ ქანდაკებას. ქანდაკება არ შერხეულა. ხმა არ ამოუღია. ჰორიზონტს გაჰყურებდა და ბაგეზე ოდნავი ღიმილი უკრთოდა.

გაახსენდა, დიდი ხნის წინათ ჩიკაგოში, ერთ უზარმაზარ შენობაში, თეთრი მარმარილოს ქანდაკებებს გარშემო როგორ უვლიდა და სიჩუმეში ყველა მხრიდან ათვალეირებდა. მის წინ ახლა ჯონ ჰაფი იდგა, მუხლებსა და საჯდომზე ბალახისაგან გამწვანებული შარვლით, ნაიარევი თითებით, გადაყვლეფილი იდაყვებით. უძრავი ფეხები სპორტულ ფეხსაცმელებში, როგორც ქარქაშში, ისე ეწყო. აი, მისი პირი, ამ ზაფხულს უკვე უამრავი გარგარის ნამცხვარი რომ შეუსანსლავს და ბევრი მშვიდი სიტყვა უთქვამს ცხოვრებასა და გარე სამყაროზე. აი, მისი თვალები, ქანდაკებების თვალევივით უსინათლო კი არა, - დამდნარი, მომწვანო ოქროთი სავსე. მუქი თმა ხან ჩრდილოეთისკენ აუფრიალდება, ხან - სამხრეთისკენ, ხანაც სხვა მიმართულებით აჰყვება ნიავს. და აი, ხელებიც, მთელი ქალაქი ზედ რომ აჰკვრია: ქუჩის მტვერი, ხის მერქნის ნაფოტები; თითებს ნაირ-ნაირი სუნი ასდის - კანაფისა და ყურძნის, მწვანე ვაშლის, ძველი მონეტების და მწნილისფერი ბაყაყებისა. აგერ მისი ატმისფერი, მზით გამჭვირვალეული ყურებიც და ჰაერში უხილავად გამოფრქვეული, პიტნის კვეით გაჯერებული სუნთქვა.

- ახლა კი, ჯონ, - მიმართა დაგლასმა, - წამწამიც არ შეარხიო. კატეგორიულად გიბრძანებ, ადგილზე დარჩე და არ გაინძრე სამი საათის განმავლობაში!

- და...

ჯონმა ტუჩები აამოძრავა.

- გაშეშდი! - უბრძანა დაგლასმა.

ჯონმა კვლავ ცას მიაჰყრო მზერა, მაგრამ აღარ იღიმებოდა.

- უნდა წავიდე, - დაიჩურჩულა.

- კუნთიც არ აამოძრაო, ასეთია თამაშის წესი!

- აუცილებლად უნდა წავიდე შინ, - თქვა ჯონმა.

ქანდაკება ამოძრავდა, მკლავები დაუშვა და დაგლასს მიუბრუნდა. იდგნენ და ერთმანეთს უყურებდნენ. სხვა ბავშვებმაც ხელები ჩამოუშვეს და აიშალნენ.

- ერთიც ვითამაშოთ, - თქვა ჯონმა, - ეს არ ითვლება. მე ვაცხადებ. გაიქეცით!

ბიჭები გაიქცნენ.

- გაშეშდიო!

ყველა ადგილზე გაიყინა და, მათთან ერთად, დაგლასიც.

- არც ერთი კუნთი, თმის არც ერთი ღერი არ გაარხიოთ! - დაიყვირა ჯონმა.

დაგლასისკენ წავიდა და მიუახლოვდა.

- უჰ, სხვანაირად ამას ვერ მოვახერხებდი, - ჩაილაპარაკა.

დაგლასი მწუხრის ცას გაჰყურებდა.

- მომდევნო სამი წუთის განმავლობაში ყველანი ქანდაკებები ხართ, გაიგეთ? - გამოაცხადა ჯონმა.

დაგლასმა იგრძნო, ჯონმა როგორ შემოუარა გარშემო ზუსტად ისევე, როგორც წედან თვითონ. მხარზე ჯონის მსუბუქი დარტყმა იგრძნო და მისი ჩუმი ხმა გაიგონა:

- კარგად.

მერე აჩქარებული ფეხის ხმა მოესმა და მიხვდა, რომ ზურგს უკან აღარავინ ედგა.

შორს მატარებლის საყვირმა დაიწვილა.

დაგლასი მთელ წუთს იდგა ასე და ელოდა, როდის მიწყდებოდა ფეხის ხმა, მაგრამ ის არ შეწყვეტილა. ის გარბის, მაგრამ მისი ფეხის ხმა აღარ მშორდება, გაიფიქრა დაგლასმა. რატომ აღარ ჩერდება?

და უცბად მიხვდა, რომ ეს მისივეგულისცემა იყო.

გაჩერდი! ხელი მკერდზე იტაცა! შეწყვიტე ცემა! ეს ხმა მაღიზიანებს!  
 უცბად გაიაზრა, რომ გაზონზე მიაბიჯებს სხვა ქანდაკებებს შორის, მაგრამ არ იცის, ისინიც მასავით თუ გაცოცხლდნენ. ეჩვენებოდა, თითქოს სულ არ იძვროდნენ. თვითონაც მხოლოდ მუხლებს ქვევით მოძრაობდა. დანარჩენი სხეული ცივ ლოდად ექცა და საშინლად დამძიმებოდა.

თავისი სახლის პარმალზე ავიდა და ერთბაშად უკან შეტრიალდა.

გაზონი ცარიელი იყო.

სროლის ჯერი გაისმა. შზის ჩასვლის აღსანიშნავი ბათქის მსგავსად, მთელ ქუჩაზე ერთიმეორის მიყოლებით კარები მიჯახუნდა.

ქანდაკებები კარგი რამაა, გაიფიქრა ბიჭმა. გაზონზე დგანან, არ ინძრევიან, მაგრამ ერთხელ თუ მიეცი მოძრაობის საშუალება, მორჩა, უკვე ველარასოდეს შეაჩერებ.

უეცრად მისმა სხეულმა მისთვისვე მოულოდნელად დგუშვით გამოისროლა მუშტი და მოუდერა გაზონს, ქუჩებსა და ჩამოწოლილ სიბნელეს. სახე სისხლისფრად აელეწა, თვალები ლამის გადმოსცვენოდა.

- ჯონ! - ბრაზისაგან მოგუდული ხმით შეჰყვირა დაგლასმა, - გესმის, ჯონ? დღეიდან ჩემი მტერი ხარ, გაიგე?! ჩვენ მეგობრები აღარ ვართ! წაეთრიე! მტრები ვართ, გესმის?! ჩვენ შორის ყველაფერი დამთავრდა, ნაგავი ხარ, ჯონ, არარაობა ხარ! გესმის ჩემი, ჯონ?!

კიდევ უფრო ჩამობნელდა, თითქოს ქალაქის მიღმა ვეებერთელა ნავთის ლამპას ჩაუწიეს პატრუქი. პირდაღებული იდგა პარმალზე და ყბებს უხმოდ ამოძრავებდა. მუშტი ისევ გამოწვდილი ჰქონდა და მოპირდაპირე სახლს უღერებდა. მუშტზე რომ დაიხედა, ისიც და მის უკან მთელი მიდამოც უცებ თითქოს წყალში გაიდღაბნა.

კიბეს აუყვა სიბნელეში, სადაც ვერაფერს ხედავდა, ვერც საკუთარ მუშტებს, მხოლოდ საკუთარ სახეს შეიგრძნობდა. გულში გაუთავებლად იმეორებდა: „განრისხებული ვარ, გამწარებული, მძულს, ვერ ვიტან!“

ათი წუთის შემდეგ ძლივძლივობით მიაღწია ჩაბნელებულ ზედა სართულს...

\* \* \*

- ტომ, - თქვა დაგლასმა, - ერთ რამეს დამპირდი, კაი?
- გპირდები. რას?
- მართალია, ჩემი ძმა ხარ და ზოგჯერ ვერ გიტან, მაგრამ ერთად ვიყოთ, კარგი?
- ესე იგი, დიდ ბიჭებთან ერთად სასეირნოდ წამიყვან ხოლმე?

- ჰმ... ჰო... კარგი, ეგრე იყოს. ამის თქმა მინდოდა. არსად წახვიდე, რა! მანქანამ არ გადაგიაროს და კლდიდან არ გადავარდე.

- არა, გაგიჟდი?! შენ ვინ გგონივარ?

- იმიტომ რომ, ყველაზე უარეს შემთხვევაშიც კი, ორივენი ძალიან რომ დავბერდებით, - ასე, ორმოცის ან ორმოცდათხუთმეტის რომ გავზდებით - მაინც ყოველთვის შეგვეძლება დასავლეთში ოქროს საბადო შევისყიდოთ, იქ ვისხდეთ, სიგარები მოვწიოთ და წვერები მოვუშვათ.

- წვერები მოვუშვათ! მაგარია!

- როგორც გითხარი, ჩემ გვერდით იყავი და ნურაფერი მოგივა.

- ჩემი იმედი გქონდეს, - დაარწმუნა ტომმა.

- შენ გამო კი არ ვდელავ, - უთხრა დაგლასმა, - ის მაფიქრებს, ღმერთი როგორ მართავს ამ სამყაროს.

ტომი ამ სიტყვებმა ერთხანს ჩააფიქრა.

- ღმერთი კაი ტიპია, დაგ, - საბოლოოდ დაასკვნა ტომმა, - ცდილობს.

\* \* \*

სააბაზანოდან გამოსულმა თითზე იოდი წაისვა. ეს-ეს არის, კინაღამ ძვლამდე ჩაითალა, როდესაც ქოქოსის ნამცხვარი ჩამოიჭრა. სწორედ ამ წუთში ჰარმადის კიბეზე ფოსტალიონმა ამოიარა, კარი გააღო და შემოვიდა. კარი ბრაგვანით მიიკეტა. ელმირა ბრაუნი შეხტა.

- სემ! - იოდწასმული თითი ჰაერში გაიქნია გასაგრილებლად, - ვერა და ვერ მივეჩვიე იმას, რომ ქმარი ფოსტალიონი მყავს. ყოველ შემოსვლაზე გულს მიხეთქავ ხოლმე!

სანახევროდ სავსე საფოსტო ჩანთაგადაკიდებული სემ ბრაუნი კართან ატუზულიყო და კეფას იფხანდა. უკან ისე მიიხედა, თითქოს ზაფხულის ამ მშვიდ, საამო დილით კარში შემოსულს ბურუსი შემოჰყვა.

- სემ, ადრე დაბრუნებულხარ, - უთხრა ქალმა.

- ვერ დავრჩები, - დაბნეული ხმით უპასუხა ქმარმა.

- ამოდერდე, რა მოხდა? - ქალი მიუახლოვდა და სახეში ჩახედა.

- შეიძლება, არც არაფერი, შეიძლება, ძალიანაც ცუდი რამ. ეს-ესაა ქუჩის დასაწყისში კლარა გუდუოტერს შევუტანე ამანათი...

- კლარა გუდუოტერს!

- ჰო, კარგი ახლა, ნუ გაცხარდები. წიგნები იყო. ვისკონსინის ქალაქ რასინის ჯონსონ-სმიტის კომპანიიდან. სათაური... მოიცადე, გავიხსენო, - სახის

კუნთები დაჭიმა და შემდეგ ისევ მოადუნა, - ალბერტუს მაგნუსი<sup>25</sup>, აი, რა იყო. „გადამოწმებული, დახარისხებული ეგვიპტური საიდუმლოებანი, ანუ... - ჭერს მიაშტერდა, თითქოს იქ ცდილობდა უცხო ნიშნების ამოკითხვას, - თეთრი და შავი ხელოვნება კაცთა და მხეცთათვის, რომელიც გაგიმხელთ უძველესი დროის ფილოსოფოსთა აკრძალულ სიბრძნესა და მისტერიებს!“

- მამ, კლარა გუდუოტერს მიუტანე?

- გზად ყდების დასათვალიერებლად საკმაო დრო მქონდა, ამით ხომ არაფერი დაშავდებოდა. „სიცოცხლის დაფარული საიდუმლოებანი, გამხელილი გამოჩენილი მეცნიერის, ფილოსოფოსის, ალქიმიკოსის, ბუნების მეცნიერის, ასტროლოგის, მეტალურგის, ნათელმხილველის მიერ, ვინაც განმარტა გრძნეულთა და ჯადოქართა სიბრძნე და მრავალი იღუმალი მეცნიერება“. უჰ, როგორ მხსომებია! თავი ისე მაქვს გასივებული, როგორც სათამაშო ყუთიდან ამომხტარ ჭინკას. მნიშვნელობა კი არ მესმის, მაგრამ მთავარია, სიტყვები დავიმანსოვრე.

ელმირა ისე დაშტერებოდა საკუთარ იოდწასმულ თითს, თითქოს სრულიად უცხო საგანი ყოფილიყო და ეს-ეს არის, ვიდაცას მისთვის ეჩვენებინა.

- კლარა გუდუოტერი, - ჩურჩულებდა ქალი.

- წიგნები რომ გადავეცი, თვალი თვალში გამიყარა და მითხრა: „კუდიანი უნდა გავხდე, ჯადოქრობის ნამდვილი ოსტატი. დღეს-ხვალ დიპლომს მომანიჭებენ. ეს უკვე გადაწყვეტილი ამბავია... და მერე კი ყველას ერთად და სათითაოდ მოვაჯადოებ, დიდებსა და პატარებს, მოხუცებსა და ახალგაზრდებს“. მერე რალაცნაირად ჩაიცინა, ცხვირი წიგნში ჩარგო და სახლში შებრუნდა.

ელმირა ახლა თავის დალურჯებულ მკლავს შეაჩერდა, მერე ენით ფრთხილად მოისინჯა მოყანყალეული კბილი.

კარი გაიღო და დაიკეტა. ელმირა ბრაუნის სახლის წინ მოლზე ჩამუხლულმა ტომ სპოლდინგმა თავი ასწია. მეზობლების ეზოებში დასეირნობდა, აქა-იქ ჭიანჭველების საქმიანობას აკვირდებოდა და ერთი განსაკუთრებულად კარგი ბორცვი იპოვა, დიდი ხვრელით, რომელშიც ალისფერი დიდი ჭიანჭველები შეშლილი სისწრაფით შედიოდნენ და გამოდიოდნენ და

<sup>25</sup> ალბერტუს მაგნუსი (ლათ. Albertus Magnus; იგივე ალბერტ დიდი, ანუ წმი-ნდა ალბერტი, ალბერტ კიოლნელი, ალბერტ ფონ ბოლშტედტი - 1200-1280) - შუა საუკუნეების გერმანელი ფილოსოფოსი, ტეოლოგი, მეცნიერი; შუა საუკუნეების სქოლასტიკის ტვალსაჩინო წარმომადგენელი, დომინიკელი ბერი, კათოლიკური ეკლესია ეკლესიის დიდ მასწავლებლად აღიარებ, თომა აკვინელის მოძღვარი.



მკვდარი კალიისა თუ ჩიტის ნაკუწებს მიწის სიღრმეში ეზიდებოდნენ. ახლა კი მის წინაშე სულ სხვა ობიექტი გამოჩნდა: მისის ბრაუნი თავისი პარმადიდან ისე გადმოყუდებულიყო, გეგონებოდა, ეს წუთია აღმოაჩინა, რომ დედამიწა წამში ტრილიონი კილომეტრის სიჩქარით კოსმოსურ უფსკრულში ვარდებაო. მის ზურგს უკან მოჩანდა მისტერ ბრაუნი, რომელმაც არაფერი იცოდა კილომეტრების შესახებ და, ალბათ, რომც სცოდნოდა, სრულებითაც არ იდარდებდა.

- მისმინე, ტომ! - გასძახა მისის ბრაუნმა, - მორალური მხარდაჭერა მესაჭიროება და კიდევ დვითური კრავის სისხლის ეკვივალენტი. წამომყევი!

სწრაფი ნაბიჯით მოსწყდა ადგილს, გადაკვეთა მოლი და ეზოს ბილიკები, გასრისა ჭიანჭველები და ქუსლებით მიწაზე წვეტიანი ხვრელები დატოვა.

ტომი წუთით კიდევ ჩამუხლული აკვირდებოდა ქუჩაზე მიმავალი მისის ბრაუნის ბეჭებსა და ხერხემალს, რომელთა მოძრაობაშიც მელოდრამა და თავგადასავალი ამოიკითხა. ეს მოვლენები მის წარმოსახვაში ჩვეულებრივ ქალებს ნაკლებად უკავშირდებოდა, თუმცა, მისის ბრაუნს სახეზე მეკობრის უღვაშის მსგავსი ღინღლი ემჩნეოდა. წუთიც და, ტომი მის მოკავშირედ იქცა.

- მისის ბრაუნ, ძალიან გაბრაზებული ჩანხართ!

- შენ ჩემი გაბრაზება ჯერ არ გინახავს, შვილო!

- ფრთხილად! - დაიძახა ტომმა.

მისის ელმირა ბრაუნმა ფეხი წამოჰკრა თავის წინ მძინარე ძაღლის ქანდაკებას და ბალახზე გაიშხლართა.

- მისის ბრაუნ!

- აი, ხედავ? - მისის ბრაუნი წამოჯდა, - ესეც კლარა გუდუოტერმა მიქნა! ჯადოქრობაა!

- ჯადოქრობა?

- ეგ არაფერი, შვილო, აგერ მისი კიბე. შენ პირველი აღი და გზად თუ უხილავი თოკებია გაჭიმული, ფეხით გაწყვიტე. ზარს ხელი მიაჭირე, ოღონდ სულ ერთი წამით, თორემ ზედ წასმული შხამი ფერფლად გაქცევს.

ტომი ზარს არ მიჰკარებია.

- კლარა გუდუოტერ! - მისის ბრაუნმა ზარის დილაკს იოდწასმული თითი მიარტყა.

სადღაც შორს, ვეება ძველისძველი სახლის დიდი და ცარიელი ოთახების ბინდში, ჩუმი წკრიალი გაისმა.

ტომი სმენად იქცა. კიდეც უფრო შორიდან თავის ფაჩუნით სწრაფი ფეხის ხმა გაიგონა. შორეულ დარბაზში რაღაც ჩრდილი გაკრთა, შეიძლება, ფარდა აფრიალდა.

- გამარჯობა, - გაისმა მშვიდი ხმა.

მისის გულუოტერი ერთბაშად გაჩნდა ბადიანი კარის იქით, პიტნის კარამელივით ცივი და მხნე იერი ჰქონდა.

- ოჰ, გამარჯობა, ტომ, ელმირა. რა ამბავია...

- ერთი დამაცადე! იმიტომ მოვედი, გავიგე, პროფესიონალი კუდიანის საქმიანობას იწყებსო!

- შენი მეუღლე მხოლოდ ფოსტალიონი კი არა, კანონის უერთგულესი დამცველიცაა, - გაეღიმა მისის გულუოტერს, - ყველაფერში თავის გრძელ ცხვირს ყოფს!

- მას არავის ფოსტაში არ ჩაუხედავს.

- რაო? სახლებს შორის ათ-ათ წუთს ჩერდება, ღია ბარათებს დანითხითებს და შეკვეთით მისატან ფეხსაცმელებს იზომავს ხოლმე.

- საქმე ის კი არ არის, თუ რა ნახა ჩემმა ქმარმა, საქმე ის არის, შენ თვითონ რა უთხარი მიღებულ წიგნებზე.

- ეს მხოლოდ ხუმრობა იყო. კუდიანი უნდა გავხდე-მეთქი, ვთქვი თუ არა და - ბრახ! სემი ისე გავარდა, თითქოს ცეცხლი მოუკიდესო. დარწმუნებული ვარ, ამ კაცის ტვინს ერთი ხვეულიც კი არ ექნება.

- შენი ჯადოქრობის შესახებ გუშინ სხვებთანაც გილაპარაკია...

- შენ, ალბათ, სენდვიჩის კლუბის შეხვედრას გულისხმობ...

- ...რომელზედაც მე ხაზგასმით არ დამჰატიყეს.

- ქალბატონო, ჩვენ როგორც ვიცოდით, ამ დღეს ყოველთვის ბებიასთან ატარებ ხოლმე.

- ბებიას მონახულება ნებისმიერ სხვა დღესაც შემიძლია, თუკი შეხვედრებზე დამჰატიყებენ.

- ერთადერთი ღირსშესანიშნავი რამ, რაც სენდვიჩის კლუბში მოხდა, იყო ის, რომ ხორციანი და მწნილიანი სენდვიჩით ხელში ყველას გასაგონად განვაცხადე: როგორც იქნა, კუდიანის დიპლომს მაძლევენ, უკვე რამდენიმე წელია, რაც მაგიას ვასწავლი-მეთქი.

- ჰოდა, სწორედ ეს მაცნობეს ტელეფონით!

- მაინც რა შესანიშნავია ეს თანამედროვე გამოგონებანი! - ადფრთოვანდა მისის გულუოტერი.

- რაკიდა ლამის სამოქალაქო ომის დროიდან ბრძანდები ჩვენი ქალაქის ქალთა საკრებულოს პრეზიდენტი, პირდაპირ პირში მოგახლი: ამ წლების

მანძილზე შენი ჯადოქრობით ხიბლავდი ქალებს და ასე იმარჯვებდი არჩევნებში, ხომ?

- ეჭვი გეპარება ამაში, ჩემო კარგო?

- ხვალ ისევ არჩევნებია და მხოლოდ ეს მაინტერესებს: კიდევ ერთი ვადით აპირებ დარჩენას და არ გრცხვენია?

- პირველ კითხვაზე პასუხია „დიახ“, მეორეზე - „არა“. ჩემო კარგო, მისმინე, ეს წიგნები ჩემს ნათესავ ბიჭს, რაულს, ვუყიდე. მხოლოდ ათი წლისაა და მთელი გულით ცდილობს, ქუდიდან კურდღელი ამოაძვრინოს. მე დავარწმუნე, რომ ქულებში კურდღლებს ისევე არაფერი ესაქმებათ, როგორც ტვინს ზოგ-ზოგიერთის თავში - სახელს და გვარს არ გეტყვით, - მაგრამ თავისას მაინც არ იშლის, ჰოდა, მეც ეს საჩუქრები შევიძინე მისთვის.

- ათას ბიბლიაზეც რომ დაიფიცო, მაინც არ დაგიჯერებ.

- როგორც გენებოს, სრული სიმართლე კია. მიყვარს ჩემს კულიანობაზე ხუმრობა. გუშინ ჩემი შავბნელი ძალების შესახებ რომ განვაცხადე, ქალებმა ერთი ვაი-უშველელი ატეხეს, ისეთი ამბავი იყო, ნეტავ გენახა.

- ხვალ ვნახავ, რას მოიმოქმედებ, როდესაც შენს დასამარცხებლად მოვალ ოქროს ჯვრითა და ყველა კეთილი ძალით აღჭურვილი, რის მოკრებასაც კი მოვახერხებ, - უპასუხა ელმირამ, - ახლა ის მითხარი, კიდევ რა ჯადოებს ინახავ სახლში?

მისის გუდუოტერმა კართან პატარა მაგიდაზე მიანიშნა.

- ყველანაირ მაგიურ ბალახბულახს ვყიდულობ. უცნაური სუნი აქვთ და თანაც ამით რაულს ვახარებ. აი, ამ პატარა ტოპრაკში ბალახია, რომელსაც სურნელოვანი ტეგანი ჰქვია, ეს საბისის ფესვია, ეს კი - ეკალიფი. აგერ, აქ შავი გოგირდი მაქვს, ამაში კი დაფუჭული ძვლები მიყრია.

- დაფუჭული ძვლები! - შემკრთალმა ელმირამ უკან დაიხია და ტომს კოჭში მიართყა ქუსლი. ტომმა დაიწკმუტუნა.

- კიდევ აბზინდა და გვიმრის ფოთლები მაქვს, რათა ტყვია არ მომეკაროს და სიზმარში დამურასავით შევძლო ფრენა, როგორც ამ პატარა წიგნის მეათე თავში წერია. ჩემი აზრით, მშვენიერია, როდესაც მოზარდი ამგვარ რამეებზე ფიქრობს. ისეთი სახით მიყურებ, ვატყობ, რაულის არსებობაში ეჭვი გეპარება. მამ, კარგი, მის მისამართს მოგცემ სპრინგფილდში.

- რასაკვირველია, - არ დაიბნა ელმირა, - და როგორც კი მივწერ, სპრინგფილდის ავტობუსს შეახტები, ფოსტაში მიხვალ, ჩემს წერილს აიღებ და ბიჭის ხელწერით მომწერ პასუხს. კარგად გიცნობ!

- მისის ბრაუნ, გამოტყედი, ქალთა საკრებულოს პრეზიდენტობაზე ოცნებობ, ასე არ არის? უკვე ათი წელია, ყოველწლიურად აყენებ შენს

კანდიდატურას და ყოველწლიურად ერთადერთ ხმას იღებ - შენს საკუთარს. ელმირა, ქალებს რომ შენ უნდოდა პრეზიდენტად, უკვე კარგა ხანია აგირჩევდნენ. მაგრამ ჩემი სიმაღლიდან კარგად ვხედავ, რომ შენს ღრმულში ერთ ბურთულაზე მეტი არ ჩაგორდება. იცი, რას გეტყვი? მოდი, ხვალ მე თვითონ წარვადგენ შენს კანდიდატურას და ხმასაც მოგცემ, თანახმა ხარ?

- მაშინ ჩემი საქმე წასულია, - თქვა ელმირამ, - შარშან ზუსტად არჩევნების დღეებში საშინელი გრიპი დამემართა; სააგიტაციოდ გამოსვლა ვეღარ შევძელი, შარშანწინ კი ამავე დროს ფეხი მოვიტეხე. ეს ყველაფერი უცნაურად არ გეჩვენება? - ელმირამ ბადის იქით მდგომ ქალს მრისხანედ დაუბღვირა, - ეს კიდეც ყველაფერი არ არის. გასულ თვეში ექვსჯერ გავიჭერი თითი, ათჯერ მივარტიყი მუხლი, ორჯერ გადმოვვარდი პარმალიდან, ორჯერ - გესმის?! გარდა ამისა, ჩამემსხვრა ფანჯარა, გამიტყდა ოთხი თეფში, ერთი ლარნაკი, ბიქსბის მაღაზიაში დოლარი და ორმოცდაცხრა ცენტი რომ ღირს, ჰოდა, იცოდე, დღეიდან ჩემს სახლსა და მის მიდამოებში ყოველი გატეხილი ჭურჭლის საფასურს შენ გაზღვევინებ!

- მაშ, შობამდე გავკოტრებულვარ! - თქვა მისის გუდუოტერმა, მოულოდნელად გარეთ გამოვიდა და კარი მიაჯახუნა, - ელმირა ბრაუნ, რამდენი წლის ხარ?

- იქნებ რომელიმე შენს შავ წიგნს ჩახედო ამის გასაგებად? ოცდათხუთმეტის.

- ჰმ, შენი ცხოვრების მაგ ოცდათხუთმეტ წელიწადზე რომ ვფიქრობ... - მისის გუდუოტერმა პირი მომუწა და თვალები მოწკურა, თითქოს ანგარიშობსო, - გამოდის სადღაც თორმეტი ათას შვიდას სამოცდათხუთმეტი ინციდენტი, თუკი დღეში მხოლოდ სამით შემოვიფარგლებით, ანუ, თორმეტი ათასზე მეტი უბედური შემთხვევა და თორმეტი ათასზე მეტი ტრავმა. მომილოცავს, ელმირა ბრაუნ, თავგადასავლებით მდიდარ ცხოვრებას ეწევი! - ხელი გაუწოდა ჩამოსართმევად.

- მომცილდი! - ხელი აუქნია ელმირამ.

- შენ, ქალბატონო, ქალაქში მეორე ადგილი გიკავია მოუქნელობასა და სიფეთხუმეში. სკამზე ისე ვერ ჯდება, რომ გარმონივითარ ააჭრიალო. წამოდგომისას აუცილებლად რამეს უნდა წამოჰკრა ფეხი. ტრიალ მინდორზე გავლისას იმდენს მოახერხებ, რომ ორმოში ჩავარდები. მთელი შენი ცხოვრება ერთი დიდი მარცხია, რატომ არ გინდა ამის აღიარება?

- ჩემი უბედურებები მოუქნელობის ბრალი არ ყოფილა: როცა ლობიოს ქვაბი ხელიდან გამივარდა და თითი შტეფსელში გამეჭადა, ამ დროს შენ ჩემი სახლიდან ერთი მილის მანძილზე იმყოფებოდი.

- ჩემო კარგო, ასეთ პატარა ქალაქში დღეში ერთხელ მაინც ყველას უწევს ერთმანეთთან ერთი მილით მიახლოება.

- აჰა, ესე იგი, აღიარებ, რომ ამ დროს ჩემს სიახლოვეს იყავი?

- დიან, ვაღიარებ, რომ აქ დავიბადე, მაგრამ ამ წუთში ყველაფერს გავცემდი, ოღონდაც კენოშაში ან ზაიონში დავბადებულიყავი. ელმირა, გირჩევნია კბილის ექიმთან მიხვიდე, ეგებ მაგ შენს გესლიან ენას რამე მოუხერხოს.

- ოჰ! - ადუღდა ელმირა, - რაო? ეს რა მითხარი?

- შენ თვითონ მიბიძგე და, თუმცა აქამდე მაგია სრულებით არ მაინტერესებდა, ახლა გადავწყვიტე, ეს საქმე მართლაც შევისწავლო. იცი, რას გეტყვი? ამ წუთიდან უზილავი ხარ! სანამ აქ იდექი, მოგაჯალოე, მთლიანად გაგაქრე!

- არა!

- სწორედ ასეა! - დაარწმუნა კუდიანმა, - თუმცა, ისედაც ვერასოდეს გამჩნევდი.

ელმირამ ჯიბის სარკე ამოიღო.

- აგერ არ ვარ?!

საკუთარ ანარეკლს ჩააშტერდა და უცებ შეიცვანდა. ხელი ისე მოიკიდა თავზე, თითქოს არფის სიმებს შეეხო, თმის ერთი ღერი ამოიძრო და პათეტიკურად ასწია.

- სიცოცხლეში თეთრი თმა არ მქონია, ამ წუთამდე!

კუდიანი ტკბილად გაიბადრა.

- მტკნარი წყლით სავსე ქილაში ჩადე და ხვალ დილისთვის ჭიაყელად გადაიქცევა. ელმირა, ბოლოს და ბოლოს, შეხედე შენს თავს! შენი ჩორთა ფეხებისა და აცაბაცა მოძრაობების გამო ამდენი წელია, სხვებს ადანაშაულებ. ოდესმე შექსპირი თუ წაგიკითხავს? ხშირად აქვს ასეთი სასცენო რემარკა: „ხმაური და ალიაქოთი“. აი, სწორედ ეგ ხარ: ხმაური და ალიაქოთი! ახლა გამასწარი, სანამ თავი არ გაგისივებ და ღამით ავი სულები არ გამოგიგზავნე! აქმა!

ხელები ისე აიქნია ჰაერში, თითქოს ელმირა აბეზარი მწერების გუნდი ყოფილიყოს და ვითომდა თავისთვის, ჩაილაპარაკა:

- ამ ზაფხულს რაღაც ძალიან მსხვილი ბუზები გაჩნდნენ.

მერე შინ შევიდა და კარი გადაკეტა.

- შენი ბედი შენსავე ხელთაა, მისის გუდუოტერ, - ელმირამ ხელები მკერდზე გადაიჯვარედინა, - ერთ უკანასკნელ შანსსაც გაძლევ: უარი თქვი არჩევნებში მონაწილეობაზე ანდა პირისპირ შემხვდი ხვალ, როცა ჩემს

კანდიდატურას წამოვაცენებ და პატიოსან ბრძოლაში დაგამარცხებ. აგერ, ტომსაც თან წამოვიყვან. უცოდველი, კეთილი ბიჭია, ხოლო უმწიკვლობა და სიკეთე საბოლოოდ მაინც იმარჯვებს.

- იცით, მისის ბრაუნ, ჩემი უცოდველობის იმედი მაინცდამაინც ნუ გექნებათ, - ჩაერთო ტომი, - დედაჩემი ამბობს...

- ენა ჩაიგდე, ტომ! სიკეთე, სიკეთეა! შენ ჩემი მარჯვენა ხელი იქნები.

- ღიახ, მისის ბრაუნ, - დაემორჩილა ტომი.

- რა თქმა უნდა, - განაგრძო ელმირამ, - თუ ამალამ ცოცხალი გადავრჩი ამ ქალბატონის ხელში: დარწმუნებული ვარ, ჩემს ცვილის ფიგურას გააკეთებს და გულ-რბილში ჟანგიან მახათებს გაურჭობს. ტომ, თუ ხვალ გამთენიისას ჩემს საწოლში უზარმაზარი დაჩამიჩებული ლეღვი იპოვეს, შენ მაინც ხომ გეცოდინება, ეს ნაყოფი ვისი მოწყვეტილიცაა. მაშინ კი ნახეთ, მისის გულდუოტერი ასი წლის ასაკამდე პრეზიდენტად რომ დარჩება.

- რას ბრძანებ, ჭკუის კოლოფო, - გამოსძახა გულდუოტერმა, - სამასი წლისა ახლა ვარ. ძველად „უხსენებელს“ მიწოდებდნენ, - თითებგაფარჩხული ხელები მაღლა ასწია, - აბრაკა-დაბრა-ზიმითი-ზამ! ეგეც შენ!

ელმირა ელდანაკრავივით ჩაქანდა კიბუზე.

- იცოდე, ხვალ!.. - დაიყვირა გაქცეულმა.

- ხვალამდე, ჩემო კეთილო! - დაადევნა მისის გულდუოტერმა.

ტომი ელმირას მიჰყვებოდა, ყოველ წუთს განზე უხტებოდა და ტროტუარზე მოფუთფუთე ჭიანჭველებს აფრთხობდა.

ელმირამ სამანქანო ზოლზე რომ გადაირბინა, უცებ საშინელი წივილი გაისმა.

- მისის ბრაუნ! - შეჰყვირა ტომმა.

გარაჟიდან უკანა სვლით გამოსულმა მანქანამ ქალს ზედ მარჯვენა ფეხის ცერზე გადაუარა.

\* \* \*

მისის ელმირა ბრაუნს ღამით საშინლად სტკიოდა ფეხის თითი, ამიტომ ადგა, სამზარეულოში ჩავიდა, ცივი ქათმის ხორცი მიირთვა და თან მოწესრიგებული, ზედმიწევნით ზუსტი სია შეადგინა. თავიდან - შარშანდელ წელიწადს გადატანილი ავადმყოფობები: სამი გაცივება, კუჭ-ნაწლავის ოთხი მსუბუქი აშლილობა, შებერილობის ერთი შეტევა, ართრიტი, ჭვალი, კიდევ რაღაც სენი, რაც თვითონ ნიკრისის ქარად მიიჩნია, მძიმე ბრონქული ხვე-

ლება, ასთიმის ნიშნები, დალურჯებული მკლავები, ამას დავუმატოთ სასუნთქი არხის შეშუპება, ზურგისა და თავის ტკივილი და თავბრუსხვევა. წამლების საერთო ღირებულება: ოთხმოცდარვა დოლარი და სამოცდათვრამეტი ცენტი.

მეორე პუნქტად - უკანასკნელი თორმეტი თვის მანძილზე მის სახლში დამტვრეულ-გაფუჭებული ნივთები: ორი მაგიდის ნათურა, ექვსი ლარნაკი, ათი თეფში, ერთი საწვინე, ორი ფანჯრის მინა, ერთი სკამი, ერთი ტახტის ბალიში, ექვსი ჭიქა და ერთი ბროლის ჭადი. მთლიანი ღირებულება: თორმეტი დოლარი და ათი ცენტი.

მესამე პუნქტად - დღევანდელი ტკივილები. ფეხის ცერათითი საშინლად სტკიოდა. კუჭი აეშალა. ზურგი გაუშუშდა, ფეხები ნერვულად უკანკალებდა. თვალები ისე ეწვოდა, თითქოს ქუთუთოების მაგივრად ზედ ცეცხლმოკიდებული ბამბის ქულები ეფარა. ენაზე მტვრის ტილოს გემო ჰქონდა. ყურებში ზარები უგუგუნებდა. ამ ყველაფრის ღირებულება? საწოლში რომ ბრუნდებოდა, კარგა ხანს ჟოჭმანობდა.

ათი ათასი დოლარი მორალური ზარალისათვის.

- ვეცდები სასამართლოს გარეშე გადავანდევინო! - ჩუმი ხმით ლაპარაკობდა.

- რაო? - შეიღვიძა ქმარმა.

ქალი საწოლში ჩაწვა.

- არასდიდებით არ მოვკვდები!

- ბატონო? - ვერ გაიგო კაცმა.

- სიკვდილს არ ვაპირებ-მეთქი! - გაიმეორა ჭერს მიშტერებულმა ქალმა.

- მეც ყოველთვის მაგას არ ვამბობდი? - თქვა ქმარმა, გვერდი შეიცვალა და ხვრინვა ამოუშვა.

მეორე დღით მისის ელმირა აღრიანად ადგა. ბიბლიოთეკაში წავიდა, შემდეგ - აფთიაქში და შინ მობრუნებული, ათასნაირი ქიმიური ნივთიერების ერთმანეთში არევით იყო დაკავებული, როდესაც შუადღისას მისი ქმარი, სემი, ცარიელი ჩანთით შემოვიდა სახლში.

- სამხარი მაცივარშია, - ელმირამ მაღალ ჭიქაში მომწვანო მასა შეანჯღრია.

- ღმერთო დიდებულო, ეს რადაა? - იკითხა ქმარმა, - ორმოცი წლის განმავლობაში მზისგულზე ნადგამ რძის კოქტეილს ჰგავს. თითქოს სოკო აქვს მოდებული.

- ჯადოქრობა ჯადოქრობითვე უნდა დაამარცხო.

- არ მითხრა, ეს უნდა დავლიო!

- დიახ, ვიდრე ქალთა საკრებულოში გმირული საქმეების ჩასადენად წავიდოდე.

სემუელ ბრაუნმა მწვანე ნარევი დაყნოსა.

- გირჩევ, ჯერ საკრებულოს დარბაზის კიბეზე ახვიდე და მერე დალიო, რისგანაა?

- ანგელოზის ფრთებიდან ჩამონაფერფლი თოვლია, თუმცა, სინამდვილეში, მენტოლია, ჯოჯოხეთის ცეცხლის გასაგრილებლადო, ასე წერია იმ წიგნში, ბიბლიოთეკაში რომ მოვძებნე. ახალმოწყვეტილი ყურძნის წვენი, რათა შავბნელი ზმანებების პირისპირ ტკბილი და ცხადი აზრები დაგებადოთო; აგრეთვე, წითელი რევანდი, ღვინის ქვის ნადუდი ქაფი, თეთრი შაქარი, კვერცხის ცილა, წყაროს წყალი და ნაკურთხ მიწაში გაზრდილი სამყურას კვირტები. ო, ყველაფერს ვერ ჩამოგივლი. აგერ, სია: ყველანაირი სიკეთე ყველანაირი ბოროტების შესამუსრად. შეუძლებელია, დავმარცხდე!

- აუცილებლად გაიმარჯვებ, - გაამხნევა ქმარმა, - მაგრამ შენ თვითონ თუ მოესწრები ამ გამარჯვებას?

- კარგზე იფიქრე. ტომი თან მიმყავს ავგაროზად.

- საბრალო ბიჭი, - თქვა კაცმა, - ასეთი უცოდველი, ნუთუ ნაკუნ-ნაკუნ დაფლეთენ ამ ამაოების ბაზარზე?

- არაფერი მოუვა, - გადაჭრით მიუგო ელმირამ, ათუხთუხებული ბანგი შესაწირისათვის განკუთვნილ ყუთში ჩადო და თავსახურავი დაახურა. სახლიდან ისე გავიდა, რომ არც კაბით გამოსდებია რაიმეს და არც ახალთახალი ოთხმოცდათვრამეტცენტრიანი წინდა გახვია. ეს რომ გაიაზრა, სულმთლად ფრთაშესხმულმა გაიარა გზა ტომის სახლამდე, სადაც ბიჭი უკვე ელოდა თავის საკვირაო თეთრ კოსტიუმში გამოწყობილი, როგორც წინასწარ ჰქონდა ნაბრძანები.

- ფუუ! - დაიყვირა ტომმა, - ამ ყუთში რა გაქვთ?

- ბედისწერა, - გამოუცხადა ელმირამ.

- დიდი იმედი მაქვს, რომ მართლაც ასეა, - ჩაილაპარაკა ტომმა და ეცადა, სიარულში მისთვის ორი ნაბიჯით მაინც გაესწრო.

\* \* \*

ქალთა საკრებულო უკვე სავსე იყო ქალებით, რომლებიც ერთმანეთის სარკეებში იცქირებოდნენ, ქვედაკაბებს ისწორებდნენ და ერთიმეორეს ეკითხებოდნენ, კაბა ხომ არ მილანდავსო.



ზუსტად პირველ საათზე მისის ელმირა ბრაუნმა თეთრკოსტიუმთან ბიჭუნასთან ერთად აიარა დარბაზის კიბე. ბიჭს ხელი ცხვირზე ჰქონდა წაჭერილი, ცალი თვალი კი მოჭუტული ჰქონდა, ამიტომ მხოლოდ სანახევროდ ხედავდა, სად მიდიოდა. მისის ბრაუნმა ხალხს თვალი შეავლო, თავი მოხადა შესაწირის ყუთს, შიგ ჩაიხედა, სუნთქვა შეეკრა და სწრაფად დააფარა თავზე ისე, რომ სითხისთვის პირი არ დაუკარებია. დარბაზში შეაბიჯა თუ არა, მის ზურგს უკან შრიალივით გაისმა ქალების ჩურჩული.

უკანა რიგში დაჯდა ტომთან ერთად, რომელსაც ამ წუთში ისეთი საცოდავი სახე ჰქონდა, როგორც არასოდეს. ბიჭმა ერთადერთი გახელილი თვალი ქალებით სავსე დარბაზს შეავლო და ისიც დიდი ხნით მოხუჭა. ელმირამ ბანგით სავსე ჭურჭელი ამოიღო და ნელა გამოცალა.

ორის ნახევარზე პრეზიდენტმა, მისის გუდუოტერმა, ქალების ყაყანი პატარა ჩაქუჩის დარტყმით წამიერად გააჩუმა.

- ქალბატონებო, - მიმართა მან საზაფხულო აბრეშუმისა და მაქმანების ტალღებით მოფენილ ზღვას, რომლის ზედაპირზეც აქა-იქ თეთრი ან რუხი ქუდი ტივტივებდა, - დღეს არჩევნების დღეა, მაგრამ, ვიდრე დავიწყებდეთ, როგორც ვიცი, მისის ელმირა ბრაუნს, ჩვენი პატივცემული გრაფოლოგის მეუღლეს...

დარბაზს ხითხითის ნიავექარმა გადაუქროლა.

- რას ნიშნავს გრაფოლოგი? - ელმირამ ორჯერ გაჰკრა იდაყვი ტომს.

- არ ვიცი, - სიმწრით გადაუჩურჩულა თვალებმოჭუტულმა ბიჭმა, რომელსაც ეს დარტყმები სრულიად მოულოდნელად წყვილიადიდან დააცხრა თავს.

- ...როგორც მოგახსენეთ, - განაგრძო მისის გუდუოტერმა, - ამერიკის შეერთებული შტატების კავშირგაბმულობის სამსახურში მოღვაწე ჩვენი პატივცემული ხელწერის ექსპერტის... (ხმამატალი სიცილი)... სამუელ ბრაუნის მეუღლეს, მისის ბრაუნს, სურს, თავისი აზრი გაგვიზიაროს. გთხოვთ, მისის ბრაუნ!

ელმირა წამოდგა. მის უკან სკამი დათვის ხაფანგივით ბრაგვანით აიკეცა. ქალი დუიმის სიმაღლეზე შეხტა და ისეთი ჭრიალით შეტორტმანდა, თითქოს მისი მატალი ქუსლები, სადაც იყო, ქვიშასავით ჩაიფშვნებოდა.

- სათქმელი ძალზე ბევრი მაქვს, - განაცხადა, ცალი ხელით შესაწირის ცარიელი ყუთი და ბიბლია ჩაბღუჯა, მეორე ტომს ჩაავლო ქეჩოში და ტრიბუნისკენ გასწია, გზად რამდენიმე ქალს გაჰკრა იდაყვი და დაუსისინა:

- ფრთხილად! შეხედეთ, რას სჩადიხართ!

როგორც იქნა, მიზანს მიაღწია, აუდიტორიისაკენ შეტრიალდა და წყლით სავსე ჭიქა წააქცია. ამის გამო მისის გუდუოტერს მრისხანე მზერა

ესროლა და შეიცადა, ვიდრე ის მაგიდას პატარა ცხვირსახოცით გადაწმენდდა. შემდეგ, ფარული ტრიუმფის გამომეტყველებით, მისის გუდუოტერის ცხვირწინ ასწია ცარიელი ჭურჭელი და ჩასჩურჩულა:

- იცი, ამაში რა ესხა? ახლა ის ჩემშია. ასე რომ, ჩემო კარგო, მოჯადოებელი წრით ვარ საიმედოდ გარშემორტყმული. მას ვერც დანა გაჭრის, ვერც ნაჯახი გაარღვევს.

ქალები ყაყანებდნენ და ყურს არ უგლებდნენ.

მისის გუდუოტერმა თავი დაუქნია, შემდეგ ხელები მალთა ასწია და დარბაზში სრული სიჩუმე ჩამოვარდა.

ელმირას ტომისთვის მაგრად ჩაეჭიდა ხელი. ბიჭს თვალები ისევ დახუჭული ჰქონდა და სიმწრისგან იმანჭებოდა.

- ქალბატონებო, - დაიწყო ელმირამ, - მე თქვენ თანაგიგრძნობთ. ვიცი, უკანასკნელი ათი წლის მანძილზე რაც გადაიტანეთ. ვიცი, რატომ აძლევდით ხმას მისის გუდუოტერს. თქვენ ხომ ვაჟები, ქალიშვილები და ქმრები გყავთ გამოსაკვები! ოჯახები გყავთ მისახელი! ვერ დაუშვებდით, რომ რძე დაგმჟავებოდათ, პური ჩაგცომებოდათ, ნამცხვრები კი ველოსიპედის ბორბლებივით ჩაგვარდნოდათ! არ გსურდათ, თქვენს შვილებს სამი კვირის შუალედში ყბაყურა, ქუნთრუმა და ყივანახველა შეჰყროდა! რომ თქვენი ქმრებისთვის მანქანას გადაევლო ანდა ქალაქარეთ მაღალი ძაბვის სადენებთან მუშაობისას დენს დაერთყა! მაგრამ დღეიდან ეს ყველაფერი დასრულდა, სიმართლის თქმას ნუღარ შეუშინდებით! აღარც დამწვრობა გემუქრებათ, აღარც ხერხემლის ტკივილი, რადგან მე აქ კეთილი სიტყვით მოვედი, რათა ყველამ ერთად გავაძევოთ ჩვენი რიგებიდან ეს კუდიანი!

ყველამ აქეთ-იქით ყურება დაიწყო, მაგრამ კუდიანი არსად ჩანდა.

- თქვენი პრეზიდენტი მყავს მხედველობაში!

- ანუ მე! - დარბაზს ხელი დაუქნია მისის გუდუოტერმა.

- დღეს, - ქოშინით განაგრძო ელმირამ და ორივე ხელით მძიმედ ჩამოეყრდნო კათედრას, - დღეს ბიბლიოთეკაში ვიყავი. მოვიძიე ყველანაირი საშუალება კუდიანის გასაძევებლად, ისეთი ჰიროვნების თავიდან მოსაცილებლად, სხვათა უსუსურობით ბოროტად რომ სარგებლობს. და მოვანხე გამოსავალი, როგორ დავიცვა თითოეული ჩვენგანის უფლებები. უკვე ვგრძნობ, ჩემში ძალა როგორ მატულობს. ყველანაირი კეთილი ძალის მქონე მცენარისა და ქიმიური ნივთიერებების ნაზავი დავლიე. ერთმანეთში ავურიე... - წამით შეჩერდა და წაბარბაცდა, თვალები დაახამხამა, - შევურიე ღვინის ქვის ქაფი და თეთრი ხარნუყა, მთვარის შუქზე დამჟავებული რძე და... - უცებ დადუმდა და გაფაცაცდა. პირი მაგრად მოკუმა, მაგრამ მისი

სხეულის წიაღიდან ამოსულმა სულ ერთი ბეწო ხმამ მაინც გამოაღწია ტუჩის კუთხეებიდან. თვალები მოწკურა და ძალა მოიკრიბა:

- მისის ბრაუნ, თავს ხომ კარგად გრძნობთ? - შეეკითხა მისის გუდუოტერი.

- მშვენივრად! - შენელებული კილოთი უპასუხა მისის ბრაუნმა, - სტაფილოს ფხვნილიც ვუქენი და წვრილად დაკეპილი ოხრახუმის ფესვიც; ღვია...

ხმა ისევ ჩაუწყდა, თითქოს იღუმალმა ხმამ უბრძანა, გაჩერდიო. სათითაოდ ყველა ქალს გადახედა.

შეამჩნია, დარბაზმა რხევა როგორ დაიწყო, მარჯვნიდან - მარცხნივ, მარცხნიდან - მარჯვნივ.

- როზმარინის ფესვები და ბაიის ყვავილი... - ყრუ ხმით განაგრძო ქალმა. ტომის მკლავს ხელი გაუშვა, ბიჭმა ცალი თვალი გაახილა და შეხედა.

- დაფნის ფოთოლი, დედოფლის ყვავილის ფურცლები... - განაგრძობდა ელმირა.

- იქნებ სჯობს, დაჯდეთ, - უთხრა მისის გუდუოტერმა.

განაპირას მჯდომი ქალი წამოდგა და ფანჯარა გამოადო.

- ბეტელის ხმელი მარცვალი, ლავანდა და სამოთხის ვაშლის კურკა, - მისის ბრაუნმა, როგორც იქნა, დაასრულა ჩამონათვალი, - ახლა კი სწრაფად დავიწყეთ არჩევნები. ჩემს კანდიდატურას ვაყენებ. უნდა გავიმარჯვო.

- რა სასწრაფოა, ელმირა? - დაამშვიდა მისის გუდუოტერმა.

- სწორედაც რომ სასწრაფოა, - ელმირამ ღრმად, სლუკუნით ჩაისუნთქა, - გახსოვდეთ, ქალბატონებო, ნუღარაფრის შეგეშინლებათ! ისე მოიქეცით, როგორც მუდამ გსურდათ! მე ამირჩიეთ და... - დარბაზი ისევ ზღვასავით მიიქც-მოიქცა, - მთავარი გამჭვირვალობაა! ყველამ, ვინც მხარს უჭერს მისის გუდუოტერის საპრეზიდენტო კანდიდატურას, თქვით „ღიახ“!

- ღიახ! - ერთხმად იხუვლა დარბაზმა.

- ახლა კი ყველამ, ვინც მხარს უჭერს მისის ელმირა ბრაუნს?.. - სუსტი ხმით წარმოთქვა ელმირამ და ნერწყვი გადაყლაპა. წუთის შემდეგ მარტომ დაიკნავლა:

- ღიახ.

თავზარდაცემული იდგა ტრიბუნასთან.

დარბაზი ღუმდა. ამ ღუმილში მისის ელმირა ბრაუნმა ყვავის ყრანტალის მსგავსი ხმა ამოუშვა და ყელზე იტაცა ხელი. მიბრუნდა და პირქუშად შეხედა მისის გუდუოტერს, რომელმაც სწორედ ამწუთას, თითქოსდა სრულიად შემთხვევით, ხელჩანთიდან პატარა ცვილის თოჯინა ამოიღო, რომელშიც რამდენიმე ჟანგიანი ქინძისთავი ერჭო.

- ტომ, - მიუბრუნდა ბიჭს ელმირა, - საპირფარეშომდე მიმაცილე.

- ახლავე.

სიარულში ფეხი ააჩქარეს და ბოლოს, სირბილზე გადავიდნენ. ელმირა წინ გაიქცა, რიგებს შორის გასასვლელში გზას მიიკვლევდა... კარში გააღწია და მარცხნივ გაუხვია.

- არა, ელმირა, მარჯვნივ, მარჯვნივ! - გასძახა მისის გუდუოტერმა.

ელმირა თვალს მოეფარა.

მაღაროში ჩაყრილი ქვანახშირის ხმა გაისმა.

- ელმირა!

ქალები გოგონების საკალათბურთო გუნდით ერთმანეთში აირ-დაირივნენ და კარისკენ გაიქცნენ. მისის გუდუოტერმა პირველმა მოახერხა დაუბრკოლებლად დერეფანში გაღწევა.

კიბის თავზე მოაჯირს მიყრდნობილი ტომი დაინახა, რომელიც ქვევით იყურებოდა.

- ორმოცი საფეხური! - ამოიგმინა ბიჭმა, - ორმოცი საფეხური სულ ნეკნებით დაითვალა!

მოგვიანებით ხალხი თვეებისა და წლების მანძილზე უამბობდა ერთმანეთს, თუ როგორ ჩაგორდა ელმირა ბრაუნი კიბეზე მთვრალივით ისე, რომ არც ერთი საფეხური არ გამოუტოვებია. უმრავლესობის ვარაუდით, ვარდნა რომ დაიწყო, უკვე ისე ცუდად იყო, რომ გონება დაკარგა და ამიტომაც მის ჩონჩხს წინააღმდეგობა კი არ გაუწევია, არამედ რბილად ჩაჰყვა საფეხურებს. კიბის ძირას რომ დაეშვა, თვალებს უაზროდ ახამხამებდა, მაგრამ ამკარა შვებას გრძნობდა, რადგან ყველაფერი, რაც მანამდე აწუნებდა, გზადაგზა დატოვა. მართალია, ისე იყო დალილავებული, რომ ტატუირებულს ჰგავდა, მაგრამ არც მაჯა ამოვარდნია, არც კოჭი უღრძვია. ამის შემდეგ სამდღეს თავი უცნაურად ეჭირა, მზერას თვალის უპეებიდან აპარებდა. მაგრამ მთავარი მოვლენა გახლდათ კიბის ძირას დაჩოქილი მისის გუდუოტერი - ელმირას თავი კალთაში რომ დაესვენებინა და დაჰაღუპით სდიოდა ცრემლი, მათ აფორიაქებული ქალების გუნდი ეხვია თავს.

- ელმირა, სიტყვას გაძლევ, ელმირა, გეფიცები, ოღონდაც გადარჩი, არ მოკვდე და დღეიდან, გესმის, ელმირა, დღეიდან ჩემს ჯადოებს მხოლოდ და მხოლოდ სიკეთისათვის გამოვიყენებ! შავს აღარ გავეკარები, მხოლოდ თეთრ მაგიას მივმართავ! დღეიდან შენს ცხოვრებას სამოთხედ ვაქცევ, ელმირა! აღარც ფეხი დაგიცლება, აღარც თითი გაგეჭრება, აღარც კიბიდან გადავარდები! ამას გპირდები! ოღონდაც იცოცხლე! შეხედე, ცვილის ფიგურას ქინძისთავები გამოვაცალე! ელმირა, ხმა ამოიღე! წამოდექი! წამოდი

დარბაზში, არჩევნები ხელმეორედ ჩავატაროთ! პირობას გაძლევ, ერთხმად აგირჩევთ ქალთა საკრებულოს პრეზიდენტად, ხომ ასეა, ქალბატონებო?

პასუხად ქალები ისე ცხარედ აქვითინდნენ, რომ ერთმანეთზე ჩამოყრდნობა დასჭირდათ.

ზევიდან მომზირალ ტომს კი ეგონა, ეს დაზარალებულის სიკვდილის გამო ხდებოდა.

კიბის შუამდე ჩამოსული ზევით ამომავალ ქალებს შეეფეთა. ყველას ისეთი იერი ჰქონდა, თითქოს ეს-ეს არის, ყუმბარის აფეთქებას გადაურჩნენო.

- გზიდან ჩამოგვეცალე, შვილო!

წინ მისის გულუოტერი მოაბიჯებდა, იცინოდა და თან ტიროდა.

მის გვერდით, ასევე ტირილითა და სიცილით, მისის ელმირა ბრაუნი მოდიოდა.

უკან საკრებულოს ას ოცდასამივე წევრი მოჰყვებოდა, თვითონაც მთლად ვერ გარკვეულიყვნენ, დაკრძალვიდან ბრუნდებოდნენ თუ მეჯლისზე მიდიოდნენ.

ბიჭმა თვალი გააყოლა და, როდესაც მადლა აიარეს, თავი გააქნია:

- ახლა სულ აღარ ვჭირდები.

ვიდრე ძებნას დაუწყებდნენ, ხტუნვა-ხტუნვით ჩაირბინა კიბეზე ისე, რომ მოაჯირისთვის ხელი არ გაუშვია.

\* \* \*

- მოკლედ რომ გითხრა, - ჰყვებოდა ტომი, - ქალები საშინლად განერვიულდნენ. წარმოიდგინე: ყველანი დგანან და ცხვირებს იხოცავენ. ელმირა ბრაუნი კიბის ძირას წამომჯდარა, სულ არაფერი დაშავებია, მგონი, ძვლების მაგივრად ჟელე უნდა ჰქონდეს, მის მკერდზე მიყრდნობილი კუდიანი სლუკუნებს. მერე უცებ ყველანი იცინიან და მადლა ადიან. ჰოდა, მეც დროზე გავეცალე იქაურობას!

ტომმა პერანგის საყელო შეიხსნა და ჰალსტუნი მოიხსნა.

- მაშ, შენ ამბობ, ჯადოქრობაო? - შეეკითხა დაგლასი.

- ჯადოქრობაა, წყალი არ გაუვა.

- გჯერა ამ ყველაფრის?

- თან მჯერა და თან არა.

- ბიჭოო, რამდენი რამე ხდება ამ ქალაქში! - დაგლასი ჰორიზონტს მიაშტერდა, სადაც დრუბლებს ცა უძველესი დროის ღვთაებათა და მეომართა

ფიგურებით აევსო, - ჯადოები, ცვილის თოჯინები, ქინძისთავები და ბანგებიო?

- ჯადოსნური ბანგის როლში დიდად ვერ ივარგა, აი, გულის ასარევ საშუალებად კი გამოდგა. ბე! - ტომმა ხელი მუცელზე მიიჭირა და ენა გამოყო.

- კუდიანები... - ჩაილაპარაკა დაგლასმა და თვალები იღუმლად, სიზმარულად მოჭუტა.

\* \* \*

მერე კი უცბად დგება დღე, როდესაც შენ გარშემო ყველა მხრიდან ვაშლების ცვენა ისმის, სათითაოდ, აქა-იქ რომ სწყდებიან ტოტებს, მერე - სამსამი, ოთხ-ოთხი, ცხრა-ცხრა, თორმეტი-თორმეტი, ვიდრე თავსხმა წვიმასავით არ მოზღვავდება, ცხენის ფლოქვებივით რბილად ეცემა ბნელ ბალახს და შენ უკანასკნელი ვაშლი ხარ, კიდეც რომ შერჩენია ხეს. ქარს ელოდები, რომ ნება-ნება დაგარწიოს, შენს ზეციურ სამყოფელს მოგწყვიტოს და ძირს ჩამოგაგდოს. ვიდრე ბალახში ჩაგორდები, უკვე დიდი ხნის დავიწყებული გექნება, ოდესმე თუ არსებობდა ხე, სხვა ვაშლები, ზაფხული და შენ ქვევით მომლოდინე ბალახი. სიბნელეში ჩავარდები...

- არა!

პოლკოვნიკმა ფრილაიმ უცბად გაახილა თვალები და თავის ბორბლებიან სავარძელში წამოიშართა. ცივი ხელი ტელეფონისკენ გაიშვირა. ტელეფონი ისევ თავის ადგილას იდგა! მკერდზე მიიკრა და წამით თვალი გაუშტერდა.

- ეს სიზმარი არ მომწონს, - უთხრა თავის ცარიელ ოთახს.

ბოლოს და ბოლოს, მოცახცახე ხელით ასწია ყურმილი, საქალაქთაშორისო კავშირების ოპერატორი გამოიძახა და ნომერი დაუსახელა, შემდეგ ელოდა საძინებლის კარს გაფაციცებით მიჩერებული, თითქოს იქიდან შემოცვენილი შვილების, შვილიშვილების, ექთანებისა და ექიმების ჯარი ყოველწამს შეიძლებოდა ღვთის რისხვასავით დასტეხოდა თავს და მისი ხელიდან ეს უკანასკნელი ფუფუნება გამოეგლიჯა, რის უფლებასაც კიდეც აძლევდა თავის მომაკვდავ გრძნობებს, მრავალი დღის თუ იქნებ წლის წინათ, როდესაც გულმა ხორცსა და ნეკნებს შორის ჩასობილ დაშნად გაუელვა.

პირველი სართულიდან ბიჭების ხმა მოესმა... რა ერქვათ ნეტავ? ჩარლზი, ჩარლი, ჩაკი. ჰო, რა თქმა უნდა! დაგლასი! და ტომი! დერეფნის ბოლოდან ეძახდნენ, მაგრამ კარი ცხვირწინ მიუხურეს და ბიჭებიც უკან გაბრუნდნენ. თქვენი ადელვება არ შეიძლებაო, ექიმმა უთხრა. არავითარი

სტუმრები, არავითარი სტუმრები. ქუჩიდან ამოესმა ბიჭების ხმა, გადახედა, ხელი დაუქნია. მათაც დაუქნიეს.

- პოლკოვნიკო!.. პოლკოვნიკო!..

ჰოდა, ახლა მარტო იჯდა სავარძელში და გული ჰატარა რუხ გომბეშოსავით სუსტად უხტოდა მკერდის ხან ერთ, ხან მეორე მხარეს.

- პოლკოვნიკო ფრილაი, - მიმართა ოპერატორმა, - თქვენს ზარს უპასუხეს. მექსიკო, ერიკსონ 3899.

შემდეგ კი ყურმილში შორიდან, მაგრამ უსასრულოდ მკაფიოდ გაისმა:

- Bueno.

- ხორხე! - გამოეხმაურა მოხუცი.

- სენიორ ფრილაი! ისევ?! ეს ხომ ძალიან ძვირი ჯდება.

- არა უშავს! ხომ იცი, რაც მინდა.

- Si, ფანჯარა, ხომ?

- ფანჯარა, ხორხე, ძალიან თუ არ შეწუხდები.

- ახლავე, - უპასუხეს ხაზის ბოლოდან.

და ათასი კილომეტრის დაშორებით, სამხრეთული ქვეყნის რომელიღაც დაწესებულების შენობაში ნაბიჯების ხმა გაისმა, თანდათან რომ შორდებოდა ტელეფონს. მოხუცი წინ წამოიწია და მაგრად მიიბჯინა ყურმილი დანაოჭებულ ყურზე, ახალი ხმის მოლოდინში რომ გაფაცვიცებულყო.

ფანჯრის რაფის აწევა.

მოხუცს ოხვრა აღმოხდა.

ქალაქ მექსიკოს ცხელი ყვითელი შუადღის ხმაურმა ღია ფანჯრიდან მომლოდინე ტელეფონში შეაღწია. თვალწინ ედგა ფანჯრის რაფას მიყრდნობილი ხორხე, ყურმილი გარეთ, კაშკაშა დღის სივრცეში რომ გაეწვდინა.

- სენიორ...

- არა, არა. გთხოვ, მომასმენინე.

იჯდა და უგდებდა ყურს ლითონის უთვალავი საყვირის ღრიალს, მუხრუჭების წივილს, ალისფერი ბანანებითა და ტროპიკული ფორთოხლებით მოვაჭრეთა შეძახილებს. პოლკოვნიკმა მგორავი სავარძლიდან ჩამოშვებული ფეხები ისე აამოძრავა, როგორც სიარულისას. თვალეები მაგრად მოხუჭა, რამდენჯერმე ჰაერი ძალუმად შეიყნოსა, თითქოს უნდოდა, მზისგულზე რკინის კაუჭებზე ჩამოკიდებული ხორცის ნაჭრების სუნი ეგრძნო. ამ ხორცის ნაჭრებს ბუზები ისე შესეოდა, გეგონებოდა, ქიშმიშის ფენა ადევსო. ისრუტავდა დილის შხაპუნა წვიმით დანამული ხეივნების ქვის ფილების სუნს. გაუპარსავი დაწვების ბუსუსებით შეიგრძნობდა მზის

სიმხურვალეს, კვლავაც ოცდახუთი წლის იყო და დადიოდა, დადიოდა შეუჩერებლად, აქეთ-იქით იცქირებოდა, იდიმებოდა, სიცოცხლე უხაროდა, უკიდურესად ფხიზელი, მოწყურებულივით ნთქავდა ფერებსა და სურნელებას.

კარზე დააკაკუნეს. მოხუცმა სწრაფად მიაფარა ტელეფონს პლელი. შემოვიდა ექთანნი.

- გამარჯობა, - მიმართა მოხუცს, - ხომ კარგად იქცეოდით?

- დიას, - მექანიკურად უპასუხა კაცმა. თითქოს ვერაფერს ხედავდა.

კარზე უბრალო კაკუნმა ისე შეძრა მთელი მისი არსება, რომ ამ არსების დიდი ნაწილი ჯერაც სხვა ქალაქში იმყოფებოდა. გონების შინ დაბრუნებას დაელოდა - ნორმალური, ზრდილობიანი ურთიერთობისათვის.

- თქვენი მაჯისცემის მოსასმენად მოვედი.

- ახლა არა! - შესძახა კაცმა.

- რატომ, სადმე ხომ არ მიბრძანდებით? - გაეღიმა ექთანს.

მოხუცი ქალს დაჟინებით შეაცქერდა. უკვე ათი წელი იყო, ფეხი არსად გაედგა.

- მომეცით მაჯა.

მიკრომეტრის მარწუხებივით მკვრივმა და ზუსტმა თითებმა წამში მიაგნეს მის მაჯაში მტოკავ სისუსტეს.

- რას აკეთებდით, ასე რამ აგაღელვათ? - შეეკითხა შემფოთებული.

- არაფერს.

ქალის მზერამ ოთახში დაიწყო რაღაცის ძებნა და ბოლოს, ტელეფონის ცარიელ მაგიდაზე შეჩერდა. იმავე წამს ათასი კილომეტრის იქით სუსტად გაიჟღერა მანქანის საყვირმა. ექთანმა ყურმილი პლელის ქვეშიდან ამოაძვრინა და მოხუცს სახეზე ააფარა.

- რატომ აკეთებთ ამას? ხომ დამპირდით, ასე აღარ მოვიქცევიო? ხომ იცით, რომ ყველაზე მეტად სწორედ ეს გაყენებთ ზიანს: აღელვება, ბევრი ლაპარაკი. ეს ბიჭები რომ ამოვიდნენ, მთელ ოთახში დახტოდნენ...

- არა, ჩემად ისხდნენ და მისმენდნენ, - უპასუხა პოლკოვნიკმა, - ისეთ რამეებს ვუამბობდი, არასოდეს რომ არ სმენიათ. ბიზონებზე ვუამბე, ღმერთმანი, ღირდა აღელვებად. რა მნიშვნელობა აქვს, მთავარია, გრძნობები მიდუღდა და ცოცხალი ვიყავი. თუკი სიცოცხლის შეგრძნება ადამიანს კლავს, ჯანდაბას, მოკლას, ეს ციებ-ცხელება ყველაფერს ჯობია. ახლა კი დამიბრუნეთ ტელეფონი. თუკი ბიჭებს არ უშვებთ, რომ ამოვიდნენ და წყნარად ჩამომისხდნენ, მაშინ ვინმეს მაინც დაველაპარაკები, ვინც ოთახის გარეთაა.



- ვწუხვარ, პოლკოვნიკო. ეს თქვენს შვილიშვილს უნდა ვაცნობო. წინა კვირას ტელეფონის მოხსნა დავუშალე, ახლა კი, მგონი, იძულებული ვიქნები, დავუთმო.

- კი მაგრამ, ეს ჩემი სახლია, ჩემი ტელეფონია. მე გინდით ხელფასს! - გააპროტესტა მოხუცმა.

- რათა მოგიაროთ და აღელვების საშუალება არ მოგცეთ, - ექთანმა სავარძელი ოთახში გააგორა, - აბა, საწოლში, ყმაწვილო!

ახლა საწოლიდან გაჰყურებდა ტელეფონს, წამითაც არ აცილებდა თვალს.

- ერთი-ორი წუთით მაღაზიაში გავდივარ, - უთხრა ექთანმა, - დარწმუნებული რომ ვიყო, ტელეფონით აღარ დარეკავთ, თქვენს სავარძელს დერეფანში გავდგამ.

ცარიელი სავარძელი კარში გააგორა. პოლკოვნიკმა გაიგონა, პირველი სართულის დერეფანში როგორ შეჩერდა და ტელეფონით საქალაქთაშორისო კავშირის განყოფილება გამოიძახა.

ნუთუ მექსიკაში რეკავს? საკუთარ თავს შეეკითხა მოხუცი. არა, ამას ვერ გაბედავს!

სახლის კარი მიიხურა.

მოხუცმა გაიხსენა, როგორ გაატარა ბოლო კვირა ამ ოთახში სრულიად მარტომ და ზმანებებში ჩაესმოდა სრუტის გადაღმა, სხვა კონტინენტიდან შორი მოძახილები, ტროპიკული ტყის გაუვალი ტევრები, ლურჯი ორქიდეებით გაბადრული პლატოები, ტბები და ბორცვები ეჩურჩულებოდნენ... ეძახდნენ... ლიმაში... ბუენოს-აირესში... რიო-დე-ჟანეიროში...

მოხუცი წამოჯდა ცივ საწოლში. ხვალიდან ტელეფონს წამართმევენ! რა ხარბი და სულელი ვიყავი! საშინლად მსხვრევადი სპილოს ძვლის ფეხები საწოლიდან ჩამოუშვა. გაუკვირდა, რამდენად გამომშრალიყო. თითქოს ერთ ღამეს, სანამ ეძინა, ვიდაცამ ეს უცნაური საგნები მიამაგრა, მისი ახალგაზრდა ფეხები კი წაიღო და საკუჭნაოს ღუმელში დაწვა. წლიდან წლამდე ამ ვიდაცამ მთელი კიდურები მოსტაცა და გაანადგურა - ხელის მტევნები, მკლავები, ფეხები, სანაცვლოდ კი ეს ჭადრაკის ფიგურებივით მყიფე და უსარგებლო პროთეზები დაუტოვა. ახლა კი ბევრად მოუხელთებელი რამის - მოგონებების - წართმევასაც უპირებდა; წარსულის რომელიღაც წელიწადთან მაკავშირებელი სადენის გადაჭრას ცდილობდა.

ბორძიკით გადაირბინა ოთახის ბოლოდან მეორემდე. ტელეფონს ხელი დასტაცა და მასთან ერთად კედლის გასწვრივ ძირს ჩაცურდა. სა-

ქალაქთაშორისო კავშირის ოპერატორი გამოიძახა, გული ლამის გასკდომოდა, სულ უფრო სწრაფად ფეთქავდა, თვალწინ წყვდიადი ამოჰფარებოდა.

- სწრაფად, იჩქარეთ!

დაელოდა.

- Bueno?

- ხორხე, კავშირი გაითიშა.

- მეტს ნუ დარეკავთ, სენიორ, - გაიგონა შორი ხმა, - თქვენი ექთანი მესაუბრა. მითხრა, რომ ძალიან ავად ხართ. უნდა დავკიდო.

- არა, ხორხე! გთხოვ! - შეევედრა მოხუცი, - ეს ბოლო დარეკვაა, მომისმინე, ხვალ ტელეფონს წამართმევენ და ვედარასოდეს დაგირეკავ.

ხორხე დუმდა.

მოხუცმა განაგრძო:

- ღვთის გულისათვის, ხორხე! ჩვენს მეგობრობას, ერთად გატარებულ დღეებს გაფიცებ! შენ არ იცი, ეს რას ნიშნავს. ჩემი თანატოლი ხარ, მაგრამ გადაადგილება შეგიძლია! მე კი, აი, უკვე ათი წელია, ვედარ ვმოდრობ.

ტელეფონი ჩაუვარდა და ძლივძლივობით აიღო, გული ტკივილისაგან გასივებოდა.

- ხორხე, ხომ ისევ მანდ ხარ?

- ეს უკანასკნელი იქნება? - იკითხა ხორხემ.

- გპირდები!

ყურმილი ათასკილომეტრიანი მანძილის მეორე ბოლოში მაგიდაზე დადეს. ისევ ისე მკაფიოდ გაისმა ნაცნობი ნაბიჯის ხმა, შემდეგ ჰაუზა და, საბოლოოდ, ფანჯრის გაღების ხმა გაჟღერდა.

- უსმინე, - ჩასჩურჩულა მოხუცმა საკუთარ თავს.

და კვლავაც გაიგონა ერთდროულად ათასი ადამიანის გნიასი და ქუჩის არდნის შორეული ჟრიალა ხმა: „La marimba“ - ო, რა მომნიბლავი საცეკვაო მელოდიაა!

თვალეზმოწკურულმა მოხუცმა ისე ასწია ხელი, თითქოს უნდოდა, ძველისძველი ტაძრისთვის გადაეღო სურათი, მისი სხეული ქორფა, ჯანსაღი ხორციით შეივსო, ხოლო ტერფებით ცხელ ქვაფენილს შეიგრძნობდა.

უნდოდა, წამოეძახა: „ხომ კიდევ იქ ხართ ყველანი, ქალაქის მცხოვრებნო, ისევ ადრიანი სიესტის დროა და ლატარიის ბილეთების გამყიდველი ბიჭები ქუჩებში გაიძახიან: Loteria nacional para hoy!<sup>26</sup> რა თქმა უნდა, კიდევ

<sup>26</sup> Loteria nacional para hoy (ესპ) – „დღეს ნაციონალური ლატარიის გათამაშება!“

არსებობთ, იქ, იმ ქალაქში. ადარც კი მჯერა, ოდესმე მეც თქვენ შორის რომ ვერიე, როდესაც ქალაქს ტოვებ, ის ფანტაზიის სფეროში ინაცვლებს. ნებისმიერ ქალაქს, ნიუ-იორკი იქნება თუ ჩიკაგო, მანძილი სრულიად არარეალურს, დაუჯერებელს ხდის. ზუსტად ისევე, როგორც მათთვის მე ვარ დაუჯერებელი, ილინოისის ამ ერთ ციციქნა ქალაქში, პატარა ტბის პირას რომ ვიმყოფები. ყველანი ერთიმეორისთვის მიუწვდომელნი ვართ, რადგან ერთურთის გვერდით არა ვართ. ამიტომაც საამოა ამ ხმაურის სმენა, რადგან ვრწმუნდები, რომ მექსიკო თავისი მოფუსფუსე, სიცოცხლით სავსე ხალხით, მართლაც არსებობს...”

იატაკზე იჯდა, ყურმილი მაგრად მიებჯინა ყურზე.

საბოლოოდ კი ყველაზე მკვეთრი და ყველაზე დაუჯერებელი ხმა გაისმა - მწვანე ტრამვაიმ კუთხეს შემოუხვია - შავტუხა, ლამაზი, უცხო იერის ხალხით დახუნძლულმა ტრამვაიმ, მერე კი სხვა ხალხის ხმებიც მოისმა, მათი, ვინც გამარჯვებულის შეძახილებით შეახტნენ ტრამვაის საფეხურს და მასთან ერთად მოსახვევში გაუჩინარდა, ვინც რელსებმა ღრჭილით აიტაცა მზით გავარვარებული სიშორისკენ. მერე ხმები მიწყდა, დარჩა მხოლოდ ბაზრის ქურებზე tortillas<sup>27</sup> შიშინი, ან იქნებ მხოლოდ ორი ათას კილომეტრზე გაჭიმული სპილენძის სადენის გაბმული და თანაც მერყევი ზუზუნი...

მოხუცი უძრავად იჯდა იატაკზე.

ღრო გადიოდა.

პირველ სართულზე ნელა გაიღო კარი. მსუბუქი ნაბიჯები მოახლოვდა, შეყოვნდა, მერე კი საფეხურებს ამოუყვა. რამდენიმე ხმის გადაჩურჩილება გაისმა.

- ჩვენი აქ ყოფნა არ შეიძლება!

- გეუბნები, დამირეკა. ძალიან სჭირდება ვინმესთან საუბარი. იმედს ხომ ვერ გავუცრუებთ.

- ავად რომ არის!

- ეგრეა, ჰო! მაგრამ მითხრა, ექთანი სადმე რომ გავა, მაშინ მოდიეთ. სულ ერთი წამით დავრჩებით, მოვიკითხავთ და...

საძინებლის კარი ფრთხილად გაიღო. სამი ბიჭი კედელთან იატაკზე მჯდომარე მოხუცს მიაჩერდა.

- პოლკოვნიკო ფრილაი! - ხმადაბლა დაუძახა დაგლასმა.

მოხუცის ღუმილი რაღაც ისეთს ასხივებდა, რამაც სამივეს ენა მუცელში ჩააგდებინა.

<sup>27</sup> Tortillas (ესპ) - პურს ან სიმინდის ფქვილისგან გამომცხვარი თხელი კვერი.

ფეხაკრეფით მიუახლოვდნენ.

დაგლასი დაიხარა და ტელეფონი მოხუცის სულმთლად გაცივებულ თითებს გამოაცალა. ყურმილი ყურთან მიიტანა და სმენად იქცა, ზუზუნის ფონზე უცხო, შორი, უკანასკნელი ხმა გაიგონა.

ორი ათასი კილომეტრის იქით ფანჯარა დაიხურა.

\* \* \*

- ბუმ! - გაიძახოდა ტომი, - ბუმ! ბუმ! ბუმ!

ის სასამართლოს შენობის წინ, სკვერში, სამამულო ომის დროინდელ ზარბაზანზე ამხედრებულიყო. მიზანში ამოღებულმა დაგლასმა გულზე იტაცა ხელი და ბალახზე გაიშლართა, მაგრამ აღარ ამდგარა; იწვა და ფიქრიანი სახით ცას აჰყურებდა.

- ისეთი სახე გაქვს, თითქოს საცაა ფანქარს მოიმარჯვებ, - თქვა ტომმა.

- ფიქრი მაცალე! - დაგლასი ზარბაზანს მიაჩერდა, მერე გადაბრუნდა და თავზევით ცასა და ხეებს ახედა, - ახლა მივხვდი, ტომ!

- რას?

- გუშინ ჩინ ლინ-სუ მოკვდა. გუშინ სწორედ აქ, ამ ქალაქში სამუდამოდ დასრულდა სამამულო ომი. გუშინ მისტერ ლინკოლნი მოკვდა, მასთან ერთად გენერალი ლი<sup>28</sup>, გენერალი გრანტი<sup>29</sup> და ასი ათასი მებრძოლი, ზოგი ჩრდილოეთს რომ უტევდა, ზოგი კი სამხრეთს. და კიდევ, გუშინ პოლკოვნიკ ფრილაის სახლში მთელი გრინთაუნისხელა ბიზონების ჯოგი კლდიდან გადაიჩეხა და არყოფნის უფსკრულში ჩაინთქა. გუშინ მტვრის უშველებელი კორიანტელი სამუდამოდ ჩადგა და დაილექა. თავის დროზე სათანადოდ ვერ დავაფასე ეს ყველაფერი. რა საშინელებაა, ტომ, რა საშინელება! რა გვეშველება მთელი ამ ჯარისკაცების, გენერალ ლის, გრანტისა და მართალი ეიბის<sup>30</sup> გარეშე, ჩინ ლინ-სუს გარეშე? რას წარმოვიდგენდი, ამდენი ხალხი ერთბაშად თუ დაიხოცებოდა, მაგრამ დაიხოცა. ჰო, დაიხოცა!

ტომი, ისევ ზარბაზანზე ამხედრებული, დაგლასს ჩამოჰყურებდა და მის მღელვარე ხმას უსმენდა.

<sup>28</sup> გენერალი ლი - რობერტ ედვარდ ლი (1807-1870), აშშ-ის კონფედერაციული შტა-ტების არმიის გენერალი, სამოქალაქო ომში მეთაურობდა ჩრდილოეთ ვირჯინიის არმიას, იყო კონფედერატთა არმიის მთავარსარდალი.

<sup>29</sup> გრანტი - ულის სიმპსონ გრანტი (1822-1885), ამერიკელი სამხედრო და პოლიტიკური მოღვაწე; ჩრდილოელთა მთავარსარდალი აშშ-ის სამოქალაქო ომში, არმიის გენერალი, 1869 წლის 4 მარტიდან 1877 წლამდე აშშ-ის მე-18 პრეზიდენტი.

<sup>30</sup> მართალი ეიბი - აშშ-ის მე-16 პრეზიდენტის (1861-1865), აბრაამ ლინკოლნის (1809 -1865) მეტსახელი.

- ბლოკნოტი აქ გაქვს?

დაგლასმა თავი გააქნია.

- მაშინ სჯობს, შინ წახვიდე და ეს ყველაფერი ჩამოწერო, ვიდრე არ დაგვიწყდა. ყოველდღე ხომ არ ხდება, მსოფლიოს მოსახლეობის ნახევარი ერთბაშად რომ ამოწყდეს.

დაგლასი წამოჯდა, მერე კი ფეხზე წამოხტა. ნელა გადაკვეთა გაზონი სასამართლოს შენობის წინ, თან ქვედა ტუჩი კბილებშორის მოიქცია.

- ბუმ! - მშვიდად წარმოთქვა ტომმა, - ბუმ! ბუმ!

მერე ხმას აუწია:

- დაგ! ვიდრე მოლს გადაივლიდი, სამჯერ მოგკალი! დაგ, გესმის ჩემი? ეი, დაგ! ჰო, კარგი. არ ითვლება, გაგაცოცხლე, - ზარბაზანზე გაწვა და განიერ, აქერცლილ ლულას გასწვრივ გახედა, ცალი თვალი მოჭრუტა, - ბუმ! - ჩურჩულით მიმართა ფიგურას, რომელიც სულ უფრო პატარავდებოდა, - ბუმ!

\* \* \*

- ჰა!

- ოცდაცხრა!

- ჰა, ესეც!

- ოცდაათი!

- ეს ერთიც!

- ოცდათერთმეტი!

ბერკეტი დაბლა დაეშვა. სავსე ბოთლების ყელზე ჩამოცმული კალის ხუფებიყვითლად ლაპლაპებდა. ჰაჰამ უკანასკნელი ბოთლი გაუწოდა დაგლასს.

- ზაფხულის მეორე მოსავალი. ივნისი უკვე თაროზეა. აგერ, ივლისიც. აგვისტოდა რჩება.

დაგლასმა ბაბუაწვერას თბილი ღვინით სავსე ბოთლი მადლა ასწია, მაგრამ თაროზე არ შემოუდგამს. გახედა სხვა დანომრილ ბოთლებს, ზუსტად რომ ჰგავდნენ ერთიმეორეს, სულ არაფრით განსხვავდებოდნენ, ყველა კრიალა, თავადერილი და თვითკმაყოფილი თავ-თავის დროს ელოდა.

„აი, ის დღე, როდესაც აღმოვაჩინე, რომ ცოცხალი ვარ, - გაიფიქრა მან, - რატომ არაა სხვებზე კრიალა?“

ეს კი ის დღეა, ჯონ ჰაფი სამყაროს პირიდან რომ გადავარდა და არსებობა შეწყვიტა; ეს რატომ არ არის დანარჩენებზე მღვრიე?

სად, სად არიან ზაფხულში, ქარში მოლივლივე ხორბლის ტალღებში დელფინებივით მონავარდე ძაღლები? სადაა ელვის სურნელი, რომელსაც მწვანე მანქანა და ტრამვაი აფრქვევდა? განა ღვინოს ახსოვდა ეს ყველაფერი? არა, არ ახსოვდა. ყოველ შემთხვევაში, არაფერი ემჩნეოდა.

რომელიღაც წიგნში ეწერა, რომ ოდესმე წარმოთქმული ყოველი სიტყვა, ოდესმე ნამდერი ყველა სიმდერა სადღაც გროვდება, უშორეს სივრცეში გაიბნევა, და შორეულ ცენტავრზე რომ გაფრინდე, იქ გაიგონებ ძილში მოლაპარაკე ჯორჯ ვამინგტონის ბუტბუტს, ანდა ზურგში ხანჯალგაყრილი კეისრის გაოგნებულ შეძახილს. ეს - რაც ბგერებს შეეხება. და სინათლეს რაღა მოსდის? ოდესღაც დანახული ყველა საგანი არ კვდება, უბრალოდ, შეუძლებელია უკვალოდ გაქრეს. თუკი მთელ სამყაროს გაჩხრეკ, სადმე, პირამდე სავსე მრავალჯერიან ფიჭაში, სადაც ყვავილის მტვრისაგან მუგუზალივით მოშიშხინე ფუტკრებს სინათლის ქარვისფერი ხსენი დაუგროვებიათ, ანდა შუადღის ნემსიყლაპიას ოქრომკედლით ნაქარგი თვალების ოცდაათი ათას წახნაგში - მსოფლიოს ნებისმიერი წელიწადის ყველა ფერსა და სურათს აღმოაჩენ. ანდა, აი, ამ ბაბუაწვერას ღვინის ერთი წვეთი მიკროსკოპის მინის ქვეშ რომ მოათავსო, ვინ იცის, იქნებ ოთხი ივლისის მთელი დიდებული სამყარო შენ თვალწინ ამოიფრქვეს ვეზუვის ფეიერვერკად. ამის დაუჯერებლობა არ შეიძლებოდა.

და მაინც... დაგლასი იმ ბოთლს გაჰყურებდა, რომელიც, ეტიკეტზე აღნიშნული თარიღის მიხედვით, იმ დღეს ემთხვეოდა, როდესაც პოლკოვნიკი ფრილაი შეტორტმანდა და ექვსი ფუტის სიდრმეზე მიწაში ჩაინთქა, მაგრამ ბიჭმა მის ფსკერზე ერთი გრამი ბნელი ნალექიც კი ვერ აღმოაჩინა; ბიზონებისგან აგორებული მტვრის ზვირთების ერთი ნამცეციც, შაილოს თოფების დენტის ერთი მარცვალიც არ ერია კრიალა სითხეს.

\* \* \*

- აგვისტო კიდეც წინ გვაქვს, - ჩაილაპარაკა დაგლასმა, - ჰო, რა თქმა უნდა, მაგრამ, თუკი ასე გაგრძელდა, საბოლოო მოსავლისათვის აღარც მანქანები შემორჩება, აღარც მეგობრები და ბაბუაწვერებიც ძალიან ცოტა თუ მოიძებნება.

- ბოომ. ბოომ. რა სასაფლაოს ზარივით რეკავ? - აღმფოთდა პაპა, - ასეთი ლაპარაკი უწმაწურობაზე უარესიც კია, მაგრამ პირის საპნით გამოსუფთავებას არ გიპირებ. აი, ბაბუაწვერას ღვინის ეს პაწია ჭიქა გამოწერილი გაქვს. აბა, გადაუშვი! როგორი გემო აქვს?

- ცეცხლის მყლაპავი ვარ! აუუუუ!

- ახლა აბრძანდი მაღლა, უბანს სამჯერ შემოურბინე, ხუთჯერ გადადი ყირაზე, მკლავებზე ექვსჯერ აიწიე, ხეზე აძვერი და ჭირისუფლის მაგივრად კონცერტმაისტერად გადაიქცევი. მიდი!

დაგლასი მირბოდა და თან ფიქრობდა: ექვსი აწევ-დაწევა, ერთი ხე და ორი ყირაც მეყოფა!

\* \* \*

აგვისტოს პირველი დღის შუაგულში თავის მანქანაში უკვე სანახევროდ ჩამჯდარმა ბილ ფორესტერმა გამოიხედა და დაიძახა, განსაკუთრებული ნაყინის საყიდლად მივდივარ შუა ქალაქში და ვინმე ხომ არ წამომყვებაო. და ხუთი წუთის წინ შეხურებულმა და გუნებაგამოკეთებულმა დაგლასმაც გავარჯარებული ქვაფენილიდან ერთბაშად გაზიანი წყლის სიგრილითა და ვანილის სუსხით გაჯერებულ მღვიმეში ამოყო თავი.

ის და ბილ ფორესტერი სანაყინის თოვლისფერი მარმარილოს მაგიდას მიუსხდნენ და მიმტანს სთხოვეს, ყველაზე უფრო უჩვეულო ნაყინების დასახელებები ჩამოეთვალა. როგორც კი გაიგონეს „ლაიმისა და ვანილის კლასიკური ნაყინი“, მაშინვე შეაწყვეტინეს:

- ეს გვინდა!

- დიახ, სერ! სწორედ ის არის, რაც გვინდა!

ვიდრე შეკვეთას ელოდნენ, მბრუნავ სავარძლებში ნელა ტრიალებდნენ. მოძრავი მზერის წინ ჩაუქროლათ ვერცხლისფერმა ონკანებმა, ბღღვრიალა სარკებმა, ჭერზე ჩამოკიდებულმა გატრუნულმა ვენტილატორებმა, ვიწრო ფანჯრებში შემოსულმა მწვანე ჩრდილებმა და არფის ფორმის მავთულის სკამებმა. უეცრად შეწყვიტეს ტრიალი. მათი მზერა ოთხმოცდათხუთმეტი წლის ქალბატონის, ელენ ლუმისის, სახესა და ფიგურაზე შეჩერდა, რომელიც მეზობელ მაგიდასთან კოვზით ხელში ნაყინს აგემოვნებდა.

- ახალგაზრდა, - მიმართა მან ბილ ფორესტერს, - თქვენ დახვეწილი გემოვნებისა და ფანტაზიის პატრონი ბრძანდებით, გარდა ამისა, გაათმაგებული გამბედაობა უნდა გქონდეთ. ასე რომ არ იყოს, ასე ხელაღებით ვერ იტყოდით უარს მენიუში ჩამოთვლილ ყველა ტრადიციულ გემოზე და ასე უყოყმანოდ არ შეუკვეთდით ისეთ გაუგონარ რამეს, როგორც ლაიმის ნაყინია.

ახალგაზრდა კაცმა პასუხად საზეიმოდ დაუკრა თავი.

- მოდით, ორივენი გადმოსხედით, - განაგრძო ქალმა, - ვისაუბროთ უჩვეულო ნაყინებსა და ისეთ რამეებზე, რაც ძალიან მოგვწონს და გვიყვარს. დარდი ნუ გაქვთ, მე გადავიხდი.

მათ ღიმილით გადაიტანეს თავიანთი ჭურჭელი მეზობელ მაგიდაზე და ქალს გვერდით მიუსხდნენ.

- შენ სპოლდინგი უნდა იყო, - მიმართა ქალმა ბიჭს, - თავის მოყვანილობით ჰაპას ჰგავხარ. თქვენ კი, თქვენ უილიამ ფორესტერი ბრძანდებით. „ქრონიკის“ ერთ-ერთი საკმაოდ კარგი რუბრიკა მიგყავთ. თქვენ შესახებ იმდენი მსმენია, რომ ყველაფერს ვერ გაგანდობთ.

- მეც გიცნობთ, - უპასუხა ბილ ფორესტერმა, - ელენ ლუმისი გქვიათ, - წუთით შეყოყმანდა, მერე განაგრძო, - ერთ ღროს მიყვარდით კიდეც, - ამოთქვა ბილმა.

- აი, საუბრის ასეთი დასაწყისი მომწონს, - ქალმა აუღელვებლად გამოთხარა კოვზით ნაყინი, - ეს შემდგომი შეხვედრის საწინდარია. არა, ნუ მიაბობთ, სად, როდის ან როგორ გიყვარდით. ეს სამერმისოდ შემოვიწინახოთ. თქვენი ლაპარაკით მადა დამაკარგვინეთ. იცით, რა? ახლა მაინც წასასვლელი ვარ და რაკიდა რეპორტიორი ბრძანდებით, მეწვიეთ ხვალ ჩაიზე სამიდან ოთხ საათამდე; თუკი შევძელი, იქნებ ქალაქის ისტორიაც გიამბოთ, ასე რომ, ორივენი დავიკმაყოფილებთ ცნობისმოყვარეობას, მისტერ ფორესტერ. იცით, იმ ჯენტლმენს მაგონებთ, ვისაც სამოცდაათი, ჰო, სამოცდაათი წლის წინათ ვხვდებოდი.

ისეთი შეგრძნება ჰქონდათ, თითქოს მოცახცახე, გზააბნეულ რუხფრთიან ფარვანას ესაუბრებოდნენ. ბგერები ამ რუხი, გაცრეცილი გარსის სიდრმიდან ამოდოდა, დაპრესილი ყვავილებისა და ბებერი პეპლების ფერფლში რომ გახვეულიყო.

- მაშ, რას იტყვით? - ქალი წამოდგა, - შემომივლით ხვალ?

- აუცილებლად, - უპასუხა ბილ ფორესტერმა.

ქალი თავის საქმეებზე გაეშურა, ბიჭმა და ახალგაზრდა კაცმა კი თვალი გააყოლეს და შემდეგ თავ-თავიანთ ნაყინს მიუბრუნდნენ.

უილიამ ფორესტერმა მეორე დღეა გაზეთისათვის საჭირო ადგილობრივი სიახლეების შესწავლაში გაატარა, ნასამხრევს ქალაქარეთ ცოტა ხნით სათევზაოდაც კი მოიცალა, მხოლოდ ორიოდ ციციქნა თევზი დაიჭირა, რომლებიც გულდამშვიდებულმა კვლავ წყალში გადაისროლა, შემდეგ კი, წინასწარი შემზადების გარეშე, - ყოველ შემთხვევაში, ისე, რომ თვითონაც არ შეუმჩნევია, - თავისი მანქანა ერთი განსაკუთრებული ქუჩის მიმართულებით წაიყვანა. ინტერესით აკვირდებოდა საკუთარ ხელებს, როდესაც



საჭე დაატრიალა, უზარმაზარ წრიულ ხეივანს შემოუარა და სურობემოხვეული ჭიშკრის წინ გაჩერდა. გადმოსვლისას გაიფიქრა, ჩემი მანქანა ჩემი ჩიბუნხით ძველი და დაღეჭილია და ამ ვეება მწვანე ბადისა და ახალშეთებებული სამსართულიანი ვიქტორიანული სახლის გვერდით მოუვლელი ჩანსო. ბადის ბოლოში ლანდივით რაღაც ამოძრავდა, ქარის შრიალივით მოესმა ძახილი და დროისა და სივრცის მიღმიერ განზომილებაში მის ლუმისი დაინახა: მის წინ ვერცხლის ჩაის სერვიზი მკრთალად ბზინავდა, ის მარტო იჯდა და მას ელოდა.

- ეს პირველი შემთხვევაა, როდესაც ქალი მელოდება, - მიუახლოვდა სტუმარი, - მაგრამ, გამოგიტყდებით, ასევე პირველი შემთხვევაა, როდესაც პაემანზე დროულად მოვედი.

- რატომ მოხდა ასე? - იკითხა დაწნულ სავარძელში ჩასვენებულმა ქალმა.

- არ ვიცი, - გულწრფელად გამოუტყდა კაცი.

- კარგი, - ქალი ჩაის დასხმას შეუდგა, - დასაწყისისთვის, რა აზრის ხართ ამ სამყაროზე?

- ვერაფერს გეტყვით, არაფერი ვიცი.

- როგორც ამბობენ, ეს სიბრძნის დასაწყისია. როცა ჩვიდმეტი წლის ხარ, მაშინ ყველაფერი იცი. და თუკი ოცდამჰიდი წლის ასაკშიც ყველაფერი იცი, ისე იგი, ისე ჩვიდმეტი წლისა დარჩი.

- წლებმა უეჭველად ბევრი რამ გასწავლათ.

- მოხუცების პრივილეგია სწორედ ის არის, რომ ყოვლისმცოდნეობის შთაბეჭდილებას ქმნიან, მაგრამ ესეც ისეთივე თამაშია, როგორიც ნებისმიერი სხვა როლი, რომელსაც ვთამაშობთ; ანდა ნიღაბი, რომელსაც ვირგებთ, ერთმანეთს კი დიმილით ვუკრავთ ხოლმე თვალს მოხუცები, თითქოს ვეკითხებით: „როგორ მოგწონს ჩემი ნიღაბი, ხომ კარგად ვთამაშობ ჩემს როლს? ხომ დამაჯერებელი ვარ? განა ცხოვრება პიესა არ არის? რას იტყვით, ხომ კარგად ვთამაშობ?“

ორივემ ხალისიანად გაიცინა. კაცი შვებით ეყრდნობოდა სკამის საზურგეს და მრავალი თვის მანძილზე პირველად სრულიად ბუნებრივად და გულით იცინოდა. როგორც იქნა, დამშვიდდნენ, ქალმა ფინჯანს ორივე ხელის თითები შემოხვია და შიგნით ჩაიხედა.

- იცით, გაგვიმართლა, რომ ერთმანეთს ასე გვიან შევხვდით. არ ვისურვებდი, ოცდაერთი წლისა რომ გაგეცნეთ, როდესაც თავში ქარი მიქროდა.

- ოცდაერთი წლის ლამაზი ქალიშვილებისათვის განსაკუთრებული კანონები მოქმედებს.

- მაშ, თქვენი აზრით, ლამაზი ვიყავი?

კაცმა თბილი მზერით დაუკრა თავი.

- კი მაგრამ, საიდან იცით? - ჩაეკითხა ქალი, - როცა ურჩხულს ხედავთ, ეს-ეს არის, გედი რომ გადაყლაპა, გედის სილამაზეზე ურჩხულის პირზე მიკრული ორიოდ ბუმბულის მიხედვით მსჯელობთ? თქვენ წინაშე სწორედ ეს არის - ღარებითა და ნაოჭებით დაფარული ეს სხეული სწორედ ურჩხულია, თეთრი გედი რომ გადასანსლა. რამდენი წელია, ის აღარ მინახავს. აღარც კი მახსოვს, როგორ გამოიყურებოდა. თუმცა, მას მთელი ჩემი არსებით ვგრძნობ. ის ცოცხალია, არსად წასულა: ისევ შიგნითაა და ერთი ბუმბულიც კი არ შესცვლია. იცით, გაზაფხულზე ან შემოდგომაზე ახლაც კი თენდება ზოგჯერ ისეთი დილა, როდესაც ვიდვიძებ და ვფიქრობ, ახლავე წამოვზბტები, მინდვრებს გადავირბენ და ტყეში მარწყვს დავკრეფ! ანდა ტბაში შევცურავ, ანდა მთელ ღამეს ვიცეკვებ გათენებაამდე-მეთქი! მერე კი უცბად ვამჩნევ, რომ კვლავ ამ ბებერი, დაფლეთილი ურჩხულის ქერქში ვარ მომწყვდეული და გულზე ვსკდები. ჩამოქცეული კომპის პატიმარი მზეთუნახავი ვარ და ჩემს მხსნელ მშვენიერ უფლისწულს ველი.

- თქვენ, წესით, წიგნები უნდა გეწერათ.

- ჩემო ბიჭო, ვწერდი კიდეც. აბა, ჩემნაირ შინაბერას სხვა რა დარჩენოდა? ვიდრე ოცდაათი წელი შემისრულდებოდა, ახირებული არსება ვიყავი, თავი საკარნავალო ზიზილ-პიპილებით მქონდა გავსებული და, ბოლოს და ბოლოს, ერთადერთი მამაკაცი, ვინც ნამდვილად მიყვარდა, ლოდინით დაიღალა და სხვაზე დაქორწინდა. ასე რომ, საკუთარი თავისაგან გაწბილებულმა საკუთარი თავის ჯიბრზე განვაცხადე, ანია ჩემზე, გათხოვების საუკეთესო შანსი რომ არ გამოვიყენე-მეთქი.

დავწყე მოგზაურობა. ჩემი ჩემოდნები მთლიანად სამოგზაურო

ეტიკეტების თოვლმა დაფარა. მარტოდმარტო ვესტუმრე პარიზს, ასევე მარტომ მოვიარე ვენა, ლონდონი და, იცით, საბოლოოდ, ეს მოგზაურობანი ზედმიწევნით ჰგავს გრინთაუნში მარტო ცხოვრებას. სიმარტოვე ყველგან სიმარტოვედ რჩება. უამრავი დრო გაქვს დასაფიქრებლად, მანერებისა და საუბრის დასახვეწად. მაგრამ ზოგჯერ ვფიქრობ, რა ადვილად გავცვლიდი ამა თუ იმ ზმნის უღლებას ანდა მოხდენილ რევერანსს ისეთ ვინმეზე, კომპანიას რომ გამიწევდა და ოცდაათწლიან არდადეგებს ჩემთან ერთად გაატარებდა-მეთქი.

ერთხანს მდუმარედ სვამდნენ ჩაის.

- საკუთარი თავის სიბრალოლი მომეძალა, - ისევ მხნედ და გულთბილად წამოიწყო ქალმა, - ახლა თქვენ შესახებ. ოცდათერთმეტი წლის ბრძანდებით და ჯერაც უცოლო?

- აჯობებს, თუ ვიტყვი, - მიუგო კაცმა, - ისეთი ქალი, თქვენსავით რომ იქცეოდეს, აზროვნებდეს და მეტყველებდეს, ჯერ არ შემხვედრია.

- ღმერთო დიდებულო, - გულწრფელად შეიცხადა ქალმა, - ახალგაზრდა ქალებს ჩემნაირი მეტყველება სულაც არ მოეთხოვება. ეს მოგვიანებით მოდის. ჯერ ერთი, საამისოდ გამოცდილება აკლიათ. მეორე ის, რომ საშუალო, ჩვეულებრივი მამაკაცი ქალში ჭკუის ნასახს თუ აღმოაჩენს, მაშინვე თავგზა ებნევა. შესაძლოა, რამდენიმე ჭკვიან ქალს მაინც გადაჰყრიხართ, მაგრამ მათ თავიანთი ჭკუის დამალვა მოახერხეს. ამ იშვიათი სახეობის მოსახელებლად ცოტაოდენი დაკვირვება დაგჭირდებათ.

ისევ გულიანად იცინეს.

- ამ წუწიაობაში, ალბათ, არასდროს მოვიყვან ცოლს, - დაასკვნა კაცმა.

- არა, არა, ამას ნუ იზამთ. ეს შეცდომა იქნება. დღეს რომ აქ მოხვედით, ესეც კი დიდი შეცდომაა. ეს გზა მხოლოდ ეგვიპტურ პირამიდასთან თუ მიგიყვანთ. პირამიდები მშვენიერია, მაგრამ მუმიები მეგობრად არ გამოდგებიან. გულზე ხელი დაიდეთ, სად ისურვებდით გამგზავრებას, რის გაკეთებას ნატრობთ სიცოცხლეში ყველაზე მეტად?

- მინდა ვნახო სტამბოლი, პორტ-საიდი, ნაირობი, ბუდაპეშტი, დავწერო წიგნი, მოვწიო ბევრი სიგარეტი, კლდიდან გადავიჩეხო, მაგრამ შუა ვარდნისას ტოტებმა შემაჩეროს. მინდა მაროკოს უკუნ ღამეში რომელიმე ვიწრო შუკაში ვიდაცამ ერთი-ორჯერ მესროლოს ტყვია, მინდა მშვენიერი ქალი მიყვარდეს.

- ჰმ, არა მგონია, ყველა ამ ნატვრის ასრულება შევძლო, - უთხრა ქალმა, - მაგრამ ბევრი ვიმოგზაურე და ამ ადგილთა უმრავლესობის შესახებ შემიძლია გიამბოთ. თუკი თავს შეიწუხებთ და ამ სადამოს ასე, თერთმეტი საათისათვის, ჩემს მოლზე გადაირბენთ, და თუ მეღვიძება, სამოქალაქო ომის დროინდელ დამბაჩას დაგახლით, იმედია, ეს თავგადასავლების მამაკაცურ სწრაფვას დაგიოკებთ?

- სწორედაც რომ არაჩვეულებრივი იქნება.

- პირველად საით ისურვებდით გამგზავრებას? ხომ იცით, მართლა შემიძლია, სადაც გსურთ, იქ გადაგიყვანოთ. ჯადოქრობა შემიძლია. დამისახელეთ: ლონდონი? კაიროს ხსენებაზე სახე გაგინათდათ. მაშ, კაიროში გავემგზავროთ. ახლა კი მოდუნდით. აი, ამ მშვენიერი თუთუნით დატენეთ ყალიონი და მყუდროდ მოეწყეთ.

კაცი საზურგეზე გადაწვა, ყალიონს მოუკიდა, გამტკნარებული, ღუნე დი-  
მილით სმენად იქცა. და ქალმა დაიწყო.

- კაირო... - წარმოთქვა ნელა.

მთელი საათი სავსე იყო ძვირფასი თვლების ბღღვრიალით, აღმოსავ-  
ლური ქუჩაბანდებითა და ეგვიპტის უდაბნოდან მონაქროლი ქარით. მზე  
ოქროს ასხივებდა, ნილოსი ამღვრეულიყო იქ, სადაც მისი წყლები დელტა-  
ში იღვრებოდა, და ვიღაც სულმთლად ნორჩი და ძალზე სწრაფი პირამიდის  
მწვერვალთან სიცილით ჩამოსდახოდა კაცს, ხელს უქნევდა, ანიშნებდა,  
ჩრდილიანი ფერდობიდან მზეში ამომძვრალიყო და, აი, უკვე მიძვრებოდა  
კიდევ, ის კი, გოგონა, ბოლო საფეხურზე ამოსასვლელად ზევიდან ხელს უწ-  
ვდიდა; მერე კი ორივენი იცინოდნენ აქლემის ზურგზე, უდაბნოს ზღურ-  
ბლზე გაწოლილი ვეება სფინქსისაკენ როცა მიირწეოდნენ; გვიან ღამით  
მდაბიოთა საცხოვრებელი უბნიდან ნაზად ისმოდა ბრინჯაოსა და ხელო-  
სანთა ვერცხლზე ერთი ბეწო ჩაქუჩების კაკუნი და რომელიღაც სიმებიანი  
საკრავის შორეული ჰანგები.

უილიამ ფორესტერმა თვალები გაახილა. მის ელენ ლუმისმა თავგადა-  
სავალი დაასრულა და ისევ შინ აღმოჩნდნენ, ისევ იმ ბაღში, სადაც ვერ-  
ცხლის ჩაიდანში ჩაი შეცივებულიყო, ნამცხვრები კი ნაშუადღევს მზეზე  
ნმებოდა. მათ შორის სრული ურთიერთგაგება და განსაკუთრებული სიახ-  
ლოვე იგრძნობოდა. სტუმარმა ნეტარებით ამოიოხრა, გაიჭიმა და ისევ  
ამოიოხრა.

- ასე კარგად ჯერ არასდროს მიგრძნია თავი.

- არც მე.

- ბევრი დრო წაგართვით. წესით, ერთი საათის წინ უნდა წავსულიყავი.

- ხომ იცით, რომ თქვენი სტუმრობის ყოველი წუთი სიამოვნებით მავ-  
სებს. აი, თქვენ კი რა ნახეთ ჭკუიდან გადასულ მოხუც ქალში?..

კაცი კვლავ საზურგეს მიეყრდნო, თვალები სანახევროდ მოხუჭა და ისე  
გახედა ქალს. ისე მოჭუტა თვალები, რომ ქუთუთოებს შორის სინათლის  
თხელი ძაფიდა ატანდა. თავი ოდნავ გადასწია ჯერ ერთ, მერე მეორე მხა-  
რეს.

- რას აკეთებთ? - ჰკითხა გაოცებულმა ქალმა.

კაცს პასუხი არ გაუცია, ისევ ისე უყურებდა.

- სწორად თუ გააკეთე, - ჩაიბურტყუნა, - შეგიძლია ჩაასწორო, დაარეგუ-  
ლირო... - თავისთვის კი გაიფიქრა, - შეგიძლია ნაოჭები ამოშალო, დროთა  
ფაქტორი შესაბამისობაში მოიყვანო და წლები უკან დაატრილო.

უეცრად შეკრთა.

- რაშია საქმე? - შეცბა ქალი.

მაგრამ ხილვა იმწამსვე გაქრა. კაცმა მის მოსახელთებლად თვალეზი გა-  
აზილა, ეს კი შეცდომა იყო. ისევ ისე მოღუნებული უნდა მჯდარიყო, უნდა  
განეგრძო ქუთუთოებს შორის ფოკუსირება და ჩასწორება.

- სულ ერთი წამით დავინახე, - წარმოთქვა ბოლოს.

- რა დაინახეთ?

- გელი, რა თქმა უნდა, - გულში თქვა კაცმა, მაგრამ მისმა ბაგემ, როგორც  
ჩანს, ეს სიტყვები უხმოდ გაიმეორა.

იმავე წამს ქალი ძალიან გამართული წამოჯდა სავარძელში. ხელები  
მკაცრად და უძრავად ეწყო კალთაში. კაცი უმწეოდ აკვირდებოდა, როგორ  
მოუწყლიანდა მას ორივე თვალი.

- მაპატიეთ, სამინლად ვწუხვარ.

- არაფერია, ნუ იღარდებთ, - ქალი ისევ გაქვავებული იჯდა, არც სახეზე,  
არც თვალეზზე არ იკარებდა ხელებს, მტევნები ისევ ერთიმეორეზე ჰქონდა  
დაწყობილი, - ახლა სჯობს, წახვიდეთ. დიახ, ხვალ შეგიძლიათ ისევ მობ-  
რძანდეთ, მაგრამ ახლა დამტოვეთ, გთხოვთ, და ნუდარაფერს იტყვით.

კაცმა ის მაგიდასთან დატოვა და ბაღის ბილიკს გაუყვა. უკან მიხედვა ვე-  
ღარ გაბედა.

გავიდა ოთხი, რვა, თორმეტი დღე და ქალი მას გამუდმებით ეპატიჟებო-  
და ჩაიზე, ვახშამზე, სამხარზე. ზაფხულის გრძელ დღეებს საუბარში ატა-  
რებდნენ - ხელოვნებაზე, ლიტერატურაზე, ცხოვრებაზე, საზოგადოებასა  
და პოლიტიკაზე ლაპარაკობდნენ, თან ნაყინს, ნასუქ მტრედებსა და საუკე-  
თესო ღვინოებს აჭამნიკებდნენ.

- სულ არ მადელვებს, რას იტყვის ხალხი, - უთხრა ერთხელ ქალმა, - არა-  
და, ჩვენზე ლაპარაკობენ, ხომ ასეა?

კაცი უხერხულად შეიმშუშნა.

- ასეც ვიცოდი. ქალი არასოდესაა დაზღვეული ჭორებისაგან, თუნდაც  
ოთხმოცდათხუთმეტი წლის იყოს.

- მაშინ აღარ მოვალ.

- ოჰ, არა! - შეჰყვირა ქალმა, მაგრამ მაშინვე გონს მოეგო და უფრო მშვი-  
დი კილოთი განაგრძო, - თვითონაც იცი, რომ ამას ვერ შეძლებ. ისიც იცი,  
რომ სინამდვილეში მათ ლაპარაკს არაფრად აგდებ, ხომ ასეა? ჩვენ ორმა  
ხომ ვიცით, რომ ყველაფერი კარგადაა?

- ასეა, არაფრად ვაგდებ, - დაეთანხმა კაცი.

- ახლა კი, - ქალი სავარძელში მოთავსდა, - ჩვენი თამაში ვითამაშოთ.  
ამჯერად საით გავემგზავროთ? პარიზში? ჰო, იყოს პარიზი.

- პარიზი, - მშვიდად დაუკრა თავი კაცმაც.

- მაშ, ასე, - დაიწყო ქალმა, - 1885 წელია და ნიუ-იორკის პორტში გემზე ავდივართ. ეს ჩვენი ბარგია, აგერ - ჩვენი ბილეთებიც. ლაინერი ოკეანეში გადის. მივცურავთ... აი, უკვე მარსელს ვუახლოვდებით...

ქალი ხიდიდან ჩაჰყურებდა სენის კამკამა წყალსა და წამის შემდეგ კაციც მის გვერდით აღმოჩნდა. ორივენი თვალს ადევნებდნენ ზაფხულის სწრაფ-მავალ ტალღებს. მეორე წუთში ქალი კაფეს მაგიდასთან იჯდა, ხელში აპერიტივით სავსე ჭიქა ეჭირა და კაციც იმწამსვე მასთან გაჩნდა, რათა ჭიქა მიეჭახუნებინა. მისმა სახემ გაიელვა ვერსალის მოსარკულ დარბაზებში, სტოკჰოლმში, შვედური მაგიდის ობივარში, ვენეციის არხების გასწვრივ კი ერთად ითვლიდნენ საღალაქოების ფირნიშებს. ყოველივეს, რაც ქალმა სიმარტოვეში განიცადა, ახლა ერთად იმეორებდნენ.

შუა აგვისტოს ერთ გვიან ნაშუადღევს ისხდნენ და მზერას არ აცილებდნენ ერთმანეთს.

- თუ ატყობ, - ჰკითხა კაცმა, - რომ ამ ორ-ნახევარი კვირის მანძილზე თითქმის ყოველდღე ვხვდებით?

- შეუძლებელია!

- ეს ჩემთვის უდიდესი სიამოვნებაა.

- კი, მაგრამ გარშემო ამდენი გოგონაა...

- შენში ყოველივე ის გაერთიანდა, რაც მათ არ გააჩნიათ: სიკეთე, სიბრძნე, მჭევრმეტყველება.

- სისულელეა. სიკეთე დასიბრძნე სიბერის უპირატესობაა. უმოწყალობა და ქარაფშუტობა ოცი წლის ასაკში უფრო გართობს, ვიდრე მოგვიანებით, - პაუზის შემდეგ ღრმად ჩაისუნთქა, - ახლა უხერხული შეკითხვა უნდა დაგისვა: გახსოვს ის პირველი დღე, როდესაც ერთმანეთს სანაყინეში შევხვდით? მაშინ თქვი, რომ ოდესღაც ჩემდამი ერთგვარ... ასე ვთქვათ, სიმპათიას განიცდიდი. მერე კი აშკარად აარიდე თავი ახსნა-განმარტებას, იმიტომ, რომ ამ თემას მეტად აღარ დაბრუნებინარ. ახლა იძულებული ვარ, გთხოვო, ეს საჩოთირო ამბავი გამანდო.

კაცს ეტყობოდა, არ იცოდა, რა ეთქვა.

- მართლაც უხერხული შეკითხვა იყო, - შეეცადა წინააღმდეგობის გაწევას.

- მითხარი ყველაფერი!

- ერთხელ, წლების წინ, შენი სურათი ვნახე!

- სურათებს არასოდეს ვიღებ.

- ძველი სურათი იყო, ოცი წლის ასაკში გადაღებული.

- აჰ, ის! ძალიან სასაცილოა. ყოველთვის, როცა საქველმოქმედო შეწირულობას ვაკეთებ ანდა მეჯლისის ვმართავ, პრესა ამ სურათს ამოქექავს და ბეჭდავს ხოლმე. მთელი ქალაქი სიცილით იხოცება, ჩემი ჩათვლით.

- გაზეთები უტაქტოდ იქცევიან.

- არა, მე თვითონ ვუთხარი, თუ ჩემი სურათი გჭირდებათ, ძველი, 1853 წელს გადაღებული ფოტო იკმარეთ. დაე, ყველას ასეთად დავამახსოვრდე და ღვთის გულისათვის, დაკრძალვის ცერემონიაზე კუბოს თავსახური დააფარეთ-მეთქი.

- ყველაფერს მოგიყვები, - ბილ ფორესტერმა თითები ერთმანეთს გადააჭდო, თავი დახარა და ერთხანს დადუმდა. იმ სურათს იხსენებდა და ერთბაშად ძალიან მკაფიოდ წარმოუდგა თვალწინ. ამ ბაღში მართლაც მოიძებნებოდა საკმარისი ღრო, რათა იმ ფოტოსურათის თითოეული ნაკვთი აღედგინა და იმაზე ეფიქრა, თუ როგორ იდგა სულმთლად ნორჩი ელენ ლუმისი მარტოდმარტო, სურათის გადასაღებად გამზადებული, მშვენიერი, მორცხვად მოღიმარი.

ეს სახე გაზაფხულს ნიშნავდა, ეს ზაფხულის სახე იყო, სამყურას თბილი სუნთქვის მონაქროლი. მის ბაგეზე ბროწეული ღუოდა, თვალებიდან კი შუადღის ლაჟვარდი გამოკრთოდა. ამ სახეს რომ შეეხო, იგივე მარად ახალი განცდა დაგეუფლება, როგორც დეკემბრის ერთ მშვენიერ დილით, როდესაც ფანჯარას აღებ და ხელით პირველ, ქათქათა თოვლს ეხები, დამით ყოველგვარი გაფრთხილების გარეშე რომ ჩამოფერფლილა. ეს მონაბერი სითბო და ბუმბულის სილბო ფოტოგრაფიული ქიმიის სასწაულს საშუალოდ შეენარჩუნებინა, დროის ქარები მას ერთი საათით, ერთი წუთითაც კი ვერ დააბერებდნენ; ეს უზენაესი პირველი თოვლი ათას ზაფხულს გაუძლებდა და არასდროს დადნებოდა.

აი, რა იყო ის ფოტოსურათი; აი, როგორ შეხვდა ამ ქალს პირველად. მას შემდეგ, რაც ეს ყველაფერი გაიხსენა, გადახარშა და წარმოიდგინა, ისევ განაგრძო ლაპარაკი:

- როდესაც პირველად ვნახე ეს სურათი, - უბრალო, გულწრფელი პორტრეტი სადა ვარცხნილობით - არ ვიცოდი, ამდენი ხნის წინათ რომ იყო გადაღებული. გაზეთი იმ საღამოს ელენ ლუმისის მიერ გამართული მეჯლისის შესახებ იუწყებოდა. სურათი გაზეთიდან ამოვხიე და მთელი ღღე თან დავატარებდი. იმ მეჯლისზე ვაპირებდი წასვლას. მერე კი, გვიან ნაშუადღევს, ვიდაცამ შენიშნა, სურათს როგორ ვაკვირდებოდი და ყველაფერი მიამბო. მითხრა, რომ ამ მშვენიერი გოგონას სურათი დიდი ხნის წინ არის გადაღებული და მას მერე გაზეთები სულ ამ სურათს იყენებენ. ისიც მიჩია,



სურათით ხელში ქალაქის მეჯლისზე არ წავსულიყავი და შენი მოძებნა არ მეცადა.

კარგა ხანს მდუმარედ ისხდნენ ბაღში. სტუმარი ქალის სახეს ჩააცქერდა. ის ბაღის შორეულ კედელს გაჰყურებდა, რომელსაც ვარდები შემოხვეოდა. ვერაფრით მიხვდა, ამ წუთში რას ფიქრობდა - მის სახეზე არაფერი აღბეჭდილა. ერთხანს კიდევ იქანავა თავისი სავარძლით, შემდეგ კი ხმადაბლა წარმოთქვა:

- ჩაი კიდევ ხომ არ დაგველია? აგერ, გამომართვი.

ისხდნენ და ჩაის წრუპავდნენ. ქალი გადასწვდა და კაცს მკლავზე გადაუსვა ხელი.

- გმადლობ.

- რისთვის?

- მეჯლისზე ჩემი მოძებნა რომ გინდოდა, ჩემი სურათი რომ ამოჭერი, ყველაფრისთვის დიდი მადლობა.

ბაღის ბილიკზე მისეირნობდნენ.

- ახლა კი, - უთხრა ქალმა, - ჩემი ჯერია. თუ გახსოვს, ერთი ახალგაზრდა კაცი ვახსენე, სამოცდაათი წლის წინ რომ მეარშიყებოდა. ო, ორმოცდაათი წელიწადი მაინც იქნება, რაც გარდაიცვალა, მაგრამ როდესაც ძალიან ახალგაზრდა და ლამაზი იყო, შეეძლო მთელი დღე არ ჩამოსულიყო ცხენიდან, ზოგჯერ ზაფხულის დამითაც ქალაქის გარშემო მინდვრებში დაჯირითობდა. ჯანსაღი, ველური სახე ჰქონდა, მუდამ გარუჯული, ხელებზე ჭრილობები არასოდეს უჩებოდა, ღუმლის საკვამურივით აბოლებდა და ისე დადიოდა, გეგონებოდა, ხელ-ფეხი უნდა ჩამოიძროს და აქეთ-იქით გაისროლოსო. არც ერთ სამუშაოზე დიდხანს არ ჩერდებოდა, როცა კი მოეხასიათებოდა, მაშინ ტოვებდა სამსახურს, ერთ მშვენიერ დღეს კი ცხენს შეახტა და მიმატოვა, რადგან მასზე უფრო თავზე ხელაღებული ვიყავი და მშვიდ ოჯახურ ცხოვრებას არაფრად ვაგდებდი. ეს იყო და ეს. ვერ წარმომედგინა, იმ დღეს თუ მოვესწრებოდი, როცა ცოცხალი დამიბრუნდებოდა. მაგრამ ძალიანაც ცოცხალი ხარ, ზუსტად მასავით ფანტავ შენ გარშემო თუთუნის ფერფლს, შენც ათავსებ უგერგილობას მოხდენილობასთან, ვიდრე რამეს გააკეთებდე, შენი ყოველი ნაბიჯი წინასწარ ვიცე, მაგრამ შენი ყოველი ქმედება მაინც მაცოცხლებს. რეინკარნაციისა დიდად არ მჯერა, მაგრამ ამას წინათ გავიფიქრე, უეცრად ქუჩაში რომ დავუძახო, „რობერტ, რობერტ!“, ნეტავ უილიამ ფორესტერი თუ მოტრიალდება-მეთქი?

- არ ვიცე, - უპასუხა კაცმა.

- არც მე ვიცე, სწორედ ამით არის ცხოვრება ასე საინტერესო.



\* \* \*

აგვისტო თითქმის მიიწურა. შემოდგომის პირველმა სიგრილემ დაუარა ქალაქს და ყოველი ხის ფოთლებს მოედო პირველი ცეცხლის მსუბუქი ალი. ბორცვების სიმწვანეც ოდნავ შეიფაკლა, ყანები კი ლომისფრად შეიღება. დღეების ქარგა ნაცნობ და მრავალნაცად ხვეულებს იმეორებდა, დღითი დღე კალიგრაფივით თანაბრად გამოჰყავდა ერთი და იგივე კონტა ასოები: „ლ“, „წ“ და „შ“.

აგვისტოს ერთ დილას უილიამ ფორესტერმა ბადის სიღრმეში შეაბიჯა. ჩაის მაგიდასთან ელენ ლუმისი დახვდა, მთელი გულისყურით წერდა რა-ღაცას.

ღაინახა თუ არა, სამელნე და კალამი გვერდზე გადადო.

- წერილს გწერდი.

- რაკიდა მოვედი, თავის შეწუხება აღარ მოგიწევს.

- არა, ეს განსაკუთრებული წერილია. დააკვირდი, - ქალმა ცისფერი კონვერტი უჩვენა, იქვე დალუქა და ხელი გადაუსვა, - დაიმანსოვრე, როგორ გამოიყურება. როდესაც მას ფოსტით მიიტებ, იცოდე, რომ მკვდარი ვარ.

- ასე ლაპარაკი არ ღირს.

- დაჯექი და მომისმინე.

კაცი დაჯდა.

- უილიამ, ჩემო კარგო, - ქალს სახეზე ქოლგის ჩრდილი ეფინებოდა, - რამდენიმე დღეში ცოცხალი აღარ ვიქნები. არა, - ხელით გააჩუმა, - ახლა ნურაფერს მეტყვი. სულაც არ მეშინია. ჩემს ასაკს რომ მიატან, ამ შიშსაც დაკარგავ. არასოდეს მყვარებია ასთაკვი, უფრო იმიტომ, რომ გასინჯული არ მქონდა. ოთხმოცი წელი რომ შემისრულდა, მაშინ გავსინჯე, ჩემს დაბადების დღეს. ვერ ვიტყვი, რომ მას მერე ასთაკვისთვის ჭკუას ვკარგავ, მაგრამ ახლა მის გემოს ვიცნობ და უკვე აღარ მაშინებს. მე ვიტყვოდი, სიკვდილიც რაღაც ასთაკვის მსგავსი იქნება და, ვფიქრობ, მასთან საერთო ენის გამოწახვას შევძლებ, - ხელები აიქნია, - მაგრამ ამაზე მოვრჩეთ. მნიშვნელოვანი ის არის, რომ შენ ვეღარ გნახავ, ჩაის სერვიზების დროც დამთავრდება. მე მგონია, როდესაც ქალი ამ უკანასკნელ ზღურბლს გადააბიჯებს, მას საკუთარ თავთან მარტოდ დარჩენის ისეთივე უფლება აქვს, როგორც ქალს, რომელიც ღამით მოსასვენებლად საძინებელში განმარტოვდა.

- როგორ შეიძლება წინასწარ განსაზღვრო სიკვდილის წუთი? - ჰკითხა თავზარდაცემულმა კაცმა.

- უკვე ორმოცდაათი წელიწადია, თვალს ვადევნებ ჩემს ჰოლში ძველებურ საათს. როცა ვქოქავ, წუთებში შემიძლია გამოვთვალო, როდის გაჩერდება. მოხუცი ადამიანებიც ზუსტად ასევე არიან მოწყობილნი. გრძნობენ, მექანიზმი თანდათან როგორ ირღვევა. ოჰ, ასე ნუ მიყურებ, გთხოვ, არ გინდა.

- არ შემიძლია, - უმწეოდ გამოეხმაურა კაცი.

- ერთად ხომ მშვენიერი დრო გავატარეთ, ასე არ არის? ეს ყოველდღიური საუბრები არაჩვეულებრივი იყო. სწორედ ასეთ მოვლენას განსაზღვრავს ზომიანე მეტად დამძიმებული და გაცვეთილი ფრაზა „სულიერი კავშირი“, - ცისფერი კონვერტი ხელში შეათამაშა და განაგრძო, - მუდამ ვიცოდი, რომ სწორედ სულია სიყვარულის საზომი, თუმცა, სხეული მას ძალზე ხშირად არ ცნობს. სხეული თავისთავად არსებობს. მხოლოდ იმით ცოცხლობს, რომ იკვებოს და ღამეს ელოდეს. მისი არსებობა, ძირითადად, ღამისეულია. მაგრამ რა ვუყოთ მზისგან ნაშობ სულს, უილიამ, რომელსაც ათასობით საათის სიფხიზლე და სიცხადე სწყურია? განა სხეულმა, ღამის ამ უბადრუკმა, ხარბმა ნაშიერმა, შეიძლება გადაწონოს მზითა და გონებით გაცისკროვნებული უგრძესი სიცოცხლე? არ ვიცი, არ ვიცი, მხოლოდ ის ვიცი, რომ ჩვენი სულები ერთად იყვნენ და ერთად გატარებული ამ დღეების მსგავსი ჩემს სიცოცხლეში არაფერი განმიცდია. კიდეც ბევრი გვაქვს სალაპარაკო, მაგრამ რას იზამ, სხვა დროისათვის უნდა შევინახოთ!

- ჩანს, ბევრი დრო ადარ დაგვრჩენია.

- არა, მაგრამ ვინ იცის, იქნებ ოდესმე სხვა დრო დაგვიდგეს. დრო უცნაური რამაა, სიცოცხლე კი - კიდეც უფრო გამოუცნობი. ბორბლებს ერთი ან მეტი კბილანა თუ დააკლდა, ტრიალს აუჩქარებენ ანდა, პირიქით, შეანელებენ და ამის გამო ადამიანთა ბედისწერა ერთურთს ნაადრევად ან დაგვიანებით ჩაექსოვება. მეტისმეტად დიდხანს რომ ვიცოცხლე, ეს უეჭველია. შენ კი ან მეტისმეტად ადრე დაიბადე, ან მეტისმეტად გვიან. დრო საშინლად აირია. ან იქნებ, უბრალოდ, ჩემი ახალგაზრდული ქარაფშუტობის გამო დავისაჯე. ასეა თუ ისე, შემდეგ შემობრუნებაზე ბორბლები შეიძლება ერთიმეორეს სწორად მოერგოს. ამასობაში კი ვინმე სათნო გოგონა უნდა მოძებნო, დაოჯახდე და ბედნიერი იყო, მაგრამ ერთ რამეს დამპირდი.

- ნებისმიერ რამეს, რაც კი გსურს.

- დამპირდი, რომ ძალიან დიდხანს არ იცოცხლებ, უილიამ. თუ მოგიხერხდა, უმჯობესია, მოკვდე, ვიდრე ორმოცდაათი წელი შეგისრულდება. თუმცა კი ამას დიდი ძალისხმევა დასჭირდება. ამას მხოლოდ იმიტომ გირჩევ, რომ არავინ იცის, კიდეც ერთი ელენ ლუმისი როდის მოევლინება ამ

ქვეყანას. ხომ საზარელი იქნებოდა, ღრმა სიბერემდე რომ გეცოცხლა და 1999 წლის ერთ მშვენიერ დღეს მთავარ ქუჩაზე ჩავლილს უეცრად დაგენახე ოცდაერთი წლის ქალიშვილი და ყველაფერი ისევ ყირამალა დატრიალებულიყო? არა მგონია, კიდევ ერთხელ გავუძლოთ აი, ასეთ დღეებს, მიუხედავად იმისა, რომ ასე სასიამოვნო იყო. რას იტყვი? ათასი ლიტრი ჩაი და ხუთასი ნამცხვარი ხომ საკმარისია ერთი მეგობრობისთვის? ასე რომ, სადღაც ოც წელიწადში შეიძლება ფილტვების ანთების მძიმე შეტევა დაგემართოს. იმიტომ, რომ არ ვიცი, იქ, მეორე მხარეს, რამდენ ხანს შეგაყოვნებენ. შესაძლოა, მაშინვე უკან გამოგზავნონ. მაგრამ რაც შემოიღია, ყველაფერს გავაკეთებ, უილიამ, ვეცდები, სიტყვას გაძღვე. და, იცი, რა მოხდება, როდესაც ყველაფერი აეწყობა?

- რა, მითხარი?

- 1985 ან 1990 წლის მშვენიერ დღეს ახალგაზრდა კაცი, სახელად ტომ სმიტი, ჯონ გრინი ან რაღაც მსგავსი, ქალაქის ცენტრში სეირნობისას სანაყინეში შეივლის და რაიმე უჩვეულო სახეობის ნაყინს შეუკვეთს. მეზობელ მაგიდასთან მჯდომი მისი თანატოლი გოგონა ყურს მოჰკრავს ნაყინის დასახელებას და იმავე წამს რაღაც მოხდება. ვერ გეტყვი, რა და როგორ. ყოველ შემთხვევაში, არც გოგონას, არც ახალგაზრდა კაცს ეს ნამდვილად არ ეცოდინებათ. უბრალოდ, აღმოჩნდება, რომ ორივეს მოსწონს ამ ნაყინის სახელწოდება. მათ შორის საუბარი გაიბმება, მოგვიანებით კი ერთმანეთს გაიცნობენ და სანაყინედან ერთად გამოვლენ.

ქალმა თანამოსაუბრეს გაუღიმა.

- მეტისმეტად შელამაზებულია, არა? რას იზამ, უნდა მიუტევო მოხუც ქალს, რომელიც ყველაფერს კობტად შეფუთულს გაწვდის. ნება მიბოძე, ეს სულელური და ყოვლად გამოუსადეგარი სამშვენიისი მაინც დაგიტოვო სახსოვრად. ახლა კი, მოდი, სხვა რამეზე ვილაპარაკოთ. მაინც რა იყო ეს? დედამიწის ზურგზე თუ დარჩა ისეთი ადგილი, ჩვენ რომ ერთად არ შემოგვევლოს? სტოკჰოლმში ვყოფილვართ?

- ჰო, მშვენიერი ქალაქია.

- გლაზგოში? ჰო? მაშ, საით გავწიოთ?

- რატომაც არ მოვინახულოთ ილინოისის შტატის ქალაქი გრინთაუნი? - იკითხა კაცმა, - ანუ აქაურობა. ჩვენს ქალაქს ერთად ჯერ არასოდეს ვწვევივართ.

ორივენი სავარძლებში მყუდროდ მოკალათდნენ და ქალმა დაიწყო:

- მაშ, კარგი. გიამბობ, თუ როგორი იყო ეს ქალაქი დიდი ხნის წინათ, როდესაც მხოლოდ ცხრამეტი წლის ვიყავი...

ზამთრის სადამო იყო, ელენი მსუბუქად მისრიალებდა ციგურებით მთვარით გადაპენტილი ტბორის ყინულზე და მისი ანარეკლიც ჩუმი შხუილით მიჰყვებოდა; ზაფხულის გვიან დამით ამ ქალაქის ჰაერში ცეცხლის სიმზურვალე იდგა, ქალაქს ლოყების ცეცხლივით უხურდა და გულშიც იგივე ცეცხლი უგიზგიზებდა, თვალები ციციანათელების ფოსფორული ციმციმით ევსებოდა; იღუმალი შრიალითა და ჩურჩულით სავსე ოქტომბრის სადამოს ელენმა სამზარეულოში დიდინით ჩამოიღო თაროდან შინ გამომცხვარი ქერის შაქარლამა. და, აი, უკვე მდინარის ხავსიან ნაპირზე მირბოდა გაზაფხულის წყვდიადში, მერე კი ქალაქგარეთ, გრანიტის აუზის ღბილ, თბილ წყლებში ცურავდა. აგერ ოთხმა ივლისმაც მოაღწია ცის შემაზანზარებელი რაკეტებით და ყოველი პარმალი სიბნელეში ნაირფრად განათებული სახეებით გაივსო, მათ შორის გაიელვა ელენის სახემაც, ვიდრე უკანასკნელი რაკეტა წყვდიადში დაინთქა.

- ხედავ ყველაფერ ამას? - იკითხა ელენ ლუმისმა, - მხედავ, როგორ ვაკეთებ ამ ყოველივეს, როგორ ვტრიალებ ამ მოვლენებს შორის?

- ჰო, - გამოეხმაურა უილიამ ფორესტერი, - გხედავ.

- მერე კი... - განაგრძო ქალმა, - მერე...

მისი ხმის ჰანგები კვლავაც იღვრებოდა ბადის მუქ სიმწვანეში, სწრაფად ჩამოწოლილი მწუხრი მას ვერ ფარავდა და ქუჩაზე გამვლელი დაბურული ტევრიდან გაიგონებდით ამ შორეულ, ფარვანასავით მოწრიალე, მიღუულ ხმას...

ორი დღის შემდეგ უილიამ ფორესტერი თავის ოთახში საწერ მაგიდას უჯდა, როდესაც მის სახელზე წერილი მოვიდა. დაგლასმა ამოიტანა კონვერტი მეორე სართულზე, ბილს მიაწოდა და ისე შეხედა, თითქოს იცოდა, რა იყო მასში.

უილიამ ფორესტერმა ცისფერი კონვერტი იცნო, მაგრამ არ გაუხსნია. უბრალოდ, უბის ჯიბეში ჩაიღო, წუთით შეხედა ბიჭს და შემდეგ უთხრა:

- წამოდი, დაგპატიჟებ.

ფენით ჩავიდნენ ქალაქის ცენტრში, თითქმის მთელი გზა ღუმდნენ. დაგლასი გრძნობდა, რომ სიჩუმე აუცილებელი იყო. შემოდგომას, ერთხანს რომ იმუქრებოდა, ახლა ისევ უკან დაეხია. ზაფხული ისევ ძალაში შესულიყო, ღრუბლები დუდილით დაემშრო და ლითონისფერი ცა გადაეკრიალებინა. კაფეში შევიდნენ და მარმარილოს მაგიდას მიუსხდნენ. უილიამ ფორესტერმა წერილი ამოიღო, წინ დაიღო, მაგრამ არ გაუხსნია.

შზის ყვითელი შუქით მოფენილ ბეტონის კედელს, მწვანე ტილოს ჩარდახებსა და კარს გვერდით მიმაგრებულ ოქროსფერ წარწერას გახედა,

შემდეგ კი კედლის კალენდარს მიუბრუნდა. 1928 წლის 27 აგვისტო. დააკვირდა თავის მაჯის საათს და გულისცემის შენელება იგრძნო. წამების ისარი ძალიან ნელა მოძრაობდა, თითქმის უძრავად იყო, კალენდარიც ერთადერთ დღეზე გაყინულიყო და ეს დღე მარადისობას უდრიდა, მზე თითქოს ცაზე მიელურსმათ: სრულებით არ მიდიოდა დაისისკენ. თავზევით მოტრიალე ვენტილატორები თბილ ჰაერს აფრქვევდნენ. რამდენიმე ქალი სიცილით შეჩერდა კარში და მისი მზერის წინ ჩაიარა, მათ მიღმა, ქალაქისა და სასამართლოს მაღალი შენობის საათისთვის რომ მიეპყრო. კაცმა წერილი გახსნა და კითხვას შეუდგა.

ნელა დატრიალდა მბრუნავ სკამზე. რამდენჯერმე უხმოდ დააგემოვნა სიტყვები, ბოლოს კი ხმამაღლა გაიმეორა:

- ერთი ლაიმისა და ვანილის ნაყინი, - და ისევ გაიმეორა, - ერთი ლაიმისა და ვანილის ნაყინი.

\* \* \*

დაგლასი, ტომი და ჩარლი ქოშინით მიუყვებოდნენ მზისგულზე გავარვარებულ ქუჩას.

- ტომ, გულახდილად მიპასუხე.

- რა გიპასუხო?

- რა იქნა ყველა ბედნიერი დასასრული?

- შაბათ დილის კინოსეანსზე ნახავ.

- ეგ ჰო, მაგრამ ცხოვრებაში?

- მხოლოდ ის ვიცი, რომ საღამოობით როცა ვწვები, კარგად ვარ, დაგ. აი, უკვე ყოველდღიური ჰეფი-ენდი. მეორე დილით ვდგები და შეიძლება საქმე ცუდადაც დატრიალდეს, მაგრამ საკმარისია, გავიხსენო, რომ იმ საღამოს საწოლში მყუდროდ ჩავლუღუნდები და ყველაფერი მავიწყდება.

- მე მისტერ ფორესტერსა და მოხუც მის ლუმისზე გელაპარაკები.

- ამ ამბავს ჩვენ ვერაფერს მოვუხერხებთ. ის მოკვდა.

- ვიცი, მაგრამ არ გეჩვენება, რომ იქ, ზევით, ვიდაცას რაღაც შეეშალა?

- იმას გულისხმობ, რომ ფორესტერს ეგონა, ქალი თავისი ფოტოსურათის ასაკისააო, ის კი მთელი ამ ხნის განმავლობაში მილიარდი წლისა იყო? არა, მე ვფიქრობ, ეს კარგია!

- კარგი როგორ არის, ბიჭო?

- ბოლო დღეებში მისტერ ფორესტერმა ცოტა-ცოტა მიაშობ მის შესახებ და მთლიანობაში რომ წარმოვიდგინე ეს ამბავი, ბიჭოო, რამდენი

ვიდრიალუ! თვითონაც არ ვიცი, რა მატირებდა. ჩემი ნება რომ იყოს, მაინც არაფერს შევცვლიდი. ყველაფერი სხვანაირად რომ მომხდარიყო, რაღა გვექნებოდა სალაპარაკო? არც არაფერი.

- ახლა გასაგებია.

- უბრალოდ, არ გინდა აღიარო, რომ შენც ხანდახან სიამოვნებით ტირი. ცოტას იტირებ და ყველაფერი ისევ კარგად არის. ესეც შენი კეთილი ბოლო. ისევ შეგიძლია გარეთ გახვიდე და ხალხს ელაპარაკო. და ამით დაიწყება რაღაც სრულიად ახალი: ღმერთმა იცის, რა! აწი მისტერ ფორესტერს ეს ყველაფერი დროდადრო რომ მოაგონდება, ისევ მიხვდება, რომ ეს ამბავი სხვანაირად ვერ მოხდებოდა, მერე ერთს კარგად წაუტირებს, გარშემო მიმოიხედავს და ნახავს, რომ ისევ გათენებულა, თუნდაც ამ დროს დღის ხუთი საათი იყოს.

- მერე ეგ რა ბედნიერი დასასრულია?

- კარგი გამოძინება ან ათწუთიანი ტირილი, ან ერთი კილოგრამი შოკოლადის ნაყინი, ანდა სამივე ერთად - მართლაც ყველაფრის წამალია, და უჯერე ექიმ ტომ სპოლდინგს.

- მოკეტეთ, ბიჭებო, - შეაწყვეტინა ჩარლიმ, - თითქმის მივედით.

მოსახვევში შეუხვიეს.

შუა ზამთარში ყველგან ზაფხულის ნაკუნებსა და ნამცეცებს დაეძებდნენ და პოულობდნენ კიდევ საქვაბებში ანდა საციგურაო მოედნის გვერდით სადამოობით დანთებულ კოცონში. ახლა კი, ზაფხულში, ბიჭები მივიწყებული ზამთრის რაიმე ნიშანწყლის, თუნდაც ციცქნა ნაგლეჯის საძებნელად გამოსულიყვნენ.

კუთხეს შემოუხვიეს თუ არა, აგურის მაღალმა შენობამ სამივე თითქოს გაბმული შხაპუნა წვიმით გააგრილაო, ეს მაშინ იგრძნეს, როდესაც წაიკითხეს წარწერა, ისედაც ზეპირად რომ იცოდნენ და სწორედ იმას რომ ნიშნავდა, რასაც ეძებდნენ:

ზაფხულის ყინულის სახლი.

ზაფხულის ყინულის სახლი აგვისტოს ცხელ დღეს! სიცილით წარმოთქვეს ეს სიტყვები და შეიხედეს ამ გამაგრილებელ მღვიმეში, სადაც იანვრის გარდასულ, მაგრამ არდავიწყებულ თოვლს ამიაკისებრ კვამლში გახვეულ ორმოცდაათ, ას და ორასგირვანქიან ლოდებად, მყინვარებად, აისბერგებად ეძინა ანდა კრისტალურ ცრემლებად იღვენთებოდა.

- გრძნობთ, რა მაგარია? - ამოიკვნესა ჩარლიმ, - ამაზე მეტი რაღა უნდა ინატრო?

მართლაც, კაშკაშა დღის შუაგულში იდგნენ და სახეზე კვლავაც და კვლავაც ზამთრის სუნთქვა ეფრქვეოდათ, იდგნენ და ისრუტავდნენ ხის სველი იატაკის სუნს, რომლის თავზეც გამყინავი მექანიზმიდან შეუჩერებლად იღვრებოდა ცისარტყელას ფერადი, მოციმციმე ნისლი.

ყინულის ლოლუებს აკნატუნებდნენ. ისე გაეთოშათ თითები, რომ ლოლუები ცხვირსახოცებში გაახვიეს.

- რა კვამლია, რა ბურუსი, - ჩურჩულებდა ტომი, - თოვლის დედოფალი. განსოვთ ეს ზღაპარი? ახლა თოვლის დედოფლებისა და ასეთი რამეების აღარავის სჯერა, ჰოდა, არ გაგიკვირდეთ, თუ აღმოჩნდა, რომ სწორედ აქ დაიმალა, იმიტომ, რომ მისი არსებობა აღარავის სწამს.

ბიჭებმა შიგნით შეიხედეს და დაინახეს, როგორ ამოდიოდა და მოირწყოდა ჰაერში ცივი კვამლის გრძელი, თეთრი ლანდები.

- არა, - თქვა ჩარლიმ, - იცით, აქ ვინ ცხოვრობს? - ერთადერთი ვინმე. ის, ვის ხსენებაზეც კი გბურძგლავს და ტანში ცივი ჟრუანტელი გივლის, - ჩარლიმ ხმას დაუწია, - მარტოხელა მკვლელი.

- მარტოხელა მკვლელი?

- აი, ვინ დაიბადა, გაიზარდა და ცხოვრობს კიდეც აქ! ამ ზამთარში, ტომ, ამ ყინვაში, დაგ! აბა, მეტი საიდან უნდა გაჩენილიყო ის, ვისი წყალობითაც ყველაზე ცხელ დამებშიც კი გვაკანკალებს? დაყნოსეთ, სწორედ მისი სუნი არ ტრიალებს? თქვენც კარგად იცით, რომ ასეა. მარტოხელა მკვლელი... მარტოხელა მკვლელი...

სიბნელეში რძისფერი კვამლი იკლავებოდა.

ტომმა შეჰკივლა.

- არაფერია, დაგ, - ჩაიცინა ჩარლიმ, - უბრალოდ, ტომს კისერში ყინულის პაწაწინა ნატეხი ჩავუგდე. ეს არის და ეს.

\* \* \*

სასამართლოს შენობიდან შვიდჯერ გაისმა საათის მელოდია და მისი ექო თანდათან შეწყდა.

ზაფხულის თბილი ბინდი ჩამოწვა ზემო ილინოისის ამ პატარა, მიყრუებულ ქალაქზე, სამყაროსგან ოთხივე მხრიდან მდინარით, ტყით, მინდვრებითა და ტბით რომ იყო იზოლირებული. მისი ტროტუარები ჰაპანაქება სიცხეს დაეხეთქა. მაღაზიები თანდათან დაიკეტა და ქუჩებიც დაბნელდა. ქალაქს ორი მთვარე დაჰნათოდა; პირველი, საათი-მთვარე, ოთხ მხარეს უშვრდა თავის ოთხ ციფერბლატ-სახეს სასამართლოს სოლიდური შავი

შენობის თავზე, ხოლო მეორე, ნამდვილი მთვარე, ვანილის ქათქათა სამოსში გახვეული, აღმოსავლეთის წყვდიადიდან ამოდიოდა.

სანაყინეს მაღალ ჭერქვეშ ვენტილატორი ზუზუნებდა. როკოკოს ჩუქურთმებით დამშვენებული პარმაღების ჩრდილში აქა-იქ სახლის უჩინარი ბინადარი იჯდა. მხოლოდ სიგარეტის ვარდისფერი ნაპერწკალი თუ გაიელვებდა ხანდახან. მინის შემოსასვლელი კარი მჭახე ხმით დასტიროდა თავის გარდასულ გაზაფხულებს და ბრაგვანით იხურებოდა. ზაფხულის მწუხრში გახვეულ, მეწამული აგურით მოკირწყლულ ქუჩებში დაგლას სპოლდინგი გარბოდა. უკან ძაღლები და ბიჭები მისდევდნენ.

- გამარჯობა, მის ლავინია!

ბიჭებმა ჩაიქროლეს. ლავინია ნებსმა უშფოთველად დაუქნია ხელი. მარტოდმარტო იჯდა და ქათქათა ხელში ლითონის მაღალი, გრილი ჭიქა ეჭირა, რომელიც ნელა მიჰქონდა ტუჩებთან, ცოტ-ცოტას წრუპავდა და იცდიდა.

- აი, მეც მოვედი, ლავინია.

ძახილზე მიბრუნებულმა კიბის ძირას ფრენსინი დაინახა, თოვლივით თეთრ კაბაში... სურნელში გახვეული.

ლავინია ნებსმა სახლის კარი გადაკეტა, ლიმონათის სანახევროდ დაცლილი ჭიქა პარმაღზე დატოვა და კიბეს ჩაუყვავა.

- მშვენიერი საღამოა კინოში წასასვლელად.

ორივენი ქუჩას გაუყვნენ.

- საით მისეირნობთ, გოგონებო? - ქუჩის მეორე მხრიდან, თავიანთი პარმაღიდან გამოსძახეს მის ფერნმა და მის რობერტამ.

ლავინია სიბნელის ხავერდოვანი ოკეანის წიაღიდან გამოეხმაურა.

- „ელიტ-თეატრში“, ჩარლი ჩაპლინის სანახავად.

- ასეთ საღამოს გარეთ რა გამიყვანს, - ავიშვიშდა მის ფერნი, - მარტოხელა მკვლელი ისევ ქალებს უსაფრდებდა და ახრჩობს. ლამის თოფი დავტენოთ და საკუჭნაოში შევიკეტოთ.

- რა სისულელეა! - ლავინიამ გაიგონა, როგორ მიაბრაზუნეს და ჩარაზეს კარი მოხუცმა ქალებმა, თვითონ კი ისევ განაგრძო გზა.

ზაფხულის ქურაში გამომდნარი ქვაფენილი სიცხეს ასხივებდა. ისეთი გრძნობა დაეუფლა, თითქოს ახალგამომცხვარი თბილ-თბილი ჰურის ხრამუნა ქერქზე დააბიჯებდა. გავარჯარებული ჰაერი მისი კიბის ქვეშ, ფეხების გასწვრივ პულსირებდა, თითქოს ფარულად, მაგრამ ჯიუტად ეპარებოდა, რაც უსიამოვნო სულაც არ იყო.

- ლავინია, ხომ არ გჯერა იმის, რასაც მარტოხელა მკვლელზე ამბობენ?

- ამ ქალებს ოღონდაც საბაბი მიეცი და ენას საერთოდ არ გააჩერებენ.



- ჰო, მაგრამ ისიც ფაქტია, რომ ჰეტი მაკდოლისი ორი თვის წინ მოკლეს, რობერტა ფერი - გასულ თვეში, ახლა კი ელიზაბეთ რემსელიც გაქრა.

- ჰეტი მაკდოლისი თავპარიანი ქალი იყო, დარწმუნებული ვარ, მოგზაურ კომერსანტთან ერთად გაიპარა.

- სხვებს რაღას უშვრები? ყველანი დამხრჩავალი იპოვეს. ამბობენ, ყველას ენა ჰქონდა პირიდან გადმოგდებულიო.

იმ ხვეის პირას იდგნენ, ქალაქს ორად რომ ყოფდა. ზურგს უკან განათებული სახლები და მუსიკა მოიტოვეს, წინ სიღრმე, სინოტივე, ციციანათელები და წყვდიადი ელოდათ.

- იქნებ ამდამ არ ღირდეს კინოსეანსზე წასვლა? - გაუბედავად წარმოთქვა ფრენსინმა, - ხომ შეიძლება, მარტოხელა მკვლელი გამოგვეკიდოს და დაგვხოცოს? ეს ხევი მაშინებს. შეხედე, როგორია!

ლავინიამაც შეხედა და აღიარა, რომ ხევი დღედაღამ შეუჩერებლად მომუშავე ძრავას ჰგავდა; მასში გამუდმებით იძვროდა და ყრუდ გუგუნებდა ცხოველთა, მწერთა და მცენარეთა ურიცხვი სიცოცხლე. მისი სიღრმიდან სათბურის სუნი ამოდოდა: მიწის უხილავი ოხშივრისა და ნაკადულების წყლებით გადანარეცი ისტორიამდელი ქვიშის სურნელი. შავი ძრავა უწყვეტად გუგუნებდა და დროდადრო ციციანათელების ნაპერწკლებს ისროდა ჰაერში.

- მე კი არ მომიწევს ამდამ, გვიან ღამით, ამ ხევზე გადასვლა; არა, ლავინია, ეს შენ უნდა ჩაიარო საფეხურებზე, ხიდზე, სადაც ვინ იცის, შეიძლება მარტოხელა მკვლელიც იყოს ჩასაფრებული.

- სისულელეა! - თავი გააქნია ლავინია ნებსმა.

- დაფიქრდი, შენ მოგიწევს ბილიკზე მარტომარტო გავლა და საკუთარი ნაბიჯებისთვის მიყურადება. მარტო მოგიწევს შინ დაბრუნება. ლავინია, როგორ ცხოვრობ მაგ სახლში სულ მარტო?

- შინაბერა ქალები ვერავის ეგუებიან, - ლავინიამ თითი იმ ბილიკისაკენ გაიშვირა, რომელიც ცხელ წყვდიადში იკარგებოდა, - მოდი, მოკლევზე მოვჭრათ.

- მეშინია!

- ჯერ ხომ ადრეა. მარტოხელა მხოლოდ გვიან ღამით გამოდის, - ლავინიამ მეგობარს ხელკავი გაუკეთა და მასთან ერთად ჩაუყვა მიხვეულ-მოხვეულ ბილიკს, ბაყაყების ყიყინითა და კალიების უფაქიზესი ზრიალით სავსე სიჩუმეში. მშრალი ბალახი ფეხებზე ედებოდათ, შიშველ კოჭებზე ეკლების ჩხვლეტას გრძნობდნენ.

- მოდი, გავიქცეთ! - შეჰკვივლა ფრენსინმა.

- არა!

ბილიკმა მოულოდნელად მოუხვია და... იქ დახვდათ.

ამ მრავალმხრივ უძირო ღამეში, თბილი ხეების ჩრდილში, თითქოს ამ ღობილ ვარსკვლავებქვეშ წამოიწვა და ნაზი ნიავით ტკბებო, მსუბუქი ხომალდის ნიჩბებივით გაშლილი მკლავებით იწვა ელიზაბეთ რემსელი!

ფრენსინმა დაიკვილა.

- ნუ ყვირი! - ლავინიამ ხელები ფრენსინისკენ გაიშვირა. ფრენსინს ქვითინი ახრჩობდა, - ნუ! ნუ!

ქალი ისე იწვა, თითქოს წყლის ზედაპირზე ტივტივებსო, სახეზე მთვარის შუქი ეფინებოდა, თვალები ფართოდ გახელილი და თითქოს კაჟისა ჰქონდა. ენა პირიდან გადმოვარდნოდა.

- მკვდარია! - ქვითინებდა ფრენსინი, - ოო, მკვდარია! მკვდარი!

ლავინია მილიარდობით თბილი ჩრდილის გარემოცვაში, კალიებისა და ბაყაყების ყაყანში გაქვავებულიყო.

- ჰოლიციას უნდა შევატყობინოთ! - როგორც იქნა, გამოერკვა ლავინია.

\* \* \*

- მომეხვიე, ლავინია, გთხოვ, მომეხვიე, მაჟრჟოლებს. ოჰ, ასეთი სიცივე ცხოვრებაში არ მიგრძნია!

ლავინიამ ფრენსინი გულში ჩაიკრა, ჰოლიციელები ხრამუნა ბალახს ჩხრეკდნენ, პროჟექტორები სერავდნენ ღამეს და ხმები ერთმანეთში ირეოდა. ცხრის ნახევარი გამხდარიყო.

- გეგონება, დეკემბერიაო. ნეტავ ახლა სვიტრი მეცვას, - თვალდახუჭული ჩურჩულებდა ფრენსინი და უფრო მაგრად ეკვროდა ლავინიას.

ჰოლიციელმა უთხრა:

- ვფიქრობ, ახლა შეგიძლიათ წაბრძანდეთ, ქალბატონებო. ხვალ, თუ არ შეწუხდებით, განყოფილებაში შემოიარეთ, კიდეც რამდენიმე შეკითხვას დაგისვამთ.

ლავინია და ფრენსინი ბარბაცით გამორდნენ ჰოლიციელებსა და ტილოგადაფარებულ იმ ფაქიზ საგანს, ხვის ბალახზე რომ ესვენა.

ლავინიას საკუთარი სხეულის შიგნით ყურისწამლები გულისცემა ესმოდა და თვითონაც თებერვლის ყინვისაგან ითოშებოდა; მთელ სხეულზე თითქოს თოვლის ფანტელები ეფრქვეოდა, თლილი თითები მთვარის შუქზე კიდეც უფრო უქათქათებდა. მოაგონდა, რომ ჰოლიციელთა შეკითხვებს სულ

თვითონ პასუხობდა, ფრენსინი კი მხოლოდ მის მკერდს ეკვროდა და ქვითინებდა.

შორიდან გამოსძახეს:

- ხომ არ გაგაცილოთ, ქალბატონებო?

- არა, გმადლობთ, - უპასუხა ლავინიამ ამ უსხეულო ხმას და ორივემ გზა განაგრძო. ჩურჩულითა და სისინით, შრიალითა და ტკაცვანით სავსე ხევში მიაბიჯებდნენ და მათ ზურგს უკან მიტოვებული გამოძიების სამყარო თანდათან სულ უფრო უსუსური ჩანდა, მისი ხმები და სინათლეები წყვდიადის ოკეანეში სულ უფრო ილეოდა.

- მიცვალებული აქამდე არასოდეს მინახავს, - თქვა ფრენსინმა.

ლავინიამ ისე დახედა თავის მაჯის საათს, თითქოს ის უსასრულოდ შორს, ვიღაც უცხოს მაჯაზე შებმული უცხო საგანი ყოფილიყო.

- ჯერ მხოლოდ ცხრის ნახევარია. შეგვიძლია ელენს გავუაროთ და კინოსეანსაც მივუსწროთ.

- კინოსეანსს?! - ფრენსინმა მისი მკლავებიდან გაითავისუფლა თავი.

- ახლა სწორედ ეს გვჭირდება გულის გადასაყოლებლად. ასეთი რამ უნდა დაივიწყო. ახლა შინ რომ წავიდეთ, სამუდამოდ დაგვამახსოვრდება. კინოში უნდა წავიდეთ, ვითომ არც არაფერი მომხდარა.

- ლავინია, ამას სერიოზულად ამბობ?

- ასე სერიოზული არასდროს ვყოფილვარ. ახლა სიცილი და თავდავიწყება გვჭირდება.

- კი მაგრამ, ელიზაბეთი აქ წევს... შენი და ჩემი მეგობარი...

- მას ვედარაფერს ვუშველით. მხოლოდ საკუთარ თავს შეიძლება ვუშველოთ. წამოდი.

ქალები ხევის გასწვრივ ქვით მოპირკეთებულ ბილიკს გაუყვნენ. მოულოდნელად წინ ვიღაც დახვდათ: დაგლას სპოლდინგი სრულიად უძრავად იდგა, მათ ვერ ამჩნევდა, რადგან თვალს ვერ სწყვეტდა ქვევით მოფუსფუსე სინათლეებსა და ზეწარგადაფარებულ ცხედარს და პოლიციის თანამშრომლების ხმებს უსმენდა.

ბიჭი მთვარის შუქზე სოკოსავით ფითრისფერი ჩანდა, მკლავები ჩამოემვა და მონუსხული ჩაჰყურებდა ხევს.

- შინ წადი! - დაუყვირა ფრენსინმა.

ბიჭმა ვერ გაიგონა.

- ეი, შენ! - არ ცხრებოდა ფრენსინი, - წადი შინ, ამ ადგილს გაეცალე, გესმის, ბიჭო? წადი სახლში!

დაგლასი შეკრთა, თავი მათკენ მიაბრუნა და ისე გამოხედა, თითქოს მათ მიღმა სიცარიელეს ამტერდებოდა. ტუჩები აამოძრავა და კიკინისმაგვარი ბგერები ამოუშვა. შემდეგ უხმოდ შეტრიალდა და გაიქცა. ხმის ამოუღებლად აირბინა აღმართი და თბილ წყვდიადში გაუჩინარდა.

ფრენსინს კვლავ ქვითინი აუვარდა, ტიროდა და თან ლავინია ნებსთან ერთად გზას განაგრძობდა.

\* \* \*

- სად ხართ ამდენ ხანს, ქალბატონებო? უკვე აღარ მეგონა, თუ მოხვიდოდით! - ელენ გრიერი უკმაყოფილოდ აბაკუნებდა ფეხებს თავისი კიბის თავზე, - მხოლოდ ერთი საათით დაიგვიანეთ, სულ ეს არის. რამე მოხდა?

- ჩვენ... - დაიწყო ფრენსინმა.

ლავინიამ მკლავზე მაგრად მოუჭირა ხელი.

- გზაზე დიდი აურზაური იყო, ვიღაცას ხევში ელიზაბეთ რემსელი უპოვია.

- მკვდარი? მ...მ...ოკლეს?

- ვინ იპოვა?

ლავინია ფრენსინის მაჯას ჩააფრინდა.

- არ ვიცი.

სამი ქალი ზაფხულის ღამეში იდგა და ერთურთს მისჩერებოდა.

- ყველაზე მეტად ახლა შინ შესვლა და კარის ყველა საკეტით ჩარაზვა მინდა, - როგორც იქნა, ამოთქვა ელენმა.

მაგრამ, საბოლოოდ, მაინც შებრუნდა შინ ჟაკეტისათვის, რადგან, სიცხის მიუხედავად, მანაც ერთბაშად ზამთრის ღამის სუსხი შეიგრძნო. ვიდრე გამოვიდოდა, ფრენსინმა შემლილი სახით ჩასჩურჩულა მეგობარს:

- რატომ არ უთხარი?

- ტყუილად რისთვის ავაფორიეკოთ? - უპასუხა ლავინიამ, - ხვალ ვეტყვით. ხვალ ხომ უამრავი დრო გვექნება.

ქალები ქუჩაში გამოვიდნენ და ბნელ ხეივანში, უეცრად ჩარაზული სახლების გასწვრივ ჩაიარეს. ახალ ამბავს ხევიდან ელვისებურად ამოუღწევია და სახლიდან სახლში, ჰარმალიდან ჰარმაღზე, ტელეფონის ერთი ხაზიდან მეორეზე გავრცელებულა. სამი მეგობარი გრძნობდა ფარდაჩამოშვებული ფანჯრებიდან მათკენ მომართულ იჭვნეულ მზერებს და საკეტების ტკაცავნიც ესმოდა. რა გამოაგნებლად იცვალა სახე ვანილისა და „ესკიმოს“ ცივი სიტკბოთი გაჟღენთილმა, ბავშვების ჟრიამულით სავსე ღამემ, როდესაც

ყველა ბავშვი ერთბაშად შინ შეყარეს და ხისა და მინის მიღმა გამომარყვდი-  
ეს; მხოლოდ ნაყინი შემორჩენილიყო მარწყვისა და ლაიმის მდნარ გროვე-  
ბად, აქა-იქ, სადაც ბავშვებს თამაში შეაწყვეტინეს. ჭეშმარიტად უცნაური  
იყო ბრინჯაოს ურდულებსა და საკეტებს მიღმა დახშული ოთახები, სადაც  
ოფლში გაწურული ადამიანები იგულებოდნენ. ფეხით გაუთელავ მოღზე  
ბეისბოლის ბიტები და ბურთები ეყარა. ცარცით სანახევროდ დახაზულ და  
მიტოვებულ კლასობანას უჯრედებს მლუდარე ქვაფენილზე ორთქლი ასდი-  
ოდა.

- ნამდვილად გავგიჟდით, ასეთ ღამეში გარეთ რომ გავდივართ, - თქვა  
ელენმა.

- მარტოხელა მკვლელი სამ ქალს არ გაეკარება, - მიუგო ლავინიამ, - ჩვე-  
ნი უსაფრთხოება ჩვენს სიმრავლეშია, თანაც, ასე სწრაფად თავს აღარავის  
დაესხმება. მკვლელობები მუდამ ერთი თვის შუალედით ხდება.

მათ შეშინებულ სახეებს ვიდაცის ჩრდილი გადაეფარა. ხის უკან ბუნდო-  
ვანი ფიგურა დალანდეს. თითქოს ვიდაცამ უხეშად ჩასცხო მუშტი ორგანის  
კლავიშებსო, ისე დაიკვილა სამივე ქალმა სხვადასხვა ხმაზე.

- ჩემს ხელთა ხართ! - დაიდრიალა უცნობმა მამაკაცმა და მკლავები მათ-  
კენ გამოიწვდინა. სინათლის არეში რომ მოექცა, სიცილი დაიწყო. ზურგით  
ხეს მიეყრდნო, ქალებისკენ თითი გაიშვირა და კვლავ გაიცილა.

- სალამი! მარტოხელა მკვლელი ვარ! - ეს ფრენკ დილონი იყო.

- ფრენკ დილონ!

- ფრენკ!

- ფრენკ, - მიმართა ლავინიამ, - ასეთი ბავშვური გამოხდომისთვის ღირ-  
სი ხარ, რევოლვერის მთელი მჭიდი დაგაცალონ!

- ეს რა ხუმრობაა!

ფრენსინმა ისტერიკული ტირილი მორთო.

ფრენკ დილონს ღიმილი სახეზე შეეყინა.

- კარგი, კარგი, ბოდიშს ვიხდი.

- მოგვცილდი! - უთხრა ლავინიამ, - არ გაგიგია, ელიზაბეთ რემსელი ხევ-  
ში მკვდარი რომ იპოვეს? შენ კიდევ დარბიხარ და ქალებს გულს უხეთქავ!  
ხმა აღარ გაგვცე!

- ოჰ, მართლა, მე არ...

ქალებმა გზა განაგრძეს. ფრენკი უკან გაედევნა.

- სჯობს აქვე დარჩე, მისტერ მარტოხელა მკვლელო, და საკუთარი თავი  
შეამინე. წადი, ელიზაბეთ რემსელის სახეს შეხედე და ნახე, როგორი სასა-  
ცილოა. ღამე მშვიდობისა! - ლავინიამ მეგობრებს ხელი ჩასჭიდა და

ვარსკვლავებით განათებულ ხეივანს გაუყვა. ფრენსინი მაგრად იკრავდა თვალეებზე ცხვირსახოცს.

- ფრენსინ, ეს უბრალოდ ხუმრობა იყო, - ელენი ლავინიას მიუბრუნდა, - ასე რატომ ტირის?

- გეტყვით, როცა ქალაქის ცენტრში ვიქნებით. რაც უნდა მოხდეს, სეანსს უნდა მივუსწროთ! კმარა. აბა, ფული მოამზადეთ, თითქმის მივედით!

\* \* \*

სანაყინე ბლანტი ჰაერის ტბორად გადაქცეულიყო, რომელსაც უზარმაზარი ხის ვენტილატორები ამღვრევდნენ და ტონიკის, არნიკის, სოდიანის ვისკის სურნელით გაჟღენთილ ნაკადებად უშვებდნენ ქუჩის ქვაფენილზე.

- ხუთი ცენტის ჰიტინის მწვანე კანფეტი მომეცით, - მიმართა ლავინიამ კაფეს მეპატრონეს. ამ კაცის სახე ისეთივე გაქვავებული და ფერმკრთალი ეჩვენა, როგორც ყველასი, ვინც კი ამ საღამოს დაცარიელებულ ქალაქში შემოხვდათ, - კინოსეანსის დროს მივირთვათ, - შენიშნა ლავინიამ, ვიდრე კაცი ვერცხლისფერი ნიჩბით სასწორზე ხუთი ცენტის კანფეტს დაყრიდა.

- ამ საღამოს ძალიან კოხტად გამოიყურებით, ქალბატონებო. მის ლავინია, დღეს შოკოლადის კოქტეილისათვის რომ შემოიარეთ, ისეთი მომხიბლავი ბრძანდებოდით, ისეთი წარმტაცი, რომ ერთმა ადამიანმა თქვენ შესახებ გამომკითხა კიდევ.

- მართლა?

- ბართან ერთი ბატონი იჯდა, რომ გაბრძანდით, თვალი გაგაყოლათ, მერე კი მკითხა, ეს ვინ არისო. როგორ თუ ვინ, მის ლავინია ნებსი, ჩვენი ქალაქის ყველაზე მომხიბლავი გასათხოვარი ქალბატონი-მეთქი, ვუპასუხე. მართლაც მშვენიერიყო, ასე მითხრა და მკითხა, სად ცხოვრობსო, - ამის შემდეგ კაფეს მეპატრონე უხერხულად დადუმდა.

- მერე, - აღელდა ფრენსინი, - იმედია, უცნობისათვის მისი მისამართი არ გითქვამთ? ხომ არ გითქვამთ?

- იცით, იმწუთას არაფერზე დავფიქრებულვარ, სხვათა შორის შევნიშნე, პარკ-სტრიტზე, ხევის გაყოლებაზე-მეთქი, მაგრამ ახლა, წუთის წინ რომ გავიგე, თურმე გვამი უპოვიათ, გავიფიქრე, ეს რა ჩავიდინე-მეთქი, - კაცმა ლავინიას მოსალოდნელზე უფრო მძიმე შეკრულა მიაწოდა.

- თქვე სულელო! - შეჰყვირა ფრენსინმა და თვალეებზე ცრემლი მოადგა.

- ვწუხვარ, თუმცა, იქნებ სანერვიულო არაფერიი.

ლავინია სამი ადამიანის დაჟინებული მზერის შუაგულში იდგა და სრულებით არაფერს გრძნობდა, მღელვარებისაგან ყელში სულ ოდნავი ჩხვლეტის გარდა. კაცს მექანიკურად გაუწოდა ხურდა ფული.

- ამ კანფეტის საფასურს არ გამოგართმევთ, - უპასუხა გამყიდველმა და შესაფუთი ქაღალდის დასტას მიუბრუნდა.

- ახლა მე ვიცი, რასაც გავაკეთებ! - ელენი სწრაფი ნაბიჯით გავიდა სანაყინედან, - ამ წუთსავე ვიძახებ ტაქსის და ყველანი შინ ვბრუნდებით! არ ვაპირებ, შენს მღევარს ხელი შევუწყო. ლავინია, არა მგონია, იმ კაცს, შენ რომ გიკითხა, კეთილი ზრახვა ამოძრავებდეს. ხომ არ გსურს, შემდეგში შენ გიპოვონ ხევში მკვდარი?

- ჩვეულებრივი კაცი იქნებოდა, - ლავინია ნელა შემობრუნდა ქუსლებზე და ქალაქს გახედა.

- ჰო, ფრენკ ღილონიც ჩვეულებრივი კაცია, მაგრამ ვინ დაიფიცებს, რომ სწორედ ის არ არის მარტოხელა მკვლელი?

ახლადა შენიშნეს, რომ ფრენსინი არ გამოჰყოლიათ, შებრუნდნენ და პირისპირ შეეჩხნენ მას.

- გამყიდველს იმ კაცის გარეგნობა აღვაწერინე. აქაური არ ყოფილა, ვიდაც უცხოა, - მოახსენა ფრენსინმა მეგობრებს, - მუქი კოსტიუმი ეცვა, ფერმკრთალი და გამხდარი იყო.

- ყველანი აღელვებულები ვართ, - თქვა ლავინიამ, - ტაქსის რომ გამოვუძახოთ, მე მაინც არ ჩავჯდები. თუკი მაინცდამაინც მე უნდა გავხდე შემდეგი მსხვერპლი, დაე, ასე იყოს. ცხოვრება მეტისმეტად მოსაწყენია, განსაკუთრებით ოცდაცამეტი წლის შინაბერასათვის, და ნუ გამიწყრებით, თუკი ამ მღელვარების სრულად დაგემოვნებას ვცდილობ. რაც უნდა იყოს, ყველაფერი სისულელეა, მე არა ვარ ლამაზი.

- როგორ არა ხარ, ლავინია! ქალაქში ულამაზესი ხარ, მას შემდეგ, რაც ელიზაბეთი... - ფრენსინს ხმა ჩაუწყდა, - მამაკაცებთან თავი ასე მკაცრად რომ არ გეჭიროს, დიდი ხანია, გათხოვილი იქნებოდი!

- მორჩი თვალთმაქცობას, ფრენსინ! აგერ, კინოთეატრის სალაროც, მე ვიხდი ორმოცდაერთ ცენტს, რათა ჩარლი ჩაპლინი ვნახო, თქვენ კი, ქალბატონებო, თუკი ტაქსი გჭირდებათ, კარგად ბრძანდებოდეთ. კინოშიც მარტო ვივლი და შინაც მარტო დავბრუნდები.

- ლავინია, ხომ არ გაგიჟებულხარ? ამის უფლებას ვერ მოგცემთ! სამივენი კინოთეატრში შევიდნენ.

პირველი ნაწილი უკვე დასრულებულიყო, შესვენებას მიუსწრეს. მქრქალად განათებული დარბაზი თითქმის ცარიელი იყო. ქალები შუა რიგში

დასხდნენ და ძველისძველი, გაპრიალებული სპილენძის სუნი შეიყნოსეს. კინოთეატრის დირექტორმა გაცრეცილი წითელი ხავერდის ფარდა გადასწია და განცხადების გასაკეთებლად სცენაზე გადმოაბიჯა.

- პოლიციამ მიგვითითა, ამაღამ ადრე დავასრულოთ სენსი, რათა ყველამ შეძლოს შინ გვიანობამდე დაბრუნება. ამიტომაც მოკლე კინოფირებს აღარ გიჩვენებთ და დაუყოვნებლივ გადავალთ მთავარ ჩვენებაზე. სენსი თერთმეტ საათზე დასრულდება. ყველას გთხოვთ, პირდაპირ შინ დაბრუნდეთ და ქუჩებში არ შეყოვნდეთ.

- ეს უპირველესად ჩვენ გვეხება, ლავინია! - გადაულაპარაკა ფრენსინმა მეგობარს.

სინათლე ჩაქრა და ეკრანი გაცოცხლდა.

- ლავინია, - აჩურჩულდა ელენი.

- რა მოხდა?

- როდესაც აქ შემოვდიოდით, ქუჩის მოპირდაპირე მხარეს მდგარი მუქკოსტიუმიანი მამაკაცი ფეხდაფეხ გამოგვყვა, შემოვიდა და ახლა ჩვენ უკანა რიგში ზის.

- ოჰ, კარგი, ელენ!

- რაო, ჩვენ უკან?

სამივე ქალი რიგრიგობით შეტრიალდა.

ცისფერი ეკრანის მოციმციმე უკეთური შუქით განათებული ფერმკრთალი სახე დაინახეს, ნებისმიერი მამაკაცის წყვილიაღში გამკრთალ სახეს რომ წააგავდა.

- ახლავ ელენი დირექტორს დავუძახებ! - ელენი უკვე რიგებს შორის გასასვლელში გარბოდა, - შეაჩერეთ ფილმი! შუქი ანთეთ!

- ელენ, დაბრუნდი! - დაუძახა ფეხზე წამომდგარმა ლავინიამ.

გაზიანი წყლის ცარიელი ჭიქები მაგიდაზე წკრიალით დადგეს. სამივეს ზედა ტუჩს ვანილის ნაყინის თეთრი ულვაში უმშვენებდა, რომელსაც სიცილით ილოკავდნენ.

- ხედავ, რა სისულელე გამოდგა? - თქვა ლავინიამ, - სულ ტყუილებრად ლოდ ატეხე ალიაქოთი. რა უხერხულია.

- ძალიან ვწუხვარ, - თქვა ძლივს გასაგონად ელენმა.

საათი თორმეტის ნახევარს აჩვენებდა. საჩქაროდ გამოვიდნენ ჩაბნელებული კინოთეატრიდან, ხალხის ჩოჩქოლს გაერიდნენ. ყველანიშინ მიიჩქაროდნენ, თან გზადაგზა ელენს დასცინოდნენ. ახლა თვითონაც ცდილობდა საკუთარი საქციელის მასხრად აგდებას.



- ელენ, რიგებს შორის რომ ირბინე და შუქი აანთეთო, დაიძახე, მეგონა, სირცხვილით მოკვდებოდი! საბრალო კაცი!

- კინოთეატრის დირექტორის რასინელი ძმა არ ყოფილა?!

- ბოდიში ხომ მოვუხადე, - ჩაილაპარაკა ელენმა და ჭერქვეშ შეუჩერებლად მოტრიალე ვენტილატორებს ახედა, კვლავაც და კვლავაც რომ აზავებდა ღამის თბილ ჰაერს ვანილის, პიტნის, ჟოლოსა და ლიზოლის<sup>31</sup> სურნელით.

- ამ მინერალური წლის დასალევად სულ ტყუილად შევყოვნდით, პოლიციამ ხომ გაგვაფრთხილა...

- ოჰ, პოლიცია, - გაეცინა ლავინიას, - მე არაფრის არ მეშინია. მარტოხელა მკვლელი ახლა მილიონი კილომეტრის მოშორებითაა. აქ რამდენიმე კვირას აღარ დაბრუნდება, მერე კი პოლიცია აუცილებლად დაიჭერს, აი, ნახავთ, თუ არა! ხომ მშვენიერი ფილმი იყო?

- კაფე იკეტება, ქალბატონებო, - თქვა მეპატრონემ და თეთრი ფილებით მოპირკეთებულ გრილ სიჩუმეში შუქი ჩააქრო.

ქუჩები ერთიანად მოსუფთავებული დახვდათ: არც ადამიანები ჩანდნენ, არც მანქანები, არც ურიკები.

მაღაზიების პატარა ვიტრინებში კამკაშა სინათლეები ენთო და ცვილის მანეკენებს ცისფრად და თეთრად მობდღვრიალე ბრილიანტისბეჭდებიანი ხელები აეწიათ, ანდა მაღალი წინდების გამოსაჩენად გადაპრანჭულად გამოეშვირათ ნარინჯისფერი ცვილის ფეხები. ცისფერ შუშის თვალებს აყოლებდნენ ცარიელ ქუჩაში გამოსულ ქალებს, რომელთა ანარეკლებიც ვიტრინებში სწრაფი ნაკადის მოცანცახე ყვავილებივით ლივლივებდა.

- როგორ ფიქრობთ, რომ დავიყვიროთ, რამეს მოიმოქმედებენ?

- ვინ?

- მანეკენები, ვიტრინის ადამიანები.

- კარგი რა, ფრენსინ.

- ჰო, კარგი.

ვიტრინებში ათასობით ადამიანი იდგა მდუმარედ, გაშეშებული, და მხოლოდ სამი ადამიანი მიდიოდა ქუჩაში, გავარვარებულ ქვაფენილზე მათი ქუსლების ბაკუნი მოპირდაპირე მხარის კედლებიდან გასროლის ხმის მსგავს ექოს გამოსცემდა.

წითელი ნეონის წარწერა მქრქალად ციმციმებდა და ახლოს რომ ჩაუარეს, მომაკვდავი მწერის ბზუილით გააცილა სამივე.

<sup>31</sup> ლიზოლი - საღებავების საშუალება.

მათ წინ სიცხისაგან დამწვარი თეთრი ხეივნები გადაშლილიყო. ვეება ხეები, ქარი მხოლოდ მათალ კენწეროებს რომ უმოძრავებდა, ორი მხრიდან შრიალით დასდგომოდნენ თავს სამ პატარა ქალს. სასამართლოს სახურავიდან რომ გამოგებდათ, ნარშავას სამ ყვავილს მოგაგონებდნენ.

- ჯერ შენ უნდა მიგაცილოთ, ფრენსინ.

- არა, პირიქით, მე გაგაცილებთ.

- გონს მოდი. შენ ხომ იმსიშორეზე, ელექტრიკ-პარკის<sup>32</sup> გვერდით ცხოვრობ. მე რომ მიმაცილო, ხევის გავლით სულ მარტოს მოგიწევს შინ დაბრუნება და ზედ ფოთოლიც რომ დაგეცეს, შიშისაგან გული გაგისკდება.

ფრენსინი არ დაიბნა:

- ამაღამ შენთან დავრჩები. ჩვენ შორის ყველაზე ლამაზი ხომ შენ ხარ!

ამ გადაწყვეტილების მიღებისთანავე განაგრძეს სვლა, სამი ზრდილი, მედიდური ლანდივით მიცურავდნენ ბალახისა და ცემენტის ამ ოკეანეში; ლავინია თვალს აყოლებდა ორივე მხარეს ჩამწკრივებულ შავ ხეებს, ყურს უგდებდა მეგობრების ჩურჩულსა და ნაძალადევ სიცილს. დამემ თითქოს მსვლელობას დაუქარაო: თუმცა, ნელა მიაბიჯებდნენ, მაინც ეჩვენებოდა, რომ გარბოდნენ, ყველაფერი დაჩქარებულიყო და ყველაფერს ცხელი თოვლის ფერი ედო.

- მოდი, ვიმღეროთ, - შესთავაზა მეგობრებს ლავინიამ.

სამივენი ამღერდნენ:

- „ანათე, ანათე, თიბათვის მთვარევ...“

სიმღერა ტკბილი და მშვიდი იყო, მკლავები ერთერთს გადახვიეს და უკანმოუხედავად მიაბიჯებდნენ. გრძნობდნენ, მათ ფეხქვეშ ცხელი ტროტუარი თანდათან როგორ გრილდებოდა და წინ, წინ მიიწევდნენ.

- ყური დაუგდეთ! - შეჩერდა ლავინია.

ზაფხულის დამეს მიაყურადეს. ჭრიჭინები ჭრიჭინებდნენ და სასამართლოს შენობის საათის შორეულმა ხმამ ამცნოთ, რომ თორმეტს ხუთი წუთი აკლდა.

- ყური დაუგდეთ!

ლავინიამ მიაყურადა. სიბნელეში საქანელამ დაიჭრიალა და ქალებმა შენიშნეს მისტერ ტერლი, უხმოდ, განმარტოებით რომ იჯდა თავის პარმადზე, ყურადღებას არავის აქცევდა და ძილის წინ უკანასკნელ სიგარას აბოლებდა. დაინახეს, ვარდისფერი ფერფლი აქეთ-იქით როგორ იფრქვეოდა.

<sup>32</sup> ელექტრიკ-პარკი - გასართობი ადგილი, პავილიონი, რომელიც XX საუკუნის დასაწყისში გაკეთდა ტროლეუბუსების პარკებში და ენერგეტიკულ და ტრამვა-ების კომპანიებს ეკუთვნოდა.

გარშემო თანდათან, თანდათან ქრებოდა სინათლეები. ყველა სახლის, ყველა ოთახის ჭადი, ყველა ღამის ლამპა, ეზოს ყველა მწვანე ფარანი, ყველა სანთელი, ნავთის ლამპა, პარმადის განათება სიბნელემ შთანთქა, ყველაფერი ცხრაკლიტულშია ჩარაზული, რკინის, ფოლადის, მძიმე ფარდების მიღმა მომწყვდეული, დაჩრდილული, გაიფიქრა ლავინიამ. წარმოიდგინა ადამიანები თავიანთ მთვარით განათებულ საწოლებში. რა მშვიდად, უშფოთველად სუნთქავდნენ თბილ ოთახებში ერთურთის გვერდით. „ჩვენ ნაბიჯების ხმა კი ცხელ ქუჩას ექოდ ეხლება, ლამპიონები ეულად დაგვნათიან და ჩვენს ჩრდილებს მთვრალეებივით აბარბაცებენ“.

- აი, შენი სახლიც, ფრენსინ, ღამე მშვიდობისა.

- ლავინია, ელენ, ამაღამ აქ დარჩით. უკვე გვიანია, თითქმის შუაღამეა. შეგიძლიათ სასტუმრო ოთახში დაიძინოთ. ცხელ შოკოლადს მოვადულებ. კარგად გავერთობით! - ფრენსინი ორივეს გულში იკრავდა.

- არა, გმადლობ, - უპასუხა ლავინიამ.

ფრენსინი ატირდა.

- ოჰ, ისეუ ტირი, ფრენსინ? - შეარცხვინა ლავინიამ.

- არ მინდა, რომ მოკვდე, - ქვითინებდა ფრენსინი, ცრემლები დაჰაღუპით ჩამოსდიოდა ლოყებზე, - ისეთი კარგი ხარ, ისეთი მშვენიერი, მინდა, რომ იცოცხლო! გთხოვთ, ო, გთხოვთ!

- ფრენსინ, არ მეგონა, ეს ამბავი ასე თუ აგაღელვებდა. გპირდები, როგორც კი შინ მივალ, მაშინვე დაგირეკავ.

- ოჰ, მართლა?

- აბა რა, და გეტყვი, რომ შინ მშვიდობით მივაღწიე. ხვალ კი ელექტრიკ-პარკში პიკნიკი მოვაწყობ. მე თვითონ მოვამზადებ ლორის სენდვიჩებს, რას იტყვი? მე არასოდეს მოვკვდები, აი, ნახავ!

- ესე იგი, დამირეკავ?

- ხომ დაგპირდი!

- კარგად! ღამე მშვიდობისა! - ფრენსინმა კიბეზე აირბინა და კარს მიეფარა, კარი თავისით მიჯახუნდა და შიგნიდან იმწამსვე ურდულის ხმა გაისმა.

- ახლა კი, - მიუბრუნდა ლავინია ელენს, - შენ მიგაცილებ.

\* \* \*

სასამართლოს შენობის საათმა შუაღამის მაუწყებლად ჩამორეკა. მისი ხმა ტალღებად გადაეკლო ცარიელ ქალაქს: ასეთი დაცარიელებული ჯერ

არასოდეს ყოფილა. ხმა თანდათან მიწყდა უკაცრიელი ქუჩების, უდაბური ეზოების, დაცლილი გაზონების მიღმა.

- ცხრა, ათი, თერთმეტი, თორმეტი, - ითვლიდა ლავინია და თან ელენის გვერდით მიაბიჯებდა.

- თავს უცნაურად არ გრძნობ? - ჰკითხა ელენმა.

- რას გულისხმობ?

- ჩვენ აქ ხეივანში დავდივართ, სხვას ყველას კი ჩარაზულ კარს მიღმა მშვიდად სძინავს. პრაქტიკულად, ათასი კილომეტრის რადიუსზე ჩვენ გარდა გარეთ ადარავინაა.

ბნელ, უძირო, თბილ ხევთან დიდხანს უმზერდნენ ერთმანეთს თვალებში. დამის ნიაჰმა ჩაიქროლა და მოთიბული ბალახის სურნელი დააფრქვია. ჩამავალ მთვარეს ღრუბლები ეპარებოდნენ.

- მგონი, აზრი არა აქვს თხოვნას, რომ ჩემთან დარჩე, ასეა, ლავინია?

- არა, წავალ.

- ზოგჯერ...

- რა - ზოგჯერ?

- ზოგჯერ მგონია, ადამიანები თავად ირჩევენ სიკვდილს. მთელი საღამო უცნაურად იქცეოდი.

- უბრალოდ, არ მეშინია, - უპასუხა ლავინიამ, - თანაც, მგონი, ცნობისმოყვარეობაც მძალავს. გარდა ამისა, ვცდილობ, ლოგიკურად ვიმსჯელო. მარტოხელა მკვლელი ახლოს ვერ იქნება: პოლიცია გაფრთხილებულია და ყველა ფხიზლად არის.

- მთელი პოლიცია ახლა სახლებშია შეყუჟული, ყველას ყურებამდე სწვდება საბნები.

- მოდი, ასე ვთქვათ: აზარტში ვარ შესული, თუმცა, ზღვარს არ გადავდივარ. ჩემს სიცოცხლეს მართლაც საფრთხე რომ ემუქრებოდეს, მერწმუნე, შენთან დავრჩებოდი.

- შესაძლოა, შენი არსების რაღაც ნაწილს სიცოცხლე ადარ სურს.

- შენ და ფრენსინი გამაგიჟებთ!

- სინდისი მქენჯნის. იმ წუთში, როდესაც ხევის ძირში, ხიდზე იქნები, მე ცხელი კაკას სმით ვიქნები დაკავებული.

- ერთი ჭიქა ჩემ მაგივრადაც დალიე. დამე მშვიდობისა.

ლავინია ნებსი მარტოდმარტო გაუყვა ზაფხულის სიჩუმეში ჩაფლულ შუადამის ქუჩას. თვალი შეავლო ჩაბნელებულფანჯრებიან სახლებს, შორიდან ძაღლის ყეფა გაიგონა. ხუთ წუთში შინ ვიქნები, გაიფიქრა. ხუთ წუთში დავურეკავ ჩერჩეტ ფრენსინს, ხუთ წუთში.

უცებ მამაკაცის ხმა მოესმა.

შორს, ხეების ძირში, ვიღაც მდებოდა.

- „ო, ივნისის ღამე, მთვარე და შენ...“

ლაზინიამ სვლას ოდნავ აუჩქარა.

- „შენს მკლავებში. სულზე უტკბესო...“ - გრძელდებოდა სიმღერა...

ქუჩის ბოლოში, მთვარის მკრთალ შუქზე, ვიღაც კაცი ნელა და თითქოს უდარდელად მოსეირნობდა.

თუ დამჭირდა, ამ სახლებიდან რომელიღაც კარზე დავაბრახუნებ, გაუელვა თავში ლაზინიას.

- „ო, ივნისის ღამე...“ - მდებოდა კაცი. ხელში გრძელი ჯოხი ეკავა, - „მთვარე და შენ...“ ოჰ, ვის ვხედავ! ასე გვიან გარეთ რამ გამოგიყვანათ, მის ლაზინია!

- ოფიცერო კენედი!

მართლაც ის იყო.

- სჯობს, შინ მიგაცილოთ.

- გმადლობთ, არ არის საჭირო.

- მაგრამ თქვენ ხომ ხევის გადაღმა ცხოვრობთ...

ასეა, გაიფიქრა ქალმა, მაგრამ არაფრისდიდებით არ ჩავალ ხევში მამაკაცთან ერთად, თუნდაც ის ოფიცერი იყოს. რა ვიცი, ვინ არის სინამდვილეში მარტოხელა მკვლეელი?

- არა, - უპასუხა, - სწრაფად გადავალ.

- აქ მოვიცდი, - უთხრა კაცმა, - დახმარება თუ დაგჭირდათ, დაიყვირეთ. აქ ხმა შორ მანძილზე ისმის, მაშინვე თქვენთან გავჩნდები!

- დიდი მადლობა.

გზა განაგრძო, ჩუმად მოდიდინე კაცი ქუჩის ლამპიონის ქვეშ დატოვა.

ესეც ასე, გაიფიქრა.

აი, ხევიც.

ნაპირზე იდგა და გადაჰყურებდა ციცაბო კლდეში ჩატანებულ ასცამეტ-საფეხურიან კიბეს, რომლის გაყოლებაზე სამოცდაათი მეტრი სიგრძის ხიდი იყო გასავლელი, შემდეგ ისევ მადლა, პარკ-სტრიტიკენ უნდა ასულიყო. და ამ ყველაფერს მხოლოდ ერთი ლამპიონი ანათებდა. სამ წუთში გასადებს ამოვიღებ და ჩემს კარს გავადებ, გაიფიქრა. მხოლოდ ას ოთხმოც წამში ისეთი რა უნდა მოხდეს?

გრძელ, მუქმწვანე საფეხურზე გადააბიჯა და ხევში ჩასვლას შეუდგა.

- ერთი, ორი, სამი, ოთხი, ხუთი, ექვსი, შვიდი, რვა, ცრა, ათი საფეხური, - ითვლიდა ჩურჩულვით.

ეჩვენებოდა, მივრბივარო, მაგრამ სინამდვილეში არ მირბოდა.

- თხუთმეტი, თექვსმეტი, ჩვიდმეტი, თვრამეტი, ცხრამეტი, ოცი საფეხური, - წამით სული მოითქვა და საკუთარ თავს მოახსენა, - გზის ერთი მეოთხედი გამოვლილია!

ხევი უძირო ჩანდა და შავი, ისეთი შავი! მსოფლიო ზურგს უკან დარჩა და სამუდამოდ გაქრა: საწოლებში მომყუდროებული ადამიანები, ჩარაზული კარი, ქალაქი, კაფე, კინოთეატრი, ლამპიონები, - ყველაფერი გამქრალიყო. ერთადერთი, რაც კიდევ არსებობდა და მის გარშემო თავისი გოლიათური, ბნელი სიცოცხლით ცოცხლობდა, ეს ხევი იყო.

- ხომ არაფერი მომხდარა? სულ არაფერი. ხომ არავინაა აქ? არავინ. ოცდაოთხი, ოცდახუთი საფეხური. გახსოვს ის საშინელი ამბავი, ერთმანეთს ბავშვობაში რომ ვუყვებოდით?

საფეხურებზე საკუთარი ქუსლების ხმას მიაყურადა.

- ვყვებოდით, შავი კაცი როგორ შემოდის შენს სახლში, შენ კი ამ დროს მეორე სართულზე საწოლში წევხარ. ახლა ის პირველ საფეხურზეა და შენი ოთახისაკენ ამოდის. ახლა მეორე საფეხურზეა, ახლა მესამე, მეოთხე, მეხუთე საფეხურზეა! ოჰ, როგორ იცინოდა და კიოდა ამ ამბის მოსმენისას! აი, საშინელი კაცი უკვე მეთორმეტე საფეხურზე დგას, აი, შენი ოთახის კარს აღებს, აი, უკვე შენს საწოლთან დგას. დაგიჭირე!

ლავინიამ დაიკვივლა. ასეთი კვილი ჯერ არასოდეს გაუგონია. ასე ხმა-მადლა სიცოცხლეში არასოდეს უყვირია. შეჩერდა, გაშეშდა, ხის მოაჯირს მიეკრა. გული ლამის გასკდომოდა. შეშლილ გულისცემას მთელი სამყარო აევსო.

- აგერ, აგერ! - დაიკვივლა, - კიბის ძირში, ლამპიონის ქვეშ კაცი დგას! არა, აღარ დგას! მე მელოდებოდა!

იყუჩა და ყური დაუგდო.

სიჩუმე.

ხიდი ცარიელი იყო.

არაფერია, უთხრა საკუთარ თავს და ხელი გულზე მიიჭირა. შე სულელო! რამ მომაცოლინა თვითონვე ეს ამბავი? რა სისულელე იყო! ახლა რა ვქნა?

გულისცემა დაუცხრა.

ოფიცერს ხომ არ დავუძახო, ნეტავი ჩემი კვილი თუ გაიგონა?

ისევ ყური დაუგდო. არაფერი. არანაირი ხმა.

გზას გავაგრძელებ. ამ სულელური ამბის ბრალია.

ისევ განაგრძო საფეხურების თვლა.

- ოცდათხუთმეტი, ოცდათექვსმეტი, ფრთხილად, არ დაგორდე. ო, რა სულელი ვარ! ოცდაჩვიდმეტი, ოცდათვრამეტი, ოცდაცხრამეტი და ორმოცი, კიდევ ორი - ორმოცდაორი და თითქმის შუაში ვარ.

კვლავ ადგილზე გაიყინა.

მოიცადე, უთხრა საკუთარ თავს.

ნაბიჯი გადადგა, ექო გაისმა.

კიდევ ერთი ნაბიჯი.

კვლავ ექო: წამის მეათასედში გამეორებული მისივე ფეხის ხმა.

- ვიღაც მომდევს, - წასჩურჩულა ქალმა ხევს, ბნელეთის ჭრიჭინებს, ჭაობისფერ ბაყაყებსა და შავ ნაკადს, - ვიღაც ფეხდაფეხ მომდევს. უკან მოხედვას ვერ გავბედავ.

კიდევ ერთ ნაბიჯს კიდევ ერთი ექოს ხმა გამოეხმაურა.

- ჯერ ნაბიჯს გადავდგამ, ისიც დგამს ნაბიჯს.

ნაბიჯი - ექო.

- ოფიცერო კენედი, თქვენ ხართ? - სუსტი ხმით ჰკითხა ხევს.

ჭრიჭინები დუმდნენ.

ჭრიჭინები ყურს უგდებდნენ. დამეც ქალის ფეხის ხმასა და სიტყვებს აყურადებდა. შორეულ მდელოებსა და ახლო მდგომ ხეებს სუნთქვა შეეკრათ; ყველა ფოთოლს, ბუჩქს, ვარსკვლავს, ბალახის ღერს ჩვეული რიტმი დაერღვია და ლავინია ნების გულისცემას აყურადებდა. და ვინ იცის, იქნებ ამ წუთში შორს, მატარებლისათვის ამაოდ მომლოდინე ველებს შორის ჩაკარგულ ცარიელ ბაქანზე, შიშველი ნათურის მქრქალ შუქზე გაზეთზე თავჩაქინდრულ ეულ მოგზაურსაც თავი აეწია და სმენად ქვეუღიყო. ნეტავ რა არისო, გაიფიქრებდა, ალბათ, და მაშინვე გადაწყვეტდა: მხოლოდ ზაზუნა ურტყამსო თათებს ფუტურო მორზე. არადა, ლავინია ნების იყო, ნამდვილად და უეჭველად მისი გულისძგერა იყო.

სიჩუმე. ზაფხულის დამის სიჩუმე, ათასობით კილომეტრზე რომ გაწოლილა, თეთრ შუქჩრდილებთან ზღვასავით რომ ფარავს მიწის ზედაპირს.

ჩქარა, ჩქარა! ქალმა კიბეზე ჩასვლა განაგრძო.

გაიქეცი!

უცრად მუსიკა მოესმა. რაღაც გიჟური, სულელური ახირებით თავზე მუსიკის ვეებერთელა ტალღა გადაევლო და როდესაც ძრწოლითა და ჰანკით ატანილი გარბოდა, გაიაზრა, რომ გონების რაღაც ნაწილით მოვლენებს გარეშე მაყურებელივით დრამატულად განიცდიდა, რომელიდაც მდეღვარე მიუზიკლიდან ნასესხებ ჰირად დრამად აქცევდა, მუსიკა მძვინვარებდა და

სულ უფრო სწრაფად მიაქროლებდა, სულ უფრო ქვევით, ხევის ფსკერისაკენ მიაქანებდა.

სულ ცოტაც დარჩა, გაიფიქრა მუდარით. ას რვა, ას ცხრა, ას ათი! მორჩა! ახლა სწრაფად! ხიდი!

უბრძანა ფეხებს, რა უნდა გაეკეთებინათ, მკლავებს, მთელ სხეულს, მთელ შიშს; თავისი არსების სათითაოდ ყოველი ნაწილი დაარიგა, როგორ მოქცეულიყო ამ საზარელ თეთრ მომენტში; ღელეში ღრიალით მოთქრიანე ნაკადის თავზე დაკიდებულ ამ მყიფე, დგაფდგაფა, თითქმის ცოცხალი, დრეკადი ფიცრების ხიდზე; უკან ისევ ის შეშლილი ფეხის ხმა მოსდევდა და კიდევ მუსიკა - ისევ ის მღელვარე, მორაკრაკე მუსიკა.

მოგდევს, არ შეტრიალდე, არ მიიხედო, თუ შეხედავ, ისე შეგეშინდება, რომ განძრევას ვეღარ შეძლებ. ოღონდაც გაიქეცი, გაიქეცი!

ხიდზე გადაირბინა.

ო, ღმერთო, ამ აღმართზე ამიყვანე! მადლა, ბილიკზე, ამ ბორცვებს შორის, ო ღმერთო, როგორ ბნელა, რა შორსაა ყველაფერი! ახლა რომც დავიყვირო, ვერავინ მიშველის; მაგრამ სულერთია, მაინც ვერ დავიყვირებ. აი, აღმართიც დასრულდა და ქუჩაც გამოჩნდა. ო, ღმერთო, გადამარჩინე. თუ შინ ცოცხალმა მივაღწიე, არსად აღარ წავალ მარტო; სულელი ვიყავი, უნდა ვადიარო, სულელი ვიყავი, შიში რას ნიშნავს, არ ვიცოდი, მაგრამ ამ საშინელებას თუ გადამარჩენ, ელენის ან ფრენსინის გარეშე აღარასოდეს გადავდგამ ფეხს! აი, ჩემი ქუჩაც.

ქუჩაზე გადაირბინა და ტროტუარი გადაკვეთა.

ო, ღმერთო, ჩემი ჰარმადი! ჩემი სახლი! ო, ღმერთო, გთხოვ, შინ შესვლა და კარის ჩაკეტვა მაცალე და აღარაფერი მიჭირს!

და უცბად - რა დროს ეგ იყო, მაგრამ რატომღაც მაინც შენიშნა - ჰარმადის მოაჯირზე ლიმონათის სანახევროდ დაცლილმა ჭიქამ გაიელვა, მან რომ დატოვა დიდი ხნის, წელიწადის თუ უფრო ნაკლები ხნის წინ! ლიმონათის ჭიქა მშვიდად და უდრტვინველად იდგა მოაჯირზე... და...

გაიგონა ჰარმადზე თავისი მოუქნელი ნაბიჯების ხმა, გრძნობდა, ხელი როგორ აჩხარუნებდა და ატრიალებდა საკეტში გასაღებს. ესმოდა თავისი გულისცემა. ესმოდა საკუთარი შინაგანი კვილი.

გასაღები გადატრიალდა.

სწრაფად, სწრაფად, კარი გააღე!

კარი გაიღო.

ახლა შედი. დახურე!

მთელი ძალით მიაბრახუნა კარი.



- ახლა გადაკეტე, ჩარაზე! - მტკივნეულად ამოიოხრა.

- მაგრად, მაგრად გადაკეტე!

კარი საკეტითა და ურდულით იყო ჩაკეტილი.

მუსიკა შეწყდა. ისევ დაუგდო ყური საკუთარ გულს: მისმა ხმამ იკლო და ბოლოს სიჩუმეში განზავდა.

შინ ვარ! ღმერთო, შინ უვნებელმა მოვაღწიე! უვნებელმა, უვნებელმა! უღონოდ მიეყრდნო კარს. ყველაფერი კარგადაა. უსმინე. ჩამიჩუმი არ ისმის. გმადლობ, ღმერთო, რომ გადამარჩინე. დამით აღარასოდეს გავალ გარეთ. შინ დავრჩები. ხევზე აღარასოდეს გადავალ. ო, რა კარგია, რა კარგია შინ ყოფნა! აქ ვერავინ მომმაგნებს, კარი დაკეტილია. მოიცადე.

ფანჯრიდან გაიხედე.

გაიხედე.

ხედავ, არავინაა! სულ არავინ. არც არავინ მომდევდა. სული მოითქვა და თითქმის გადაიხარხარა. ამას დიდი ფიქრი რად უნდა! მართლაც რომ გამომკიდებოდა ვინმე კაცი, დამეწეოდა კიდევ! მაინცდამაინც კარგად ვერ დავრბივარ... არც ჰარმადზე, არც ეზოში არავინაა. სულელი ვარ, რისთვის ვირბინე? ხევი ისეთივე უსაფრთხოა, როგორც ნებისმიერი სხვა ადგილი. რაც უნდა იყოს, მთავარია, შინ ვარ. შინ ყოფნას მართლა არაფერი სჯობს.

ხელი სინათლის გადასართველისკენ გაიშვირა, მაგრამ გაშეშდა.

- რა არის? - იკითხა, - რა არის, რა?

სასტუმრო ოთახში მის ზურგს უკან ვიღაცამ ყელი ჩაიწმინდა.

\* \* \*

- რა უბედურებაა, ყველაფერს გვიფუჭებენ!

- კარგი, ასე ნუ განიცდი, ჩარლი!

- აბა, აწი რაღაზე უნდა ვილაპარაკოთ? რა აზრი აქვს მარტოხელა მკვლელზე ლაპარაკს, თუ ცოცხალი აღარ არის? ვიდას შეეშინდება?

- შენი არ ვიცი, ჩარლი, - თქვა ტომმა, - მე კი ზაფხულის ყინულის სახლთან მივალ, კართან დავჯდები და წარმოვიდგენ, რომ ის ცოცხალია და ზურგზე ცივი ჟრუანტელი დამივლის.

- ეს თავის მოტყუება იქნება.

- რას იზამ, ვისაც როგორ შეუძლია, ისე გრილდება, ჩარლი.

დაგლასი ტომსა და ჩარლის ყურს არ უგდებდა. ლავინია ნების სახლს უყურებდა და თითქმის თავისთვის ლაპარაკობდა.

- წუხელ ხევში ვიყავი და დავინახე. ყველაფერი დავინახე. უკანა გზაზე ამ ადგილას გადმოვედი. პარმადის მოაჯირზე ჭიქა დავინახე, შიგ ნახევრამდე ლიმონათი ესხა. მისი დაღვევა მომინდა. ვიფიქრე, ავალ და დავლევ-მეთქი. ხევშიც და აქაც, ყველაფერს შევესწარი.

თავის მხრივ, არც ტომი და ჩარლი უგდებდნენ ყურს დაგლასს.

- ამიტომაც, - განაცხადა ტომმა, - არა მგონია, მარტოხელა მართლაც მკვდარი იყოს.

- ამ დილას აქ არ იყავი, სასწრაფო დახმარების მანქანა რომ მოვიდა და ის კაცი გარეთ საკაცით რომ გამოასვენეს?

- აბა, რა, - დაუდასტურა ტომმა.

- ჰოდა, ეგ იყო მარტოხელა მკვლელი, შტერო! წაიკითხე გაზეთები! ათი წელიწადი ემალებოდა პოლიციას და უცებ ლავინია ნებსი ადგა და მუცელში სამკერვალო მაკრატელი გაუყარა. ამას სჯობდა, თავისი საქმისათვის მიეხედა!

- გინდოდა, მორჩილად გაწოლილიყო, ვიდრე მკვლელი დაახრჩობდა?

- არა, მაგრამ ხომ შეეძლო უბრალოდ სახლიდან გამოვარდნილიყო და იმდენ ხანს ეკივლა: „მარტოხელა მკვლელი! მარტოხელა მკვლელი! მარტოხელა მკვლელი!“, სანამ ის გაქცევას არ მოასწრებდა. ჩვენს ქალაქს ერთი კარგი რამ კიდევ ჰქონდა შერჩენილი წუხანდელი ღამის თორმეტ საათამდე, დღეიდან კი ნაგვის გროვად ვიქცით.

- უკანასკნელად გეუბნები, ჩარლი: მარტოხელა მკვლელი არ მომკვდარა. იმ კაცის სახე ხომ ნახე? მეც ვნახე, დაგმაც ნახა, ნახე ხომ, დაგ?

- რაა? ჰო, მგონი, ჰო.

- მთელმა ქალაქმა ნახა. ჰოდა, ახლა ერთი რამ მიპასუხე: შენი აზრით, ჰგავდა ის კაცი მარტოხელა მკვლელს?

- მე... - დაგლასმა დაიწყო და შეჩერდა.

ხუთიოდე წამის მანძილზე მზე ფუტკარივით აზუზუნდა ცაში.

- უჰ, შენი... - როგორც იქნა, ნელა დაიჩურჩულა ჩარლიმ.

ტომი ღიმილით აკვირდებოდა მის რეაქციას.

- არ ჰგავდა! - გაოცებით შეიცხადა ჩარლიმ, - ეს არ იყო მარტოხელას სახე: ჩვეულებრივი ადამიანის სახე იყო.

- დიახ, ბატონო, ჩვეულებრივი უღიმღამო ადამიანის სახე ჰქონდა, ბუზსაც რომ არ ააფრენს, ჩარლი, გესმის, ბუზსაც! ყველაზე ცოტა, რაც მარტოხელამ უნდა გააკეთოს, თუკი ის მართლა მარტოხელა მკვლელია, ეს არის: ის უნდა გამოიყურებოდეს მარტოხელა მკვლელივით, ხომ მართალი ვარ?

ეს კი „ელიტთეატრის“ შესასვლელში მდგომ კანფეტების გამყიდველს ჰგავდა.

- როგორ ფიქრობ, ვინ იყო? ჩვენს ქალაქში შემოხეტებული მაწანწალა, რომელმაც იფიქრა, მიტოვებულ სახლში შევიპარეო და ამ დროს ლავინია ნებსი შინ დაბრუნდა და მოკლა, ხომ ასეა?

- აბა, რა!

- მაგრამ მოიცა, ხომ არავინ იცის, მარტოხელა მკვლელი როგორ გამოიყურება? მისი სურათი არ არსებობს. ვინც კი ნახა, ყველა მკვდარია.

- შენც, დაგმაც და მეც ხომ კარგად ვიცით, როგორ გამოიყურება. ის უნდა იყოს მაღალი, ასე არ არის?

- ჰოო...

- და ფერმკრთალი, ასეა?

- ფერმკრთალი, მართალია.

- და ჩონჩხივით გამხდარი... და გრძელი შავი თმა უნდა ჰქონდეს, არა?

- ჰო, მეც ყოველთვის ამას არ ვამბობდი?

- და დიდი გადმოკარკლული თვალები, კატისნაირი მწვანე თვალები.

- ეგ არის, ზუსტად!

- აი, ხომ ხედავ, - ჩაიციხა ტომმა, - ხომ ნახე, ის საცოდავი ტიპი, რამდენიმე საათის წინ ნებსის სახლიდან რომ გამოათრიეს, როგორი იყო?

- დაბალი, წითელსახიანი, მოსქელო, თმა თითქმის არ აბადია და რაც აქვს, ის ქერაა. ტომ, ათიანში გაარტყი! მიდი, დაუძახე ბიჭებს! მათაც ისევე უნდა განუმარტო, როგორც მე! მარტოხელა მკვლელი არ მომკვდარა და ამაღამ ისევე გამოვა სათარეშოდ.

- ჰოო, - ტომი მოულოდნელად გაყუჩდა და ჩაფიქრდა.

- ტომ, ძმა ხარ, ბიჭო, რა ტვინი გაქვს! ამას შენ გარდა ვერავინ მოახერხებდა: შენ დღევანდელი დღეც გადაარჩინე და ზაფხულის მთელი დარჩენილი დღეების. დროულად ჩაერიე საქმეში ისე, რომ აგვისტო მთლად დაკარგულად აღარ ჩაითვლებოდა. ჰეი, ბიჭებო!

ჩარლი ყვირილითა და ხელების ქნევით გავარდა.

ტომი ლავინია ნებსის სახლის წინ ტროტუარზე გამეშებულიყო, სახეზე ფერი აღარ ედო.

- ღმერთო! - ჩურჩულით წარმოთქვა ბიჭმა, - ამ წუთში საშინელი რაღაც ჩავიდინე!

დაგლასს მიუბრუნდა.

- გესმის, დაგ? რაღაც საშინელი ჩავიდინე.

დაგლასი კვლავაც სახლს მიშტერებოდა. ტუჩებს ნელა ამოძრავებდა.

- წუხელ აქ ვიყავი, ხევში. ელიზაბეთ რემსელი ვნახე. შინ რომ ვბრუნდებოდი, ამ სახლს ჩავუარე. მოაჯირის თავზე ლიმონათიანი ჭიქა დავინახე. ეს მხოლოდ გუმინ მოხდა. ვიფიქრე, ავალ და დავლევ-მეთქი... ავალ და დავლევ...

\* \* \*

იმ ქალებს მიეკუთვნებოდა, ხელში მუდამ ცოცხი და აქანდაზი, ჭურჭლის სახეხი ღრუბელი ანდა მიქსერი რომ უჭირავთ. დილაობით ნახავდით, დიდინით როგორ ჭრიდა ნამცხვრის ფირფიტებს, ანდა შუადღისას შეეფეთებოდი გასაგრილებლად გამოტანილი ხრამუნა კექსებიანი სინით ხელში, ანდა საღამოს უკვე გაგრილებულ ნამცხვრებს კარადაში რომ ინახავდა. მის ხელში ფაიფურის ჭიქები შვეიცარიული საათივით წკრიალებდნენ და თავთავიანთ ადგილას კობტად ეწყობოდნენ. სახლის დერეფნებში მტვერსასრუტივით მსუბუქად და საიმედოდ მიირწეოდა, გზადაგზა ყველაფერს აწესრიგებდა და ასუფთავებდა. ყოველ ფანჯარას მზის სხივის დამჭერ სარკედ აქცევდა. საკმარისი იყო, ნებისმიერი ბაღი სარწყავით ხელში სულ ორად-ორჯერ შემოევლო, რომ ყვავილები მის სადილებლად ცეცხლის ალებივით ცისკენ აწვერილიყვნენ. ღამით მშვიდად ეძინა და მხოლოდ სამჯერ თუ შეიცვლიდა გვერდს, თეთრი ხელთათმანივით მოღუნებული იწვა, რომელსაც რიჟრაჟთან ერთად მარჯვე ხელი უნდა დაბრუნებოდა. გაღვიძებისთანავე, ადამიანებს, როგორც სურათებს, ისე შეახებდა ხელს, თითქოს ჩარჩოებს უსწორებდეს.

მაგრამ ახლა?

- ბებო! - გაიძახოდა ყველა, - დიდი ბებო!

ახლა, როგორც ჩანს, რაღაც დიდი არითმეტიკული რიცხვი საბოლოოდ თავის დასასრულს მიახლოებოდა. ვინ მოთვლიდა, რამდენი ინდაური, ქათამი, მტრელი ჰყავდა დაჩურთული, რამდენი მამაკაცი და ბიჭი - დაპურებული! მთელი ცხოვრება ასუფთავებდა, რეცხავდა, ბანდა: ჭერებს, კედლებს, მწოლიარე ავადმყოფებსა და ჩვილ ბავშვებს. აგებდა ლინოლეუმს, აკეთებდა ველოსიპედებს, ქოქავდა საათებს, ანთებდა ბუხრებს; სულ ცოტა ათი ათას საშინელ ჭრილობაზე ექნებოდა წასმული იოდის. მისი ხელები ყველგან დაქროდნენ, დაფარფატებდნენ, ხან ვის ამშვილებდნენ, ხან რას ეზიდებოდნენ; ბეისბოლის ბურთებით პასებს აწვდიდნენ, კროკეტის ფერად-ფერად ჯოხებს იქნევდნენ, დაბარულ მიწაში თესლებს ყრიდნენ; გუფთასა და რაგუს ხუფებს აფარებდნენ, აქეთ-იქით მიყრილ, ძილმორეულ ბავშვებს კი

- საბნებს. ფარდების ჩამოფარებით, სანთლების ჩაქრობითა და ჩამრთველებზე თითის მიჭერით დაკავებული თანდათანობით ბერდებოდა. ახლა ოცდაათი ათასი მილიარდი დაწყებული და ბოლომდე მიყვანილი საქმის გადასახედიდან სრული რიცხვი შეაჯამა და დაამრგვალა; უკანასკნელი მეათედი მისთვის განკუთვნილ ადგილას ჩასვა და დამაგვირგვინებელი ნულიც შემოხაზა. და, აი ახლა ცარცით ხელში უკან დაიხია და ერთი საათი მდუმარედ აკვირდებოდა, ვიდრე მთელი ამ ფორმულების წასაშლელად ჩვარს მოიმარჯვებდა.

- აბა, ერთი, ვნახოთ, - ამბობდა დიდი ბებო, - ვნახოთ, რა გამოვიდა...

ყოველგვარი აურზაურისა თუ ფუსფუსის გარეშე მთელ სახლს ჩამოუარა, ყველაფერი გადაამოწმა და შეაფასა, ბოლოს კი, როგორც იქნა, შიდა კიბეს მიაღწია, თავის ოთახამდე სამი სართული აიარა. უხმოდ, რაიმე საგანგებო განცხადების გარეშე, ნამარხი ფრინველის ანაბეჭდივით გაწვა გრილი თოვლისფერი ზეწრის ქვეშ და გარდაცვალებას შეუდგა.

ხმები ამრიალდა:

- ბებო! დიდი ბებო!

მისი ამგვარი საქციელის ამბავი ლოდივით ჩაეშვა კიბის ორმოში, ძირს დაენარცხა, ტალღებად გავრცელდა ოთახებში, ეზოში, თელების ხეივანში და მწვანე ხევის ნაპირსაც მიაწყდა.

- აქეთ, ყველა აქეთ!

ოჯახი მის საწოლს გარს შემოეხვია.

- მაცალეთ წოლა, - წასჩურჩულა ყველას.

მისი სწეულება არც ერთ მიკროსკოპში არ გამოჩნდებოდა: სხვა არაფერი იყო, თუ არა მსუბუქი, მაგრამ მზარდი დაქანცულობა, მის ბელურისებრ სხეულს ბუნდოვან ტვირთად რომ დააწვა; თვალებზე რული ეფინებოდა, ძილი ერეოდა, უკვე ეძინა.

მის შვილებსა და შვილიშვილებს კი ვერაფრით გაეგოთ, ასეთ უბრალო და უვნებელ ქმედებას რატომ უნდა გამოეწვია ყველას შემოფოთება.

- დიდო ბებო, მოიცადე: რასაც შენ აკეთებ, შეთანხმების დარღვევას უდრის. ეს სახლი უშენოდ დაიქცევა. ასეთი რამ, სულ ცოტა, ერთი წლით ადრე უნდა შეგვატყობინო.

დიდმა ბებომ ცალი თვალი გაახილა. ამწამს ოთხმოცდაათი წელიწადი მშვიდად ამოჰყურებდა თავის მკურნალებს, როგორც მათალ თაღოვან ფანჯარაში ჩამჯდარი აჩრდილი გაჰყურებს ხოლმე სახლს, რომელიც მისი შიშით ცარიელდება.

- ტომ...

ბიჭი მარტოდმარტო მიავლინეს შრიალითა და ჩურჩულით ადვსილ საწოლთან.

- ტომ, - წარმოთქვა ბებომ სუსტი, თითქოს შორიდან მოსული ხმით, - სამხრეთის ოკეანის კუნძულზე ასე სწამთ: ყოველი ადამიანის ცხოვრებაში დგება დღე, როდესაც ის ხელს ართმევს მეგობრებს, ემშვიდობება და ზღვაში გადის: ეს ბუნებრივია, რადგან მისი დრო მოვიდა. დღესაც სწორედ ეს ამბავი ხდება. იცი, მეც შენსავით ვარ, შაბათ დილის კინოსეანსზე სადამოს ცხრა საათამდე რომ შემორჩები ხოლმე, როცა შენს შინ წამოსაყვანად მამას ვგზავნით. გამიგე, ტომ: როდესაც ატყობ, რომ ერთი და იგივე კოვზი ერთსა და იმავე ინდიელს სულ ერთსა და იმავე კლდის თავზე კლავს, ესე იგი, დროა, სკამი აკეცო და კარისკენ გასწიო, ყოველგვარი სინანულისა და რიგებს შორის უკან-უკან სვლის გარეშე. ჰოდა, მეც მაშინ მივდივარ, ვიდრე ჯერ კიდევ ბედნიერი და კმაყოფილი ვარ.

ახლა მასთან გამოცხადების ჯერი დაგლასს დაუდგა.

- ბებო, გაისად გაზაფხულზე სახურავი ვინ უნდა შეაკეთოს?

მას შემდეგ, რაც კალენდრები შეიქმნა, ყოველწლიურად, აპრილში, გეგონებოდათ, სახლის სახურავს კოდალები შეესივნენო; სინამდვილეში ეს დიდი ბებია გახლდათ, რაღაც ძალას მადლა ცაში რომ აეყვანა: გაფუჭებულ ყავარს ცვლიდა და სიმღერით აჭედებდა ლურსმნებს!

- დაგლას, - გაისმა პასუხად ჩურჩული, - არავის დააძალო სახურავის შეკეთება, თუკი არ ეხალისება.

- კარგი.

- აპრილი რომ მოახლოვდება, გარშემო მიმოიხედე და ისე, სხვათა შორის, ჩაილაპარაკე: „ვის უნდა სახურავის შეკეთება?“ და ვისაც სახე სიხარულით გაუნათდება, დაგლას, სწორედ ის ადამიანი გჭირდება. იმიტომ, რომ სახურავიდან შეგიძლია დაინახო მთელი ქალაქი, რომელიც სოფლის ლანდშაფტში გადადის, დაინახო, როგორ აღწევს ეს მიდამო მიწის დასალიერს, როგორ ლიკლიკებს მდინარე, რა სუფთაა დილით ტბის კამკამა წყალი და როგორ სხედან შენ ქვემოთ, ხის ტოტებზე, ჩიტები. ყველაზე სუფთა და ლაღი ნიავი სწორედ იქ, ზევით ქრის. ამ მიზეზთაგან ერთიც კი კმარა საიმისოდ, რომ გაზაფხულის ერთ სისხამ დილით კაცმა ფლიუგერზე აძრომა გაბედო. ეს მართლაც უძძლავრესი წამია, მთავარია, მიენდო მას.

მისი ხმა ოდნავ შესამჩნევ თრთოლამდე ჩაწყდა.

დაგლასი ტიროდა.

დიდმა ბებიამ თავს ძალა დაატანა და გამოფხიზლდა.

- რატომ ტირი?

- იმიტომ, - უპასუხა ბიჭმა, - რომ ხვალ აქ აღარ იქნები.

ბებომ ხელში პატარა სარკე აათამაშა და მერე ბიჭს გაუწოდა. დაგლასმა შეხედა მის სახეს და საკუთარანარეკლს, ბოლოს კი კვლავ ბებოზე გადაიტანა მზერა. მან უთხრა:

- ხვალ დილით შვიდზე ავდგები და ყურებს გულდაგულ დავიბან; ჩარლი ვუდმენტან ერთად ეკლესიაში გადავირბენ; გავმართავ პიკნიკს ელექტრიკ-პარკში; ვიცურავებ, ვირბენ ფეხშიშველა, ხეებიდან ჩამოვვარდები, პიტნის კეკს დავლეჭავ... დაგლას, დაგლას, როგორ არ გრცხვენია? ფრჩხილებს ხომ იჭრი?

- ჰო, ბებო.

- ხომ არ დრიალებ ხოლმე იმის გამო, რომ შენი სხეული ყოველწლიურად იზრდება, ძველი უჯრედები კვდება, ახალი კი შენს თითებსა და გულს ემატება? ეს არ განერვიულებს, ხომ ასეა?

- ასეა.

- ჰოდა, დაფიქრდი, შვილო. ის, ვინც დაქნილ ფრჩხილებს ინახავს, სულელია. ოდესმე გინახავს, გველი თავის გამოცვლილ კანს უფრთხილდებოდეს? ჰოდა, რასაც დღეს ამ საწოლში ხედავ, დაქნილი ფრჩხილები და გველის პერანგია. ერთი კარგად რომ შემიბერო სული, ფერფლად ვიქცევი. აქ მწოლიარე „მე“-ზე ბევრად უფრო მნიშვნელოვანი ის „მე“-ა, ახლა საწოლის კიდეზე რომ ჩამომჯდარა და თვალებში მიყურებს, ისიც, ქვედა სართულზე ვახშამს რომ ამზადებს, გარაჟში მანქანის ქვეშ რომ გაწოლილა ანდა ბიბლიოთეკაში წიგნს რომ ჩაჰკირკიტებს. ჩემი ახალი ნაწილები - აი, რას აქვს ნამდვილი ფასი. სინამდვილეში მე დღეს არ კვცდები. ვისაც ოჯახი ჰყავს, ის არასოდეს კვდება. კიდეც დიდხანს ვიქნები ამქვეყნად. ათასი წლის შემდეგ მთელი ქალაქი ჩემი შთამომავლობით აივსება, ყველანი გამვუდის<sup>33</sup> ჩრდილში დასხდებიან და მწვანე ვაშლებით გაისველებენ პირს. აი, ჩემი პასუხი ყველას, ვინც ბრძნულ კითხვებს სვამს! ახლა კი, სწრაფად, დანარჩენები ამოგზავნე!

ბოლოს და ბოლოს, მთელი ოჯახი ისე ჩამწკრივდა ოთახში, თითქოს სადგურში ახლობელს მატარებელზე აცილებენო.

- მამ, ასე, ჩემო კარგებო, - მიმართა ყველას დიდმა ბებომ, - მეტისმეტი თვინიერებით არასოდეს გამოვირჩეოდი, ამიტომ ძალიანაც მსიამოვნებს, ყველანი ჩემს საწოლთან რომ შეკრებილხართ. აბა, თქვენ იცით! შემდეგ

<sup>33</sup> გამვუდი (ლათ. *Commidendrum robustum*) - ხე მირტისებრთა ოჯახისა, ლამაზი თე-თრი ყვავილებით, ხარობს აშშ-სა და წმინდა ელენეს კუნძულზე.

კვირას ბადია მისახედი, საკუჭნაო - დასალაგებელი და ბავშვებისთვის - ახალი ტანისამოსი საყიდელი. და, რადგანაც ჩემი ის ნაწილი, სიმარჯვისთვის დიდ ბებოს რომ ეძახიან, ამ საქმეების გასაკეთებლად აქ არ იქნება, ისინი ჩემმა იმ ნაწილმა უნდა იკისროს, რომლებსაც ძია ბერტი, ლეო, ტომი, დაგლასი და სხვა დანარჩენი სახელები ჰქვიათ, ყველამ თავ-თავისი საქმე უნდა გამოძებნოს.

- კარგი, დიღო ბებო.

- იცოდეთ, არანაირი ჰელოუნის სუფრა ხვალ აქ არ დავინახო. არ არის საჭირო კეთილი სიტყვებით ჩემი ხსენება; თავის დროზე ყველაფერი თვითონვე ვთქვი, როგორც ჩემს სიამაყეს შეეფერებოდა. ყველანაირი კერძი გავსინჯე და ყველა ცეკვა ვიცეკვე; ერთადერთი ნამცხვარიცაა დარჩა, რისთვისაც გემო არ გამისინჯავს, ერთადერთი მელოდია, ჯერაც რომ არ დამისტვენია, მაგრამ არც მისი მეშინია. გულწრფელად მაინტერესებს, როგორია. მერწმუნეთ, სიკვდილის ერთ ლუკმასაც არ გამოვტოვებ ისე, რომ არ დავაგემოვნო. ასე რომ, ჩემზე არ იდარდოთ. ახლა კი ყველანი წადით და ძილი მაცალეთ...

სადღაც ფრთხილად მიიხურა კარი.

- აი, ასე სჯობს, - მართო რომ დარჩა, ნეტარებით გაიზმორა ტილოსა და შალის, ზეწრისა და საბნის თბილ ნამქერში; ნაჭრების დალიანდაგებული საბანიც ისეთი ჭრელი იყო, როგორიც ძველი დროის ცირკის დროშები. საწოლში ჩაღუნდულებული, ისეთივე პატარა და შეუმჩნეველი იყო, როგორც ოთხმოცზე მეტი წლის წინათ, როცა დილაობით იღვიძებდა და ფაქიზ ძვლებს საბნის ქვეშ ითბობდა.

ფიქრობდა: დიდი, ძალიან დიდი ხნის წინათ ვხედავდი სიზმარს, ისეთ ტკბილ სიზმარს, მერე კი ვიდაცამ გამაღვიძა და ეს სწორედ ის დღე იყო, როდესაც დავიბადე. ახლა კი? ახლა... აბა, გავიხსენო... მოგონებებში ჩაიხედა. სად ვიყავი ეს ოთხმოცდაათი წელიწადი? როგორღა აღვიდგინო იმ გაწყვეტილი სიზმრის ძაფი? ჩია ხელი გაიშვირა. აქ არის... ჰო, მართლაც აქ იყო. გაიღიმა. უფრო ღრმად ჩაეფლო თბილ თოვლში და ბალიშზე თავი შეატრიალა. აი, ასე. ახლა უკვე შინაგანი მზერით ხედავდა, თითქოს გამჭვირვალე ზღვის წყალში იკვეთებოდა იმ სიზმრის ფორმები, ზღვა კი ხან მიიქცეოდა, ხან მოიქცეოდა უსასრულო, მარად განახლებულ ნაპირზე. ძველმა სიზმარმა აიტაცა თოვლის საწოლიდან, რომელიც უკვე ადარც ახსოვდა, და მშვიდი რწევით თან გაიყოლა. გაიფიქრა, ქვედა სართულზე ვერცხლის დანა-ჩანგალს აპრიალებენ, სარდაფს ალაგებენ და დერეფნებს წმენდენო. ეს-მოდა, მთელი სახლი ჩვეული წესით რომ ცხოვრობდა.



- კარგია, - ჩურჩულით წარმოთქვა სიზმრის ზვირთებზე მოტივტივე დიდ-მა ბებომ, - ესეც ისევე კარგია, როგორც ყველაფერი ამ ცხოვრებაში.  
და ზღვის მიქცევამ ნელა წაიყოლა.

\* \* \*

- მოჩვენება! - შესძახა ტომმა.

- არა, - მოესმა ნაცნობი ხმა, - მე ვარ.

ბუნდოვანი სინათლე ვაშლის სურნელით სავსე საძინებელში შემოცურდა. ნახევარკილოგრამიან შუშის ქილაში, რომელიც ჰაერის გარდა, არაფერს ეყრდნობოდა, უამრავი მწუხრისფერინაპერწყალი ბუბუღავდა, ქრებოდა და ინთებოდა. იმ მქრქალ განათებაში დაგლასის თვალეზიც მკრთალი და საზეიმო შუქით ბრწყინავდა. სახე და მკლავები ისეთი გარუჯული ჰქონდა, რომ წყვდიადში განზავებულიყო, და მისი საღამური პერანგი უსხეულო ლანდს ჰგავდა.

- აუ, ბიჭო! - შეიცხადა ტომმა, - ოცდაათი, ორმოცი ციცინათელა!

- ჩუ! ნუ ყვირი!

- რად გინდა?

- ხომ დაგვადგენ თავზე ღამით საბნების ქვეშ ჯიბის ნათურის შუქზე რომ ვკითხულობდით, ჰოდა, ძველ ქილაში შეკრებილი ციცინათელები არავის დააეჭვებს. იფიქრებენ, ღამის მუზეუმიას ან რამე ეგეთი.

- ღაგ, გენიოსი ხარ!

მაგრამ დაგლასს პასუხი არ გაუცია. ძალიან სერიოზულად დადგა შიგადაშიგ მოციმციმე პატარა შუქურა ღამის მაგიდაზე, ფანქარი მოიმარჯვა და მსხვილი ასოებით შეუდგა ბლოკნოტში წერას. ციცინათელები ინთებოდნენ და ქრებოდნენ, ინთებოდნენ და იხოცებოდნენ, ბიჭის თვალეზშიც ორმოციოდე მოცანცახე მწვანე ნაპერწყალი ენთო, ის კი ბეჭდური ასოებით წერდა და აჯამებდა, ამწკრივებდა და აჯგუფებდა ფაქტებს, რომლებიც წლევანდელ ზაფხულს თავბრუდამხვევი სისწრაფით შეაგროვა. ტომი მონუსხული შეჰყურებდა ქილაში მოფუსფუსე კოცონს და ერთბაშად ჩაძინებული, ლოყის ქვეშ ამოდებული მუშტით გაშეშდა, ვიდრე დაგლასი კვლავაც წერდა და წერდა. უკანასკნელ გვერდზე ყველაფერი შეაჯამა:

**საგნებს ვერ ენდობი, რადგან...**

...სხვადასხვა სახის მანქანების მსგავსად, ისინი ნაწილებად იშლება, ჟანგდება, ფუჭდება, ანდა მათი გამართვა ვერა და ვერ ხერხდება... ისინი შეიძლება სამუდამოდ გაუქმდნენ და გარაჟში ჩარჩნენ...

...როგორც მაშინ, როცა სპორტული ფეხსაცმელი გაცვია, სირბილის დროს მხოლოდ გარკვეულ სიმაღლესა და სიჩქარეს აღწევ, მერე კი მიწა ისევ გიხელთებს...

როგორც ტრამვაი: ტრამვაი, მართალია, დიდია, მაგრამ ლიანდაგი, ბოლოს და ბოლოს, მუდამ მთავრდება და ტრამვაიც ჩერდება...

### **ადამიანებს ვერ ენდობი, რადგან...**

...ისინი გტოვებენ.

...უცხო ადამიანები კვდებიან.

...ისეთი ადამიანები, ვისაც კარგად იცნობ, კვდებიან.

...მეგობრები კვდებიან.

...ადამიანები ერთმანეთს კლავენ, როგორც წიგნებში.

...შენი საკუთარი ოჯახის წევრიც კი შეიძლება მოკვდეს.

ამიტომაც...

ათიოდე წამით ფილტვებში შეიჩერა ჰაერი, ნელი სისინით გამოუშვა, ისევ შეისუნთქა და კბილებს შორის შრიალით გამოატარა.

ამიტომაც... უზარმაზარი, მძიმე ბეჭდური ასოებით დაასკვნა:

**ამიტომაც, თუკი ტრამვაები, მანქანები, მეგობრები და ახლო მეგობრები შეიძლება წავიდნენ დროებით ან სამუდამოდ, ან დაჟანგდნენ, დაიშალონ, მოკვდნენ, თუკი ადამიანი შეიძლება მოკლა, და თუკი დიდი ბებოს მსგავსი ვინმეც კი, წესით, უსასრულოდ რომ უნდა ეცოცხლა, შეიძლება მოკვდეს... თუკი ეს ყველაფერი მართალია... ესე იგი... მე, დაგლას სპოლდინგი, ოღესმე... უნდა...**

მაგრამ ციციანათელები თითქოს დაგლასის მძიმე ფიქრებმა დააფრთხესო, მოულოდნელად რბილად ჩაქრნენ.

მაინც ვეღარ ვწერ, იფიქრა დაგლასმა, და აღარც დავწერ. არა, ამაღამ აღარ დავასრულებ ამ ნაწერს.

გადახედა იდაყვზე ჩამოყრდნობილ მძინარე ტომს, მაჯაზე შეეხო და ტომმა მაშინვე ამოიოხრა და საწოლზე დაეშვა.

დაგლასმა ხელში აიღო ჩამქრალი ცივი კომტებით სავსე ქილა და მკრთალი სინათლეები ისევ აკიაფდნენ, თითქოს ბიჭის ხელის სითბომ გააცოცხლაო. ქილა ისე ასწია მაღლა, რომ მისი დასკვნა განათებულიყო. საბოლოო სიტყვები დასრულებას ითხოვდა, მაგრამ ბიჭი ამის მაგივრად ფანჯარასთან მივიდა და ორივე საგდული გადასწია. ქილას ხუფი მოხადა და ციციანათელები მქრქალი ნაპერწკლების ნიაღვრად გადაუშვა ღამის უძრავ ჰაერში. ისინი წამსვე გამოერკვნენ, ფრთები აამოძრავეს და გაფრინდნენ.

დაგლასმა მათ თვალი გააყოლა, - უკანასკნელი დაისის ნაგლეჯებით დაეშვნენ იავარქმნილი სამყაროს ისტორიის ფსკერზე. თბილი იმედის ბოლო ნაკურებივით გაუსხლტნენ ხელიდან. ბიჭის სახე, ტანი და ამ ტანში არსებული სივრცე წყვილიად დაუტოვეს. ახლა იმ შუშის ქილასავით ცარიელი იყო, რომელიც სრულიად გაუცნობიერებლად შერჩენოდა მკლავებში, როდესაც საწოლში ჩაწვა და შეეცადა, დაეძინა...

\* \* \*

არავინ იცის, უკვე რამდენი ღამე იყო, რაც ასე იჯდა თავის შუშის კუბოში, ზაფხულის კარნავალი თავისი სიმბურვალით ცვილის სხეულს უდნობდა, ზამთრის ქარები აჩრდილებით გარს შემოეჯარებოდნენ ხოლმე და ყინულად აქცევდნენ. იჯდა და ელოდა, ნამგლისებრი ღიმილითა და კეხიანი კაუჭა ცხვირით, მკრთალ ვარდისფერ, დანაოჭებულ ხელებში სამუდამოდ ჩაებლუჯა მარაოდ გამლილი ძველისძველი ბანქოს ქაღალდი. კუდიანი ტარო! რა ნეტარება იყო ამ სახელის წარმოთქმა! კუდიანი ტარო! ვერცხლისფერ ჭრილში ხურდას ჩააგდებდი და სადღაც ქვევით, უკან, სიდრმეში მექანიზმი აკვნესდებოდა, კბილანები ერთერთს მოეჭიდებოდნენ, ბერკეტები დაიძვრებოდნენ, ბორბლები დატრიალდებოდნენ და კუდიანიც თავის ყუთში გაბრწყინებულ სახეს მოგიშვერდა და თვალების ვიწრო ჭრილიდან ერთადერთი გამჭოლი მზერით დაგაბრმავებდა. შეუვალ მარცხენა ხელს დაბლა დაუშვებდა და ტაროს ქაღალდებზე გამოსახულ იდუმალ თავის ქალებს, ეშმაკებს, სახრჩობელებს, განდევილებს, კარდინალებსა და ჯამბაზებს გადაგიშლიდა, თან შენკენ თავდახრილი შენში საიდუმლოს თუ მკვლელობას, იმედს თუ სიმართლეს ჭვრეტდა, ყოველ დილით შენს ახალ დაბადებასა და ყოველ ღამით შენს კვდომას შეისწავლიდა. ამის შემდეგ რომელიმე ქაღალდის უკანა მხარეს ფანქრით რაღაცას წააწერდა და მეორე ჭრილიდან ხელში ჩაგიგდებდა. შემდეგ თვალებს უკანასკნელად, შეფარვით შემოგანათებდა და, თავის გარსში გამომწყვდეული, კვლავაც მრავალი კვირით, თვით თუ წლით გაირინდებოდა მორიგი მომენტის მოლოდინში, რომელსაც უნდა გაეცოცხლებინა. ახლაც, ცვილის სიკვდილით მოჯადოებული, უძრავად შეეგება ორი ბიჭის მოახლოებას.

დაგლასმა თითი შუშაზე მიაკაკუნა.

- აი, ეს არის.

- უბრალო ცვილის ფიგურაა, - შენიშნა ტომმა, - რატომ მაჩვენებ?

- „რატომ, რატომ?“ სულ ამას მეკითხები! - დაუღრიალა დაგლასმა, - რატომ და იმიტომ!

იმიტომ, რომ თაღებქვეშ ჭალების სინათლე თითქოს განელდა...

ერთ მშვენიერ დღეს აღმოაჩენ, რომ ცოცხალი ხარ.

აფეთქება! მიწისძვრა! ფეიერვერკი! სინარული!

იცინი, ყირაზე გადადიხარ, ყვირი.

მაგრამ სულ ცოტა ხნის შემდეგ მზის სინათლე ქრება. შუა აგვისტოში თოვა იწყება, თუმცა, ამას შენ გარდა ვერავინ ხედავს.

გასულ შაბათს დილის კინოსეანსზე თეთრად გავარვარებულ ეკრანზე მკვდარი კოვბოი ძირს დაეცა. დაგლასმა დაიკვივლა. წლების მანძილზე მის თვალწინ რამდენი კოვბოი ჩამოუხრჩვიათ, დაუცხრილავთ, დაუწვიათ, გაუნადგურებიათ, მაგრამ ახლა, მაინცდამაინც, ამ კაცის სიკვდილი...

ეს კაცი ვედარასოდეს ივლის, ირბენს, იცინებს, იტირებს, ვედარაფერს გააკეთებს, ფიქრობდა დაგლასი. აი, ამწუთას სხეული უცივდება. დაგლასს კბილები აუკანკალდა, გულში საზარელი ნალექი დაუგუბდა, თვალები მოხუჭა და უღონოდ დაჰყვა კრუნჩხვის შემოტევას.

მასა და სხვა ბიჭებს შორის უეცარი კედელი აღიმართა, რადგან ისინი სიკვდილზე არ ფიქრობდნენ და დაცემული კაცის შემხედვარე ისე იცინოდნენ და ყვიროდნენ, თითქოს ის ჯერაც ცოცხალი ყოფილიყოს. დაგლასი მკვდარ კოვბოისთან ერთად იჯდა ნავში და შორდებოდა განათებულ ნაპირს, სადაც დანარჩენები დარბოდნენ, დახტოდნენ, გნისებდნენ და აზრადაც არ მოსდიოდათ, რომ მკვდარ კაცსა და დაგლასს უკვე შეეცურათ წყვილადში. ბიჭი ტირილით გაიქცა ლიმონის სურნელით გაჟღენთილ საპირფარეშოში და იქ გული აერია: მოეჩვენა, თითქოს ყელიდან ცეცხლოვანი ჩანჩქერი ამოეფრქვა.

ულოდა, გულისრევა როდის გაუვლიდა და თან ფიქრობდა: ჩემ გარშემო რამდენი ადამიანი გარდაიცვალაო ამ ზაფხულს! პოლკოვნიკი ფრილაი გარდაიცვალა! მაშინ ამაზე არ მიფიქრია: რატომ? დიდი ბებო გარდაიცვალა. მართლა. და ამით საქმე არ დასრულდება... წუთით შეყოვნდა. მე! არა. მე ვერ მომკლავენ! როგორ ვერა, საიდანდაც მოესმა ხმა, ნებისმიერ დროს, როცა კი მოესურვებათ, გინდ იყვირე, გინდ ფეხები იქნე, მაინც ვება ხელს დაგაფარებენ და თითსაც ვეღარ გაატოკებ... არ მინდა სიკვდილი! უხმოდ დაიყვირა დაგლასმა. მაინც გამოეხმაურა იგივე ხმა, მაინც მოგიწევს...

კინოთეატრის გარეთ მზე თვალისმომჭრელად ანათებდა მოჩვენებითი ქუჩას, მოჩვენებით შენობებსა და ადამიანებს, ძალიან ნელა რომ მიმოდიოდნენ, და დაგლასს მოეჩვენა, თითქოს ეს ყველაფერი აალებული გაზის

კამკამა, მძიმე ოკეანის ქვეშ იყო მოქცეული. იცოდა, ახლა შინ უნდა წასულიყო და თავის ბლოკნოტში დამაგვირგვინებელი ფრაზა ჩაეწერა:

### **ოდესმე მე, დაგლას სპოლდინგი, უნდა მოვკვდე!**

მთელი ათი წუთი დასჭირდა ქუჩაზე გადასასვლელად და, აი, სწორედ ამ დროს მოუწია თაღებიან გალერეასთან გავლამ და იქ, მის მუდმივ მტვრიან სამალავში, ბიჭმა თვალი მოჰკრა ცვილის კუდიანს - მას, ვის ფრჩხილებქვეშ ბედისწერის ქალღმერთები და ფერიები ჩასაფრებულან. ჩავლილმა მანქანამ გალერეას შუქი მიანათა, ჩრდილები აათამაშა და დაგლასს მოეჩვენა, რომ ცვილის ქალბატონი თავის დაკვირვებით ეპატიუებოდა.

ბიჭიც დაჰყვა კუდიანის მოხმობას და გალერეაში შეაბიჯა, ხუთი წუთის შემდეგ კი გამოვიდა, გადარჩენის რწმენით აღვსილი. ახლა ის ტომისთვის უნდა ეჩვენებინა...

- თითქმის ცოცხალს ჰგავს, - თქვა ტომმა.

- ცოცხალია. ახლავე გაჩვენებ.

ჭრილში ხურდა ჩაუშვა.

არაფერი მომხდარა.

დაგლასმა გადასცხა დერეფნის ბოლოში გაზიანი სასმელების გადაპირქვავებულ ყუთზე მჯდომ მეპატრონეს, მისტერ ბლეკს, რომელსაც სწორედ იმ წუთში საცობი მოეხსნა უკვე თითქმის დაცლილი ბოთლისათვის და მოყვითალო-მოყავისფრო სითხის საკმაოდ დიდი ყლუპი მოესვა.

- უი, კუდიანს რაღაც დაემართა!

მისტერ ბლეკი ტაატიტ მიუახლოვდა, თვალეები მინაბული ჰქონდა, პირიდან მძაფრი სუნი ამოსდიოდა.

- ჩინურ ბილიარდსაც რაღაც დაემართა, კინესკოპსაც და ელექტრომანქანასაც, - შუშის ყუთს ხელი მიარტყა, - ჰეი, შენ! გაცოცხლდი! - კუდიანი კვლავაც უდრტივინველად გაქვავებულიყო, - ყოველთვიურად მისი შეკეთება მის მიერ შემოტანილ მოგებაზე ბევრად მეტი მიჯდება, - მისტერ ბლეკმა ყუთის უკან ხელი ჩააცურა და ამოათრია აბრა წარწერით: „გაფუჭებულია“ და კუდიანს სახეზე ააფარა, - ეეჰ, მხოლოდ ეს რომ იყოს გაფუჭებული, კიდევ რა უჭირს! მე, თქვენ, ეს ქალაქი, ეს ქვეყანა, მთელი მსოფლიო გაფუჭებულია! ეშმაკსაც წაუღია ყველაფერი! - შეცრად დედაბერს მუშტი მოუღერა, - ნაგვის გროვა ხარ, გესმის?! ნაგვის გროვა! - ისევ თავის ადგილს დაუბრუნდა და გადაპირქვავებულ ყუთზე დაეზღერთა, თან წელზე შემორტყმულ წინსაფარში ისე მოისინჯა ხურდა ფული, თითქოს მტკივან მუცელს ისრესსო.

- შეუძლებელია, უბრალოდ, შეუძლებელია, გაფუჭებულიყო, - იმეორებდა თავზარდაცემული დაგლასი.

- ძალიან ძველია, - ამშვილებდა ტომი, - პაპა ამბობს, პატარა ბიჭი რომ ვიყავი, მაშინაც აქ იდგა და მანამდეცო. ადრე თუ გვიან, ხომ უნდა მოშლილიყო...

- მიდი, - ჩურჩულებდა დაგლასი, - გთხოვ, ო, გთხოვ, დაწერე რამე, უჩვენე ტომს, რომ ცოცხალი ხარ!

მალულად ჩაუშვა მანქანაში კიდევ ერთი მონეტა.

- გეხვეწები...

ბიჭები მინას მიეკვრნენ და მათმა სუნთქვამ მის ზედაპირზე ღრუბლის ქულები დახატა.

მერე კი ყუთის სიდრმიდან შრიალი და ტკაცანი მოესმათ.

და კუდიანმა ნელა, ძალიან ნელა ასწია თავი და მის მზერაში იყო რაღაც ისეთი, ბიჭები ერთბაშად რომ მონუსხა. ის შეშლილივით გამმაგებით დასწვდა ბანქოს, შლიდა, შეშლებოდა და კვლავ ელვისებურად ამოძრავებდა ხელებს. მერე სახე დახარა, ცალი ხელი გაუჩერდა... მანქანას რაღაც გიჟური ციებ-ციხელებით აცანცახებდა, ვიდრე მეორე ხელი წერდა, ჩერდებოდა, ისევ წერდა და საბოლოოდ ისეთი მოულოდნელი ზანზარით გაქვავდა, რომ მინას ჩარჩოში ზრიალი გაადენინა. კუდიანს მექანიკური უსუსურობით თავი მკერდზე ჩამოუვარდა, სახე ერთბაშად მუჭისოდენად შეეჭმუნა. მექანიზმმა დაიხუვლა და ერთადერთი კბილანის შემობრუნებით დაგლასის გამომშვრილ ხელისგულზე ციცქნა ბანქოს ქათალდი დაეშვა.

- ცოცხალია! ისევ ამუშავდა!

- ბარათზე რა წერია, დაგ?

- იგივე, რაც გასულ შაბათს მე დამიწერა! მისმინე...

დაგლასმა წაიკითხა:

*ჰეი, ნონი ნო!*

*სულელია, ვინც სიკვდილს ელის!*

*სჯობს უდარდელად მღერა და ცეკვა!*

*როს ისმის სიკვდილის ზარების რეკვა!*

*ღვინის სმა სჯობს და ფერხული*

*და სიმღერა მხიარული:*

*ჰეი, ნონი ნო!*

*ნუ გაშინებს ნურც ქარი*

*და ნურც მორევი ამღვრეული!*

*ჰეი, ნონი ნო!*

- სულ ეს არის? - იკითხა ტომმა.

- ქვევით კიდევ მინაწერია: „წინასწარმეტყველება: დღეგრძელი და მრავალფეროვანი ცხოვრება“.

- აი, ეს უფრო გასაგებია! ახლა ერთი ცხემთვის.

ტომმა ფული ჭრილში ჩააგდო. კუდიანი ცახცახით გაცოცხლდა. ხელში ქადალდი ჩაუვარდა.

- აქედან ვინც ბოლო გავა, კუდიანის უკანალია, - მშვიდად განაცხადა ტომმა.

ისეთი სისწრაფით გაცვივდნენ, რომ მეპატრონე შეკრთა და ორმოცდახუთი სპილენძისცენტიანი ცალი ხელით ჩაბღუჯა, ოცდათექვსმეტი - მეორით.

გარეთ, ლამპიონების ბუნდოვან შუქში, დაგლასსა და ტომს შემამფოთებელი აღმოჩენა ელოდათ.

ტაროს ბარათი ცარიელი იყო, ზედ არავითარი წინასწარმეტყველება არ ეწერა.

- შეუძლებელია!

- არ ინერვიულო, დაგ. უბრალოდ, კარტია, მხოლოდ ერთი პენი დავკარგეთ.

- ეს უბრალო კარტი არაა და ერთ პენიზე ბევრად მეტს ნიშნავს: სიკვდილსიციცოცხლის ამბავია.

ლამპიონების ფარვანების ფრთხილით აცეკვებულ შუქზე დაგლასის სახე რძისფრად მოჩანდა. ბარათს დაშტერებოდა და მასზე სიტყვების ამოკითხვას ცდილობდა.

- მელანი გაუთავდებოდა.

- მას მელანი არასოდეს უთავდება!

გახედა ისევ თავის ადგილას მჯდომ მისტერ ბლეკს, ბოთლი რომ მოიყუდა და მერე წყევლა-კრულვით მოითქვა სული: მას თავშიც არ მოსდიოდა, როგორ გაუმართლა, თალებიან გალერეაში რომ ბინადრობდა. გთხოვ, ფიქრით შევედრა ბიჭი, ამ გალერეას მაინც ნუ ჩამოაქცევ. დარდად ისიც გაგვყვება, რომ რეალურ სამყაროში მეგობრები ქრებიან, ადამიანებს ხოცავენ და მიწაში მარხავენ; მინდა, ეს გალერეა მაინც დარჩეს სამუდამოდ ისეთად, როგორიც ახლაა, გთხოვ, გთხოვ, გთხოვ...

დაგლასი ახლათა მიხვდა, რატომ იზიდავდა მას გალერეა მთელი ამ კვირის მანძილზეც და ამ სადამოსაც. ეს ხომ სრულყოფილი, მოწესრიგებული, წინასწარ საიმედოდ დაგეგმილი სამყარო გახლდათ, ხურდა ფულისათვის გამზადებული ვერცხლისფერი ბრჭყვიალა ჭრილებით, საზარელი გორილათი, რომელსაც შუშის მიღმა სამარადისოდ და უცვლელად კლავს ცვილის გმირი, ცვილისავე მზეთუნახავის გადასარჩენად; აქვე, შიშველი

ნათურის სხივებში, ინდიელისთავიანი მონეტის<sup>34</sup> მიერ დატრიალებულ კოჭებზე, რაკრაკითა და ჟღერტულით იცვლებოდა ფოტოფირი კისტონელი პოლიციელების<sup>35</sup> შტერი სახეებით. პოლიციელები გამუდმებით ეჯახებოდნენ (ანდა ლამის ეჯახებოდნენ) მატარებელს, სატვირთო ან მსუბუქ მანქანას, ცვიოდნენ ზღვაში, მაგრამ არ იხრჩობოდნენ, რადგან კვლავ მატარებლის, სატვირთო თუ მსუბუქი მანქანის კატასტროფისაკენ მიიჩქაროდნენ, კვლავ ზღვაში ყვინთავდნენ ლამაზი, საოცრად ნაცნობი სანაპიროდან. სამყაროები სამყაროების შიგნით, ერთგროშიანი სლაიდების შოუ, რომელსაც ბეჯითად ატრიალებდი ძველისძველი რიტუალებისა და ფორმულების გასაცოცნებლად. იქ, თუკი მოისურვებდი, ძმები რაიტები კვლავაც კიტი-ჰოკის<sup>36</sup> ქვიშიან ქარში აფრინდებოდნენ, ტედი რუზველტიც<sup>37</sup> ბღღვრიალა კბილებს გამოაჩენდა და სან-ფრანცისკოც უსასრულოდ აშენდებოდა და დაიწვებოდა, აშენდებოდა და კვლავაც დაიწვებოდა, ვიდრე ოფლისგან სველი ხურდებით გაუმაძღარ მანქანებს დააპურებდი.

დაგლასმა გახედა ლამის ქალაქს, სადაც სწორედ ამ წუთში, ანდა მომდევნო წუთში ნებისმიერი რამ შეიძლებოდა მომხდარიყო. ჩვენს სამყაროში, გინდ დღისით, გინდ ღამით, ძალზე ცოტა ვერცხლისფერ ქრილს თუ იპოვიდი ფულის ჩასაგდებად, კიდევ უფრო ცოტა ბარათს გიგდებდნენ ხელში წასაკითხად, ხოლო წაკითხულიდან ათასში ერთი გზავნილი თუ გამოდგებოდა აზრიანი. აქ, ადამიანთა სამყაროში, დროს, ფულსა და ლოცვებს, როგორც წესი, ძალზე მცირე საფასურის სანაცვლოდ ან სულაც უქმად ვხარჯავთ.

აქ კი, გალერეაში, საკმარისი იყო, იმ მანქანის ყვითელ ბერკეტს ჩასჭიდებოდი და ჩამოგეწია, რომლის სახელწოდებაცაა „რამდენს გაუძლებთ?“ და ხელში ელვები აგიცეკვდებოდა, დენი კრაზანასავით ჩაგესობოდა მოფართხალე თითებში, დაგფუფქავდა და დაგჩხვლეტდა. სპეციალურ ტომსიკას ხელს რომ მოუჭერდი, მამინვე გამცნობდა, თუ რამდენგირვანქიან ძალას ფლობდა შენი მუშტი სამყაროს შესამუსრად, თუკი მისი შემუსვრა საჭირო გახდებოდა. რობოტს ხელს თუ გადაუწევდი და ამით შენს ბრაზსა და ბოღმას ინდიელივით დაამარცხებდი, დანომრილ სკალაზე ნახევრამდე

<sup>34</sup> ინდიელისთავიანი მონეტა (indian-head penny) – 1859-1909 წლებში აშშ-ში გამოშვებული ერთცენტრიანი მონეტა, რომელზედაც ინდიელის პროფილია გამოსახული.

<sup>35</sup> „კისტონელი პოლიციელები“ - XX საუკუნის დასაწყისის გადღებული კომედიური ჟანრის ამერიკული მუნჯური კინოსერიალი

<sup>36</sup> კიტი-ჰოკი - ქალაქი ჩრდილოეთ კაროლინაში, დეირის ოლქში.

<sup>37</sup> ტედი რუზველტი - თეოდორ რუზველტი (1858-1919) - ამერიკელი პოლიტიკოსი, აშშ-ის 26-ე პრეზიდენტი (1901-1909) და 25-ე ვიცი პრეზიდენტი (1901) რესპუბლიკუ-რი პარტიიდან.



აინთებოდა ნათურები, ხოლო სულ მალე ამოფრქვეული ფეიერვერკი შენს ძალას აღიარებდა.

მოკლედ, გალერეაში შენს ამა თუ იმ მოქმედებას მუდამ შედეგი მოსდევდა და გარეთ ისეთი დამშვიდებული გამოდიოდი, თითქოს მანამდე უცნობი ეკლესია მოგელოცოს.

ახლა კი? ახლა?

კუდიანი მოძრაობს, მაგრამ დადუმდა და ვინ იცის, დღეს-ხვალ შეიძლება სულაც მოკვდეს თავის ბროლის კუბოში. დაგლასმა უსაქმოდ ჩამომჯდარ მისტერ ბლექს გახედა, ყველა სამყაროს, მათ შორის საკუთარსაც, დაუნდობელ ბრძოლას რომ უცხადებდა. ერთ მშვენიერ დღეს მთელი მექანიზმები სიყვარულისა და ზრუნვის ნაკლებობისაგან დაჟანგდება და ჩამოიფშვნება, კისტუნელი პოლიციელები წყალში გადაცვენის მომენტში სამუდამოდ გაქვავდებიან, დარჩებიან ლოკომოტივის ქვეშ სანახევროდ მოყოლილები; ძმები რაიტები ვედარასოდეს მოსწყვეტენ მიწას თავიანთ საფრენ აპარატს...

- ტომ, - თქვა დაგლასმა, - ბიბლიოთეკაში უნდა დავსხდეთ და ამის შესახებ მოვილაპარაკოთ.

ქუჩას გაუყვნენ, თან წაუწერელ თეთრ ბარათს ხელიდან ხელში გადასცემდნენ.

კარგა ხანს ისხდნენ ბიბლიოთეკის მწვანეაბაჟურიანი ნათურის ქვეშ, შემდეგ - გარეთ, ქვისგან ამოკვეთილ ლომზე, და მჭმუნვარე იერიით ფეხებს ქანდაკების ზურგზე აბარტყუნებდნენ.

- ის ბებერი ბლექი სულ უყვირის და მოკვლით ემუქრება.

- რაც ცოცხალი არ არის, იმას ვერც მოკლავ, დაგ.

- ისე ექცევა კუდიანს, თითქოს ცოცხალი იყოს, ან ოდესმე ცოცხალი ყოფილიყოს, ან რაღაც ამდაგვარი, იმდენს უყვირის, რომ ვინ იცის, იქნებ კუდიანიც, ბოლოს და ბოლოს, შეშინდა. ან ეგებ სულაც არ შეშინებია, უბრალოდ, ჩვენს გასაფრთხილებლად საიდუმლო ხერხი გამოიანა და გვატყობინებს, რომ მისი სიცოცხლე საფრთხეშია. იქნებ ეს უხილავი მელანია ან ლიმონის წვენი! აქ რაღაც ისეთი წერია, რაც მისტერ ბლექს არ უნდა ენახა: ხომ შეიძლებოდა, ბარათისთვის დაეხედა, ვიდრე მის გალერეაში ვიყავით. შენ დაიჭირე! აგერ მაქვს ასანთი.

- მაინცდამაინც ჩვენთვის რატომ უნდა მოეწერა კუდიანს, დაგ?

- დაიჭირე ბარათი! ასე! - დაგლასმა ასანთს მოუკიდა და ქაღალდს ქვევიდან მოუტარა.

- აუ, სიტყვები თითებზე კი არ მაწერია, დაგ! გასწიე ასანთი!

- აი! - ისტერიკულად დაიყვირა დაგლასმა. მართლაც გამოჩნდა გაკრული ხელით ნაწერი, ობობას ქსელის მსგავსი ასოები, ასანთის ალმა მუქად რომ გამოაშუქა... ერთი, ორი, სამი სიტყვა...

- ბარათი იწვის! - შეჰყვირა ტომმა და ბარათი ხელიდან გააგდო.

- დააბიჯე!

მაგრამ, ვიდრე წამოხტებოდნენ და ბებერი ლომის ზურგს ფეხებს დაუშენდნენ, ბარათი უკვე ფერფლის შავ ლაქად ქცეულიყო.

- დაგ, ახლა ვედარასოდეს გავიგებთ, ზედ რა ეწერა!

დაგლასმა თბილი ფერფლის ფანტელები ხელისგულზე მოაგროვა.

- არა, დავინახე, რაც ეწერა. მახსოვს სიტყვები.

ფერფლი თითებს შორის შრიალით გაეფანტა.

- გახსოვს, გაზაფხულზე ჩარლი ჩეიზის კომედიას რომ ვუყურებდით: ფრანგი რომ იხრჩობოდა და რაღაცას ყვიროდა, ჩარლი ჩეიზი კი ვერ მიხვდა, რას ეუბნებოდა. Secours, Secours!<sup>38</sup> მერე ვიღაცამ აუხსნა, ეს რას ნიშნავდა და ჩარლი წყალში გადახტა და ის კაცი გადაარჩინა. ჰოდა, ამ ბარათზე ჩემი თვალით ვნახე, როგორ ეწერა: Secours!

- ფრანგულად რატომ მოგვწერა?

- მისტერ ბლექს რომ ვერ გაეგო, ტუტუცო!

- დაგ, უბრალოდ წყლის ნიშანი იყო. ბარათი რომ გაახურე, იმიტომ გამოჩნდა... - დაგლასის სახის გამომეტყველების დანახვაზე ტომი დადუმდა,

- ჰო, კარგი, კარგი, ნუ გადაირევი. იყოს „სეკუ“ თუ რაღაც ჯანდაბა, მაგრამ მაგის გარდა სხვა სიტყვებიც ეწერა...

- კიდეც ეწერა: მაღამ ტარო. ტომ, ყველაფერს მივხვდი! მაღამ ტარო მართლაც ცხოვრობდა დიდი ხნის წინ, მკითხავი და ნათელმხილველი იყო. ერთხელ ენციკლოპედიაში მისი სურათი ვნახე. ხალხი მთელი ევროპიდან ჩამოდიოდა მასთან. ჰოდა, დანარჩენს თვითონ უნდა მიხვდე, ტომ, დაფიქრდი!

ტომი ლომის ზურგს მიეყრდნო და ქუჩის ბოლოში მოციმციმე შუქებს გახედა.

- არ მითხრა ახლა, ეგ არისო ნამდვილი მაღამ ტარო!

- ამ შუშის ყუთში, მთელი ამ წითელი და ლურჯი ატლასისა და ძველისძველი, ჩამომდნარი ცვილის ქვეშ: ჰო, აბა, რა! იქნებ დიდი ხნის წინ ვიღაცას მისი შეშურდა ან რაღაცის გამო შეიძულა იგი და ცვილი გადაასხა, მას მერე ბოროტმოქმედი სამუდამო ტყვეობაშია, ხელიდან ხელში გადადის, ბოლოს

<sup>38</sup> Secours (ფრანგ.) - მიშველეთ.

კი, საუკუნეების შემდეგ, ილინოისის შტატის გრინთაუნში ამოყო თავი. აქ ინდიელისთავიანი ხურდების ფასად მუშაობს, იმის მაგივრად, რომ ევროპის მონარქთა გამოსახულებიანი ოქროს ფულები მიიღოს!

- ვინ ბოროტმოქმედები? მისტერ ბლეკი?

- სახელადაც ბლეკი ჰქვია და პერანგიც შავი აქვს, შარვალი და ჰალსტუხიც შავი აქვს. კინოში ბოროტები ხომ ყოველთვის შავები არიან?

- მაგრამ რატომ არ დაუძახა ვინმეს თუნდაც შარშან ან შარშანწინ?

- ვინ იცის, იქნებ უკვე ასი წელია, ყოველ სადამოს, ყოველ ბარათზე ლიმონის წვეთით წერს, მაგრამ ყველა მხოლოდ ჩვეულებრივ წარწერებს კითხულობს. ჩვენსავით არავის მოსვლია აზრად ბარათის ცეცხლში გატარება და ნამდვილი წერილის გამომჟღავნება. კიდეც კარგი, ვიცი, Secours რასაც ნიშნავს.

- კარგი, ეგრე იყოს: მიშველეთო, მოგვწერა. აწი რაღა უნდა ვქნათ?

- უნდა გადავარჩინოთ.

- მისტერ ბლეკის ცხვირწინ მოვიტაცოთ თუ რა? ჩვენც რომ ცვილგადავლებულ კუდიანებად გვაქციოს და ასე, ათი ათასი წლით შუშის ყუთში გამოგვამწყვდიოს, მერე?

- ტომ, ბიბლიოთეკა აქვეა. მისტერ ბლეკთან შესაბრძოლებლად ჯადოებითა და ავგაროებით უნდა ადვიჭურვოთ.

- მისტერ ბლეკთან ერთადერთი ჯადო თუ გაჭრის, - შენიშნა ტომმა, - ყოველ სადამოს, როგორც კი საჭირო რაოდენობის ხურდებს დააგროვებს... აგერ, ვნახოთ, - ტომმა ჯიბიდან ხურდა ფული ამოიღო, - ეს შეიძლება ეყოს კიდეც. დაგ, შენ მიდი, წიგნები წაიკითხე, მე კი დავბრუნდები და თხუთმეტჯერ ვუყურებ კისტოუნელ პოლიციელებს, ხომ იცი, ეგ არასდროს მწყინდება. მერე გალერეაში შევხვდეთ და იმ დროისათვის ჯადომ შეიძლება უკვე მოქმედებაც დაიწყოს.

- ტომ, იმედია, დარწმუნებული ხარ იმაში, რასაც აკეთებ.

- დაგ, ხომ გინდა ამ პრინცესის გათავისუფლება?

დაგლასი ქუსლებზე დატრიალდა და ადგილს მოსწყდა.

ტომმა თვალი გააყოლა. ბიბლიოთეკის კარი ლაწალუწით მიიხურა და დადუმდა. ბიჭი ლომის ზურგიდან გადმოხტა და წყვილიადმი ჩაყვინთა, ბიბლიოთეკის საფეხურებიდან კი ტაროს ქაღალდის ფერფლი აფრიალდა და ჰაერში გაიფანტა.

გალერეაში ბნელოდა; იღუმალის შუქით განათებული ჩინური ბილიარდის დაფა გოლიათის მღვიმეში ქვიშაზე ნაფხაჭნ ასოებს ჰგავდა. შუშაში გასახედ სლაიდებზე ტედი რუზველტი იკრიჭებოდა, ძმები რაიტები კი

საფრენი აპარატის პროპელერს ასწორებდნენ. კუდიანი თავის საკანში იჯდა, თვალეზე ცვილის ლიბრი გადაჰკვროდა, უეცრად ერთმა თვალმა გაიბრწყინა. გალერეის მტვრიან ფანჯრებს გარედან ჯიბის ნათურა მიანათეს. ვიდაცის მძიმე სხეული მიაწვა დაკეტილ კარს და კლიტეში გასაღებმა დაიქდარუნა. მძიმე ხვნემა გაისმა.

- ნუ გეშინია, მე ვარ, პატარა ქალო! - თქვა მისტერ ბლეკმა და შეტორტიმანდა.

ლამპიონის შუქზე წიგნში თავჩარგულ დაგლასს სადარბაზოს სამალავიდან გამოსული ტომი წაადგა თავს.

- ჩუ! - ჩასჩურჩულა ტომმა, - გამომივიდა. კისტონუნელ პოლიციელებს თხუთმეტჯერ ვუყურე; მისტერ ბლეკმა ამდენი ხურდა ფულის ჩხრიალი რომ გაიგონა, თვალეები აუთამამდა, აპარატი გახსნა, ფული ამოიღო და გარეთ გამაგდო, თვითონ კი ქუჩის მოპირდაპირე მხარეს გადავიდა კონტრაბანდული სასმლის დუქანში ჯადოსნური ბანგის საყიდლად.

დაგლასი თითის წვერებზე მიეპარა გალერეის ფანჯარას და გორილა დაინახა: ერთს, სრულიად უძრავს, ბანჯგვლიან მკლავებში ცვილის მზეთუნახავი მოემწყვდია, მეორე ელდანაცემივით იდგა შუა დარბაზში და ოდნავ ბარბაცებდა.

- ტომ, - ჩასჩურჩულა ძმას, - მაგარი ხარ. ჯადოსნური ბანგითაა გაჟღენთილი, ასე არ არის?

- ნამდვილად. შენ რა გამოარკვე?

დაგლასმა თითები წიგნზე აათამამა და ხმადაბლა ალაპარაკდა:

- მადამ ტარო, როგორც გითხარი, მდიდარ ხალხს ბედისწერას, სიკვდილს და ეგეთ რამეებს უწინასწარმეტყველებდა, მაგრამ ერთი შეცდომა დაუშვა - ნაპოლეონს პირში მიახალა მისი დამარცხებისა და სიკვდილის ამბავი! ჰოდა...

დაგლასმა კიდევ ერთხელ შეიხედა მტვრიან ფანჯარაში და თვალეები გაუსწორა ბროლის საკანში უძრავად მჯდომ ფიგურას.

- Secours, - ჩაილაპარაკა დაგლასმა და განაგრძო, - ნაპოლეონმა დაუძახა მადამ ტიუსოს ცვილის ფიგურების ოსტატებს და მათ ტაროს კუდიანი მღუდარე ცვილში ცოცხლად ჩააგდეს. ახლა კი... ახლა...

- შეხედე, დაგ, მისტერ ბლეკი შიგნით რას შვრება! ხელში იარაღისმაგვარი რაღაც უჭირავს!

ასეც იყო. მისტერ ბლეკის უზარმაზარი ფიგურა საშინელი

წყევლა-კრულვითა და ტორტიმანით მიიწევდა გალერეის გასწვრივ, ჯაყვა ეკავა და კუდიანს ცხვირწინ სისინით უტრიალებდა.

- მაღამ ტაროს იმიტომ გადაეკიდა, რომ მთელ ამ გროვაში ადამიანური იერი მხოლოდ მას აქვს, - თქვა ტომმა, - ვერაფერს დაუშავებს. ერთ წუთში ძირს დაეცემა და დილამდე იძინებს.

- არაფერიც, - შეეკამათა დაგლასი, - მშვენივრად იცის, რომ კუდიანმა გაგვაფრთხილა და მის საშველად მივდივართ. არ სურს, მისი შავბნელი საიდუმლო გამოვამჟღავნოთ, ამიტომ შეიძლება ამაღამ საბოლოოდ გაანადგუროს.

- რა იცის, რომ გაგვაფრთხილა? ჩვენ თვითონაც ხომ არ ვიცოდით, ვიდრე აქაურობას არ მოვშორდით?

- ათქმევინა, აპარატში ხურდები ჩაყარა. ბარათებზე წერისას კუდიანს ტყუილის თქმა არ შეუძლია, ტაროს ქალები და ჩონჩხები მხოლოდ სიმართლეს ამბობენ. იძულებული იყო, სიმართლე გაემხილა და, ალბათ, ისეთი ბარათი გადმოუგდო, რომელზეც ორი პატარა რაინდია გამოსახული, ბავშვების სიმაღლისა, ხომ გესმის? ეს ჩვენ ვართ, ხელკეტებით შეიარაღებული მასთან მივდივართ.

- უკანასკნელად! - ყვიროდა მისტერ ბლეკი თავის ჩაბნელებულ მღვიმეში, - უკანასკნელად ვაგდებ მონეტას. ერთხელაც მითხარი, ეშმაკსაც წაუღიხარ, ეს წყეული გალერეა ოდესმე ფულს მომიტანს თუ საბოლოოდ გავკოტრდები?! ყველა ქალივით გულცივი ხარ, მშვიდად ზიხარ, როცა კაცს შიმშილით სული სძვრება! მომეცი ბარათი. ასე! აბა, ვნახოთ! - ბარათი სინათლესთან მიიტანა.

- ღმერთო! - ჩურჩულით შეიცხადა დაგლასმა, - მზად იყავი.

- არა! - შეჰყვირა ბლეკმა, - მატყუარა! მატყუარა! ესეც შენ! - ყუთს მუშტი დაარტყა. მინამ ვარსკვლავების კასკადად იფეთქა და ძირს ჩამოიმსხვრა. კუდიანი ახლა სრულიად დაუცველი იჯდა და მეორე დარტყმას მშვიდად ელოდა.

- არა! - დაგლასმა კარი შეამტვრია, - მისტერ ბლეკ!

- დაგ! - დაიყვირა ტომმა.

მისტერ ბლეკი ყვირილის ხმაზე შებრუნდა, ბრმად მოიქნია დანა და დარტყმა დააპირა. დაგლასი გაქვავდა. მოულოდნელად მისტერ ბლეკმა თვალები გადმოკარკლა, ამოტრიალდა და პირადმა დავარდა, დაგლასს მოეჩვენა, თითქოს ათასი წელი გავიდა, ვიდრე ძირს დაენარცხებოდა. მარჯვენა ხელიდან ჯიბის ნათურა გაუგორდა, მარცხნიდან კი ვერცხლისფერი თევზივით დანა გაუსხლტა.

ტომი ფრთხილად შევიდა შიგნით და სიბნელეში გამოტილ ფიგურას დახედა.

- მკვდარია, დაგ?

- არა, უბრალოდ, მადამ ტაროს მკითხაობამ თავზარი დასცა. სახე ისე აქვს აღეწილი, ეტყობა, ბარათზე საშინელი წინასწარმეტყველება ეწერა.

იატაკზე გამოტილი კაცი ხმამაღლა ხვრინავდა.

დაგლასმა აცახცახებული ხელით აკრიფა ძირს მიმოფანტული ქაღალდი და ჯიბეში ჩაიწყო.

- წამოდი, ტომ, სანამ დროა, აქაურობას გავარიდოთ.

- მოვიტაცოთ? გაგიჟდი?

- რა, გინდა უარესი დანაშაულის თანამონაწილე გახდე? მაგალითად, მკვლელობის?

- კარგი, რა, დაგ, თოჯინა როგორ უნდა მოკლა?

მაგრამ დაგი ყურს აღარ უგდებდა. გახსნილ ყუთში ხელები ჩაყო და კუდიანმა ტარომ, თითქოს დიდხანს, დიდხანს სწორედ ამ წუთს ელოდაო, შრიალით ამოიოხრა, ნელა, ძალიან ნელა გადმოიხარა და ბიჭს მკლავებში ჩაუვარდა.

\* \* \*

ქალაქის საათი ცხრა საათსა და ორმოცდახუთ წუთს აჩვენებდა. მთვარე ცაზე მაღლა იდგა და მიდამოს თბილი, მაგრამ მაინც სუსხიანი შუქით ავსებდა. ტროტუარი ერთთავად ვერცხლისფრად ლაპლაპებდა. მის ზედაპირზე შავი ჩრდილები მოძრაობდნენ. დაგლასი მარტოკა მიიწევდა წინ, მკლავებში ხავერდისა და ჩალისფერი ცვილის არსება ეკავა. დროდადრო მოცახცახე ხეების ჩრდილის შავ გუბეებში იმალებოდა, ჩერდებოდა და სმენას ძაბავდა. შრიალი მოესმა, თითქოს თავგები მორბოდნენ, და უკან მიიხედა. ტომი მოსახვევიდან გამოქანდა და მიუახლოვდა.

- დაგ, უკან ჩამოვრჩი, მისტერ ბლეკი ხომ არ... მოკლედ, გონს მოვიდა და ლანძღვა-გინება მორთო. ოჰ, დაგ, მაგ თოჯინათი ხელში თუ დაგიჭირა! ჩვენი მშობლები რაღას იტყვიან? ეს ხომ ქურდობაა!

- ჩუმაად!

თავიანთ ზურგს უკან მთვარით განათებულ ქუჩას, როგორც მდინარის ხმას, ისე მიაყურადეს.

- ტომ, შეგიძლია მის გადარჩენაში დამეხმარო, მაგრამ იცოდე, არაფერი გამოვა, თუკი „თოჯინას“ უწოდებ, ხმამაღლა ილაპარაკებ ანდა უსაქმოდ შემომარტყამ წრეებს.

- დაგეზმარები! - ტომმა ხელი შეაშველა და წონის ნახევარი იტვირთა, - უჰ, მსუბუქი ყოფილა!

- სულ ახალგაზრდა იყო, როცა ნაპოლეონმა... - დაგლასმა ფრაზა შუაში გაწყვიტა, - მოხუცები მძიმეები არიან. ამის მიხედვით შეგიძლია მიხვდე მათ ასაკს.

- კარგი, მაინც რატომ? რატომ ატენე მთელი ეს ამბავი მისი გულისთვის, დაგ? რისთვის?

რისთვის? დაგლასმა თვალები აახამხამა და შეჩერდა. მოვლენები ისე სწრაფად დატრიალდა, თვითონაც ისე სწრაფად ირბინა და სისხლი ისე უდუღდა, რომ სულმთლად დაავიწყდა, რისთვის ხდებოდა ყველაფერი. მხოლოდ ახლა, ტროტუარს რომ მიუყვებოდნენ და ჩრდილები ქუთუთოებზე ღამის ჰეპლებივით ასხდებოდნენ, ხელებზე მტვრიანი ცვილის მძიმე სუნი რომ იგრძნო, მაშინდა მოიცალა ყველაფრის გასააზრებლად და როდესაც ამის შესახებ ალაპარაკდა, საკუთარი ხმა მთვარის შუქივით უცხო ეჩვენა.

- ტომ, ერთი-ორი კვირის წინ აღმოვაჩინე, რომ ცოცხალი ვარ. ღმერთო, რას დავხტოდი და ვკუნტრუმებდი! მერე კი, გასულ კვირას, კინოში მიხვდვი, რომ ოდესმე უნდა მოვკვდე კიდეც. ამაზე აღრე არასოდეს მიფიქრია. ისეთივე გრძნობა დამეუფლა, როგორიც გამიჩნდებოდა, მაგალითად, Y.M.C.A.<sup>39</sup> რომ გაუქმდეს, ანდა სამუდამოდ დაიკეტოს სკოლა, რომელიც სულაც არ არის ისეთი ცუდი, ჩვენ რომ გვეჩვენება; ან მთელი ატმის ხეები ერთბაშად რომ განმეს, თუნდაც ხევი რომ ამოავსონ, გადაასწორონ და სათამაშო ადგილი აღარსად დაგვრჩეს, ძალიან დიდი ხნით ავად რომ გავხდე და ლოგინს მივეჯაჭვო. ამ გრძნობამ ძალიან შემამინა. ჰოდა, არ ვიცი. მინდა მაღამ ტარო გადავარჩინო. რამდენიმე კვირით ან თვით სადმე გადავმალავ, ვიდრე მაგიის სახელმძღვანელოებში ამოვიკითხავ, როგორ ავხსნა ჯადო და ცვილისგან გავათავისუფლო, რომ ამდენი ხნის შემდეგ ისევ შეძლოს ქვეყნად ცხოვრება. ჰოდა, იმდენად მაღლიერი იქნება, თავის ეშმაკებიან, სასმისებიან, ძვლებიან და ხანჯლებიან ბანქოს გამიშლის, დამარიგებს, როდის ავუარო გვერდი ორმოებს და რომელ ხუთშაბათს სჯობს საერთოდ არ ავდგე საწოლიდან. და მეც უსასრულოდ, ან თითქმის უსასრულოდ, ვიცოცხლებ.

- ამ ყველაფრის შენ თვითონ არ გჯერა.

- მჯერა, ძირითადი ნაწილი მაინც. მოიცადე, აი, ხევიც, ნაგავსაყრელთან ახლოს გადავჭრათ და...

<sup>39</sup> The Young Men's Christian Association – „ახალგაზრდა მამაკაცთა ქრისტიანული ასო-ციაცია“, ინგლისში დაარსებული საერთაშორისო გაერთიანება, რომელიც სულიერი და ფიზიკური სიჯანსაღის პრინციპებით ხელმძღვანელობს.

ტომი შეჩერდა. დაგლასმა შეაჩერა. უკან არ მიუხედავთ, მაგრამ კარგად გაიგონეს ზურგს უკან სროლასავით მძიმე ნაბიჯები, ყვირილი და წყევლაც მოესმათ.

- ტომ, დაგინახა და გამოგვეკიდა!

გაიქცნენ, მაგრამ გოლიათის ხელი დასწვდათ და ორივე გვერდით გადაისროლა. მისტერ ბლეკი მძვინვარებდა, აქეთ-იქით ბარბაცებდა და კბილებს შორის ნერწყვის შხეფებს აფრქვევდა, ბიჭები ბალახზე იწვნენ და შისისაგან კიოდნენ. კაცს კუდიანი ქეჩოთი და ცალი ხელით ეკავა და ბიჭებს თვალებს უბრიალებდა.

- ეს ჩემი საკუთრებაა და რასაც მინდა, იმას ვუზამ! როგორ გაბედეთ მისი წადება?! მთელი ჩემი უბედურება მისი ბრალია: უფულობა, უიღბლობა! დიან, სწორედ ასეა!

- არა! - დაიყვირა დაგლასმა.

მაგრამ ვება მკლავებს მსუბუქი ფიგურა უკვე ზევით, მთვარისკენ აუზიდათ, კაცმა მძლავრად მოიქცია კუდიანის ფაქიზი ცვილის სხეული, გეგონებოდათ, ვარსკვლავებს უნდა შეალეწოსო, წყევლით გადაისროლა ხევში, სადაც ის დაღმართზე ჩაგორდა, თან ნაგვის კომპტები ჩაიყოლა და თეთრი მტვრისა და ნაცრის გროვამი ჩაეფლო.

- არა! - იმეორებდა ძირს წამომჯდარი დაგლასი და ხევში იყურებოდა, - არა!

წოწოლა კაცი ბორცვის ქიმზე წაბორძიკდა და დაუღრიალა:

- მაღლობა თქვი, რომ შენც ზედ არ მიგაყოლე! - და აცაბაცა ნაბიჯებით იქაურობას გამორდა, ერთხელ წაიქცა, ისევ წამოდგა და სიცილითა და ლანდვა-გინებით თვალს მოეფარა.

დაგლასი ხევის პირას იჯდა და ტიროდა. კარგა ხნის შემდეგ ცხვირი მოიხოცა და ტომს შეხედა.

- ტომ, უკვე გვიანია. მამა ჩვენს საძებნელად ქუჩაში იქნება გამოსული. ერთი საათის წინ მაინც უნდა ვყოფილიყავით სახლში. ვაშინგტონის ქუჩით გაიქეცი, მამა მოძებნე და აქ მოიყვანე.

- შენ რა, ხევში ჩასვლას აპირებ?

- ახლა ნაგავსაყრელზე გდია. ესე იგი, ქალაქის საკუთრებაა, ასე რომ, მისი ბედი არავის საქმე აღარ არის, მათ შორის, არც მისტერ ბლეკის. აუხსენი მამას, აქ რისთვისაც ვეძახით და ისიც უთხარი, რომ ჩემთან და კუდიანთან ერთად შინ მისულს ვერავინ შენიშნავს. უკან დავბრუნდები და შემოვლითი გზით მივათრევ შინ, ისე, რომ ვერაფერს გაიგებენ.

- მაინც აღარაფერში გამოგადგება, მექანიზმი სულ დაღეწილი ექნება.



- აქ, ღია ცის ქვეშ, წვიმაში ვერ დავტოვებ, ხომ გესმის, ტომ!

- ჰო, აბა, რა.

ტომი ნელა გაუდგა გზას.

დაგლასი ბორცვის კალთას ჩაუყვავა, ნაცრის გროვებს, ძველ ქაღალდებსა და თუნუქის დაჭყლეტილ ქილებს შორის მიაბიჯებდა. სიბნელეში ფერადად გადაშლილ ოღროჩოღრო დაღმართს აკვირდებოდა.

- მაღამ ტარო! - თითქმის ჩურჩულით ეძახდა, - მაღამ ტარო!

მოეჩვენა, თითქოს ბორცვის ძირას მთვარის შუქზე თეთრი ცვილის ხელი დალანდა, რომელსაც კუდიანი უქნევდა. ნიავი თეთრ ფურცელს აფრიალებდა, მაგრამ ბიჭმა მაინც მისკენ გაუხვია.

ქალაქის საათმა ღამის თორმეტი საათი ჩამორეკა. გარშემო თითქმის არც ერთ სახლში აღარ ენთო შუქი. გარაჟში მოწყობილ სახელოსნოში ორმა ბიჭმა და ერთმა მამაკაცმა, ბოლოს და ბოლოს, უკან დაიხიეს და ძველის-ძველ დაწნულ სავარძელში დაბრძანებულ, აწყობილ და მოწესრიგებულ კუდიანს შორიდან გახედეს. მის წინ, მუშამბაგადაფარებულ ბანქოს მაგიდაზე, ფანტასტიკურ მარაოებად გადაშლილიყო რომის პაპების, ჯამბაზების, კარდინალების, სიკვდილების, მზეებისა და კომეტებისგამოსახულებიანი ტაროს ქაღალდი, რომელსაც ზევიდან ცვილის თეთრი ხელი ეფარა.

მამა მშვიდად ლაპარაკობდა:

- ასეა. პატარა ბიჭი რომ ვიყავი, ქალაქიდან ცირკის გამგზავრება ისე განვიცადე, მთელი ქალაქი შემოვირბინე და მილიონობით ძველი აფიშა შევაგროვე. მოგვიანებით ბოცვრების მოშენებამ და მაგიამ გამიტაცა. სხვენში ილუზიების კომკებს ვაგებდი, დღის სინათლეზე რომ ვერ გამომქონდა, - თავი კუდიანისკენ გაიქნია, - ო, მახსოვს, ერთხელ, ასე, ოცდაათი წლის წინათ, მომავალი რომ მიწინასწარმეტყველა. კარგი, გაასუფთავეთ და მერე დასაძინებლად წადით. შაბათს საგანგებო ბინა ავუშენოთ, - მამა კარისკენ გაემართა, მაგრამ დაგლასის ხმაზე შეჩერდა.

- მამა, გმადლობ. გმადლობ, სახლამდე რომ მოგვაცილე. გმადლობ ყველაფრისთვის.

- არაფრის, - უთხრა მამამ და გარაჟიდან გავიდა.

კუდიანთან დარჩენილმა ბიჭებმა ერთმანეთს გადახედეს.

- აუჰ, ჰირდაჰირ მთავარი ქუჩა არ ჩავიარეთ ოთხივემ, - შენ, მე, მამამ და კუდიანმა! მამა ნამდვილი განძია!

- ხვალ, - თქვა დაგლასმა, - ქალაქის ცენტრში ჩავალ და აპარატის დარჩენილ ნაწილს მისტერ ბლეკისგან ათ დოლარად ვიყიდი, თორემ მასაც გადააგდებს.

- აბა, რას იზამს, - ტომმა თვალი შეავლო დაწნულ სავარძელში მჯდომ მოხუც ქალს, - ბიჭო, მართლა ცოცხალივითაა. ნეტავ შიგნით როგორაა მოწყობილი.

- ჩიტვივით თხელი ჩონჩხი ექნება. სულ ეს არის, რაც მადამ ტაროსგან შემორჩა მას შემდეგ, რაც ნაპოლეონმა...

- და არავითარი მექანიზმი? მოდი, რა, გავჭრათ და შევხედოთ!

- მოვასწრებთ, ტომ.

- როდის?

- რა ვიცი, ერთ ან ორ წელიწადში, თოთხმეტი ან თხუთმეტი წლის როცა ვიქნები. ამ წუთში არაფრის გაგება არ მსურს, გარდა იმისა, რომ აქ, ჩემთანაა. ხვალიდან კი ჯადოების მოხსნაზე უნდა ვიმუშაო, რათა სამუდამოდ გავათავისუფლო. ერთ მშვენიერ სადამოს შეიტყობ, რომ ქალაქის ცენტრში ვიღაც ულამაზესი, საზაფხულო ჭრელ კაბაში გამოწყობილი იტალიელი ქალიშვილი დაუნახავთ. სადგურზე აღმოსავლეთის მიმართულებით იყიდის ბილეთს. ყველა დაინახავს, მატარებელში როგორ ჩაჯდება: ყველა იტყვის, რომ ასეთი მშვენიერი გოგონა არასოდეს უნახავთ და როდესაც ამას გაიგონებ, ტომ - ეს ამბავი კი, მერწმუნე, ელვის სისწრაფით გავრცელდება, რადგან არავის ეცოდინება, თუ საიდან მოვიდა ან საით მიემგზავრება, - აი, მაშინ იცოდე, რომ ჯადო ავხსენი და გავათავისუფლე. და ერთი ან ორი წლის მერე, როგორც კი მატარებელი სადგურიდან დაიძვრება, ცვილის გაკვეთის წამიც დადგება. მისი წასვლისთანავე სრული უფლება გექნება, მის შიგნულში მხოლოდ პატარა ბორბლები, კბილანები და რკინები აღმოაჩინო. აი, ასე.

დაგლასმა კუდიანის ხელი აიღო და სიცოცხლის ფერხულს გადაუსვა: სიკვდილის ჩონჩხების, თარიღებისა და ბედისწერის, მოირებისა და ახირებების ფერად ზარ-ზეიმს. კუდიანის გაცვეთილი ფრჩხილები შრი-ალით ეხებოდა ქაღალდს. სახე ყოვლად იღუმალი წონასწორობის ძალით ჰქონდა დახრილი, ნათურის შუქზე მოელვარე თვალები გაბმით უმზერდნენ ბიჭებს.

- გინდა გიმკითხავო, ტომ? - მშვიდი ხმით იკითხა დაგლასმა.

- მიდი.

კუდიანის ფართო სახელოდან ბარათი გადმოვარდა.

- ტომ, შეხედე ამას! ერთი ბარათი გადაუმალავს და ახლა გვაძლევს! - დაგლასმა ქაღალდს სინათლეზე გახედა, - ცარიელია. ამაღამ ქიმიკატებით სავსე ასანთის კოლოფში ჩავდებ, ხვალ კოლოფს გავხსნით და შიგ წერილი დაგვხვდება!

- რა ეწერება ბარათზე?

დაგლასმა სიტყვების უკეთ გასარჩევად თვალეები მოხუჭა.

- ეს ეწერება: „მადლობას მოგახსენებთ თქვენი უმორჩილესი მონა და გულითადი მეგობარი, მადამ ფლორისტან მარიან ტარო, ქირომანტი, სულის მკურნალი და ბედისწერის ქალღმერთთა შემლოცველი“.

ტომმა გადაიხარხარა და ძმას მხარში მსუბუქად ჰკრა ხელი.

- განაგრძე, დაგ, კიდევ, კიდევ რა?

- მოიცადე... კიდევ ეწერება: „ჰეი, ჰერი-ო!.. სულელია, ვინც სიკვდილის ელის!.. სჯობს უდარდელად მდერა და ცეკვა... როს ისმის სიკვდილის ზარების რეკვა... ღვინის სმა სჯობს და ფერხული... ჰეი, ჰერი-ო!“ კიდევ ეწერება: „ტომ და დაგლას სპოლდინგებო, მთელი სიცოცხლის განმავლობაში, რასაც კი მოისურვებთ, ყველაფერი აგინდებათ!“ და ეწერება, რომ მე და მენ უსასრულოდ ვიცოცხლებთ, ტომ, უსასრულოდ...

- და ეს ყველაფერი - ამ ციცქნა ბარათზე?

- დიახ, თითოეული სიტყვა, ტომ.

ელექტრონათურის სინათლეზე სამივეს თავი დაეხარა, ბიჭებსაც და კუდიანსაც, უსასრულოდ აკვირდებოდნენ ცარიელ, მაგრამ მრავლისადმთქმელ კოხტა ბარათს და თითოეულ იმ დაფარულ სიტყვას შეიგრძნობდნენ, არარადან რომ უნდა ამოტივტივებულიყო.

- მაგარია, - ძლივს გასაგონად ჩაილაპარაკა ტომმა.

დაგლასმა კი საზეიმო ჩურჩულით გაიმეორა:

- მაგარია...

\* \* \*

ალისფერ შუადღეს მწვანე ხეების ჩრდილში ვიდაც ჩუმად, ღიღინით ითვლიდა.

- ...ცხრა, ათი, თერთმეტი, თორმეტი...

დაგლასმა ნელა გადაჭრა გაზონი.

- ტომ, რას ითვლი?

- ...ცამეტი, თოთხმეტი, მოკეტე, თექვსმეტი, ჩვიდმეტი, ჟრიჭინებს, თვრამეტი, ცხრამეტი!..

- ჟრიჭინებს?

- ოჰ, ჯანდაბა! - ტომმა მოჭუტული თვალეები დაჭყიტა, - ჯანდაბა, ჯანდაბა, ჯანდაბა!

- გეყოფა, უფროსებმა არ გაიგონ, რომ იწყევლები.

- ჯანდაბა, ჯანდაბა-მეთქი! - ყვიროდა ტომი, - ახლა თავიდან დაწყება მომიწევს, ვითვლიდი, ჭრიჭინები თხუთმეტი წამის განმავლობაში რამდენ-ჯერ დაიჭრიჭინებდნენ, - თავისი ორდოლარიანი მაჯის საათი მაღლა ასწია, - დაითვლი, მერე ოცდაცხრამეტს მიუმატებ და მიიღებ ზუსტად იმ ტემპერატურას, რაც ამ წუთშია, - ისევ ჩაუკვირდა საათს, ცალი თვალი მოხუჭა, თავი დახარა და აჩურჩულდა:

- ერთი, ორი, სამი..!

დაგლასი შეტრიალდა და სმენად იქცა. სადღაც მაღლა, სპილოსძვლისფერ ცაში, უსასრულოსიგრძის სპილენძის მავთული გაჭიმულიყო და ზრიალი გაუდიოდა. ყოვლისგამჭოლი ლითონისებრი ვიბრაცია ნედლი ელექტრომუხტებივით კვლავაც და კვლავაც ცვიოდა ხეებიდან და არემარეს თავზარს სცემდა.

- შვიდი, - ითვლიდა ტომი, - რვა.

დაგლასი ნელა აუყვა სახლის კიბეს. ბნელ დერეფანში რაღაცას გაჭირვებით ჩააკვირდა, ასევე ნელა დაბრუნდა ჰარმაღზე და სუსტი ხმით გადასძანა ტომს:

- ზუსტად ოთხმოცდაშვიდი გრადუსია ფარენჰაიტი.

- ოცდაშვიდი, ოცდარვა...

- ჰეი, ტომ, გესმის?

- მესმის - ოცდაათი, ოცდათერთმეტი! გამეცალე! ორი, სამი, ოცდათოთხმეტი!

- შეგიძლია თვლა შეწყვიტო, აგერ, შიგნით რომ თერმომეტრი კიდია, ის უჩვენებს ოთხმოცდაშვიდს ყოველგვარი ჭრიჭინების გარეშე.

- ჭრიჭინები! ოცდაცხრამეტი, ორმოცი! ჭრიჭინების კი არა! ორმოცდაორი!

- ოთხმოცდაშვიდი გრადუსია. მეგონა, სწორედ ამის გაგება გასურდა.

- ორმოცდახუთი ეგ შიგნითაა და არა გარეთ! ორმოცდაცხრა, ორმოცდაათი, ორმოცდათერთმეტი! ორმოცდათორმეტი, ორმოცდაცამეტი! ორმოცდაცამეტს ჰლუს ოცდაცხრამეტი იქნება ოთხმოცდათორმეტი გრადუსი!

- ამას ვინ ამბობს?

- ვინ ამბობს და მე ვამბობ! ოთხმოცდაშვიდი გრადუსი ფარენჰაიტით კი არა, ოთხმოცდათორმეტი გრადუსი სპოლდინგით!

- შენ გარდა ამ აზრს კიდევ ვინმე იზიარებს?

ტომი ალენილი სახით წამოხტა ფეხზე და მზეს თვალი გაუსწორა.

- ჭრიჭინები, აი, ვინ! მე და ჭრიჭინები! ხომ ხედავ, რომ უმცირესობაში ხარ! ოთხმოცდათორმეტი, ოთხმოცდათორმეტი გრადუსი სპოლდინგით, დმერთმანი!

ორივენი იდგნენ და უმოწყალოდ გამიშვლებულ ცას აჰყურებდნენ, რომელიც ახლა წყობიდან გამოსულ კინოთეატრს ჰგავდა: ფართო ეკრანით ამტერდებოდა უძრავად გართხმულ მომაკვდავ ქალაქს, მდუღარე ოფლში რომ იხრჩობოდა.

დაგლასმა თვალები დახუჭა და ორი შტერი მზე დაინახა, მისი ქუთუთოების ვარდისფერ, გამჭვირვალე სარჩულებზე რომ ცეკვავდნენ.

- ერთი... ორი... სამი...

დაგლასს ტუჩები თავისით აუმოდრავდა.

- ...ოთხი... ხუთი... ექვსი...

ამჯერად ჭრიჭინები კიდეც უფრო სწრაფად ჭრიჭინებდნენ.

\* \* \*

შუადღიდან დაღამებამდე, შუაღამიდან რიჟრაჟამდე კაცი, ცხენი და ფურგონი გრინთაუნის ყველა ქუჩასა და კუნჭულში მიმოდიოდნენ და ქალაქის ოცდაექვსიათას სამას ორმოცდაცხრავე მცხოვრები საუკეთესოდ იცნობდა მათ.

დღის ნებისმიერ მომენტში ბავშვებს შეეძლოთ თითქოსდა უმიზეზოდ შეჩერებულიყვნენ და გამოეცხადებინათ:

- მისტერ ჯონასი მოდის!

- ნედი მოდის!

- ფურგონი მოდის!

ასაკოვან ხალხს შეიძლებოდა ვერც სამხრეთით, ვერც ჩრდილოეთით, ვერც აღმოსავლეთით და ვერც დასავლეთით მისტერ ჯონასის, ნედის სახელით ცნობილი ცხენისა და პრერიაში მოხეტიალე პირველი კოლონისტებისდროინდელი ფურგონის ვერანაირი ნიშანწყალი ვერ შეენიშნათ.

მაგრამ ნებისმიერი ქუჩის ძაღლისგან ყურს თუ ისესხებდით, სათანადო სინშირეზე მომართავდით და რაც ძალი და ღონე გაქვთ, დაცქვებდით, კილომეტრების მოშორებით ქალაქის მეორე ბოლოდან გაიგონებდით გამკვივან სიმღერას, თითქოს რაბინი გალობსო შუა უდაბნოში, ან მუეძინი - მინარეთიდან. მისტერ ჯონასის ხმა თავის პატრონს მუდამ წინ უსწრებდა, ასე რომ, ხალხს მისი მოსვლისათვის მოსამზადებლად ნახევარი საათი მაინც

ჰქონდა. მისი მოახლოებისას კი ტროტუარის ბორდიურები უკვე ბავშვებით იყო ხოლმე სავსე, გეგონებოდათ, აღლუმის სანახავად გამოეფინენო.

მაშ, ასე: ფურგონი ქუჩაზე შემობრძანდებოდა ხოლმე, ხურმისფერი საჩრდილობლის ქვეშ, კოფოზე მისტერ ჯონასი იჯდა, სადავე ნაკადულივით ეღვრებოდა ხელებიდან. კოფოზე იჯდა და მდეროდა:

*ძველმანები, ძონძები!*

*არა, ჩემო ბატონო!*

*ძველმანები, ძონძები!*

*არაფერიც, ქალბატონო -*

*ბრილიანტები, ძონძები!*

*ნამსხვრევები, ნატუნები,*

*სამეჯლისო კაბები,*

*ბოხჩები და მაქმანები,*

*ბებოს მოსართავები.*

*ძველმანები? ძონძები?*

*არაფერიც, ქალბატონო!*

*არა, ჩემო ბატონო!*

მისი სიმღერის გაგონებისთანავე ყველა ხვდებოდა, რომ მისტერ ჯონასი ჩვეულებრივი მეძველმანე სულაც არ განლდათ, თუმცა, ტანზე დაკონკილი ველვეტის კოსტიუმი ეცვა, თავზე კი ფეტრის ქუდი ეხურა, ზედ დაკრებული სამოქალაქო ომისდროინდელი სამხედრო დილებით. ეს უცნაურობა კი სჭირდა: გარდა იმისა, რომ მზის შუქზე დადიოდა ქალაქში, ის და მისი ცხენი შეიძლებოდა თქვენს შესახვედრად მთვარით განათებული ქუჩის კუთხიდანაც გამოცურებულიყვნენ; ასე მიაგორებდა ფურგონს და უვლიდა წრეებს დამის წყვილადში ჩაკარგულ კუნძულებს, კვარტალებს, რომელთა ბინადრებს უხსოვარი დროიდან იცნობდა. ფურგონით აქა-იქ შეგროვებულ ნივთებს დაატარებდა კვირაობით, თვეობით თუ წლობით, ვიდრე ისინი ვინმეს არ დასჭირდებოდა. ასეთ შემთხვევაში საკმარისი იყო, გეთქვათ: „ეს საათი მინდა“, ან: „ეს ლეიბი გამომადგება“, და ჯონასი გამოგიწვდიდათ მას, უსასყიდლოდ გაგატანდათ და, ახალი სიმღერისათვის სიტყვების შერჩევით გართული, გზას განაგრძობდა.

ამგვარად, ძალზე ხშირად ის ერთადერთი ადამიანი იყო მთელ გრინთაუნში, ვისაც დამის სამ საათზე ეღვიდა და როდესაც თავის ტკივილით შეწუხებული ადამიანი მთვარის შუქზე მის ფურგონსა და ცხენის მოლაპლავე გვერდებს დალანდავდა, გარეთ გამორბოდა და უკითხებოდა, შემთხვევით

ასპირინი ხომ არ გექნებათო, რასაც უცვლელად დადებითი პასუხი მოსდევდა. არაერთხელ მოუწია ღამის ოთხ საათზე მშობიარე ქალისათვის დახმარების გაწევამ და ადამიანები მხოლოდ ასეთ შემთხვევაში ამჩნევდნენ, რა სუფთა ხელები და მოვლილი ფრჩხილები ჰქონდა, თითქოს მდიდარი კაცი ყოფილიყოს, ყველასგან საიდუმლოდ სადღაც მეორე ცხოვრებით რომ ცხოვრობდა. ზოგჯერ ვინმეს გვერდით მოისვამდა და ქალაქის ცენტრში სამუშაოზე მიჰყავდა, ანდა, თუ ადამიანს უძილობა სჭირდა, მასთან პარმალზე ადიოდა, თან მუდამ სიგარები აღმოაჩნდებოდა ხოლმე, ერთად დილაშედიდებოდნენ, ეწეოდნენ და საუბრობდნენ.

ვინც ან რაც უნდა ყოფილიყო მისტერ ჯონასი, ან რაგინდ უცნაურად და გიჟად უნდა მოგჩვენებოდათ, სინამდვილეში გიჟი არ იყო. თვითონ ჩვეული თავმდაბლობითა და სიღბოთი არაერთხელ უთქვამს, რომ დიდი ხნის წინათ ჩიკაგოში ბიზნესი ჰქონდა, მაგრამ ამ საქმემ დააღალა და სიცოცხლის დარჩენილი წლების სრულიად სხვაგვარად გატარება ინდომა. ეკლესიებს არ ცნობდა, თუმცა, მათი იდეებისადმი მოწინებით იყო განმსჭვალული, თავად კი მუდამ სიამოვნებით ქადაგებდა და უყვარდა ცოდნის გამომჟღავნება; ცხენი და ფურგონი იყიდა და გზას გაუდგა, დარჩენილი წლები იმაზე ზრუნვას მიუძღვნა, რომ ქალაქის ერთ ნაწილს ის მიეღო, რაც მეორე ნაწილს აღარ სჭირდებოდა. საკუთარ ფუნქციას ოსმოსის მსგავს ფიზიკურ პროცესად აღიქვამდა: ქალაქის სხვადასხვა კულტურულ ფენას ერთმანეთთან დაკავშირებას უადვილებდა. მფლანგველობას ვერ იტანდა: იცოდა, ის, რაც ერთისთვის ნაგავია, სხვისთვის შეიძლება ფუფუნებას ნიშნავდეს.

ასე რომ, დიდები და, განსაკუთრებით პატარები, ცნობისმოყვარედ იცქირებოდნენ ფურგონში და განძეულობის უშველებელ გროვას სინჯავდნენ.

- ოღონდ დაიხსომეთ, - ამბობდა მისტერ ჯონასი, - რაც მოგესურვებათ, ყველაფერი თქვენია, თუკი მართლა გჭირდებათ. ამის დასადგენად საკუთარ თავს დაუსვით კითხვა: მართლაც მთელი გულით მინდა ეს ნივთი? ერთ დღეს მაინც თუ გავძლებ უმისოდ? თუ ფიქრობთ, რომ უამნივთოდ მზის ჩასვლისთანავე სულს გააფრთხობთ, მაშინ სტაცეთ ხელი და გაიქცით. სიამოვნებით გაგატანთ, რა ნივთიც უნდა იყოს.

ბავშვებიც იდგნენ და ათვალიერებდნენ პერგამენტის, ფარჩისა და შპალერის რულონებს, მარმარილოს საფერფლეებსა და პერანგებს, გორგოლაჭებსა და ბამბით გატენილ რბილ, ამობურცულ სკამებს, კუთხის მაგიდებსა და ბროლის ჭალებს. კარგა ხანს ჩურჩულის, შრიალისა და ჭახაჭუნის მეტს ვერაფერს გაიგონებდი. მისტერ ჯონასი ჩიბუხს გემრიელად ექაჩებოდა და ბავშვებს თვალს ადევნებდა. ბავშვებმა იცოდნენ, რომ მის თვალს

არაფერი გამოეპარებოდა. ხანდახან ხელი შაშის ყუთისკენ, მძივებისა თუ ძველებური სკამისკენ რომ გაეპარებოდათ, მაშინვე თავს ასწევდნენ და მისტერ ჯონასის მოსიყვარულე, გამომცდელ მზერას ხვდებოდნენ. მიმზიდველ საგანს მაშინვე უშვებდნენ ხელს და ძებნას განაგრძობდნენ, ვიდრე ყოველი მათგანი მხოლოდ მისთვის განკუთვნილ საგანს არ გადაეყრებოდა და არ ჩაეჭიდებოდა. ამჯერად ისეთი გაბრწყინებული სახეებით ახედავდნენ, რომ მისტერ ჯონასს უნებლიეთ ეცინებოდა. ხელს ისე აწევდა, თითქოს მათი სახის ბრწყინვალეობას ვერ უძლებს და თვალებს იჩრდილავსო. თვალებზე ხელაფარებული წამით შეშდებოდა. ამის დანახვაზე ბავშვები ყვირილით უხდიდნენ მადლობას, გორგოლაჭებს, თინის ფირფიტებს თუ ქოლგას გულში იკრავდნენ, მიწაზე ხტებოდნენ და გარბოდნენ.

წუთის შემდეგ უკანვე ბრუნდებოდნენ და რომელიმე საკუთარი ნივთი მოჰქონდათ, მობეზრებული თოჯინა ან თამაში, რასაც გემოგასული საღეჭი რეზინივით დაეკარგა ხიბლი და რასაც ქალაქის მეორე ბოლოში გადანაცვლების დრო დასდგომოდა, სადაც ახალი თვალის დანახული კვლავ მკვდრეთით აღდგებოდა და მნახველსაც სიცოცხლის ხალისით ადავსებდა. გაცვლა-გამოცვლის ამ საბუთებს მორცხვად აგდებდნენ ფურგონის ფერდს მიღმა უხილავ საგანძურში; მერე კი ფურგონი რწევა-რწევით განაგრძობდა გზას, მზესუმზირისებრი ბორბლებით შუქს ისხლეტდა და მისტერ ჯონასს კვლავაც ღიღინებდა:

*ძველმანები, ძონძები!*

*არა, ჩემო ბატონო!*

*ძველმანები, ძონძები!*

*არა, ქალბატონო!*

...ვიდრე თვალს არ მოეფარებოდა და მხოლოდ ძალღებულა ესმოდათ უდაბნოში რაბინის ხმა და კულებს აქიცინებდნენ...

- ...ძველმანები...

ხმა წყდებოდა.

- ...ძონძები...

ჩურჩული.

- ...ძველმანები... - ხმა საბოლოოდ წყდებოდა.

და ძაღლებიც იძინებდნენ.



\* \* \*

ტროტუარებზე მტვრის აჩრდილები დაძრწოდნენ: გავარვარებული დამის ქარი მათ აგროვებდა, აქეთ-იქით აფრიალებდა და გაზონებზე მშვიდად აფენდა. გვიან ღამით მოსეირნეთა ნაბიჯებისაგან დარწეული ხეების ტოტები ზვავებდა აფრქვევდა ქვიშას. შუალამიდან ისეთი გრძნობა გაგიჩნდებოდათ, თითქოს ქალაქის მიღმა გამოღვიძებული ვულკანი გარშემო წითელ, ცხელ ფერფლს ანთხევს და უძინარ გუმაგებსა და სიცხის გამო აღრენილ ძაღლებს სქელი ქერქით ფარავსო. დილის სამი საათისათვის ყოველი სახლი გამომშრალ და კვამლიან სხვენად იქცა, ნაპერწკლის აფეთქებას რომ ელის, რათა გაღვივდეს.

რიჩრაჟი ის დრო იყო, როდესაც ელემენტები ერთმანეთს ენაცვლებოდნენ. ჰაერი გაზაფხულის მდუღარე წყლებივით უხმოდ და უმიზნოდ მოჩქევდა. ტბა უძრავი ორთქლის სქელ ფენად გადაჰფარებოდა თევზებისა და ქვიშის ველებს, მისი გამჭვირვალე წნეხის ქვეშ რომ იფუფქებოდნენ. ქუჩის ზედაპირზე ძირტკბილას ჭიქურივით იღვრებოდა კუპრი, წითელი აგური თითბრისა და ოქროს ნაზავად ქვეულიყო, სახურავებს მდუღარე ბრინჯაო ჰქონდათ გადასხმული. მაღალი ძაბვის სადენები სამუდამოდ დატყვევებულ ელვებად იკლაკნებოდნენ და უძილო სახლებს ხანძრით ემუქრებოდნენ.

ჭრიჭინები სულ უფრო ხმამაღლა ჭრიჭინებდნენ.

მზე კი არ ამოვიდა, თითქოს გაღმოიღვარა.

დაგლასი თავის ოთახში იწვა დადნებოდა, სახეზე ოფლის წვეთები ჰატარ-ჰატარა ბუმტებივით ეყარა.

- ეუჰ! - შესძახა მასთან შემოსულმა ტომმა, - დაგ, დაგ, დღეს მთელი დღე მდინარეში ვისხედით.

დაგლასმა ამოისუნთქა. მერე შეისუნთქა. ოფლი წურწურით ჩაედვარა კისერში.

- დაგ, გღვიძავს?

დაგლასმა დასტურის ნიშნად სულ ოდნავ დაუკრა თავი.

- ცუდად ხარ? უჰ, ამ სახლს დღეს ნამდვილად ცეცხლი მოეკიდება! - ტომმა ძმას შუბლზე დაადო ხელი და ასე ეგონა, გახურებული ღუმლის კარს შევხეო. შეშფოთებულმა თითები სწრაფად მოაცილა, გაბრუნდა და ქვედა სართულზე ჩაირბინა.

- დედა, - დაიძახა, - დაგლასი ცუდადაა!

დედა, რომელიც ამ დროს მაცივრიდან კვერცხს იღებდა, შედგა, სახეზე ერთბაშად შემფოთება დაეტყო, კვერცხებიანი ყუთი ისევ უკან შედო და ტომს მეორე სართულზე აჰყვა.

დაგლასს ამასობაში თითიც კი არ შეუტოკებია.

ჭრიჭინები ახლა უკვე კიოდნენ.

\* \* \*

შუადღისას, თითქოს ეშინოდა, მზე არ დამეწიოს და ძირს არ დამანარცხოსო, სახლის მთავარ შესასვლელს ექიმი მიადგა, სულს ძლივს ითქვამდა, თვალელებში უკვე დაღლილობა ეტყობოდა. თავისი ჩანთა ტომს გადასცა.

პირველი საათისათვის ექიმმა სახლი დატოვა. კარში რომ გადიოდა, გაოგნებული იქნევდა თავს. ტომი და დედამისი ბადიან კართან იდგნენ, ექიმი ხმადაბლა იმეორებდა, არ ვიცი, არ ვიციო. მერე თავზე ჰანამა დაიხურა, მაღლა ახედა, როგორ ხეთქავდა და ახმოებდა მზე ხეების ფოთლებს, წამითაც შეყოვნდა, ისე, თითქოს ჯოჯოხეთის პირველ სკნელში აპირებს შებიჯებასო, მერე კი სირბილით გაემართა მანქანისაკენ. გამონაბოლქვმა მფეთქავ ჰაერს ხუთიოდ წუთით კვამლის მოღურჯო ფარდა ჩამოაფარა და თანდათან გაიფანტა.

ტომმა სამზარეულოში ყინულის სამტვრევი შეიტანა. ყინული პრიზმებად დაამსხვრია და მეორე სართულზე აიტანა. დედა საწოლის ნაპირზე იჯდა და ერთადერთი ხმა, რაც ოთახში ისმოდა, დაგლასის სუნთქვა იყო: ორთქლს ჩაისუნთქავდა და ცეცხლს ამოისუნთქავდა. ტილოში გახვეული ყინულის ნაჭრები შუბლზე და ტანის გასწვრივ დაადეს. ფარდები ჩამოაფარეს და ოთახი მღვიმეს დაამსგავსეს. ორ საათამდე ასე ისხდნენ და გამუდმებით ახალ-ახალი ყინული მოჰქონდათ. დაგლასს შუბლზე რომ მიადეს ხელი, ისეთი იყო, როგორიც ნათურა, მთელი დამის განმავლობაში რომ ანთია. ხელით რომ შეეხებოდით, თითებზე დაიხედავდით და გაიკვირვებდით, ძვლამდე როგორ არ ჩამეწვაო.

დედამ რაღაცის სათქმელად გახსნა პირი, მაგრამ ჭრიჭინები ახლა უკვე ისე ხმაურობდნენ, რომ ჭერიდან ბათქაში ცვიოდა.

წითელ მორევში მოცურავე, დაბრმავებული დაგლასი იწვა და თავისი გულის პისტონისებრ ფეთქვასა და ფეხებსა და მკლავებში სისხლის ბლანტ მიმოქცევას უსმენდა.

ტუჩები ისე დაუმძიმდა, ვერ ამოძრავებდა. ფიქრებიც დაუმძიმდა, მხოლოდ ქვიშის საათში ნელა, სათითაოდ ჩაცვენილი მარცვლებივით წკარუნებდნენ. წკაპ!

მბზინავი ფოლადის ლიანდაგის მოსახვევიდან უეცრად რწევით შემოვიდა ტრამვაი და ჰაერში ნაპერწკლების კასკადი გადმოაფრქვია. მისმა ზარმა ათასჯერ დაიწკრიალა, მისი ბოლო ხმა ჭრიჭინების ჭრიჭინს შეერწყა. ტრამვამ ზარბაზნისებრი გუგუნით ჩაიქროლა და გაუჩინარდა. მისტერ ტრიდენ!

წკაპ. ერთი მარცვალის ჩამოვარდა. წკაპ.

- ჩუქუ-ჩუქუ-ჩუქუ-ჩუქ! გუ-გუუუ!

სახურავის თავზე ბიჭი მატარებლობანას თამაშობდა, საყვირის უხილავ ბაწარს ექაჩებოდა, მერე კი უცბად გაშეშდა და ქანდაკებად იქცა.

- ჯონ! ჯონ ჰაფ! მძულხარ, ჯონ! არა, ჯონ, შენ ჩემი მეგობარი ხარ! არ მძულხარ, არა, გესმის?

ჯონი თელებს შორის დერეფანში, როგორც ზაფხულის უძირო ამომშრალ ჭაში, ისე ვარდება, ვარდნისას სულ უფრო პატარავდება.

წკაპ. ჯონ ჰაფ. წკაპ. მარცვალის ვარდება. წკაპ. ჯონ...

დაგლასმა თავი გააქნ-გამოაქნია და ქათქათა, საზარლად ქათქათა ბალიში გადასრისა.

ორი ქალბატონი სელაპის ყეფის თანხლებით მოსეირნობს მწვანე მანქანით, გამვლელებს მტრედებივით თეთრ ხელებს უქნევენ. თანდათან გაზონის ღრმა წყალში იძირებიან, აი, მწვანე ბალახმა თითქმის დაფარა, მხოლოდ მადლა აწეული თეთრი ხელებიდა მოუჩანთ...

მის ფერნ! მის რობერტა!

წკაპ... წკაპ...

და უცბად გზის გადაღმა ფანჯრიდან პოლკოვნიკი ფრილაი გადმოეყუდა, სახე საათის ციფერბლატს მიუგავდა და ქუჩაში ბიზონების ჩლიქებით აფორიაქებული მტვერი დატრიალდა. პოლკოვნიკი ფრილაი არაბუნებრივად შეირხა და დაიჭრიალა, ყბა ჩამოუვარდა, პირიდან ენის მაგივრად ზამბარა ამოუვარდა და ჰაერში აზანზარდა. თოჯინასავით განერთხა ფანჯრის რაფაზე, მაგრამ ცალი ხელის ქნევას მაინც განაგრძობდა.

მისტერ აუფმანმა ჩამოიარა რაღაც ბრჭყვიალა ტრანსპორტით, ტრამვისაც რომ ჰგავდა და მწვანე ელექტრომანქანასაც, კვამლის ღრუბელში გახვეული ამაყად მოგორავდა და მზესავით გჭრიდა თვალს.

- მისტერ აუფმან, ეს თქვენი გამოგონებაა? - გასძახა ბიჭმა, - ბოლოს და ბოლოს, ააშენეთ ბედნიერების მანქანა?

მაგრამ კარგად რომ დაუკვირდა, შენიშნა, რომ მანქანას ძირი არა აქვს და მისტერ აუფმანი მთელ ამ კონსტრუქციას საკუთარი მხრებით დაატარებს.

- ბედნიერება, დაგ, ესეც შენი ბედნიერება! - და ისიც ტრამვაის, ჯონ ჰაფსა და მტრედისთითებიან ქალბატონებს გაჰყვა.

მადლა სახურავზე კაკუნი გაისმა. ბრახ-ბრუხ. სიჩუმე. ბრახ-ბრუხ. ჩაქუჩი და ლურსმანი. ლურსმანი და ჩაქუჩი. ფრინველების გუნდი და მოხუცი ქალი სუსტი, მაგრამ ხალისიანი ხმით ამღერდა:

*და შევგროვდებით მდინარის პირას... პირას... პირას...*

*და შევგროვდებით მდინარის პირას...*

*უფლის ტახტთან რომ მოედინება.*

- ბებო! დიდო ბებო!

რბილი კაკუნი. რბილი კაკუნი.

- ...მდინარის პირას... მდინარის პირას...

ახლა უკვე მხოლოდ ჩიტები ციციქნა ფეხებით უნაზესად ფხაჭნიდნენ სახურავს. რბილად. რბილად.

- მდინარის პირას...

დაგლასმა ჰაერი ჩაისუნთქა და კივილით ამოისუნთქა.

არც კი გაუგია, დედა რომ ოთახში შემოვარდა.

დაბუყებულ ხელზე სიგარეტის ცხელი ფერფლივით დაეცა ბუზი და უღონო ბზულით ისევ აფრინდა.

\* \* \*

ნაშუადღევს ოთხი საათი იდგა. ქვაფენილი მკვდარი ბუზებით იყო მოფენილი. ძაღლები თავიანთ წყლიან ჯამებში ისველებდნენ თათებს და ბუდრუგანებში იყუჩებოდნენ. ჩრდილები ხეებქვეშ დახვავებულიყვნენ. ქალაქის ცენტრში ყველა მაღაზია ჩარაზული და ცარიელი იყო. არც ტბის სანაპიროზე ჩანდა ვინმე, ტბა კი კისრამდე თბილ, მაგრამ შვებისმომგვრელ წყალში ჩამსხდარი ადამიანებით იყო სავსე.

ოთხი საათი და თხუთმეტი წუთია. აგურით მოკირწყლულ ქუჩებზე ძველმანების ფურგონი მიირწეოდა, ზედ მისტერ ჯონასი იჯდა და მღეროდა.

ტომმა, რომელიც შინიდან დაგლასის აწითლებულ, განაწამებ სახეს გამოექცა, ტროტუარი ნელა გადაკვეთა და გაჩერებულ ფურგონს მიუახლოვდა.

- სალამი, მისტერ ჯონას!

- გამარჯობა, ტომ.

ქუჩაში, ტომისა და მისტერ ჯონასის გარდა, არავინ იყო და შეეძლოთ მშვიდად დამტკბარიყვნენ მიმზიდველი ძველმანების დათვალიერებით, რომლითაც ფურგონი პირამდე იყო სავსე, მაგრამ ზედაც არ შეუხედავთ. მისტერ ჯონასს არაფერი უთქვამს, ჩიბუხს მოუკიდა, გააბოლა და თავი ისე დაუკრა ბიჭს, თითქოს უთქმელადაც იცოდა, რადაც უბედურება რომ ტრი-ალეებდა.

- რა ამბავია, ტომ? - იკითხა ბოლოს.

- ჩემი ძმა, - უპასუხა ტომმა, - დაგი.

მისტერ ჯონასმა სახლს ახედა.

- ავად არის, - თქვა ტომმა, - კვდება.

- მთლად ასე ცუდად არ იქნება საქმე, - დაამშვიდა მისტერ ჯონასმა და აქეთ-იქით მიმოიხედა: ამ მდუმარე დღეს რეალური სამყაროს არც ერთი საგანი ოღონვადაც არ მოასწავებდა სიკვდილს.

- კვდება, - გაიმეორა ტომმა, - ექიმმაც ვერაფერი გაუგო. სიცხეო, ასე ამბობს, ცუდად იმიტომაა, რომ უსაშველოდ ცხელაო. განა ეს შესაძლებელია, მისტერ ჯონას? განა შეიძლება მზემ ადამიანი ჩაბნელებულ ოთახშიც კი მოკლას?

- რა ვიცი, - მისტერ ჯონასმა რაღაცის თქმა დააპირა და შეჩერდა.

იმიტომ, რომ ტომი ტიროდა.

- ყოველთვის მეგონა, რომ მძულს... დიან, ასე მეგონა... თითქმის გამუდმებით ვჩხუბობდით... ჰო, მგონი, მართლაც, მძულდა... ხანდახან... მაგრამ ახლა... ახლა. ოჰ, მისტერ ჯონას, იქნებ...

- იქნებ რა, ბიჭუნავ?

- იქნებ ფურგონში ისეთი რამ გქონდეთ, მისი გადარჩენა რომ შეეძლოს? რამე ისეთი, რასაც მივუტანდი და რაც გამოაჯანმრთელებდა.

ტომი ისევ ტიროდა.

მისტერ ჯონასმა დიდი წითელი ცხვირსახოცი ამოიღო და ტომს გაუწოდა. ტომმა ცხვირი მოიხოცა და თვალები შეიმშრალა.

- დაგს მძიმე ზაფხული ჰქონდა, - თქვა მერე, - ბევრი რამ გადახდა თავს.

- მიაშბე ყველაფერი, - სთხოვა მეძველმანემ.

- რა გითხრათ, - ჩაისლუკუნა ტომმა, რადგან ჯერ რიგიანად არ მოეთავებინა ტირილი, - ჯერ ერთი, თავისი საუკეთესო მარმარილოს ბურთულა დაეკარგა, ყველაზე ლამაზი. მეორე ის, რომ ვიდაცამ ბეისბოლის ხელთათმანი მოჰარა, დოლარი და ოთხმოცდათხუთმეტი ცენტი რომ ღირდა. მერე ძალიან დიდი ზარალი ნახა, ჩარლი ვუდმენს თავისი ნამარხი ქვებისა და ნიჟარების კოლექცია ტარზანის თიხის ფიგურაში რომ გაუცვალა, რომელსაც

თურმე მაკარონის ყუთის ხუფებს თუ შეაგროვებ, უფასოდ გაძლევენ. ეს ფიგურაც მეორე დღესვე ტროტუარზე დაუვარდა და დაემსხვრა.

- დასანანია, - თქვა მეძველმანემ და ცხადად დაინახა ასფალტზე თიხის ყველა ნამსხვრევი.

- მერე კიდევ, დაბადების დღეს, მაგიის შესახებ წიგნი რომ უნდოდა, ის არ აჩუქეს: მის მაგივრად შარვალი და პერანგი მიიღო. ეს უკვე თავისთავად საკმარისია ზაფხულის ჩასაშხამებლად.

- მშობლებს ზოგჯერ ავიწყდებათ, თავად რას განიცდიდნენ ბავშვობაში, - შენიშნა მისტერ ჯონასმა.

- ეგრეა, - ტომმა ხმადაბლა განაგრძო, - მერე კიდევ, ტაუერის ნამდვილი ორიგინალური ხელობრიკილები, დაგლასს ლონდონიდან რომ ჩამოუტანეს, მთელი დამე გარეთ დარჩა და დაჟანგდა. და, რაც მთავარია, სიმაღლეში ერთი დუიმი მოვიმატე და თითქმის დავეწიე.

- სულ ეს არის? - მშვიდად ჰკითხა მეძველმანემ.

- ასეთ ან უარეს შემთხვევას კიდევ ასს ჩამოგითვისლიდით. ზოგ ზაფხულს უიღბლობა პირდაპირ ფენდაფენ დაგდევს. რაც სკოლა დამთავრდა, დაგლასს ხან წიგნის ჭია უჭამს კომიქსების კოლექციას და ხანახალი სპორტული ფეხსაცმელი უობდება.

- მეც შემიძლია გავიხსენო ასეთი წლები, - თქვა მეძველმანემ.

ცას ახედა და მთელმა წლებმა თვალწინ ჩაუარა.

- ჰოდა, ხომ ხედავთ, მისტერ ჯონას, აი, ამის გამო კვდება...

ტომს ხმა ჩაუწყდა და მსმენელს თვალი აარიდა.

- უნდა დავფიქრდე, - თქვა მისტერ ჯონასმა.

- შეგიძლიათ უშველოთ, მისტერ ჯონას? შეგიძლიათ?

მისტერ ჯონასი ფურგონში დრმად ჩაეყუდა, ბოლოს წელში გაიმართა და თავი გაიქნია. მზეში გამოსულს, სახეზე დადლილობა დაემჩნა და ოფლმა წვრილ წვეთებად დაასხა. მერე კვლავ გადახედა ლარნაკების, აქერცლილ-სადებავებიანი აბაჟურების, გამწვანებული სპილენძის ნიშვების გროვებს და ამოიოხრა. შემდეგ სადავე ხელში აიღო და ოდნავ შეარხია. ცხენის ზურგისთვის თვალი არ მოუცილებია, ბიჭს ისე უთხრა:

- ტომ, მოგვიანებით გნახავ. რაღაც მაქვს მოსაფიქრებელი. უნდა მოვძებნო, მივიხედ-მოვიხედო და ნავახშმევს დავბრუნდები. მაშინაც, ვინ იცის, რას მოვახერხებ.. აი, მანამდე... - ფურგონში ხელი ჩაყო და პატარა ჩინური ზანზალაკების ასხმა ამოიღო, - ეს მისი საძინებლის ფანჯარაზე ჩამოკიდე. სასიამოვნო, გრილ მუსიკას გამოსცემს!

ფურგონი გაგორდა, ტომი კი ზანზალაკებით ხელში იდგა და თვალს აყოლებდა. ასხმა მადლა ასწია, მაგრამ ჰაერი არ იძვროდა და ერთი ბგერაც კი არ ესმოდა. ზანზალაკები დამუნჯებულიყვნენ.

\* \* \*

შვიდი საათი. ქალაქი გოლიათურ ქურას ჰგავდა, რომელსაც თავზე დასავლეთიდან მოსული სიცხის ტალღები ეღვრებოდა. ყოველი სახლის თუ ხის ქვეშ ნახშირისფერი ჩრდილები ირხეოდა. ქვევით ჟღალთმიანი კაცი მიმოდიოდა. ტომი ფანჯრიდან უყურებდა ჩამავალი და მაინც უმოწყალო მზით განათებულ მის თავს და ეგონა, ამაყად წამომართულ ჩირაღდანს, ალისფერ მელას თუ თვით საკუთარ სამფლობელოში მოსიარულე ეშმაკს ვხედავო.

რვის ნახევარზე მისის სპოლდინგი უკანა კარიდან გავიდა ნაგვის ვედროში საზამთროს ქერქების ჩასაყრელად და სახლთან მისტერ ჯონასს მოჰკრა თვალი.

- ბიჭი როგორ არის? - იკითხა მისტერ ჯონასმა.

მისის სპოლდინგი უხმოდ იდგა, პასუხი ბაგეზე უცანცაუნებდა.

- თუ ნებას დამრთავთ, მისი ნახვა მინდა, - თქვა მისტერ ჯონასმა.

მისის სპოლდინგი კვლავ ვერ იღებდა ხმას.

- თქვენს ბიჭს კარგად ვიცნობ, - განაგრძო კაცმა, - რაც წამოიზარდა და გარეთ დამოუკიდებლად გამოდის, თითქმის ყოველდღე ვხედავ. მისთვის რაღაც მაქვს ფურგონში.

- ის... - ქალს უნდოდა ეთქვა, უგონოდააო, მაგრამ ამის მაგიერ თქვა, - თვლემს. დიახ, სძინავს. ექიმმა გაგვაფრთხილა, რომ მისი შეწუხება არ შეიძლება. ოჰ, ისიც კი არ ვიცით, რა სჭირს!

- მიუხედავად იმისა, რომ „თვლემს“, მაინც დაველაპარაკებოდი, - რბილად, მაგრამ მტკიცედ თქვა მისტერ ჯონასმა, - ძილში გაგონილს ზოგჯერ მეტი მნიშვნელობა აქვს, შენამდგე უკეთ აღწევს, რადგან ყურადღება მოკრებილი გაქვს.

- ძალიან ვწუხვარ, მისტერ ჯონას, მაგრამ ვერ გავრისკავ, - მისის სპოლდინგი კარის სახელურს ჩაეჭიდა და თითებს აღარ უშვებდა, - მაინც გმადლობთ. დიდი მადლობა, რომ შემოიარეთ.

- კარგად ბრძანდებოდეთ, ქალბატონო.

მისტერ ჯონასს ფეხი არ მოუცვლია. იდგა და ზედა სართულის ფანჯარას აჰყურებდა. მისის სპოლდინგი სახლში შევიდა და კარი მოიხურა.

ზედა სართულზე მწოლიარე დაგლასი ხმაურიანად სუნთქავდა, თითქოს ხანჯლის ბასრ ჰირს ქარქაშში აგებს და კვლავ ამოაქვსო.

\* \* \*

რვა საათზე ექიმი მოვიდა და ისევ თავის ქნევით წავიდა. ჰიჯაკი აღარ ეცვა, ჰალსტუხი შეხსნილი ჰქონდა და ისეთი გასავათებული სახით იყურებოდა, თითქოს იმ დღეს, სულ ცოტა, ოცდაათი გირვანქა მაინც დაიკლოო. ცხრაზე ტომმა, დედამ და მამამ გარეთ გასაშლელი საწოლი გამოიტანეს, რათა დაგლასს ღამით ეზოში, ვაშლის ძირას დაეძინა. თუკი ოდნავი ნიავი მაინც შეირხეოდა, აქ უფრო ადრე მიაღწევდა ავადმყოფი ბიჭის საწოლამდე, ვიდრე საზარლად ჩახუთულ საძინებელში. თერთმეტ საათამდე აქეთ-იქით მიმოდიოდნენ. მერე კი მადვიძარა სამ საათზე დააყენეს, რათა ამ დროისათვის ჰარკების გასავსებად ახალი ყინული დაეკეპათ.

როგორც იქნა, სახლი ჩაბნელდა და მიწყნარდა, ყველას ეძინა.

თორმეტ საათსა და ორმოცდათხუთმეტ წუთზე დაგლასმა ქუთუთოები შეარხია.

მთვარე ამოდიოდა.

შორს ვიღაცამ სიმღერა წამოიწყო.

მაღალი, ნაღვლიანი ხმა იყო, ძლიერდებოდა და კვლავ მშვიდდებოდა, კრიალა, სუფთა ბგერები იყო, სიტყვებს კი ვერ გაარჩევდით.

ტბის თავზე მთვარე ამოვიდა და ილინოისის შტატის ქალაქ გრინთაუნს გადახედა, გამოაჩინა ყოველი სახლი, ყოველი ხე თუ ისტორიამდელი მოგონებებითა და გულუბრყვილო სიზმრებით შეწუხებული ყოველი ძაღლი, ძილში ძლივს გასაგონად რომ წკმუტუნებდა და წრიალებდა.

რაც უფრო მაღლა იყო ცაზე მთვარე, სიმღერის ხმაც თითქოს მით უფრო კრიალდებოდა და ძლიერდებოდა.

სიცხიანმა დაგლასმა ოხვრით შეიცვალა გვერდი.

შესაძლოა, ეს მანამდე ერთი საათით ადრეც კი დაიწყო, ვიდრე მთვარე თავის შუქს ქვეყნად მიმოაფრქვევდა, ან იქნებ უფრო გვიანაც. ასე იყო თუ ისე, ხმა უკვე მოახლოებულიყო და მასთან ერთად გულისძგერის მსგავსი ხმაც ჟღერდა: სინამდვილეში ეს აგურის ქუჩებზე, ხეების მწვანე რიდეების გასწვრივ, მომავალი ცხენის ფლოქვების ხმა იყო, ყრუდ და რბილად რომ მოისმოდა.

და კიდევ ერთი ხმა ისმოდა, კარის ნელი გაღებისა და დახურვის ხმა, დროდადრო რბილ ჭრიალში რომ გადადიოდა. ფურგონის ხმა.



და მთვარის შუქით განათებულ ქუჩაზე ფურგონში შებმულმა ცხენმა შემოაბიჯა, ფურგონის მაღალ კოფოზე კი მსუბუქად დაბრძანებულებით მისტერ ჯონასის გამხდარი ფიგურა. ქული ისევ ეხურა, თითქოს კვლავაც მზე აჭერსო და დროდადრო სადავეს ცხენს თავზე ნაკადულის ტალღებად უფრიალებდა. ფურგონმა ძალიან ნელა ჩაიარა ქუჩაზე, მისტერ ჯონასი განაგრძობდა სიმღერას, მძინარე დაგლასმა წუთით თითქოს შეაჩერა სუნთქვა და ყური დაუგდო.

- ჰაერი, ჰაერი... იყიდეთ ჰაერი... წყალივით კამკამა და თოვლივით ცივი... აპრილის სუნთქვა და ქროლა შემოდგომის... ჰაპაიის სურნელი შორი კუნძულისიდან... მთებიდან... ზღვებიდან... მყინვარის ფერდიდან... ქილა სულ ათ ცენტად, ბოთლი კი თორმეტად, იჩქარეთ, ციური ნამი გეგონებათ...

სიმღერა რომ დასრულდა, ფურგონი გზის პირას შეჩერდა და ვიღაც უკვე ეზოში იყო, საკუთარ ჩრდილს ფეხით თელავდა, მოჰქონდა ხოჭობივით მწვანე ორი ბოთლი, მთვარის შუქზე კატის თვალებად რომ ბრწყვიალებდა. მისტერ ჯონასი გასაშლელ საწოლს მიუახლოვდა და ზედ მწოლიარე ბიჭს ხმამაღლა დაუძახა ერთხელ, ორჯერ, სამჯერ, ერთხანს იდგა და ოდნავ ირხეოდა, თითქოს ჭოჭმანობსო, მერე გადაწყვეტილება მიიღო, საწოლის გვერდით ბალახზე ჩამოჯდა და ზაფხულის წნეხით გასრესილ ბიჭს სახეში ჩახედა.

- დაგ, - უთხრა, - მშვიდად იწევი, არც რამის თქმა მოგეთხოვება, არც თვალების გახელა. თავს ძალასაც კი ნუ დაატან, რათა ყური დამიგდო, მაგრამ ღრმად, შინაგანად, ვიცი, რომ მისმენ. მე ვარ, ბებერი ჯონასი, შენი მეგობარი. შენი მეგობარი, - გაიმეორა და თავი დაუქნია.

ხელი აიშვირა, ხიდან ვაშლი მოწყვიტა, აქეთ-იქით შეატრიალა, მოკბიჩა და ცოტა ხნის შემდეგ განაგრძო.

- არიან ადამიანები, ვისაც ძალზე ადრეულ ასაკში აწვებათ დარდი, - ამბობდა მისტერ ჯონასი, - თითქოს ამის არანაირი მიზეზი არ არსებობს, მაგრამ ეს ლამის დაბადებიდანვე მოსდევთ. მათი გულისტკენა სხვებზე იოლია, დანარჩენებზე სწრაფად იქანცებიან, მეტს ტირიან, უფრო ხანგრძლივი მახსოვრობა აქვთ... ეს კარგად ვიცი, მეც ერთ-ერთი მათგანი ვარ.

ვაშლი მოკბიჩა და დაღეჭა. შემდეგ განაგრძო:

- მაშ, კარგი, სად ვიყავით? - საკუთარ თავს თვითონვე გასცა პასუხი, - ცხელი ღამეა, ჰაერი არ იძვრის, აგვისტოა. მომაკვდინებელი სიცხეა. ზაფხულიც გრძელი იყო და ძალზე ბევრი რამ მოხდა, ასე არ არის? მეტისმეტად ბევრი რამ. აი, უკვე პირველი საათი ხდება და არც ნიაჟია, არც წვიმა. ერთი წუთიც და, აქედან ავდგები და წავალ, მაგრამ წასვლის წინ, კარგად

დაიმახსოვრე, საწოლზე ამ ორ ბოთლს დაგიტოვებ და როდესაც წავალ, მინდა კიდევ ორიოდ წუთი შეიცადო, მერე კი თვალები გაახილო, ფრთხილად წამოჯდე და ბოთლების შიგთავსი დალიო. პირით კი არა, ცხვირის ნესტოებით. ბოთლები შეანჯღრიე, გახსენი და რაც შიგნითაა, შეისრუტე, რათა ტვინი და ფილტვები აგვესოს. ოღონდ ჯერ ეტიკეტებზე წარწერები წაიკითხე. არა, სჯობს მე თვითონ წაგიკითხო.

ერთი ბოთლი სინათლეს შეუშვია.

- საოცნებო მწვანე ბინდის პროდუქცია, ჩრდილოეთის სუფთა ჰაერი, - წაკითხა კაცმა, - დამზადებულია 1900 წლის გაზაფხულზე თეთრი არქტიკული ატმოსფეროსაგან, შეიცავს აგრეთვე ზემო ჰუძონის ხეობაში 1910 წლის აპრილში შეგროვებულ ნიავს და აიოვის შტატის ქალაქ გრინელის მიდამოებში მზის ჩასვლისას აბრჭყვიალებულ მტვრის ნაწილაკებს, როდესაც ტბის, ნაკადულისა და ტყის წყაროს თავზე გრილი ჰაერი ტრიალებს. ახლა კი ის, რაც წვრილად წერია, - თქვა და თვალები ოდნავ მოჭუტა, - „ასევე შეიცავს მენტოლის, ლაიმის, პაპაიის, საზამთროსა და სხვა გრილი, წვნიანი ხილისა და მცენარის მოლეკულებს, როგორცაა ქაფური, ისეთ ბალახებს, როგორცაა ზამთრის გაულტერია და მდინარე დეს-პლეინზის<sup>40</sup> ნაპირებიდან მონაქროლ ნიავს. გარანტირებულია ძალის აღსადგენად და გასაგრილებლად. მიიღეთ ზაფხულის დამით, როდესაც ტემპერატურა ოთხმოცდაათს გადააჭარბებს“.

ახლა მეორე ბოთლი აიღო.

- ესეც იგივეა, ოღონდ არანის კუნძულების<sup>41</sup> ქარი, ღუბლინის ყურეში შეგროვებული მლაშე ბრიზი და ისლანდიის სანაპიროს ფლანელის ბურუსი დავემატე.

ორივე ბოთლი საწოლზე დადო და წამოდგა.

- კიდევ ერთ მითითებას მოგცემ, - საწოლისკენ გადაიხარა და თვალდახუჭულ ბიჭს მშვიდად ჩასჩურჩულა, - ამას რომ შეისრუტავ, თან იმაზე იფიქრე, რომ ეს ბოთლები შენი მეგობრის მოხუფულია. ს. ჯ. ჯონასის სასმელების კომპანია, გრინთაუნი, ილინოისი - 1928 წლის აგვისტო. მოსავლიანი წელიწადია, ჩემო ბიჭო... მოსავლიანი წელიწადი.

წუთიც და, მთვარით განათებულ კვარტალში კვლავ ცხენის ზურგზე სადავის ტყაპუნის ხმა გაისმა და ფურგონი ქუჩის ბოლოში რბილი რახრახით გაუჩინარდა.

<sup>40</sup> დეს-პლეინზი - მდინარე აშშ-ის შტატ ილინოისის ქალაქ დეს-პლეინზში.

<sup>41</sup> არანის კუნძულები - აერთიანებს სამ კუნძულს: ინიმორს, ინიმანსა და ინაშირს, მდებარეობს ირლანდიის დასავლეთ სანაპიროსთან.

კიდევ ერთი წუთის შემდეგ დაგლასს ქუთუთოები აუთრთოლდა და მან ნელა გაახილა თვალები.

- დედა! - ჩურჩულებდა ტომი, - მამა! დაგი, დაგი უკეთაა! ამწუთას ჩავედი მის სანახავად და... წამოდით!

ტომი გარეთ გავარდა. მშობლები უკან მიჰყვნენ.

როდესაც მიუახლოვდნენ, დაგლასს ეძინა. ყურებამდე გაბადრულმა ტომმა ხელი დაუქნია და დედ-მამა საწოლისაკენ დაიხარა.

სამივენი დახრილი უსმენდნენ ავადმყოფის სუნთქვას. ამოსუნთქვა, სიჩუმე, ამოსუნთქვა, სიჩუმე.

დაგლასს პირი ოდნავ გახსნილი ჰქონდა და ბაგეებიდან და ნესტოებიდან გრილი ღამისა და გრილი წყლის, ქათქათა თოვლისა და ქორფა, მწვანე ხავსის სურნელს აფრქვევდა, მშვიდი მდინარის ფსკერზე, ვერცხლისფერ კენჭებზე არეკლილი მთვარის შუქისა და თეთრი ქვის ჭაში მოლიკლიკე წყლის სიგრილეს.

მოეჩვენათ, თითქოს სახე ჰაერში ამოფრქვეული შადრევნის მაცოცხლებელ, ვაშლისსურნელიან ჭავლს შეუშვირეს.

კარგა ხანს იდგნენ ასე უძრავად.

\* \* \*

მეორე დღია გათენდა და ერთ მუხლუხოსაც ვერ ნახავდით ვერსად. სამყარო, რომელიც პირამდე სავსე იყო შავი თუ რუხი ციცქნა ქულებით, მუდამ თავ-თავიანთ გზაზე, მწვანე ფოთლისა თუ ბალახის მთრთოლარე დაშნისკენ რომ მიდოდავდნენ, ერთბაშად დაცარიელდა. ის მოუხელთებელი, აღუწერელი ხმა, რომელსაც მუხლუხოების მილიარდობით ციცქნა ნაბიჯი გამოსცემდა, ერთბაშად მიწყდა. ტომი, რომელიც ამტკიცებდა, ამ უფაქიზესი ხმის გაგონება შემოძლიაო, ახლა გაოცებული გაჰყურებდა ქალაქს, სადაც არც ერთი ჩიტის ნისკარტში ბუსუსებიანი ნამცეცი აღარ იძვროდა. ამასთან, ჭრიჭინებიც აღარ მღეროდნენ.

მერე კი სიჩუმეში ვება ამოხვრასავით გაისმა შრიალი, რომელმაც ყველას მუხლუხოებისა და ჭრიჭინების უეცარი გაქრობის მიზეზი ამცნო.

შხაპუნა წვიმა.

წვიმა მსუბუქი ალერსივით დაიწყო, შემდეგ იმატა და მძიმედ დაუშვა, ტროტუარები და სახურავები უზარმაზარი ფორტეპიანოებივით დააგუგუნა.

თავის საძინებელში დაბრუნებული დაგლასი საწოლში ახალჩამოფერფლილი თოვლივით მსუბუქად იწვა, თვალები გაახილა, სახე ცის

მაცოცხლებელი ნიაღვრებისკენ მიაბრუნა და თავისი ყვითელი ბლოკნოტი-სა და „ტიკონდეროგას“ ყვითელი ფანქრისაკენ ნელა, ძალიან ნელა გააპარა თითები...

\* \* \*

ჩამობრძანება-დახვედრის დიდი მღელვარება ტრიალებდა. საიდანღაც თითქოს საყვირების ხმაც კი მოისმოდა. ოთახებში ნაშუადღევის ჩაისთვის შეკრებილი ახლობლებისა და მეზობლების ტევა აღარ იყო. ჩამოვიდა დეიდა, რომელსაც როუზი ერქვა და მისმა კლარნეტივით წკრიალა ხმამ ყველა ხმა გადაფარა. თვითონ დეიდას კი, მისი სახელის შესაბამისად, წარმოსახვაში სათბურის ვარდივით თბილ, რბილ და ფაშფაშა არსებად დაინახავდით, სადაც კი დაჯდებოდა, ნებისმიერ ოთახს რომ ამოავსებდა. მაგრამ დაგლასისთვის ახლა მთელი ეს ხმაური და ალიაქოთი არაფერს ნიშნავდა. ის თავისი საკუთარი სამყაროდან გამოვიდა და სამზარეულოს კარში იდგა, სადაც ბებო, აქაურობის მბრძანებელი, სასტუმრო ოთახში ქათმებივით მოკაკანე კრებას რომ განერიდა, ახლა ვახშმის მზადებით იყო დაკავებული. კართან მდგარი ბიჭი რომ დაინახა, იმწამსვე მივარდა, მოესიყვარულა, შუბლზე ეამბორა, თვალებიდან ქერა თმა გადაუწია, თვალებში დაჟინებით ჩახედა, რათა გაეგო, საბოლოოდ თუ ჩაიფერფლა მასში ცოტა ხნის წინათ მძვინვარე სიცხე, ხოლო როდესაც ამაში დარწმუნდა, შვებით ამოისუნთქა და საქმეს მიუბრუნდა.

დაგლასს ხშირად უჩნდებოდა სურვილი, ეკითხა: „ბებო, ეს არის ის ადგილი, საიდანაც ქვეყნიერება დაიწყო?“ რადგან უეჭველი იყო: სწორედ ამისთანა ადგილას ჩაეყარა საფუძველი სამყაროს. სამზარეულო უდავოდ შესაქმის შუაგულს წარმოადგენდა, რადგან ყოველივე მის გარშემო ტრიალებდა; ის განლდათ საძირკველი, რომელზედაც ტაძარი დაფუძნებულიყო.

ბიჭმა თვალები მოხუჭა და ყნოსვას მიენდო. ბრმად მოძრაობდა ჯოჯოხეთის ამ ცეცხლსა და ფევილის მოულოდნელ ქარბუქებს შორის, ამ ყოვლად საოცარ ჰავაში, სადაც ბებო, ინდოელი გურუსთვალებიანი ბებო, რომლის კორსაჟიც ორი მკვრივი და თბილი ქათმისხელა სხეულს იტევდა, ათასმკლავიანი ქალღმერთი ბებო ცრიდა, თქვეფდა, ბეგავდა, ჩურთავდა, კეპავდა, ფცქვნიდა, ახვევდა, ურევდა და მარილს აყრიდა.

საკუჭნაოსკენ ბრმად გაიკვლია გზა. სასტუმრო ოთხიდან ხარხარი და ჩაის ფინჯნების ჟღარუნის ისმოდა, მაგრამ ბიჭმა ზღვისფერი მწვანე

სიგრილისა და ველური ხურმის სამფლობელოში შეაბიჯა, სადაც ჭერში ჩამოკიდებული კრემისფერი ბანანების სურნელი ტრიალებდა, მშვიდად რომ მწიფდნენ და შემოსულ სტუმარს თავში რბილად უკაკუნებდნენ. აღმფოთებული ქინქლები ძმრის ბოთლებისა და ბიჭის თავზე აწრიალდნენ.

თვალეები გაახილა. დაინახა ზაფხულის დრუბელივით გაწოლილი პური, თითქოს ელოდა, რბილ ნაჭრებად როდის დამჭრიანო, ბლითები რომელიდაც კულინარიული თამაშის მერე მიმოფანტულ საცირკო რგოლებს მიამსგავსა. ბიჭს მათი სურნელისაგან ნერწყვი მოადგა. აქ, სახლის ჩრდილიან მხარეს, სადაც ცხელი ქარი ფანჯრის მინას ნეკერჩხლის ფოთლებს ახლიდა და ნაკადულის რაკრაკა ხმას გამოსცემდა, დაგლასი საკაშმ-სანელებლების დასახელებებს კითხულობდა.

როგორ ვუთხრა მადლობა მისტერ ჯონასს იმისთვის, რაც გამიკეთა? რით გადავუხადო ეს სიკეთე? ვერაფრით, ვერაფრით გადავუხდი. ასეთი რამისანაზღაურება შეუძლებელია. მაშ, რა? როგორ მოვიქცე? რამენაირად სხვას უნდა გადავცე, რათა ჯაჭვი არ გაწყდეს. ვიპოვო ვინმე, ვისაც დახმარება სჭირდება და დავეხმარო. მხოლოდ ასე...

- კაიენური წიწაკა, თავშავა, დარიჩინი.

ზღაპრული, იავარქმნილი ქალაქების სახელწოდებები, რომლებსაც სანელებლების მტვრის ქარიშხალმა გადაუქროლა.

ხელი გაჰკრა და მსუბუქად შეარხია რომელიდაც შავი კონტინენტიდან ჩამოტანილი, ასხმებად ჩამოკიდებული ხახვის თავები, რითაც მოკოლადისთითებიანი ბავშვები რძისფერ მარმარილოზე ოდესღაც კენჭობანას თამაშობდნენ.

ერთი ქილის ეტიკეტზე წარწერა რომ წაიკითხა, მიხვდა, რომ კალენდრის წრეს შემოურბინა და წლევიანდელი ზაფხულის იმ განსაკუთრებულ დღეს მიადგა, როდესაც საკუთარი თავი მბრუნავი სამყაროს ცენტრში უნდა აღმოეჩინა.

ქილაზე ეწერა სიტყვა ნეტარება.

და დაგლასი მიხვდა, რომ სწორად მოიქცა, სიცოცხლე რომ გადაწყვიტა.

ნეტარება! რა არაჩვეულებრივი სახელია თეთრხუფიან ქილაში ჩაპრესილი წვრილად დაკეპილი მწნილისათვის! როგორი ადამიანი იქნებოდა ის, ვინც ეს სახელი მოიგონა? ალბათ, ღრიალითა და ფეხების ბაკუნით გასრისა, ერთმანეთში აზილა ამ ქვეყნის ყველა სიხარული, მერე ქილაში მოათავსა და გაკრულად წააწერა: ნეტარება! რადგან ჟღერადობით ეს სიტყვა უკვე თავისთავად ნიშნავდა მინდორ-ველად თარემს ველურ წაბლა ცხენებთან ერთად, პირიდან ბალახი წვერ-ულვაშივით რომ ჰკიდიათ, ანდა ოკეანის

მღვიმეში თავის ჩაყოფას, რათა წყლის გოლიათური მასა ზედ გადაგველოს. ნეტარება!

ხელი ისევ თაროსკენ გაიწვდინა. აი, კიდევ ერთი ქილა: გემო.

რეალური სამყაროს ნაშუადღევის სასტუმრო ოთახიდან დეიდა როუზის ხმა მოისმა:

- ამ საღამოს ბებო რას გვიმზადებს სადილად?

- ვიღრე სუფრას არ მივუსწდებით, არავინ იცის, რას ამზადებს ბებო, - უპასუხა პაპამ, რომელიც დღეს ამ გოლიათი ყვავილის დასახვედრად სამსახურიდან ადრე წამოსულიყო, - ეს მუდამ საიდუმლოა, მუდამ მღელვარე მოლოდინი.

- მე კი მიყვარს, როდესაც წინასწარ ვიცი, საჭმელად რა მექნება, - წივიანა ხმით თქვა დეიდა როუზმა და გადაიხარხარა. ჭაღზე ჩამოკიდებული ბროლის კრისტალები მტკივნეულად აწკარუნდნენ.

დაგლასმა საკუჭნაოს წიაღში უფრო ღრმად შეაბიჯა.

- გემო... რა საუცხოო სიტყვაა. რეჰანსა და ბეტელსაც არა უშავს. წიწაკა. კერი. ყველა მაგარია, მაგრამ „ნეტარება“... ეჭვგარეშეა: „ნეტარება“ ყველას სჯობს.

\* \* \*

ბებო თავდახურული ქვაბებით სამზარეულოსა და სასადილო ოთახს შორის მიმოდინდა, უკან კი ორთქლის შლეიფებს დააფრიალებდა, სუფრასთან შეკრებილი საზოგადოება კი მღუმარე მოლოდინით აყობებდა თავალს. არავის გასჩენია სურვილი, ღროზე ადრე აეხადა ხუფები, რათა იღუმალი კერძებისათვის დაეხედა. აი, როგორც იქნა, ბებამ თავისი ადგილი დაიკავა, პაპამ ლოცვა წარმოთქვა და იმწამსვე ვერცხლისფერი ხუფები კალიების გუნდით აფრიალდა სუფრიდან.

როდესაც სათითაოდ ყველამ მისი კულინარიული საოცრებებით ამოივსო პირი, ბებო მშვიდად მიეყრდნო სკამის საზურგეს და იკითხა:

- აბა, როგორ მოგწონთ?

ნათესავებიც, დეიდა როუზის ჩათვლით, და მდგმურებიც, ვისი ყბებიც ამ წუთში ნეტარად შეედუღაბებინა უგემრიელეს ნაზავს - ყველანი საშინელი დილემის წინაშე აღმოჩნდნენ. რა ქნან: ხმა ამოიღონ და სუფრას ჯადო ახადონ, თუ განაგრძონ ღეჭვა, კიდევ და კიდევ იგემონ ეს ღმერთების საკვები, ეს თაფლი და ბადაგი? ისეთი სახეები ჰქონდათ, თითქოს არ იცოდნენ, ეცინათ თუ ეტირათ ამ უმოწყალო დილემის გამო; უსასრულოდ ისხდებოდნენ

ასე და ვერც ხანძარი, ვერც მიწისძვრა, ვერც ფანჯრის მიღმა თოფის გასროლა თუ ყრმათა წარტყვევნა ვერ დასძრავდათ ადგილიდან, რადგან უკვდავების ელექსირით იყვნენ მონუსხულნი. უნეტარესი სანელებლების, ტკბილი ნიანხურისა და ქორფა ბოლქვების ამ ჯადოსნურ ჟამს ყველა ბოროტმოქმედი ბავშვივით უმანკოა. ყველა თვალი ქათქათა თოვლის მინდორზე მიმორბოდა, სადაც კონტად ელაგა ფრიკასე და ბამი, ახალგამოგონებული სიმინდისა და ლობიოს კერძი, რაგუ და მოლუსკების წვნიანი. სრულ სიჩუმეში ერთადერთი, რასაც გაიგონებდით, სამზარეულოდან გამოსული დუდილის შესაქმისეული ხმაური გახლდათ და ჩანგლების თეფშებზე შეხების საათისებრი წკრიალი, წუთების მაგიერ წამებს რომ ითვლიდა.

უცბად დეიდა როუზმა ერთი ღრმა ჩასუნთქვით დაიბრუნა მთელი თავისი წარუშლელი სივარდისფრე, სიჯანსაღე და მუუპოვარი ენერგია, ჩანგალი ჰაერში შეაჩერა, ზედ ასხმულ საიღუმლოს დაამტერდა და მეტისმეტად ხმამაღლა თქვა:

- ო, უდავოდ არაჩვეულებრივი სადილია, მაგრამ რა არის ის, რასაც ახლა მივირთმევთ?

შეორთქლილ ჭიქებში ლიმონათმა შიშხინი შეწყვიტა, ჰაერში მოლაპლაპე ყველა ჩანგალი მაგიდაზე დაეშვა.

დაგლასმა ისეთი თვალეებით შეხედა დეიდა როუზს, როგორც განგმირული შველი შეჭყურებს მონადირეს, ვიდრე ძირს დაეცემა. მაგიდის გაყოლებაზე ყველა სახეს შეშფოთება დაეტყო. ყველა კერძი ხომ თავად ამბობდა საკუთარ სათქმელს, განა ასე არ იყო? საკუთარი ფილოსოფია ჰქონდა, თავად სვამდა შეკითხვებს, რომელთაც თავადვე სცემდა პასუხს. რა საჭიროა ზედმეტი სიტყვები, როდესაც შენი სისხლი და მთელი სხეული მხოლოდ ამ წმინდა ქებათა ქებას ითხოვს?!

- ასე მგონია, - განაგრძო დეიდა როუზმა, - ჩემი შეკითხვა არავის გაუგია.

ბოლოს და ბოლოს, ბებომ სულ ოდნავ გახსნილ ტუჩებს შორის გამოცრა პასუხი:

- ამ კერძს „ხუთშაბათის ოჯახურს“ ვუწოდებ. ყოველ კვირას გვაქვს სადილად.

ეს სიცრუე იყო.

მრავალი წლის განმავლობაში ერთი კერძი არასოდეს ჰგავდა მეორეს. მწვანე ზღვის ბინადარი იყო თუ ზაფხულის კრიალა ციდან ჩამოვარდა, მცურავი საკვები იყო თუ მფრინავი, სისხლი დაადინეს თუ ქლოროფილი, გადაადგილება შეეძლო თუ მხოლოდ მზისკენ თავის მიბრუნება, არავინ იცოდა. არავინ კითხულობდა. არავის ადარებდა.



ოჯახის წევრები, დიდი-დიდი, სამზარეულოს კარში თუ გაჩერდებოდნენ და ფქვილის ამოფრქვევებს დააკვირდებოდნენ, ტკბებოდნენ ჟღარუნითა და ბრაგაბრუგით, თითქოს შემლილი ფაბრიკის მუშაობას ესწრებოდნენ, სადაც ბებო ნანევრად ბეც თვალებს აქეთ-იქით აცეცებდა, მისი თითები კი ქვაბებსა და ჯამებს შორის თავად იკვლევდნენ გზას.

ნეტავ თვითონ თუ დაფიქრებულა თავის ნიჭზე? ალბათ, არა. თუკი ვინმე მის კულინარიულ შესაძლებლობებს ახსენებდა, ბებო უბრალოდ დაიხედავდა ხოლმე ხელებზე, რომლებსაც რაღაც დალოცვილი ინსტინქტი ხან ფქვილის ხელთათმანებით მოსავდა, ხან გამოფატრული ინდაურების წინაღმი უშვებდა მათი ცხოველური სულის მოსაპოვებლად. თანამოსაუბრეს ძველი სათვალთ შემორკალულ რუხ თვალებს შეანათებდა. სათვალის მინები ორმოცი წლის განმავლობაში ღუმლის ჭვარტლსა და წინაკისა თუ სალბის მტვერს დაებინდა ისე, რომ ბებო ზოგჯერ შესაწვავ ხორცს ორცხობილას მაგიერ სახამებელში ამოავლებდა ხოლმე, მიუხედავად ამისა, ხორცი მაინც არაჩვეულებრივად ნაზი და ცვრიანი გამოდიოდა! ხშირად გარგარის ნაჭრები ხორციან წვნიანში უცვიოდა, ერთმანეთთან აჯვარებდა ხილს, ბალახეულს, ხორცს, ბოსტნეულს ისე, რომ არანაირ ტრადიციას, არანაირ რეცეპტს არ ცნობდა. გადამწყვეტი მხოლოდ ის გახლდათ, რომ სუფრაზე მიტანის დამაგვირგვინებელ მომენტში ჯილდოდ ნერწყვმომდგარი პირები და ყველას ძარღვებში სისხლის აძგერებული დინება ერგებოდა. ასე რომ, მისი ხელები, როგორც მანამდე დიდი ბებოს ხელები, მისი საიდუმლო და საუნჯე, მისი სიხარული და სიცოცხლე იყო. ბებო მათ გაოგნებით დასცქეროდა, მაგრამ თავისუფლებას ანიჭებდა, რათა თავიანთი ცხოვრებით ეცხოვრათ.

\* \* \*

მაგრამ აი, ამდენი წლის განმავლობაში პირველად გამოეცხადა ეს მეტიჩარა, კირკიტა, შეიძლება ითქვას, ეს ლაბორატორიული მკვლევარი, ხმამაღლა რომ ალაპარაკდა იქ, სადაც ერთადერთ ღირსებას დუმილი წარმოადგენდა:

- დიახ, რა თქმა უნდა, მაგრამ მაინც რისგან დაამზადეთ ეგ თქვენი „ხუთშაბათის ოჯახური“?

- რისგან და, - კვლავ თავი აარიდა ბებომ პირდაპირ ჰასუნს, - თავად განსაჯე, რისი გემო აქვს?

დეიდა როუზმა ჩანგალზე აცმული ლუკმა დაყნოსა.



- საქონლის ხორცია თუ ბატკნის? ჯანჯაფილი თუ დარიჩინი? ლორი? მოცვი? ცოტაოდენი ორცხობილაც ხომ არ ჩაგიდვიათ? პრასი? ნუში?

- ზუსტად ეგ არის, ზუსტად, - თავი დაუქნია ბებომ, - დამატება ხომ ყველას გნებავთ?

ამ სიტყვებს მაშინვე დიდი გნასი, თეფშების ჩხარუნი და აჩქარებული ყაყანი მოჰყვა, მკრეხელური დაკითხვის სამუდამოდ შეჩერებას რომ იმედოვნებდა. ყველაზე მეტს დაგლასი ხმაურობდა და სხვებზე მეტადაც იქნევდა ხელებს. მაგრამ სახეზე ყველას ეტყობოდა, რომ მათი სამყარო შეტორტიმანდა, მათ ბედნიერებას საფრთხე დაემუქრა, რადგანაც ოჯახის თითოეული წევრი თავს პრივილეგირებულად თვლიდა და დერეფანში გონგის პირველი გაჟღერებისთანავე ტოვებდა საქმეს თუ თამაშს და სასადილო ოთახში გარბოდა. წლების განმავლობაში ასე იყო: სუფრის გარშემო სკამების აჩქარებული სიმფონია და თეთრი ხელსახოცების ფრიალი; იდაყვებით მიიკვლევდნენ მაგიდისაკენ გზას და დანა-ჩანგალს ისეთი სიშმაგით დასწვდებოდნენ, თითქოს ეს-ეს არის, საპყრობილიდან გამოსულან, სადაც შიმშილით გატანჯულნი ელოდნენო განაჩენს. ახლა კი ნერვიულად ყაყანებდნენ, უკბილოდ ხუმრობდნენ და დეიდა როუზს ისეთ მზერას ესროდნენ, თითქოს თავის დიდრონ უბეში ყუმბარას მალავდა, უმოწყალო წიკწიკით საბედისწერო წამებს რომ ითვლიდა.

დეიდა როუზი ამასობაში რაღაცნაირი გუმანით მიხვდა, რომ დუმილი ოქროა და მთელი ენერგია თავის თეფშზე სამჯერ გადმოღებულ იმ კერძს მიუძღვნა, რომლის არსისა და წარმოშობის დადგენას ამაოდ ეცადა, ნასადილევს კი თავის ოთახში ავიდა კორსეტის შესასწნელად.

\* \* \*

- ბებო, - ამბობდა კვლავ პირველ სართულზე დაბრუნებული დეიდა როუზი, - რას ჰგავს შენი სამზარეულო! თვითონვე უნდა აღიარო, რომ აქ საშინელი არეულობაა. ბოთლები, ჯამები და ყუთები სულ ერთმანეთზეა დახვავებული, ეტიკეტი თითქმის ყველას მომძვრალი აქვს: როგორდა იგებ, რას იყენებ? თავს დამნაშავედ ვიგრძნობ, თუ ნებას არ დამრთავ, ვიდრე თქვენთან ვსტუმრობ, აქაურობა დაგიწკრიალო. ერთი დამაცადე, მკლავები დავიკაპიწო...

- არ არის საჭირო, დიდი მადლობელი ვარ, - უპასუხა ბებიამ.

დაგლასმა ეს საუბარი ბიბლიოთეკის კედლის მიღმა გაიგონა და გულმა რეჩნი უყო.

- აქ ისეთი ბუდი დგას, როგორც თურქულ აბანოში, - განაგრძობდა დე-  
იდა როუზი, - მოდი, რომელიმე ფანჯარა გავაღოთ და ეს ფარდები გადავ-  
წიოთ. ხომ უნდა ვხედავდეთ, რას ვაკეთებთ!

- კამკაშა სინათლე თვალებს მჭრის, - მშვიდად თქვა ბებომ.

- მე თვითონ დავგვი სამზარეულოს, დავრეცხავ ჭურჭელს და ყველაფერს  
კონტად დავაწყობ. ნუღარ მეკამათები, უნდა დაგეხმარო.

- სჯობს განვიდე და სასტუმრო ოთახში დაჯდე, - არ უთმობდა ბებო.

- დაფიქრდი, ბებო, ეს როგორ დაგეხმარება საჭმლის მომზადებაში?  
მართლაც, არაჩვეულებრივი დიასახლისი ხარ, მაგრამ, თუკი ამ ქაოსში -  
ნამდვილ ქაოსში! - ამდენს ახერხებ, ხომ წარმოგიდგენია, რას მიაღწევ,  
ყველა ნივთი რომ თავ-თავის ადგილას იქნება, იქ, სადაც ადვილად მის-  
წვდები.

- ამაზე არასოდეს მიფიქრია, - თქვა ბებომ.

- მაშ, ახლა იფიქრე. კულინარიის თანამედროვე მეთოდები შენს მომზა-  
დებულ კერძებს, სულ ცოტა, ათი-თხუთმეტი პროცენტით მაინც გააუმჯობე-  
ლებს. შენი მამაკაცები სადილს ისედაც ცხოველებივით შეექცვიან, სადღაც  
ერთ კვირაში კი სიმაძღრისაგან ბუზებივით დაიხოცებიან. ისეთი გემრიელი  
და კონტა სადილები გამოგივა, რომ დანა-ჩანგალს ხელიდან ვეღარ გააგ-  
დებინებ.

- მართლა ასე ფიქრობ? - ბებო უკვე დაინტრიგებული ჩანდა.

- არ დანებდე, ბებო! - მხურვალედ ჩასჩურჩულა დაგლასმა ბიბლიოთე-  
კის კედელს.

მაგრამ მეორე წუთში ძრწოლით გაიგონა, როგორ გვიდნენ და ხეხავდნენ  
სამზარეულოს, სანახევროდ დაცლილ პარკებს ნაგავში ყრიდნენ, ქილებს  
ახალ ეტიკეტებს აკრავდნენ, ჯამებს, ყავადნებსა და ტაფებს კი კარადებში  
აწყობდნენ, წლების განმავლობაში ცარიელი რომ იყო. თვით დანებიც კი,  
მუდამ ვერცხლისფრად მოლივლივე თევზების გროვად რომ ეყარა მაგიდა-  
ზე, ახლა უჯრაში შეენახათ.

ჰაპა ხუთი წუთის განმავლობაში ყურებდაცქვეტილი იდგა დაგლასის  
ზურგს უკან, მერე, ცოტა არ იყოს, უგერგილოდ მოიფხანა ნიკაპი და შენიშნა:

- ისე, კაცმა რომ თქვას, ეს სამზარეულო ადამ და ევას დროიდან არეულ-  
დარეული იყო და ცოტაოდენი მოწესრიგება მართლაც არ აწყენდა. და თუკი  
ის, რასაც დეიდა როუზი ამტკიცებს, მართალი გამოდგა, ბიჭო დაგლას, ხვა-  
ლინდელი სადილი უიშვიათეს განცდას გვპირდება.

- ჰო, - გაიმეორა დაგლასმა, - უიშვიათეს განცდას.

\* \* \*

- ეს რა არის? - იკითხა ბებომ.

დეიდა როუზმა შეფუთული საჩუქარი გაუწოდა, ზურგს უკან რომ მაღავედა.

ბებომ გაშალა და შესძახა:

- რეცეპტების წიგნი! - საჩუქარი მაგიდაზე დააგდო, - ასეთ რამეს არასოდეს ვიყენებ! ერთი მუჭა ეს, ერთი მწიკვი ის, სათითოსოდენა ჭიქით კიდევ რაღაც, - ყველაფერს ისე ვამზადებ...

- საყიდლებზე გაგყვები და საჭირო პროდუქტით მოგამარაგებ, - უდრტივინველი იერით გამოუცხადა დეიდა როუზმა, - ჰო, მართლა, წეღან შენს სათვალეს დავაკვირდი: ნუთუ ამდენი წელი ასეთ მიგრეხილ-მოგრეხილ ბუდეში ჩასმულ, დაბზარულ-დაკბილული შუშებიდან იყურები? მიკვირს, საერთოდ როგორ ახერხებ სიარულს ისე, რომ ფქვილიან კასრში არ ჩავარდე. ახლავე წავიდეთ შენთვის ახალი სათვალის შესარჩევად.

წუთიც და, როუზიც და მის ხელკავში მომწყვდეული გაოგნებული ბებოც ნაშუადღევს მზიან ქუჩაში გავიდნენ.

დაბრუნდნენ ხილ-ბოსტნეულითა და ახალი სათვალით. ბებოს ახალი ვარცხნილობა ჰქონდა, მაგრამ ისე გამოიყურებოდა, თითქოს ქალაქი ჭენებით შემოარბენინესო და როდესაც როუზმა სახლში შემოიყვანა, სული ძლივს მოითქვა.

- ესეც ასე, ბებო. ახლა ყველაფერი თავის ადგილზე გაქვს და არაფრის პოვნა არ გაგიჭირდება... და ახლა კარგადაც ხედავ!

- წამოდი, დაგ, - უთხრა პაპამ ბიჭს, - კვარტალის გარშემო გავისეირნოთ, რომ უფრო მადიანად მივირთვათ. ეს ისტორიული სადამო იქნება. ნაძლევს დავდებ, ცხოვრებაში საუკეთესო ვახშამს მოვესწრებით.

\* \* \*

ვახშმის დროც მოვიდა.

მოღიმარი სახეები ერთბაშად გაქვავდა. დაგლასი სამი წუთის განმავლობაში დეჭავდა ლუკმას. ბოლოს კი, ვითომ პირი გაიწმინდა, თავის ხელსახოცში გადმოაფურთხა. შენიშნა, რომ ტომმა და მამამაც იგივე გააკეთეს. ყველანი ისხდნენ და საჭმელს თეფშებზე ზეღდნენ, სოუსში გზებსა და

ჩუქურთმებს ხატავდნენ, კარტოფილის ნაჭრებისაგან კომპებს აგებდნენ და ხორცის ნაჭრებს ჩუმ-ჩუმად ძაღლს უყრიდნენ.

პაპამ ადრევე მოიბოდიშა, უკვე დავნაყრდიო და სუფრიდან წამოდგა.

ყველა გაფითრებული და მდუმარე იჯდა.

ბებო თავის თეფშზე გადმოდებულ ულუფას ნერვიულად ურევდა ჩან-გლით.

- ხომ მშვენიერი კერძია? - ყველას სათითაოდ ეკითხებოდა დეიდა როუზი, - თანაც, სუფრა დღეს ნახევარი საათით ადრე გავშალეთ!

მაგრამ დანარჩენები იმაზე ფიქრობდნენ, კვირადღეს ორშაბათი რომ მოჰყვებოდა, ორშაბათს - სამშაბათი და ასე წყებად ჩამწკრივდებოდნენ ნაღვლიანი საუზმეები, მდუმარე სადილები და მგლოვიარე ვახშმები. რამდენიმე წუთიც და, სასადილო ოთახი მთლიანად დაიცალა. მდგმურები მეორე სართულზე თავ-თავიანთ ოთახებში შეიყუჟნენ.

თავზარდაცემული ბებო ნელა გაემართა სამზარეულოსკენ.

- ეს უკვე მეტისმეტია! - განაცხადა პაპამ, სახლის ხვეული კიბის ძირში დადგა და მზის სხივებში მოფარფატე მტვრის ნაწილაკებს ახედა, - ყველანი ქვევით ჩამოდით!

ოჯახის წევრები ბუტბუტით ისხდნენ შიგნიდან ჩაკეტილ, დაბინდულ და მყუდრო ბიბლიოთეკაში. პაპამ მდუმარედ ჩამოატარა ქუდი და ბოლოს თქვა, - ესეც ჩვენი ბანკი, - დაგლასს ხელი მძიმედ დაადო მხარზე, - დაგლას, მნიშვნელოვანი მისია უნდა დაგაკისროთ, კარგად მისმინე, - მისი სუნთქვა ბიჭს თბილად, ახლობლურად მოხვდა სახეზე, როდესაც ყურში ჩურჩული გაიგონა.

\* \* \*

მეორე დღეს დაგლასმა დეიდა როუზს ბაღში მიაგნო, ყვავილების ჭრით იყო გართული.

- დეიდა როუზ, - სერიოზულად მიმართა ბიჭმა, - ხომ არ გინდათ, გავისეირნოთ? აი, აქეთ წამოდით და პეპლების ხევს გიჩვენებთ.

ერთად მთელი ქალაქი შემოიარეს. დაგლასი სწრაფად, აღელვებით ლაპარაკობდა, ქალს სახეში არ უყურებდა, მხოლოდ სასამართლოს შენობაზე საათის რეკვას აკვირდებოდა.

როდესაც თელების თბილ ჩრდილში სახლისკენ მოსეირნობდნენ, დეიდა როუზმა უცებ შეჰყვირა და ხელი ყელზე მიიფარა.

პარმადის ბოლო საფეხურზე სათუთად ჩალაგებული მისი ბარგი ეწყო. ერთ-ერთ ჩემოდანზე ზაფხულის ნიაკით კუთხეაფრიალებული რკინიგზის ვარდისფერი ბილეთი იღო.

ოჯახის ათივე წევრი პარმადზე უძრავად იჯდა. პაპამ მატარებლის კონდუქტორივით, ქალაქის მერივით, მეგობარივით საზეიმოდ ჩამოიარა საფეხურები.

- როუზ, - მიმართა ქალს, თან ხელი სერიოზულად ჩამოართვა, - თქვენთვის რაღაც მაქვს სათქმელი.

- რა მოხდა? - შეკრთა დეიდა როუზი.

- დეიდა როუზ, - გაისმა პასუხად, - კარგად ბრძანდებოდეთ.

\* \* \*

ნაშუადღევს ჰაერში მატარებლის შორი ყიჟინა გაისმა. პარმადი დაცარიელდა. დეიდა როუზის ბარგი გაქრა, მისი ოთახიც თავისუფალი იყო. ბიბლიოთეკაში პაპა დიმილით დასწვდა ედგარ ალან პოს ტომეულის უკან გადამალულ წამლის პატარა ბოთლს.

ბებომ, რომელმაც ამჯერად მარტომ მოიარა საყიდლები, შინ დაბრუნებისთანავე იკითხა:

- დეიდა როუზი სადაა?

- სადგურზე დავემშვიდობეთ, - უპასუხა პაპამ, - ყველანი ვტიროდით. ძალიან არ უნდოდა წასვლა, მაგრამ რას იზამ! დიდი მოკითხვა შემოგიტვალა და დაგვიბარა, თორმეტ წელიწადში კიდევ გესტუმრებითო, - პაპამ თავისი ოქროს საათი ამოიღო, - ახლა კი ყველას გთავაზობთ, ბიბლიოთეკაში მოვმყუდროვდეთ და თითო ჭიქა შერი დავლიოთ, ვიდრე ბებო თავის მორიგ გასაოცარ ბანკეტს მოგვიმზადებს.

ბებო სახლის სიღრმეში გაუჩინარდა.

ყველანი - მდგმურები, პაპა, დაგლასი, - ლაპარაკობდნენ და ხალისობდნენ, თან სამზარეულოდან გამოსულ ოღნავ გასაგონ ხმაურს უგდებდნენ ყურს. როგორც კი ბებომ გონგს შემოჰკრა, ყველანი წამოხტნენ და ხელების ქნევით სასადილო ოთახს მიაშურეს.

ყველამ დიდი ლუკმა მოკბიჩა.

ბებო ოჯახის წევრების სახეებს ჩააკვირდა. ისინი მდუმარედ მისჩერებოდნენ თეფშებს, ხელები კალთაში უღონოდ ეყარათ, დაუღეჭავი ლუკმა ყბებს შორის უცივდებოდათ.

- დავკარგე! - თქვა ბებომ, - ჩემი ალღო დავკარგე...

და ატირდა.

სუფრიდან ადგა და ბარბაცით წავიდა თავისი დასუფთავებული, მოწესრიგებული, ეტიკეტებიანი სამზარეულოსაკენ, უსარგებლოდ ქცეული ხელები წინ უსუსურად გაეშვირა.

\* \* \*

ყველანი მშვირები დაწვნენ დასაძინებლად.

დაგლასს ესმოდა, სასამართლოს შენობის საათმა როგორ ჩამორეკა ჯერ თერთმეტის ნახევარი, მერე თერთმეტი, მერე კი შუაღამეც დადგა, ესმოდა თავ-თავიანთ საწოლებში ოჯახის წევრების წრიალი, თითქოს ვეება სახლის მთვარით გადათეთრებულ სახურავქვეშ ზღვის ტალღები მღელვარებდა. იცოდა, არც ერთს რომ არ ეძინა, ყველას მძიმე ფიქრები შემოსწოლოდა. დიდი ხნის შემდეგ საწოლზე წამოჯდა. კედელსა და სარკეს გაუღიმა და თავისი გაბადრული სახე დაინახა, როდესაც კარი გააღო და კიბისკენ ფეხაკრეფით გაემართა. სასტუმრო ოთახში ბნელოდა, იქ სიძველისა და სიმარტოვის სუნი ტრიალებდა. წუთით სუნთქვა შეიკავა.

ხელის ფათურით გაიკვლია გზა სამზარეულოსკენ და კიდეც ერთ წუთს შეიცადა.

შემდეგ კი ამოქმედდა.

სოდა ახალი მბზინავი თუნუქის ყუთიდან ფქვილის ძველ ტომარაში გადმოყარა, სადაც მას ამ სახლში ყოველთვის ინახავდნენ. თეთრი ფქვილი თიხის ძველ ჭურჭელში გადაიტანა. ლითონის ყუთიდან - წარწერით „შაქარი“ - შაქრის ფხვნილი კარადის მომცრო და კარგად ნაცნობ უჯრებში ჩაყარა, რომლებსაც „სანელებელი“, „დანა-ჩანგალი“ და „ბაწარი“ ეწერათ. მიხაკსაც მისი ჩვეული ადგილსამყოფელი მიუჩინა: ხუთი-ექვსი უჯრის ფსკერზე მიმოფანტა. ჯამები, დანა-ჩანგალი და კოვზები ისევ მაგიდებზე დაახვავა.

ბებოს ახალ სათვალეს სასტუმრო ოთახში თაროზე მიაგნო და სარდაფში გადამალა. ძველისძველ ღუმელში შეშა შეაწყო და ცეცხლი მოუკიდა. დამის პირველი საათის მღუმარე ცაში შავი საკვამურიდან ისეთი ღრიალით ავარდა კვამლი, რომ თუკი სახლში ვინმეს ეძინა, უთუოდ გაადვიძებდა. დაგლასმა სახლის კიბეზე ბებოს ჩუსტების შარიშური გაიგონა. ბებო სამზარეულოს კარში გაშემდა და აღორძინებულ ქაოსს თვალების ხამხამით შეჰყურებდა. დაგლასი კარს უკან დამალულიყო.

ზაფხულის ბნელი ღამის ორის ნახევარზე სახლის ფარღალაღა ღერეფ-ნებში საჭმლის ნაირ-ნაირი სურნელი დატრიალდა და კიბეს სათითაოდ ჩამოუყვანენ ბიგულებიანი ქალები და ღამისხალათიანი მამაკაცები, ფეხაკრეფით მიდიოდნენ სამზარეულოს კართან და შიგნით იჭყიტებოდნენ: იქ დავანებულ წყვდიადს კი მხოლოდ ღუმლიდან ამონაფრქვევი წითელი ალები სერავდა. და ამ წყვდიადში, ღამის ორ საათზე, კვლავ სანახევროდ დაბრმავებული ბებო მოჩვენებასავით დაქროდა მოზანზარე და მოჟღარუნე ქვაბებს შორის. მისი თითები უტყუარი გუმანით აგნებდნენ გზას სიბნელეში და მოთუხთუხე ქოთნებისა და მობუყბუყე ქვაბების თავზე სანელებლების კორიანტელს აყენებდნენ; დიდებულ საჭმელს მარჯვედ ურევდა, წურავდა, თქვეფდა, წითელი ათინათებით აალებულ სახეზე კი გრძნეული ღიმილი დასთამაშებდა.

ოჯახის წევრებმა ჩუმად, ძალიან ჩუმად გადააფარეს მაგიდას საუკეთესო სუფრა, მბზინავი ვერცხლის დანა-ჩანგალი გამოიღეს და ელექტრონათურების მაგიერ, ვაითუ, ჯადოქრობა გავფანტოთო, სანთლები დაანთეს.

სტამბაში ღამის სამსახურიდან დაბრუნებულმა პაპამ გაცეცხლით გაიგონა სანთლის შუქით განათებული სასადილო ოთახიდან სამადლობელი ლოცვის სიტყვები.

ახლა საჭმელს ადარ იკითხავთ? ცხარე მწვადები, კერის სოუსი, ერბომოსხმული უტკბესი სალათი, ქარვისფერი თაფლით დაფარული ნამცხვრები; ყველაფერი ისეთი გემრიელი, სასიამოვნო და ისე საოცრად ნოყიერი იყო, რომ სუფრასთან ქორფა სამყურას საძოვარზე მიშვებული ნახირის ნეტარი ზმუილი ისმოდა. ყველამ, როგორც ერთმა, მაღლი შესწირა თავის თავისუფალ, ფარფატა სადამურ სამოსს.

კვირა დილის ოთხის ნახევრისთვის სახლი მირთმეული კერძებისა და დამტკბარი სულების სითბოს აევსო. პაპამ თავისი სკამი მაგიდას მოაცილა და დარბაისლური ჟესტით მიიპყრო ყველას ყურადღება. ბიბლიოთეკიდან შექსპირის ტომი გამოიტანა, სინზე დადო და თავის მეუღლეს მიართვა.

- ბებო, უმორჩილესად გთხოვ მხოლოდ ერთ რამეს: ხვალ ვახშმად ეს დიდებული ფოლიანტი მოგვიშაღე. მე მგონი, ყველა დამეთანხმება, რომ სუფრაზე მიტანის მომენტისათვის ხობხის მკერდივით ნაზი, წვნიანი და კნატუნა იქნება.

ბებომ წიგნი გულში ჩაიკრა და სიხარულისაგან ატირდა.

გათენებამდე სუფრას შემორჩინენ, პატარ-პატარა დესერტებითა და იმ ყვავილის ღვინით ტკბებოდნენ, სახლის წინ ეზოში რომ ხარობდა. როდესაც ჩიტებმა სიცოცხლის პირველი ნიშანწყალი მისცეს და მზემ

ადმოსავლეთი შეავარდისფრა, ყველანი მეორე სართულზე აბობდნენ. დაგლასი სამზარეულოში ღუმლის გაგრილების ხმას უსმენდა. გაიგონა, ბებო როგორ დაწვა.

მეძველმანევ, ფიქრობდა ბიჭი, მისტერ ჯონას, სადაც უნდა იყო ახლა, იცოდე, რომ ვალი გადაგიხადე, მაღლი სხვას გადავეცი, ჰო, ასე მგონია, გადავეცი...

ჩაეძინა და სიზმარი ნახა.

სიზმარში გონგი რეკავდა და ყველანი კისრისტეხითა და ყიჟინით გარბოდნენ საუზმის მისართმევად.

\* \* \*

მერე კი ზაფხული ერთბაშად დამთავრდა.

დაგლასმა ეს ქალაქის ცენტრში სიარულისას აღმოაჩინა. ტომმა უცებ შეიცხადა, მკლავში ხელი ჩაავლო და შემფოთებულმა მაღაზიის ვიტრინაზე მიუთითა. ერთ ადგილას თავზარდაცემულები იდგნენ, რადგან ვიტრინაში სხვა სამყაროდან მოვლენილი ნივთები ეწყო კოხტად, უცოდველად და შემზარავად.

- ფანქრები, დაგ, ათი ათასი ფანქარი!

- ო, არა!

- თხელი და საერთო რვეულები, ბლოკნოტები, საშლელელები, აკვარელეები, სახაზავები, კომპასები, ასი ათასი სასკოლო ნივთი!

- არ შეხედო. იქნებ მხოლოდ მოლანდება იყოს.

- არა, - სასოწარკვეთით ამოიგმინა ტომმა, - სკოლა. სკოლას ვერ ავცდებით! რატომ გამოფენენ ხოლმე ეს მაღაზიები სასკოლო ნივთებს მაშინ, როდესაც ზაფხული ჯერ დამთავრებულიც კი არაა?! ნახევარ არდადეგებს გვიმწარებენ!

შინ დაბრუნებულებს ჰაჰა დამჭნარი და გამეჩხრებული გაზონის შუაგულში დახვდათ, უკანასკნელ თითო-ოროლა ბაბუაწვერას კრეფდა. ერთხანს მის გვერდით მდუმარედ მუშაობდნენ, მერე კი საკუთარი ჩრდილისკენ თავდახრილმა დაგლასმა იკითხა:

- ტომ, თუკი ამ ზაფხულმა ასე ჩაიარა, შენი აზრით, მომდევნო როგორიდა იქნება: უკეთესი თუ უარესი?

- მე რას მეკითხები, - ტომმა ბაბუაწვერას ღეროს სალამურივით ჩაჰბერა, - ეს ქვეყანა მე კი არ შემეძმნია, - წუთით საკუთარ ნათქვამს ჩაუფიქრდა, -



ისე, ზოგჯერ კი მეჩვენება, თითქოს მე შევქმენი, - ბედნიერი სახით გადააფურთხა.

- მოდი, ნაძლევი, - უთხრა დაგლასმა.

- რაზე?

- მომდევნო წელი კიდე უფრო ბევრ რამეს დაიტევს, დღეები უფრო კაშკაშა, ღამეები უფრო გრძელი და ბნელი იქნება, მეტი ხალხი დაიხოცება, მეტი ბავშვი მოევლინება ქვეყანას და მე ამ ყოველივეს შუაგულში ვიქნები.

- შენ და ორი მილიარდი სხვა ადამიანი, არ დაგავიწყდეს.

- გაისად, დღეისსწორს, - ჩურჩულებდა დაგლასი, - თუ არ ვცდები... ნწ... სწორედ რომ მე ვიქნები!

- თუ რამეში დახმარება დაგჭირდეს, დამიძახე, - ჩაურთო ტომმა.

- ათი წლის ძმა რაში უნდა დამეხმაროს?

- ათი წლის ძმა გაისად თერთმეტის იქნება. ყოველ დილით სამყაროს გოლფის ბურთში ჩახვეული რეზინის ბაწარივით გაგიშლი, ყოველ საღამოს კი ისევ შევახვევ. თუ გინდა, ახლავე გიჩვენებ, როგორ.

- გიჟი ხარ.

- ჰო, ყოველთვის გიჟი ვიყავი, - ტომმა თვალი თვალში გაუყარა და ენა გამოუყო, - და ყოველთვის ასეთი ვიქნები.

დაგლასს გაეცინა. ჰაპას სარდაფში ჩაჰყვნენ და, ვიდრე ის ყვავილებს სიცოცხლეს ასალმებდა, მბზინავ მწკრივებად ჩაწყობილზაფხულს - ბაბუაწვერას ღვინის ბოთლებს - ათვალეირებდნენ. პირველიდან ოთხმოდგაათს ზევით დანომრილი კეტჩუპის ბოთლების უმრავლესობა სავსე იყო და სარდაფის ბინდში ელვარებდა: ზაფხულის თითო დღისთვის - თითო.

- ბიჭო, - ჩაილაპარაკა ტომმა, - რა პრაქტიკული საშუალებაა ივნისის, ივლისისა და აგვისტოს შესანახად.

ჰაპამ ახედა, დაფიქრდა და გაეღიმა.

- სხვენში უსარგებლო ნივთების ატანას ნამდვილად სჯობს. ასე შეგიძლია ზამთარში დროდადრო ორი-სამი წუთით განიცადო განვლილი ზაფხული, ხოლო როდესაც ყველა ბოთლი დაცარიელდება, ზაფხულიც უკვალოდ გაქრება და ადარც სინანულის შეგრძნება, ადარც სენტიმენტალური ხარახურა, შემდგომი ორმოცი წლის განმავლობაში ფეხქვეშ რომ გედება. ბაბუაწვერას ღვინო სუფთად, უნაშთოდ, უკვამლოდ წვავს წარსულის განცდებს.

ბიჭებმა ბოთლების რიგს ხელი გააყოლეს.

- აი, ზაფხულის პირველი დღე.

- აი, ტენისის ახალი ფეხსაცმელი.

- ჰო! აი, მწვანე მანქანა!  
 - ბიზონების დაყენებული მტვერი და ჩინ ლინ-სუ!  
 - კუდიანი ტარო! მარტოხელა მკვლელი!  
 - სინამდვილეში არაფერი დამთავრებულა, - თქვა ტომმა, - და არც ოდეს-მე დამთავრდება. ის, რაც მოხდა, ყოველთვის მემახსოვრება.

- ყველაფერი მანამდე დამთავრდა, ვიდრე დაიწყებოდა, - შენიშნა ჰაჰამ, რომელიც ღვინის პრესის სახელურს ატრიალებდა, - ახალი არაფერი მახსენდება, გარდა იმ რაღაც ახალი ჯიშის ბალახისა, რომელსაც მოჭრა არ სჭირდება.

- შენ, ალბათ, ხუმრობ!

- არა, დაგ, არა, ტომ, წლები რომ მოგემატებათ, თქვენც იგრძნობთ, რომ დღეები რატაცნაირად იბინდება და ერთიმეორეში ირევა... ერთ დღეს მეორისგან ძნელადღა გაარჩევთ...

- კი მაგრამ, - გაოცდა ტომი, - ამ ორშაბათს ელექტრიკ-პარკში გორგოლაჭებით დავსრიალებდი, სამშაბათს შოკოლადის ტორტი ვჭამე, ოთხშაბათს ნაკადულში ჩავვარდი, ხუთშაბათს ვაზის ტოტზე ვქანაობდი და ძირს ჩამოვვარდი - მოკლედ, ეს კვირა მოვლენებით იყო სავსე! დღევანდელ დღეს კი იმით დავიმახსოვრებ, რომ ფოთლებმა გაწითლება და გაყვითლება დაიწყეს. ცოტაც და, მთელი ბილიკი ფოთლებით დაიფარება, მათ გროვამი ვინტუნავებ და კოცონს დავანთებთ. დღევანდელ დღეს რა დამავიწყებს! ვიცი, ყოველთვის მემახსოვრება!

ჰაჰამ სარდაფის ფანჯარაში გვიანი ზაფხულის ხეებს გახედა, მათ ტოტებს აგრილებული ნიავი არხევდა.

- ჰო, გეხსომება, ტომ, - წარმოთქვა მშვიდად, - როგორ არ გეხსომება.

ბაბუაწვერას ღვინის ლბილი ციაგი მიატოვეს და კიბეს აუყვნენ ზაფხულის უკანასკნელი რიტუალების შესასრულებლად, რადგან იცოდნენ, ბოლო დღე და ბოლო დამე რომ ახლოვდებოდა. მოსაღამოვდა და ახლად მიხვდნენ, რომ უკვე ორი-სამი საღამო იყო, რაც პარმალები უფრო ადრე ცარიელდებოდა. ჰაერს სხვაგვარი, უფრო მშრალი სურნელი დაჰკრავდა და ბებოც ცივი ჩაის მაგიერ ცხელ ყავაზე ალაპარაკდა; სახლის ფრონტონის ფარფატა თეთრფარდიან ფანჯრებს უკვე კეტავდნენ; ცივად მოხარშულმა ხორცმა კვლავაც ცხელ მწვადებს დაუთმო ადგილი. კოდოები ტოვებდნენ პარმალებს და, რაკიდა მტრები უკან იხევდნენ, დროის ბრძოლაში გამარჯვებულ ადამიანებსაც ბრძოლის ველის მიტოვების გარდა, სხვა აღარაფერი რჩებოდათ.

ტომი, დაგლასი და პაპა კვლავაც ისევე იდგნენ პარმალზე, როგორც სამი თვის წინ, თუ სამი უგრძესი საუკუნის წინ, მონანავე ტალღებზე მთვლემარე ხომალდით ჟრიალა პარმალზე, და კვლავაც ჰაერს ყნოსავდნენ. ბიჭები ძვლებში ცარცისა და აბანოზის მატებას შეიგრძნობდნენ, არადა, გაზაფხულზე ძვლებში სულ პიტნის ყლორტები და დრეკადი ძირტები უმოდრავებდათ. მაგრამ აგრილება პირველად პაპას ბებერ ჩონჩხს დასწვდა და უხეში ხელით მის გაყვითლებულ კლავიშებზე დაიწყო დაკვრა.

პაპა კომპასის ისარივით ჩრდილოეთისაკენ შეტრიალდა და ჩაილაპარაკა:

- მგონი, წელს აქ დასაჯდომად უკვე აღარ გამოვალთ.

სამივემ პარმალის ჭერის რგოლებიდან ჟღარუნით ჩამოხსნა ჯაჭვები და მოდუნებული საქანელა ხმელი ფოთლების პირველი გუნდების თანხლებით დამკრძალავ პროცესიასავით ნელა წაასვენეს გარაჟისაკენ. გაიგონეს, ბებო ბიბლიოთეკაში ბუხარს როგორ ანთებდა. უცარმა ქარმა ფანჯრის მინები შეაზანზარა.

დაგლასი წელს უკანასკნელად ატარებდა დამეს ბებოსა და პაპას სახლის მაღალ მანსარდაში. ძილის წინ თავის ბლოკნოტში ჩაწერა:

„ყველაფერი უკუდმა დატრიალდა. როგორც კინოში, როდესაც ადამიანები წყლიდან სახტუნაო კომპურაზე ხტებიან. სექტემბერი მოდის და ზაფხულის დასაწყისში გაღებული ფანჯრების დაკეტვა გიწევს, ბოტასებს იხდი და ივნისში გადაყრილ ტყავის მძიმე ფენსაცმელს იცვამ. ადამიანები სახლებში ისევე ბრუნდებიან, როგორც საათიდან გამომხტარი გუგული ბრუნდება შიგნით. სულ რაღაც წუთის წინ პარმადები ყაყანითა და ხალისით იყო სასუსე, მეორე წუთში კი კარებს აჯახუნებენ, ლაპარაკი წყდება და მხოლოდ ფოთლები ცვივიან ძირს გიჟებივით“.

ფანჯარაში გადახედა მიდამოს, სადაც კალიებს ლედვის ჩირივით დაეფარათ ნაკადულების გადამხმარი კალაპოტები, ცას, სადაც სულ მალე ბატასინის კვილოზე ფრინველთა გუნდები სამხრეთისაკენ გადაიჭიმებოდნენ, სადაც ფოლადისებრი ღრუბლების ფონზე ხეები მაღალი კოცონის ფერებით ააღდებოდნენ. შორს, მინდვრებში, დაგლასმა დღეს პირველად შეიგრძნო მწიფე გოგრების სურნელი, რომლებსაც დანა, სამკუთხედად ამოჭრილი თვალი და გულში ჩადგმული მწველი სანთელი ელოდათ. ქალაქის თავზე აქა-იქ საკვამურებიდან ამოსული კვამლის პირველი ლენტები აფრიალდა. რკინის შორი ყრო ჟღარუნის სარდაფებში ქვანახშირის შავი მკვრივი მდინარეების ჩამვებას იუწყებოდა, მიწისქვეშა სიბნელეში სამარის ბორცვებად რომ დახვავდებოდა.

მაგრამ უკვე გვიანი იყო და თანდათან სულ უფრო გვიანდებოდა. ქალაქის თავზე აღმართულ მაღალ კოშკში დაგლასმა ხელი მაღლა ასწია.

- ყველამ ტანზე გაიხადოს!

თქვა და შეიცადა. ცივი ქარი ფანჯრის მინას ეხლებოდა.

- ახლა კბილები გამოიხეხეთ.

კვლავ შეიცადა.

- ახლა კი, - გასცა საბოლოო ბრძანება, - სინათლეები ჩააქრეთ!

თვალეები დაახამხამა. ძილმორეულმა ქალაქმაც დაახამხამა სინათლეები ჯერ ერთგან, მერე სხვაგანაც, სასამართლოს შენობაზე კი საათმა ათი, თერთმეტი და, საბოლოოდ, შუადამის თორმეტი საათი ჩამორეკა.

- უკანასკნელი სინათლეები... აქ... და აქაც...

ბიჭი თავის საწოლში იწვა, მის გარშემო ქალაქს ეძინა, ხევი სიბნელეს მოეცვა, ტბა მშვიდად იტალღებოდა ნაპირის გასწვრივ და ყველას, მისი ოჯახის წევრებს თუ მეგობრებს, მშვიდი ძილით ეძინათ ამა თუ იმ ქუჩაზე, ამა თუ იმ სახლში, ან ქალაქგარეთ სასაფლაოზე.

დაგლასმა თვალეები დახუჭა.

ივნისის რიჟრაჟები, ივლისის შუადღეები, აგვისტოს საღამოები - ყველაფერი დასრულდა და მხოლოდ ამ ყოველივეს განცდა შერჩა გულს და გონებას. გრძელი შემოდგომა, თეთრი ზამთარი და გრილი, მწვანე გაზაფხული გასული ზაფხულის შეჯამებასა და შეფასებას დაეთმობა. თუკი რამე დაავიწყდება, სარდაფში ბაბუაწვერას ღვინოა და თითოეული დღე დიდი მრგვალი ციფრებითაა დანომრილი. დაგლასი ხშირად ჩავა სარდაფში, მზეს მანამ შეხედავს, ვიდრე თვალეები არ აეწვება, შემდეგ დახუჭავს თვალეებს და თბილ ქუთუთოებზე დარჩენილ მოციმციმე დამწვრობებსა და იარებს დაითვლის. ყველა ნაპერწკალსა და ანარეკლს თავ-თავიანთ ადგილს მიუჩენს, ვიდრე სურათი თვალწინ ცხადად არ წარმოუდგება.

ამ ფიქრში ჩაეძინა.

და 1928 წლის ზაფხულიც ძილში გასრულდა.